

Жеймс Херли Чейз

ДАНФИЛДАМА  
ХОВЛИДАГИ  
ЎЛИМ

ДЕТЕКТИВ-САРГУЗАШТИШҚИБОЗЛАРИ УЧУН

N.	2020/127		
32808	H66		
2	H66		
Человек, Михаил			
Хирург: Канзунда			
одежда	хотел	горел	
игрушки	T.	3142	

2020/127-H66

*Жеймс Херли Чейз*

# ДАНФИЛЛАМА ХОВЛИДАГИ ЎЛИМ



*Детектив роман*



«YANGI KITOB»  
TOSHKENT  
2020



УЎК: 821.111-312.4

КБК: 84(4Ббр)

Ч 34

Ч 34

**Чейз, Жеймс Хедли.**

Данғиллама ҳовлидаги ўлим [Матн]: детектив роман / Жеймс Хедли Чейз. – Тошкент: Yangi kitob, 2020. – 304 б.

ISBN 978-9943-6327-4-5

УЎК: 821.111-312.4

КБК: 84(4Ббр)


*Сирли қотиллик, бир-бирдан тушуниксиз гувоҳликлар, ноҳақ айбловлар ва туҳмат адолатсизликка олиб келади. Ҳаммаси оддий муштлашувдан бошланган эди, бу машина катта изқуварликка сабаб бўлади. Издиҳомга аёлларнинг аралашуви воқеаларни янада чигаллаштириб юборади. Шов-шувли жиноят омма эътиборини тартади. Уни очиш учун каттагина пул тикилади. Бироқ жиноятчиларни топши осон эмас. Бу ишни фақат биргина одам уддалаши мумкин...*

*Ўтқир сюжетларга бой ушбу китоб детектив ишқибозларига манзур бўлади, деган умиддамиз.*

**Фатҳулла Намозов**  
таржимаси

ISBN 978-9943-6327-4-5

© Жеймс Хедли Чейз  
«Данғиллама ҳовлидаги ўлим».  
© «Yangi kitob», 2020.



32808  
291

## БИРИНЧИ БЎЛИМ

### 1

Июль ойининг иссиқ кунларидан бири эди. Мен кабинетимда ўтирар эканман, ёруғ кунлар бу оламга ўзим билан бирга кириб келади, деб умид қилардим. Эшиқдан чиройли қора сочли бошини суққан Паула ширин хаёлларимни тўзғитиб юборди.

– Сиз Уингров иши билан шуғулланишингиз керак, – деди у.

Шундай дақиқалар бўладики, мана шу «Универсал хизматлар бюроси»ни очиш фикри калламга келгани учун пушаймонлар еб қоламан. Гап ишнинг қийинлигида эмас (биз озми-кўпми эплайпмиз), идорамиз даромади етарли даражада. Ғоянинг ўзи ҳам ажойиб, бошқа бировга бериб кўринг-чи! Аммо Уингровникига ўхшаган ишга дуч келганимда, бўйнимга шундай сиртмоқни илишдан олдин ўзимни психиатрга текширтириб кўрганим яхши эмасмиди, деб сўрай бошлайман.

Бу Уингров дегани бизга бир ишни ҳавола қилдики, агар мен билан маслаҳатлашганларида борми, ундан юз одим нарига қочган бўлардим. Аммо Уингров бизнинг идорага суқилиб кириб келганида (беш юз долларлик закат пули билан), бошим ичкиликдан қақшаб оғриганича, тўшакда ялпайиб ётганман. Паула пулни олиб, квитанцияни унга тутқазган.

Мартин Уингров Орхид-ситидаги энг обрўли инсонлардан ҳисобланади. У мени бир йигит билан қочиб кетган қизини уйига қайтариб олиб келишга

кўндирди. Аммо қизга нимани тавсия қилишим мумкин? Отаси қартайган, семиз ва жирканч одам бўлиб, Фельман-стритда томи осмонга бўй чўзган ғоят ҳашаматли кошонада Ральф Баннистрнинг рақс залидаги раққоса, баланд бўйли, сариқ сочли сурбет аёл билан яшайди. Уларнинг биргаликдаги турмуш тарзидан ҳатто горилла ҳам даҳшатга тушган бўларди. Оила бошлиғи ўта золим, ўзига бино қўйган ва очкўз муттаҳам. Хотини қочиб кетган. Қочганда ҳам эрининг ҳайдовчиси, ўзидан икки баравар кичик, пулга ўлгудай ўч, курумсоқ йигит билан қочиб кетган. Ўғли эса гиёҳвандликдан азият чекади, хусусий клиникада даволанмоқда. Бир сўз билан айтганда, қизни уйга қайтариш учун оилавий вазият унчалик яхши эмас. Бунинг устига мен уни кўрмаганман. Фаҳмимча, бу олмача ўз олма дарахтидан узоққа тушмаган. Агар ростдан ҳам шундай бўлса, менинг ишим анча енгил кечарди, албатта.

Пауладан олган маълумотимга кўра, қиз Жеф Баррет деган ўтакетган ярамас, ахлоқий ва маънавий жиҳатдан бузилиб кетган йигит билан яшар экан.

Менинг тўла-тўқис эркин ҳаракат қилишим учун имкониятлар бор. Қиз вояга етмаган, шундай экан, Уингров уни уйга куч ишлатиб бўлса-да, қайтариш учун тўла ҳуқуққа эга. Аммо Баррет уни осонгина қўйиб юборармиди? Қизнинг ўзи ҳам ўлгудай қаршилик кўрсатса керак. Ҳар жиҳатдан қараганда, бу иш бирмунча нохуш. У билан полиция ҳам шуғулланиши мумкин, аммо Уингров шов-шув бўлиб кетишидан қўрқарди. Агар қизини полиция қайтаргудай бўлса, бу воқеа газеталар орқали ёйилиб кетишини яхши англаб эди. Шунинг учун қўлига ўта ифлос иш тушганида ўзига қадар кўпгина одамлар қандай йўл тутган бў-

лишса, уларнинг йўриғидан борди: уни менинг зим-мамга юклади.

Кейинги уч кунда ишим шунчалик кўпайиб кетган эдики, Паула Уингровнинг илтимосини унутган бўлса керак, деган умидда эдим. Бироқ мен котибамни яхши билмас эканман.

– Нима? – дедим бир кўзимни очиб ва Паулага таънали қараб.

– Уингров ишини айтяпман, – деди у хонага кирар экан, такрорлаб.

Мен ўрнимдан турдим.

– Бу иш билан шуғулланишни истамайман, деб неча марта айтишим керак? Пулини қайтариб беринг ва менинг ҳаддан зиёд банд эканлигимни маълум қилинг.

– Сиз беш юз доллардан воз кечмоқчимисиз? Буни қаранг-а!

– Мен бу иш билан шуғулланишни истамайман.

– Нега, шунчалик ёмон ишми? – деб сўради Паула тоқат билан. – Бу иш бир соат вақтни олади, холос. Ахир шундай осонгина иш билан шуғулланмаслик тақдирни алдаш билан баробар-ку!

– Агар тақдир шунчалик тантиқ бўлса, унга тупуриш керак. Қисқаси, мени тинч қўйинг. Уингров билан боғланинг-у, биз жуда банд эканлигимиз, бу иш билан шуғулланишга мутлақо вақтимиз йўқлигини айтинг.

– Баъзида бизнинг умуман нима билан машғул эканлигимизни билгим келади, – деди Паула киноя аралаш. – Умид қиламанки, сиз ой охирида ҳисоб-китоб бўйича пул тўлашингиз кераклигини унутмаганиз. Бундан ташқари ўзингиз оёқ тираб олдирган ёзув столининг ҳақини тўламаганимиз ҳам эсингиздадир?

Агар Паулани тўхтатиб қолмасам, шу маромда кеч-гача вайсайверишини яхши биламан.

– Хўп, майли, Керманни юборинг. У ҳам баъзида турли-туман ишларда ўзини синаб кўрсин. Нима учун ҳамма ифлос ишлар фақат менга қолар экан? Сиз менинг бу муассасага бошлиқ эканлигимни, менга бундай мурожаат қилиш ножоизлигини эсингиздан чиқардингизми? Бу ишни Керманга топширинг.

– У Риттер хонимга машина ҳайдашни ўргатяпти.

– Янами? У фақат ҳайдашни ўргатиш билан машгул, денг? Наҳотки, икки ой бадалига ҳар куни олти соатдан шуғулланса-ю, ҳеч нимани ўргата олмаса! Бундай тўнка одамлар кам учрайди.

– Риттер Керманга қойил қолган, – деди Паула кулгисини зўрға яшириб, – аслида бу ҳам дидга боғлиқ, шекилли. Аммо у менга тан олиб айтдики, Керман билан машинада ёнма-ён ўтириш шунчалик маъқул тушганки, ҳар қандай аёл буни ҳаётида бир марта бошидан кечириши мумкин экан. Бу гапи билан нимани назарда тутганини билмайман, албатта. Риттер хоним жаҳлдор эмас, аммо жазаваси тутиб туради. Дарвоқе, бунинг нима фарқи бор? У яхшигина ҳақ тўлайди.

– Сизнинг эс-ҳушингиз фақат пул! Демак, Керман яхши, Риттер эса жазаваси тутиб қолгани учун бу ноҳуш иш билан мен шуғулланишим керак, шундайми?

– Сиз истаган пайтда яна битта ёрдамчи олишингиз мумкин, – деб луқма ташлади Паула.

– Ундай бўлса, бизнинг пулимизни ким сарфлар экан? Майли, мен шуғулланаман. Аммо эсингизда бўлсин: Керман эртанинг ўзидаёқ ўзининг иши билан шуғуллансин, Риттер хонимга мен ўргатаман. Агар унга Керман топилма бўлса, мен уни ёқимли равишда ҳайратга соламан.



– Манзили: Жефферсон-авеню, 247... – деб гап бошлади яна Паула.

– Биламан! Такрорламасангиз ҳам бўлади. Мен ўлиб қолгудай бўлсам, жасадимни ёриб кўрсангиз, ана шу манзил жигаримни заҳарлаганини билиб оласиз. Кейинги беш кундан буён фақат шуни эшитяпман.

Мен шляпамни олдим-у, эшикка томон равона бўлдим.

## 2

Жефферсон-авенюдаги 247-уй кўчанинг охирида жойлашган бўлиб, тураржой биноси экан. У катта кўкимтир тусли тўртбурчак шаклдаги яшил деразали ва оғир, хунукдан-хунук колоннали пешайвонли бинодан иборат эди.

Уй вестибюлида зулмат ва сокинлик ҳукмронлик қиларди. Бу ерда ярим кечада қайтадиган ароқхўрларни кўрқитиши мумкин бўлган, кўзга яққол ташланувчи бўёқларда бўялган деворий ёзувлар ва ҳайкаллар кўринмасди. Йўлакдаги резина бўйра устига ёзилган юмшоқ гиламчалар туфайли лифт томон ташлаган қадамларим товуши эшитилмади.

Мис бочкалар билан ўралган тропик пальмалар яшил майсаларга бурканган томонда эса телефон коммутаторининг кичкина идораси кўзга ташланарди. Ёзув столи ортида кўкрагида микрофонли қулоқчин тутган қиз газета ўқиб ўтирарди. Ҳаммаси жонига теккани учунми ёки кирганимни эшитмай қолгани боисми, у менга мутлақо эътибор бермади. Ваҳоланки, мазкур ҳолат бу тахлит уйлар учун одатий ҳол эмас. Қоидага мувофиқ, сизни лифтга киритишдан олдин

кимнинг хузурига келган бўлсангиз, ўшанга қўнғироқ қилишар, таклиф этилган меҳмон эканингизга изох бериб ўтиришмасди.

Шунга қарамасдан, мен сездирмай лифт эшигигача борганимда, устун ортидан эски костюм кийган, бош кийимини кўзининг устига бостирган бир киши оғир қадамлар босиб, мен томонга одимлади.

– Иш билан келдингизми ёки бирор кишини майна қилмоқчимисиз? – деб бўқирди у.

Унинг юзи юмалоқ, ёқимсиз бўлиб, майда томир-чалар билан тўлиб-тошган, чуқур ботган кўзлари совуқ боқарди. Юпқа мўйлови хунук оғзини беркитиб турибди. Умуман олганда, у қандай бўлса, айнан шунга мос: пенсиягача қанчадан-қанча чақирилмаган шахсларни дўппослаб урган полициячининг нақ ўзи.

– Меҳмон бўлиб келдим, – дедим ва дўстона кулим-сираб қарадим, аммо ширин муомалам унга заррача ҳам таъсир қилмади.

– Бизда барча меҳмонлар журналга қайд этилади. Сиз кимникига келдингиз?

У Орхид-ситидаги ҳар қандай полициячидан қолишмай қатъият билан савол берар, аммо саволлари оғир, вазмин, сира ҳовлиқмасдан бериладиган жиддий тарзда эди.

Мен ташрифимдан Баррет олдиндан хабардор бўлишини истамас эдим. Шусиз ҳам иш пачава, унинг эртароқ эҳтиёт чораларини кўриб қўйишининг нима кераги бор?

Ҳамёнимдан беш долларлик қоғоз чиқариб, побонга кўрсатдим. Мушти йўғон бақалоқнинг кўзлари пулга ҳарислик билан тикилди, мўйлови тагидан поймабзал тилига ўхшаш тили оғзининг у бурчагидан бу бурчагига қараб ҳаракатга келди. Мен пулни узатдим.

Никотин дудидан сарғайиб кетган тўмтоқ бармоқлар ўша заҳоти пулни муштига қисиб олди. Йиллар давомида ишланган шартли рефлекс эди бу.

– Шунчаки калака қилмоқчи эдим, – дедим мен.

– Узоқ ўтириб қолманг, – вайсади посбон, – бу билан мени сотиб олдим, деб ўйламанг, тагин. Шунчаки... сизни пайқамай қолдим.

Мушти йўғон колонна орқасига қараб одимлади, сўнг тўхтади-да, газета ўқишдан чалғиб, кулимсираганча уни кузатиб турган қизчага дарғазаб нигоҳ ташлади. Лифт эшиги очилгунча, мен бақалоқнинг қиз олдига борганини кўришга улгурдим. Шубҳасиз, у ундирилган фойдани баҳам кўрмоқчи бўлди, шекилли.

Тўртинчи қаватга кўтарилиб, узун йўлак бўйлаб юрдим ва эшиклардаги пешлавҳалардан 4В15 уй рақамини қидира бошладим. Маълум бўлишича, Баррет ним қоронғи бурчакдаги хонада турар экан. Уй эшигидан радионинг баланд овози таралар, қўнғироқ тугмачасини босиш учун қўлимни кўтарганимда, у ердан синган шиша товуши баралла эшитилди.

Бош бармоғим билан қўнғироқ тугмачасини босдим ва кута бошладим. Эшик тирқишидан менга жазнинг ўйноқи оҳанглари етиб келса-да, ҳеч ким жавоб бермади. Мен яна куч билан тугмачани босдим. Шунда қўнғироқ кларнет ноталарини босиб кетганини эшитдим. Радионинг овози ўчди, эшик шахд билан очилди.

Қаршимда қизил қўйлак кийган, новча, сарғиш сочли йигит кулимсираб турарди. Унинг узунчоқ оппоқ юзини чиройли санаш мумкин эди. Юқори лабининг устини қора мўйлов безаб турибди, қаҳрабо – сариқ тусдаги кўз қорачиқлари иккита ўн центлик тангага ўхшаш катта-катта.

– Салом, – деди у паст ва чўзиқ товушда. – Қўнғироқ чалган сизмидингиз?

– Агар мен бўлмасам, демак, арвоҳ чалибди-да, – дедим уни диққат билан кузатар эканман. Кўзларидаги ифодага қараб, йигитнинг карахт қилар даражада марихуана чекканини билиш мумкин. Шу боис қулоқни динг қилиб, ҳушёр туриш керак.

– Шунақа денг, мен ҳам ҳазилни яхши кўраман, – деди йигитча юмшоққина қилиб. Унинг қўли бирдан юқори кўтарилди. Орқасига яшириб турган шиша синиғи ҳавони кесиб, мен томон учди. Ўзимни четга олишга улгурдим. Йигит нишонга теккиза олмади, аммо бошлаган хатти-ҳаракати олдинга ташланишга ундади. Шу тариқа у ўнг муштим учун яхшигина нишон бўлди ва мен тумшуғига зарб билан туширдим.

Йигит пол устига ағдарилиб тушди ва мен ичкарига кириб олдим.

Ичкилик ва дорининг аччиқ ҳиди димоғимга урилди. Бундай қўланса ис Барретга ўхшаган одам эгаллаган кулбадан анқиши турган гап. Камин атрофи синган шиша идишларга тўлиб кетган. Металлдан ясалган мебелнинг оёғи осмондан бўлиб тўнтарилиб ётар, гўё хонада портнинг иккита бақувват юк ташувчиси муштлашганга ўхшар эди. Улкан ялтироқ темир стол ёнбоши билан ойнаси синган дераза ёнида ётарди.

Агар оғир қўлланса ҳид ва ағдарилган мебелни ҳисобга олмаса, битта хона деярли бўм-бўш. Мен индамай қонга бўялган қизил гилам устидан юриб, ярим очик эшикдан ётоқхонага мўралаб қарадим. У ерда чироқ ёниб турар, дераза пардалари туширилган эди.

Каравотда оқ-малла сочли қиз ётарди. Бўйнида фил суягидан ясалган мунчоқ, чап оёғининг тўпиғида ингичка тилла занжир. Қиз ёш ва етарли даражада

семиз бўлиб, ифлос, ғижимланиб кетган чойшаблар устида ётгани учун кўриниши мутлақо ёқимсиз эди. Шишган лаблари уни кимдир яқиндагина дўппослаганидан далолат берарди. Елкалари ва бўйнида кўкарган, тилинган бир неча жойлар бор.

Биз индамай бир-биримизга қараб қолдик. У мени кўриб хайратга тушмади, ҳатто қимирлаб ҳам қўймади. Юзида маъносиз, эринчоқ бир табассум пайдо бўлди. Одатда бундай табассумни гиёҳвандлар айрим пайтлардагина ўзларидаги хайрихоҳликни намоён этиш мақсадида истар-истамас юзага чиқарадилар, аммо ана шу салгина бўлса-да ҳаракат ҳам улар учун анча қийинчилик туғдиради.

Мен қизнинг бирорта ақлли таклифни эшитадиган ҳолатда эмаслигини кўрдим. Энди уни бу ерда қолдириш керакми ёки уйга олиб кетган маъқулми – ана шуни ҳал этишим шарт.

Гарчи Уингров унинг отаси бўлса-да, бирорта одобли бойскаут<sup>1</sup> ўзининг байроғи сопига сиғинадиган анжомни илиб қўйишга қарор қилувчи наслдан эдики, уни гашиш билан булғашни истамасди. Мен қизни олиб кетишга қарор қилдим.

– Салом, Уингрова хоним! Уйга, отангизнинг ҳузурига қайтиб борсак, нима дейсиз?

Қиз ҳеч нима демади. Очiq қизил лабларида ўша эринчоқ кулги ўйнарди. Умуман, у менинг сўзларимни эшитдими, йўқми, бўлиб ўтган воқеаларни ангадими, шубҳаланиб қолдим.

Қизга қўл тегизишни ўйласам, юрагим орқага тортиб кетади, аммо унинг бу хонадан ўзини эплаб чи-

<sup>1</sup> XX аср бошларида Англияда, сўнгра бошқа давлатларда тузилган ғарбий-сиёсий тавсифдаги болалар ташкилоти аъзоси.

қиб кета олмаслиги очик-ойдин кўриниб турибди. Кўлимда кўтариб чиқишимга тўғри келади. Агар мушти йўғон уни кўтариб вестибюлдан олиб ўтаётганимни кўрса, нима деркан?

Дераза тагида иккинчи каравот турарди. Мен ундан тўшамани сидириб олдим, қизни ўрадим.

– Юра оласизми? – деб сўрадим қиздан. – Агар юра олмасангиз, кўтариб оламан.

У менга ҳамон маъносиз бақрайиб ётар, миқ этмас, энди юзидан табассум ўчган эди. Ўзини бир жойда тутиб туриши учун анчагина куч сарфлашига тўғри келди.

Мен қизнинг устига энгашиб, қўлимни елкаси ва тиззаси остидан ўтказиб, тўшакдан кўтара бошладим. Шу лаҳзада қиз бирдан хушёр тортди-ю, менинг бўйнимдан ушлаб, ўзини каравотга отди. Мувозанатимни йўқотиб, мен ҳам каравот устига ағанаб тушдим. У мени қўл-оёқлари билан чирмаб олди, шунинг учун қимирлай олмай қолдим.

Қизнинг жонини оғритишни истамасдим, аммо у анчагина кучли чиқди. Кутулиб чиқишим учун бирор нарсага таянай десам, ҳеч вақо йўқ. Биз полга ағанаб тушдик. У бир неча бор мени калласи билан урди, бурнимни жароҳатламоқчи бўлди.

Биз мебель ағдарилгунча олишувни давом эттирдик. Юзимга икки зарба еганимда ғазабим қайнаб кетди. Унга шундай мушт туширдимки, энтикиб қолди. Оғзини каппа-каппа очиб, зўрға нафас олганича мени қўйиб юборди. Мен оёққа турдим. Кўйлагимнинг ёқаси қаергадир ғойиб бўлган, пиджагимнинг ўнг томондаги қайтарма ёқаси йиртилган, юзимдаги тирналган жойлардан қон оқарди.

Аммо қанча қаҳр-ғазаб ва ёвузлик қолган экан қизда! У оғзидан кўпик оққанча полда ўрмалар, нафас

олмоқчи бўлар, мени қайтадан ушлаб олишга интиларди. Айни шу пайтда хонага бирдан Баррет кириб келди. У қандайдир хунук тиржайганча, юзи бужмайиб, мен томонга аста-секин ва эҳтиёткорлик билан яқинлаша бошлади. Ўнг қўлида узун ўткир пичоқ, афтидан, уни ошхонадан олган.

Муз тиқиб қўйилгандай кўзлар, қотиб қолган табассум, ўткир пичоқ – буларнинг барчасини кўриб, баданимдан совуқ тер чиқиб кетди.

– Баррет, ҳозирок пичоқни ташла! – деб қичқирдим мен ва бирор қурол топиш илинжида орқага тисарилдим.

У худди ойпараст каби оҳиста яқинлашишда давом этди. Мени бурчакка қувиб кирмагунча Барретни тезлик билан тўхтатишнинг иложини топишим керак. Мен тезгина энгашиб, каравот устидаги ёстиқни чангаллаб юлиб олдим-у, рақибимга қараб отдим. У зарбадан гандираклаб кетди. Мен эса сакраб бориб, Баррет менга ташлангунича, стулни бошим узра кўтардим. Стул билан Барретни туширганимда, у бирдан стулнинг оёғига ёпишди. Бу ҳаракатдан иккимиз ҳам сал бўлмаса йиқилиб тушаёздик. Тезлик билан ўзимни ўнглаб олдим ва йигитнинг бошига уриш учун стулга тармашдим. Аммо кутилмаганда қиз ортимдан сакради-ю, бўйнимга ёпишиб, томоғимдан бўға бошлади.

Мен хириллаб қолдим, гандираклаб қизни деворга томон итариб юбордим. Шунда Баррет қўлидаги пичоқ билан менга ташланди. Ялтироқ тиғни кўриб, ўзимни четга олдим-у, бор овозда қичқириб юбордим.

Уингровнинг қизи билан биргаликда пол устига ағдарилиб тушдик. Менга ёпишиб олган қиз бўйним-

ни шунчалик қаттиқ қисдики, қон бошимга бамисоли болғадек тепди. Баррет устимга энгашиган пайтда мен эндигина бўйнимни қизнинг қўлидан холос этишга муваффақ бўлган эдим. Миямдан яшин тезлигида, ҳаммаси тамом, деган фикр чакнаб ўтди. Мен қаҳр-газабга тўлиб, худди қутурган мисоли йигитни тепиб юбормоқчи бўлдим, аммо нишонга теккиза олмадим ва пўлат тиг тўғридан-тўғри қорнимга тўғирланаётганига кўзим тушди. Шиддат билан ўзимни бир четга олмоқчи бўлдим, аммо улгурмадим: қиз мени ортимдан маҳкам тутиб турарди. На бурила оламан, на қўлимни бўшатишга қодирман.

Бирдан хонада оёқ товуши эшитилди ва Баррет эшикка қайрилиб қаради. Пичоқ шу ондаёқ визиллаб учиб, бир дюйм нарига бориб тушди. Қандайдир чорпахил, елкалари кенг одам пайдо бўлиб, Барретнинг бошига резина калтак билан қаттиқ туширганди. Баррет оғриқдан букчайиб қолди, мендан лип этиб бошқа томонга ўтди ва ерга қулади. Ўрнидан турмоқчи бўлди, аммо калтабақай киши унинг олдига сакраб борди-да, яна бир марта туширди.

Буларнинг бари беш сония ҳам вақтни олгани йўқ. Томоғимдан ҳамон бўғмоқчи бўлган қиз қичқириб юборди. Мен фурсатдан фойдаланиб, шундай бурилиб олдимки, натижада у баландда бўлиб қолди. Қизнинг қўллари қандай қилиб бўйнимни қўйиб юборганини ҳис этдим. Ирғиб оёққа турдим, у эса чинқирганча чорпахил йигитга ташланиб, юзини тирноқлари билан тирнамоқчи бўлди. Йигит жойидан жилмай, унинг қўлини бир чеккага силтаб юборди ва қаншарига резина калтак билан қаттиқ туширди. Қиз худди кесилган кундадай унинг оёқлари остига шалпайиб тушди.



Йигит унинг устига энгашди, қовоқларини йириб очиб тикилди. Сўнгра қаддини ростлади ва менга қараб кулимсиради:

– Хэллоу! Бу ерда яхшигина вақтичоғлик қилиб-сизлар, шекилли. Мен сизнинг қичқирғингизни эшитдим. У ҳақиқатан сизни чавақлаб ташламоқчи бўлдим ёки бу шунчаки ҳазилмиди?

Юзим ва бўйнимни дастрўмолим билан артар эканман:

– Назаримда, у анча ичиб олган кўринади, ҳуши ўзида эмас. Нима қилаётганини билмаса керак, – дедим.

Мен бироз қизиқиш билан полга чўзилиб ётган қизга қарадим:

– Сиз уни куч билан урдингиз. Майиб қилмагансиз, деб умид қиламан. У менинг мижозим ҳисобланади.

Йигит қўлини бепарволик билан силкитиб қўйди.

– Ташвиш чекманг. Бу ҳам кам. Мен уларга уч кунга зўрға чидадим. Тўхтовсиз уришиб сўкишиб, менга асло уйқу беришмасди.

Мен ҳамон дастрўмол билан юзимни артишда давом этар, чунки тердан бутунлай шалаббо бўлиб қолган эдим. Узун ошхона пичоғи ҳам эсимни чиқариб юборганди.

– Сиз шу ерда яшайсизми?

– Ҳа, гуноҳларим эвазига. Йўлақдан ўтсангиз, қаршингизда. Агар сизни қизиқтираётган бўлса, исмим Ник Пирелли.

Мен ҳам номимни айтдим.

– Сиздан жудаям миннатдорман. Агар вақтида келмаганингизда, бу босқинчи мени чавқалаб ташлаган бўларди.

Пирелли кулимсиради. Унинг юмалоқ нозик юзида кинояли ифода сақланиб турарди. Бу ёқимтой киши нимаси биландир киноактёр Жорж Рафтни эслатар, кийган шинам костюми эса, айрим жиҳатлардан қараганда жуда башанг эди.

– Демак, сиз «Универсал хизматлар бюроси»даги ишларни бошқарувчи йигитсиз, шундайми? Жуда ажойиб. Шундай ишни эгаллашни истар эдим.

– Бу ишнинг ҳам ўзига яраша қийинчиликлари бор – мана, кўриб турибсиз биттасини. Мени буни эслаб қоламан. Агар сизга бирор ёрдам керак бўлиб қолса, хабар қилинг. Биз сизга биринчи тоифа даражасида хизмат кўрсатамиз, қолаверса бепул.

– Ҳисобга оламан, – жавоб берди Пирелли ва кулимсиради: – ҳозирча ҳамма ишларим жойида, аммо ким билади дейсиз... – У пойабзалининг учи билан қизни туртиб қўйди. – Бу ҳам сизнинг хизматларингиздан бирими?

– Ҳа. Энг ёқимсизи. Мен бу ерга уни отасига қайтариш учун келган эдим.

– Сиз бу мўъжизадан уни хурсанд бўлади, деб ўйлайсизми? Мен яхта беришганида ҳам қизни ортга қайтариб олиб бормаган бўлардим.

Мен ёпинчиқ келтириб, қизнинг устига ташладим.

– Отаси бундан сал дурустроқ. Аммо мен бу мўъжизани кўтариб вестибюль орқали ўтсам, пастда турган мушти йўғон нима деркан?

– Максими? – кулиб юборди Пирелли. – Роса хурсанд бўлади-да! Қиздан қутулишга жон-жон дерди-ю, аммо фақат Барретдан кўрқарди. Мен ҳозир учрашувга боряпман, демак, биз бирга пастга тушишимиз мумкин. Унинг сизга халақит бермаслигига ҳаракат қиламан.

– Жуда соз, – дедим мен. – Бу ерда рўй берган воқеадан сўнг мени одам ўғирлаганликда айблашларини истамасдим.

– Агар сиз у ёқ-бу ёғингизни тартибга келтирмоқчи бўлсангиз, ванна ҳув нариги томонда, – деди Пирелли бармоғини чап томонга нуқиб. – Кўринишингиз худди ёнғиндан чиққандай. Қизга эса мен қараб тураман.

Мен ваннага кириб, ўзимни сал-пал эпақага келтирдим. Кўринишим худди ёввойи мушук билан олишган одамга ўхшарди. Узилган ёқамни тўғнағич билан уладим-да, наридан-бери ювиндим.

Хонага қайтиб, ҳамон беҳуш ётган қизни адёлга ўраб олдим.

– Борди-ю, у машина ичида хушига келиб қолсачи?

– Келмайди, – деди Пирелли манманлик билан. – Мен кимга зарба берсам, буни тузуккина бажараман.

Биз қизни лифтга олиб келдик, ҳеч ким сезмай қолди.

– Айтинг-чи, сиз учрашувга доимо ўзингиз билан резина калтак олиб чиқасизми?

Пирелли кулиб юборди.

– Мен аслида кўчага бусиз чиқмайман. Қарта ўйнайман, куним шу билан ўтади. Резина калтак эса ўйиндан кейинги муносабатларни ойдинлаштиришнинг энг ажойиб йўли.

– Айтганингиздек, калтакни ишлатишни яхши биларсиз?

– Бунинг қийин томони йўқ. Ҳамма сир шундаки, зарба кучли бўлиши керак. Заиф зарба рақибни ғазаблантириб юборади.

Лифт тўхтади ва биз вестибюлга чиқдик.

Қулоқчин тутган қиз ўрнидан турди ва бизга тикилиб қолди. Унинг ўнг қўли бармоқлари клавишлар устида югурар, кўрсаткич бармоғи эса қўнғироқ тугмасини пайпаслар эди. Колонна ортидан мушти йўғон сакраб чиқди. У нимадир деб бақирди-да, тўппа-тўғри мен томонга бостириб кела бошлади.

– Ҳаммаси жойида, Макси... Жим! – деди Пирелли.  
– Биз фақат уйдан ахлатни олиб чиқдик. Безовта бўлма.

Макси ярим йўлда тўхтади. У юкка диққат билан қаради ва қизни кўрган заҳоти ўз-ўзидан босилди.

– Ҳа-а, буми?! – деди у. – Қаерга олиб кетяпсизлар?

– Қаёққа олиб боришимизнинг сенга нима фарқи бор?

– Ҳа, тўғри. Баррет-чи, у эътироз билдирмадими?

– У ухляпти, уйғотгимиз келмади, – дедим мен.

Мушти йўғон юзимдаги тирналган жойларни кўрган бўлса керак, ҳуштак чалиб юборди:

– Ҳм, тушунарлику-я... Ҳўш, сизларни кўрганим йўқ, деб ҳисобланг. – У қиз ўтирган идорага қаради: – Грация, эшитяпсанми? Биз ҳеч кимни кўрмадик, тушундингми?

У бош ирғаб қўйди ва яна газета ўқишга тутинди. Макси бизга чиқиб кетиш йўлини кўрсатди.

– Эҳтиёт бўлинг. Қаранг-чи, у ёқда полициячилар йўқмикан?

Биз кўчага чиқдик. Ҳамма ёқ жимжит, полициячилар кўринмасди. Мен Уингровнинг қизини машинанинг орқа ўриндиғига жойладим (у ҳамон беҳуш эди) ва эшикни ёпдим.

– Ҳўп, яна бир марта раҳмат. Ошириб айтаётганим йўқ: сиз ҳаётимни сақлаб қолдингиз, – мен Пиреллига ўзимнинг ташриф қоғозимни узатдим. Сизнинг ол-

дингизда қарздорман. Эсингизда бўлсин, мен ҳамиша ва ҳамма жойда хизматингизда тайёрман.

Ваъда қилиш осон, аммо орадан уч ҳафта ўтгач, мен думига консерва банкаси боғлаб қўйилган маймун каби тентирар, берган сўзимнинг устидан чиқиш учун виждонан ҳаракат қилар эдим.

### 3

Узун, шиша идиш рангидаги башанг пальтоли, озгин, оқ-сарик шойи кўйлакли ҳамда буқа терисидан тикилган малла туфли кийган Жек Керман бутун гавдасини керганича диванимда ястаниб ётарди. У ширакайф ҳолда бир қўли билан кўкраги устига содали виски бордоқни тутган, бошқа қўлини эса радиодан таралаётган жаз мусиқаси оҳангига мос ҳаракатлантирарди.

Мен унинг қаршисидаги чуқур оромкурсидан жой олган, очик деразадан ой нурига ғарқ бўлган океанга қараб ўтирар ва бир қарорга келолмасдим: бориб чўмилсаммикан ёки яна бир бордоқ обизамзамдан куйсаммикан?

Уингров қизига дахлдор воқеа аллақачон хотирамдан ўчиб кетган, у билан бирга Пирелли ҳам эсдан чиққан эди. Қочоқ гиёҳванд қизни оиласининг бағрига қайтарганимга ҳам роппа-роса ўн кун бўлди, ўзимга тааллуқли бу иш ёпилган.

– Агар таътилга чиқсак, зап иш бўларди-да, – деди Керман. – Бу бетўхтов ишдан фақат ошқозонни алдаш мумкин. Кел, дўконимизни бир-икки ойга ёпамиз-у, Бермуд ёки Гонолулуга жуфтакни ростлаймиз. Бу мешчанлар шаҳарчасида маҳаллий гўзаллар билан

зерикиб ўлар даражага етдим. Қандайдир ўтқирроқ, хуштаъм, узун пижамали ўрнига бошқачасини кўнгил тусаб қоляпти. Нима дейсан, Вик? Биз ҳам сал-пал дам олишимиз керакми, йўқми?

– Сенга мумкин, менга эса йўқ. Қолаверса, Паулани қаёққа қолдирамиз?

Керман бордоқдан хўплади, хўрсинди ва сигара чекишга тутинди.

– Бу энди сенинг ишинг. Паула қиз эмас, нақ қазойи жазонинг ўзгинаси. Унинг ўйлайдигани фақат пул ва иш. Сендан илтимос, айтиб қўй, менга иш тўғрисида ҳадеб гапиравермасин. Унга кулоқ солсанг борми, мен ош-нонимга яраша ишламаётган эмишман, сен шундай деб ўйлайсанми?

– Сен етарли ишляяпсанми ўзи? – деб сўрадим мен кўзимни юмиб. – Умуман, қай биримиз тер тўқяпмиз? Нима десанг дегин-у, Жек, аммо таътил бекор қилинади. Ҳозир иш бошимиздан ошиб ётибди. Бундан кейин ҳам шунга бардош беришимиз керак. Агар идорани шундоққина ёпсак борми, бир ҳафтадан кейин бизни унутиб юборишади.

– Эҳтимол, сен ҳақдирсан. Тушунасанми, ўша сарғиш сочли қиз, дўндиғим, мени бир олам пулга туширади. Билмайман, уни нима қилишим керак. Бу қиз афтидан мени пул босиб чиқаради, деб ҳисобласа керак. Йўқ, бошқача ўйлама тағин, ёмон қиз эмас, эҳтиросли ва оловнинг нақ ўзи, мен аёлларда айнан шу нарсаларни яхши кўраман. Ёмон томони...

Телефон кўнғироғи унинг гапини бўлиб қўйди.

Керман бошини кўтариб, телефон аппаратига аччиқланиб қараб қолди.

– Гушакни кўтармай қўя қол, – деб маслаҳат берди у. – Бирорта мижоз бўлиши мумкин.

– Ахир ҳали соат кечки ўн ҳам бўлгани йўқ-ку, – эътироз билдирдим мен, истар-истамас оромкурсидан турар эканман. – Мени ўзимнинг ўтмишим тутиб олмоқчи, шекилли.

– Ундай бўлса, мен гаплашай. Телефонда аёллар билан валақлашишни қотираман.

Мен Керманга ёстиқни улоқтирдим ва гўшакни кўтардим.

– Алло?

– Жаноб Меллоймисиз?

Бу – овозидан аёлларнинг елкасида чумолилар ўрмалайдиган эркакнинг товуши бўлиб, кўз олдингизда эса баланд бўйли, елкалари кенг, офтобда қорайган эркак намоён бўларди. Бундайларни хонимлар эри ишда бўлганида эрталаб бир пиёла чойга таклиф қилади, кечкурун эри ишдан қайтганидан сўнг эмас.

Эҳтимол, адашаётгандирман, аммо айнан шу манзара кўз олдимга келди. Бу унинг йўғон овозини эшитганимдан кейин рўй берди.

– Эшитаман. Ким билан гаплашишга муяссар бўлдим?

– Мени Ли Дедрик дейишади. Идорангизга қўнғироқ қилсам, у ердан ҳеч ким жавоб бермади.

– Кечирасиз, аммо идорамиз кеч соат олтида ёпилади.

– Худди тартиб билан ишлайдиган бошқа корхоналар каби, – деб ғудранди Керман боши остига мен улоқтирган ёстиқни қўяр экан. – Қулоқ сол, унга қизамиқ билан оғриб, тўшакда ётибман, дегин.

Гўшакнинг нариги томонидан кескин овоз эшитилди:

– Нима, сизларда тунги навбатчилик бўлмайдими?

– Жаноб Дедрик, сиз айнан тунги навбатчи билан гаплашяпсиз.

– А-а, тушунарли.

Жимлик чўкди, сўнг яна ўша овоз давом этди:

– Мен сизнинг ҳозир зудлик билан хузуримга етиб келишингизни истардим. Жуда шошилинч.

Овоз оҳанги ниҳоятда ўктам бўлишига қарамай, менга унинг эгаси нимадандир қўрққандек туюлди. Товушида қандайдир ғалати саросималик бор.

– Жаноб Дедрик, сизга қандай ёрдам беришимиз кераклигини айта олмайсизми? – деб сўрадим мен Керманнинг гўшакни қўйишимга имо-ишора қилиб, ғазабга тўлганига эътибор бермай.

Кишини эзиб юборувчи оғир жимлик чўкди. Мен гўшакнинг нариги томонидаги кишининг қисман узук-юлуқ нафас олишига қулоқ солиб, жавоб беришини кутардим.

– Ҳозиргина қўнғироқ қилиб огоҳлантиришди: бугун кечкурун мени ўғирлашмоқчи экан. Эҳтимол, бу ҳазилдир, аммо айрим эҳтиёт чораларини кўришга қарор қилдим. Ҳайдовчини ҳисобга олмаганда, уйда ёлғизман. Аммо у филиппинлик, шундай экан, хавф-хатар рўй бергудай бўлса, кам фойдаси тегади.

Бу гаплар менга жуда ғалати туюлди. Яна жимлик чўкди ва мен тагин унинг тез-тез нафас олгани, ўша қўрқинчли овоз – менда ваҳима уйғотган товушни эшитдим. Худди гапираётган кишининг саросимали юзини аниқ-тиниқ кўргандай бўлдим.

– Мен Серена Маршленднинг эриман, – деди ниҳоят гўшакнинг нариги томонидаги овоз. – Яхшиси, вақтни бекорга ўтказманг, қизиқишингизни қондириш учун учрашганимизда вақтингиз етарли бўлади.

Бу одамнинг товуш оҳанги мутлақо ёқмаса-да, аммо у нимадандир қаттиқ қўрққанини аниқ-тиниқ англаб олган эдим. Очиғи, ҳозир ҳеч қаёққа боргим келмаяпти, кун бўйи ишлаб, қолган вақтда Керман



билан бир шиша шароб ичмоқчи эдим. Аммо бу тарзда ҳеч қайси ишни дўндира олмайман. Устига-устак, Серена Маршленд дунёдаги бой аёллар рўйхатининг тўртинчи поғонасида туради.

– Сиз ҳозир қаердасиз, жаноб Дедрик?

– «Оушен-энд» номли ҳашаматли ҳовлида. Балки у ҳақда эшитгандирсиз? Шаҳардан бироз четда, хилватда жойлашган. Агар ҳозир етиб келсангиз, ниҳоятда хурсанд бўлардим.

– Яхши. Бизни кечи билан ўн дақиқа кутинг.

– У ердан «Оушен-энд»га қадар хусусий йўл боради. Дарвоза очиқ. Аслини олганда ўзим ҳам эндигина келиб турибман ва...

Товуш тўсатдан узилиб қолди.

Мен бироз кутиб турдим, аммо суҳбат давом этмади, мен гўшаққа «Хэллоу!» деб қичқирдим.

Қулоғим тагида ҳамон ўша қўрқиб қолган кишининг узуқ-юлуқ нафас олиши эшитилар, аммо овози чиқмасди.

– Хэллоу, жаноб Дедрик?!

Ниҳоят нафас олиш ҳам эшитилмай қолди. Кишини толиқтириб юборадиган жимлик чўкди, сўнг гўшақда шиқирлаш эшитилди-ю, алоқа узилди.

#### 4

«Оушен-энд» – ҳашаматли уй-жой уйимдан уч миля нарида қумли саҳро ўртасида жойлашган. Уни асримизнинг 20-йилларида қайсидир миллионер ўзи учун қурдирган, аммо мутлақо яшамаган. Ҳашаматли ҳовлига жойлашишидан олдин касодга учраб, кейин ўзини отган.

Ҳовли бир неча йил бўш турди. Шундан сўнг уни қандайдир синдикат сотиб олди ва маҳаллий меҳмонхона – «Орхид»да туришни ўзларининг обрў-эътиборларига тўғри келмайди, деб ҳисобловчи машҳур кишилар ҳамда ажнабий аъёнларга ижарага бериладиган бўлди. Бу зеб-зийнатга бурканган иморат-ҳовли миллионернинг орзуси сифатида реклама қилина бошланди. Унда ниҳоятда катта – қирқ акри боғ бўлиб, бир чеккаси океанга туташиб кетган эди. Сузиш бассейни эса ярми очиқ осмон остида, ярми том билан ёпилган. Саройнинг ўзи бетон ва рангдор тошлардан итальянча барокко усулида қурилган бўлиб, ички жиҳозлари ҳам ажойиб ўйма нақшлари ва санъат ашёлари билан машҳур.

Мен «Бьюик» машинамни ҳашаматли кошонага элтувчи икки милдан иборат хусусий йўлга бурганимда, аъло даражадаги кенг йўл теварагидаги ғоят гўзал қирол пальмаларига кўзи тушган Керман:

– Мен ҳамиша шу саройга келишни орзу қилардим, – деди.

У энгашганча машинанинг олдинги чироқлари ёғду бераётган нур ҳалқасига тикилиб ўтирарди.

– Мен уни курорт мавсуми олдидан қизгин ҳафталик ҳазил ўрнида қабул қилишни жон-жон деб истар эдим. Бу менга қанчага тушар экан, нима деб ўйлайсан?

– Сенинг маошинг ўн йил олдин тўланади.

– Балки ҳақдирсан. Майли, орзу қилиб қўя қолган яхшироқ. Афсус. Агар менда шундай сарой бўлганида борми, сариқ сочли муғамбиргинам бутунлай қўлга ўрганиб қоларди.

– Ҳа, сен эса бундан хурсанд бўлардинг... Аммо менга манови Дедрик билан бўлган воқеа мутлақо

ёқмаяпти... Унинг гапи узилиб қолишига нима сабаб бўлди экан?

– Биласанми, бу бой ҳўкизларнинг ҳаммаси бир хил. Улар шу даражада ялқовлашганки, битта ортиқча сўз айтишни ҳам иштасмайди, жин урсин.

– Назаримда, кимдир унинг олдига кириб қолган, шунинг учун суҳбатимизни эшитишни истамаган.

– Қўй-ей, сен бир умр пашшадан фил ясамоқчи бўласан. Гаров ўйнаб айтаман, унинг сен билан гаплашиб ўтиргани жонига теккан ва гўшакни қўйган. Бу бадавлат разиллар бизга ўхшаган кишилар учун хушмуомалалик қоидаларига риоя қилиб ўтиришни ўзларига эп кўришмайди.

Олдинда дарвоза кўринди. Унинг тавақалари кенг очилган эди. Мен тезликни камайтирмадим, ўқдай отилиб, шиддат билан атрофи баланд альп атиргули буталари билан қопланган кенг хиёбон бўйлаб юриб кетдик.

– Ўт кетдими, бунча шошасан? – деди Керман аччиқланиб.

– Менга бу одам нимадандир жудаям кўрққандек туюлди, – жавоб бердим мен. – Унинг бир кулфатга дучор бўлганини кўнглим сезиб турибди.

Тик бурилишда мен машинани кескин бурдим. Чирок ёруғида уй худди устимизга сакрагандек бўлиб кўринди. Керман заиф қичқирди, мен эса кескин равишда тормозни босдим. Шиналар оғриқдан инграгандек бўлди. Зудлик билан кетаётган машинани ички ҳовлини ўраб турган пешайвонга икки дюйм қолганида зўрға тўхтатиб қолдим.

– Нега тўхтадинг? – деди Керман терлаб кетган юзини артар экан. – Биратўла уй олдига тўхтасанг бўларди, пиёда юришни ёмон кўришимни биласан-ку.

– Сенинг асабларинг заиф, – дедим мен. – Жуда кўп ичасан, ҳамма кулфатинг шунда.

Биз машинадан тушдик.

Чап томонда, уйга кираверишда узун никеллари ярқираб турган катта автомобиль худди йўналиш кема-си каби орқа стоп-чироқлари ёнганича турарди.

Пешайвон охиридаги икки тавақали очиқ эшикдан тушиб турган ёруғликни ҳисобга олмаганда, уй бутунлай қоронғилик қаърига ғарқ бўлган эди.

– Қўнғироқ қиламизми ёки шундай кираверамизми? – деб сўради Керман кўрсаткич бармоғи билан ёруғлик тушиб турган эшикни кўрсатар экан.

– Олдин бир қараб кўрамиз. Агар у ерда ҳеч ким бўлмаса, шундан кейин қўнғироқ қиламиз. Тўппонча қўлингдами?

– Ҳа, сенга берайми? – деди олижаноблик қилиб Керман ва қирқ бешинчи калибрли тўппончани қўлимга тутқазди. – Бу фақат чўнтагимни йиртади, холос.

– Тўппонча сенда экан, олдинга тушиб биринчи бўлиб борасан, демоқчисан-да?

– Эҳ, баъзан каллангга шундай ажойиб ва яхши фикрлар келадики... Мен, ростини айтсам, нима учун қўл остингда ишлаётганимни ҳам билмай қоламан.

– Пул туфайли дейиш мумкин. Сендан бошқа ким ҳам буни иш деб ҳисобларди?

Биз пешайвон бўйлаб юрар эканмиз, товуш чиқармай шивирлаб гаплашар эдик. Ёритилган дарвозага етгач, имо-ишора билан Керманга жим бўлишни буюрдим. У орқага тисланди ва мени қўли билан итарди.

Олдинга қараб юрдим, Керман ортимдан эргашди. Икки тавақали очиқ эшикка етгач, мексиканча услуб-

да жиҳозланган катта тўғри бурчакли залга мўралаб қарадим: пол узра қимматбаҳо гиламлар тўшалган, деворлар эгар ва юганлар билан безатилган, дераза яқинида ва баҳайбат совуқ камин олдида кенг диванлар қўйилган эди.

Стол устида телефон турар, унинг ёнидаги ичимлик солинган узун бордоққа қўл теккизилмаган эди. Столнинг ялтироқ сатҳида шиша кулдон бўлиб, ичидаги кул тўкилганди.

Хонада ҳеч ким кўринмасди.

Мен ишора билан Керманни чақирдим.

– Оҳ, гўзаллигини! – деб хитоб қилди у елкам оша хонага кўз ташлар экан. – Бу ерда яшашни кўз олдимга келтиряпман... Энди нима қиламиз?

Мен хонани айланар эканман, папирос кули ҳушёр торттирди. Шу билан бирга қўл тегизилмаган бордоқ ҳам. Ҳидлаб кўрдим – виски.

Ортимдан эриниб қадам ташлаётган Керман камин олдидаги диванни айланиб ўтди-да, деворга осилган мексиканча эгарга яхшироқ қарамоқчи бўлди. Икки қадам ташлаган захоти кескин тўхтади ва бирдан бошини шундай бурдики, сочлари кўзи устига тушиб қолди.

– Қарагин!

Мен тезда унинг олдига ўтдим. Диван ортида ҳайдовчиларнинг қора, зар уқали кийимида кимдир чалқанча тушиб ётарди. Унинг ўлганини билиш учун яқин боришнинг ҳожати йўқ эди. Пешанасининг ўртасидан қора тешик ўрин олган, полга тўшалган мексиканча гилам қонга беланган. Сарик – малларанг қўллари ёйилган, бармоқлари худди илмоқ каби акашак бўлиб қолган, кичик тунд юзида даҳшат қотиб қолган эди унинг.

– Эсизгина, – деди Керман анча хотиржам тортиб, – аммо, роса қўрқитиб юборди ўзиям!

Мен энгашиб, акашак бўлиб қолган қўлни кўтардим. У ҳали илиқ эди. Қўйиб юборган эдим, қўл жонсиз ҳолда гиламга тушди. Демак, бу одам яқинда ўлдирилган.

– Бемаъни иш, – дедим. – Улар Дедрик мен билан гаплашиб турган пайтда кириб келган бўлишлари мумкин.

– Уни ўғирлаб кетишган, деб ўйлайсанми?

– Шунақага ўхшайди. Қани, Жек, полицияни чақир. Бу ерда қиладиган ишимиз қолмади. Брендонни биласан-ку, бизга қандай муносабатда бўлади. Агар билиб қолса борми, шундай шов-шув кўтарадики, асти қўяверасан. Биз бу ерда вақтни бекор ўтказиб, лақиллаб қолдик.

Телефонга яқин келган Керман тўхтади, бошини бир ёнига эгиб қулоқ солиб турди.

– Машина келаётганга ўхшайди...

Мен айвонга чиқдим. Ҳақиқатан уйга машина яқинлашмоқда эди. Тезлиги жуда катта. Автомашина бурилишдан ўтганида моторининг овози ва ғилдирак резинасининг ғижирлаши менгача етиб келди.

– Қўнғироқ қилишга шошмай тур, – дедим Керманга.

Буталар орасидан чироқлар ёруғи кўринди. Бир неча дақиқадан сўнг машина хиёбон ортидан сапчиб чиқди ва менинг «Бьюик»имдан бир неча ярд нарида тўхтади.

Мен олдинга интилиб, боққа туташиб кетган зина-поядан пастга тушаётганимда, машинадан қандайдир бир қиз тушди. Ойнинг хира ёруғи ҳамда машинанинг орқа стоп-чироғи ёғдусида унинг баланд бўйли, келишган ва шляпасиз эканлигини кўрдим.

– Ли? – деб овоз чиқарди қиз. – Ли, бу сенмисан?

– Бу ерда жаноб Дедрик йўқ, – дедим унга пешвоз чиқиб.

Қизнинг нафаси ичига тушиб кетди. У худди қочиб кетмоқчи бўлгандек бурилди, аммо ўзини тутди ва жойида тўхтаб қолди.

– Сиз... сиз кимсиз?

– Мен Вик Мэллойман. Бундан ўн беш дақиқа олдин жаноб Дедрик менга қўнғироқ қилиб, бу ерга келишимни илтимос қилган эди.

– А-а... – у бир пайтнинг ўзида ҳам ҳайрон бўлди, ҳам саросимага тушди. – Сиз уни бу ерда йўқ демоқчимисиз?

– Ҳа, шунақага ўхшайди. Ҳов анави хонада, кўриб турганингиздек, чироқ ёниб турибди, аммо у ерда йўқ. Бошқа хоналар эса қоронғи.

Мен қизнинг ташқи кўринишини яхшироқ кўриб олиш учун унга яқин жойда туриб қолдим. Рўпарамда тунги либосдаги, анча ёш ва қорачадан келган чиройли қиз турарди.

– У шу ерда бўлиши керак эди, – деди қиз кескин овозда.

– Сизнинг кимлигингизни билсам бўладими?

Қандайдир оний лаҳза ичида у бир қарорга кела олмади, сўнг шундай деди:

– Мени Мэри Жером дейишади, жаноб Дедрикнинг котибаси.

– Сизни қўрқитиб юбораман, деб ўйлайман, аммо анави ерда, – мен қўлим билан ёруғ хонани кўрсатдим, – жаноб Дедрикнинг ҳайдовчиси ётибди. У ўлган.

– Ўлган?!

Қиз серрайиб қолди.

– Ҳа. У бошидан ўқ еган.

Қиз олдинга қалқиб кетди. Мен уни ҳозир хушидан кетиб қолади, деб ўйладим, қўлидан ушлаб, енгилгина тутиб қолдим.

– Сиз, яхшиси, машинада бироз ўтиринг.

У қўлларимдан ўзини четга олди.

– Кераги йўқ. Ҳаммаси жойида. Сиз уни ўлдирилган деяпсизми?

– Шунақага ўхшайди. Ҳар ҳолда бу ўз жонига қасд қилиш эмас.

– Ли билан-чи?.. Жаноб Дедрикка нима бўлган?

– Билмадим. У менга қўнғироқ қилиб, қандайдир киши ўғирлаб кетмоқчи эканлигини айтиб, огоҳлантирганини етказганди. Бу ерга келиб, ҳайдовчининг жасадини топиб олдим.

– Ўғирлаб кетмоқчи дейсизми?! О-о-о! – қиз инграб юборди. – У айнан шундай дедими? Сиз адашмаяпсизми?

– Мутлақо. Биз уйни кўздан кечиришга ҳозирланаётган эдик, аммо улгурмадик. Сиз машинада кутиб тура оласизми?

– Йўқ! Сизлар билан бирга бўламан. Уни ўғирлаб кетиш нима учун керак бўлиб қолди экан?

– Мен ҳам шу ҳақда сўрадим. У Серена Маршлендининг эри эканлигини айтди.

Қиз мени айланиб ўтиб, зинапоялардан югуриб чиқиб кетди. Сўнг айвон бўйлаб тез одимлай бошлади. Мен унинг изидан юрдим. Шу дақиқа ичида Керман айвонга кириб, чиқиш жойини тўсди.

– Бу ёққа киришингизни маъқул эмас, деб ҳисоблайман, – деди у қизга юмшоқ оҳангда.

– Сиз жаноб Дедрикни топдингизми? – сўради Мэри Керманга диққат билан тикилганча.



Энди деразадан тушган ёруғлик тўғридан-тўғри кизга тушиб турарди. Унинг маънодор кўзлари, қимтилган лаблари ва энгагига кўзим тушди. Қиз шу туришида ғоят гўзал, лекин шу билан бирга қандайдир шафқатсиз ва совуқ, менинг тасаввуримдаги бой хотин қиёфасига асло тўғри келмасди. У қимматбаҳо тунги кўйлак устидан қорамтир-қизил юмшоқ шойидан тикилган тунги ёпинғич кийиб олган эди.

Қизнинг саволига Керман «йўқ» дея бош чайқаб қўйди.

– Худо хайрингизни берсин, уни ахтариб кўринг. Иккингиз ҳам. Бутун уйни кўздан кечириб чиқинглар.

Мен Керманга бош ирғадим:

– Жек, аввал полицияни чақиргин!

Керман телефон рақамини териш билан овора экан, қиз ўлган ҳайдовчини кўргани кирди. Шунда даставвал унинг юзи аста-секин оқараётганига кўзим тушди, яқинига борганимда эса қиз аллақачон ўзини кўлга олган эди.

– Келинг, айвонга қайтайлик, – таклиф қилдим мен. – Керманнинг ўзи Дедрик қаерда эканини кўриб чиқади.

Мен қизнинг елкасига қўлимни қўйдим, аммо у саросимага тушиб, қўлимни олиб ташлади-ю, айвонга чиқди.

– Нақадар даҳшат! – деди у. – Атрофимда кўп вайсамай, сиз ҳам жаноб Дедрикни ахтарсангиз бўларди... У нега айнан сизга қўнғироқ қилган? Сизни илгаридан билармиди?

– Мен «Универсал хизматлар бюроси»ни бошқарман. У, афтидан, бизнинг эълонлардан бирини ўқиган бўлиши керак.

Қиз қўллари билан юзини беркитди ва панжарага суянди.

– Бу ном ҳеч нимани англатмайди. Мен шахрингизда бир неча соатдан бери турибман. Бу қанақа бюро ўзи?

– Биз ажралишдан тортиб, йўқолган мушук, итларни топишгача бўлган барча топшириқларни бажариш билан шуғулланамиз. Жаноб Дедриikka тансоқчи керак бўлиб қолган экан, аммо ўйлашимча, биз жуда кеч келганга ўхшаймиз.

Қиз сесканиб кетди.

– Мен бунга ишона олмайман. Марҳамат қилиб, унинг бу ерда эмаслигига ишонтиринг. Жаноб Дедрик шу ерда бўлиши керак.

– Керман барча ишни бажаради. Жаноб Дедрик билан гаплашганимда, унинг бу ерга эндигина келгани ва ҳайдовчиси билан ёлғиз эканлигини фаҳмлаган эдим, шундайми?

– Жаноб Дедрик бу уйни ёзда ижарага олган эди. У хотини билан Нью-Йоркда бир ҳафта қолганди, – деб тез-тез тушунтира бошлади қиз. – Улар эндигина чет элдан қайтиб келишганди. Жаноб Дедрик бу ерга уй масаласида келишиб олиш учун икки кун аввал ташриф буюрган. Дедрик хоним эртага келиши керак эди. Мен унинг эри билан бирга қайтиб, ҳаммаси жойида эканлигига ишонч ҳосил қилишим зарур эди. Биз ҳозирча «Орхид» меҳмонхонасида жойлашганмиз. Жаноб Дедрик бугун кечқурун уйни кўздан кечириб чиқмоқчи, мен эса кечроқ келиб унга ёрдамлашмоқчи эдим.

– Тушунарли...

Айвонда Керман кўринди:

– У ерда ҳеч ким йўқ.

– Боғни кўздан кечириб чиққин, – дедим унга.

Шундан сўнг Мэри Жеромга тезгина синчков назар ташладим-да, айвондан настга туша бошладим.

– У сизга ўғирланиши мумкинлиги тўғрисида бирор марта гапирганмиди? – деб сўрадим қиздан.

– Йўқ!

– У меҳмонхонадан қачон чиқиб кетган эди?

– Саккиз яримда.

– Хўш. Менга ўн бирдан ўн дақиқа ўтганда қўнғирок қилди. Қизиқ, у ана шу икки соату қирқ дақиқада нима қилган бўлиши мумкин? Сизга бирор нарса маълумми?

– Уйни кўздан кечириб чиққан, деб айтиш мумкин. Сиздан илтимос, пастга тушинг-у, дўстингизга ёрдам беринг. Балки жаноб Дедрик бирор жойда дабдаласи чиқиб ётгандир.

Назаримда Мэри тезроқ мендан халос бўлмоқчидай туюлди. Унга шундай дедим:

– Мен полиция келгунча шу ерда қоламан. Сизни ҳам тўсатдан ўғирлаб кетишларини истамайман.

– Бундай бўлмаса керак. Мен, яхшиси, меҳмонхонага қайтаман.

– Ўйлашимча, полиция келгунича сиз ҳам шу ерда қолишингизга тўғри келади, – дедим мен хотиржам оҳангда.

– Йўқ, кетаман. У меҳмонхонада бўлиши мумкин, шундай экан, мен кетишим керак.

Мэри кетмоқчи бўлиб бурилган эди, мен қўлидан тутиб қолдим.

– Кечирасиз, полиция келгунича сизнинг шу ерда бўлишингизга тўғри келади, – дедим қатъий равишда.

У менга ғазабли нигоҳ ташлади.

– Агар сиз шундай деб ҳисобласангиз...

– Худди шундай!

Мэри ўзининг сумкасини очди.

– Ундай бўлса чекишамиз.

У ҳаммасини чаққонлик билан амалга оширди. Мен қорнимга тиралган қирқ беш калибрли тўппончани кўриб, кўзларимга ишонмай қолдим. Хатто бурилиб қарашга ҳам улгурмадим.

– Уйга кириг!

– Кулоқ солиг...

– Уйга кириг деяпман! – унинг товуши таҳдидли янгради. – Тезроқ, акс ҳолда отаман.

– Бу яхши ҳазил эмас, бироқ, майли, сиз айтгандек бўла қолсин, – деб эшитилар-эшитилмас тўнғиллаб қўйдим мен ва уйга кирдим.

Бир неча лаҳзадан сўнг унинг зинапоядан пастга югуриб тушиб, ўзини панжарадан пастга отганини кўрдим.

– Жек, ушла уни! – деб қичқирдим мен қоронғиликка қараб. – Эҳтиёт бўл, тўппончаси бор. – Сўнг унинг ортидан айвон бўйлаб югурдим.

Кескин қарсиллаган товуш эшитилди ва менинг бошим устидан ўқ хуштак чалиб учиб ўтди. Ўзимни пальма дарахти панасига олдим. Яна ўқ узилди ва Керманнинг қаттиқ додлагани эшитилди. Кейин моторнинг гуриллагани, учинчи ўқ товуши эшитилди-ю, пастдан, эшикка киравериш жойидан автомашина зарб билан қўзғалди.

Мен айвондан югуриб тушиб, қизни ўзимнинг «Бьюик»им билан қувмоқчи бўлдим, аммо бунинг удасидан чиқа олмадим: у ҳаммасини ҳисобга олган, учинчи ўқни машинамнинг орқа ғилдирагига отган эди.

Қоронғилик қаъридан Керман чиқиб келар экан, ғазабланиб деди:

– Нима бўляпти бу ерда? Мени ўлдиришига сал қолди.

Биз Керман билан кутубхонадаги совуқ камин олдида ўтирардик. Эшик ёнида эса бети тошдай қотган полициячи тик турганча биздан кўз узмасди. Изқувар Макгроуга барча воқеаларни айтиб беришга улгурдик, энди эса капитан Брендонни кутардик. Дедрикнинг ким эканлигини билганидан сўнг, Макгроу дарҳол округ полиция бошлиғи биз билан шахсан ўзи гаплашмоқчи эканлигини айтди.

Қўшни хонада қотилликни тергов қилиш бўлимининг бир гуруҳ йигитлари ишларди: бармоқ изларини топиш учун буюмларга кукун сепишар, жасадни суратга тушириб, хонани турли томондан расмга олиб, жиноят изларини топиш мақсадида уйни кўздан кечиришар эди.

Телефон тўхтовсиз равишда жиринглар, автомашиналар келар, кетарди. Ниҳоят кучли гуриллаган овоз эшитилди ва мен Керманни туртдим:

– Брендон келди!

– Бизни бу ерда кўрса, роса хангома бўлади-да, – деб кулди Керман.

Эшикда турган полициячи Керманга жаҳл билан қаради-да, безовта бўлиб ҳаракатланди. Сўнг беихтиёр равишда мундирини ечиб, тугмаларини кўздан кечирди. Капитан Брендон инжиқ ва майдакаш одам бўлиб, қўли остида ишлаганлар ундан мисоли оловдан қўрққандек қўрқишарди. Жимлик бизни худди наMAT каби елкамиздан босган. Кишини эзиб юборадиган яна ярим соат ўтиб кетди. Вақт ярим кечадан ҳам ошган. Ниҳоят эшик очилиб, Брендон қотилликларни тергов қилиш бўлимидаги лейтенант Мифлин ҳамкорлигида кириб келди. Мен Керманни туртдим,

унинг кўзлари чақчайиб кетди. Полиция бошлиғи тўхтаб, бизга шундай нафрат билан қарадики, австралиялик шахзода ўзининг оппоқ тўшагида қандайдир ифлос оёқ изини кўрса, айнан шундай жирканиб боққан бўларди.

Капитан Брендон ўрта бўйли, семиз, юмалок, худди чўчқанинг қорнидай оппоқ юзли киши бўлиб, сочининг ўртаси кенг тақирбош, атрофида оққа мойил калта сочлари чўтканинг қилидай осилиб турар, совуқ кўзлари синчковлик билан тикиларди. Ўзига бино кўйган бу кимса Мифлиннинг миясидан фойдаланиб, ютуқларининг барчасини ўзиники қилиб ўзлаштирарди. Полиция бошлиғи мансабида ишлаётганига ўн йил бўлар-бўлмас, у «Кадиллак» машинаси, катта уй, хотинига қоракузан пўстин олиш, ўғли ва қизини университетга жойлаштиришга эришди. Фақат маош билан бундай ҳашаматга эга бўлолмайсан. Уни пора олади, деб гапиришади. Аммо бирор киши текшириш ва фош қилишга уринмаган. У кўпинча ўзига керакли далилларни ўйлаб чиқарар ва тобеларга нисбатан қўпол, шафқатсиз усулларни қўллар эди. Умуман олганда, Брендон хавфли, катта мавқега эга бўлган одам.

– Сиз, икки бадбўй чиябўри, бу ишга қандай қилиб қўл урдингиз? – деб сўради у хириллоқ овозида.

Биз индамадик. Брендонга дуч келдингми, ўзингни панжара ортида кўрасан. У эшик ёнбошида турган полициячига назар ташлади.

– Қани, чиқиб тур-чи!

Полициячи оёқ учида чиқиб кетди ва ортидан эшикни шундай эҳтиёткорлик билан ёпдики, гўё эшик тухум пўчоғидан ясалгандек эди.

Мифлин полиция бошлиғи тепасидан менга маъноли тарзда кўз қисиб қўйди.

Брендон оромкурсига чўкиб, калта оёқларини олдинга чўзди ва аъло навли наMATсимон матодан тикилган шляпасини елкаси томон суриб қўйди. Сўнг қўлларида доимий турадиган сигарасини олиб эзғилай бошлади.

– Қани, бошидан бошла, такрорла-чи, – деб буюрди у. – Мен айрим ўринларни аниқлаб олмоқчиман. Шундай экан, қани Мэллой, сен биринчи бўлиб бошлагин. Макгроуга нима деган бўлсанг, шуларнинг ҳаммасини гапириб бергин. Қачон керак бўлса, ана ўшанда сени тўхтатаман.

– Мен кеча Керман билан бирга уйда ўтирган эдим, – деб гап бошладим шошилиб. – Соат ўн бирдан ўн дақиқа ўтганда телефон жиринглади ва ўзини қандайдир Ли Дедрик деб атаган киши менинг зудлик билан етиб боришимни илтимос қилди. Чунки унга қўнғироқ қилиб, бугун кечкурун ўғирлаб кетишга тайёрланишаётгани ҳақида огоҳлантиришган экан.

– У сенга айнан шундай дедими? – сўради Брендон катта бармоғининг тирноғи билан сигаранинг целлофан ўровини кесар экан.

– Албатта.

– Бўлмаса бундоқ, бизнинг аниқлашимизча, бу ёққа ҳеч ким қўнғироқ қилмаган. Энди нима дейсан?

– Балки меҳмонхонага қўнғироқ қилишгандир?

– Текширилди. У ерда ҳам шундай.

– Менга шу ердан Дедриктан бошқа киши қўнғироқ қилгани йўқ.

Брендон сигарани ўзининг семиз бармоқлари билан айлантириб, шундай деди:

– Бир марта бўлган, телефон-автомат будкасидан. Хўш, нима бўпти?

– Балки унга кундуз куни ўша будкага қўнғироқ қилишини сўрашган ва шу тариқа уни огоҳлантиришгандир, – деди Мифлин тушкун товушда.

Брендон лейтенантга елкаси оша қаради ва гўё унинг хонада эканлигини энди пайқагандай бўлди. Гарчи Мифлиннинг миясидан фойдаланса-да, аммо уни доимо полицияда мутлақо фойдасиз одамдай кўрсатишга уринар эди.

– Эҳтимол, шундайдир, – деди Брендон, – балки, Мэллой алдаётгандир.

У менга кичкина ўткир тишларини ғижирлатиб, назар ташлади.

– Хўш, Мэллой, алдадингми?

– Йўқ!

– Энди менга айт-чи, Дедрик нега полицияга эмас, сенга мурожаат қилди?

Бундай саволга жавобни мен аввалроқ тайёрлаб қўйган эдим, аммо унга ёқармикан:

– Афтидан Дедрик лақиллатишаётганига унчалик ишонмаган, кулгига қолишни истамаган.

– Хўп, майли, қани, яна алдайвер, – хириллади Брендон сигарага гугуртни яқин келтириб, сўнг менга вазмин тикилди.

– Дедрик мен билан гаплашаётганида, тармоқда жимлик чўқди. Мен уни чақирдим, аммо ҳеч ким жавоб бермади. Нафас олгани эшитилиб турди. Кейин кимдир гўшакни қўйди.

– Худди шу вақтда сизлар полицияга қўнғироқ қилишларинг лозим эди, – бақириб юборди Брендон. – Худди шу пайтда нимадир бўлганини тушунишингиз керак эди.

– Мен хонага Дедрикнинг ҳайдовчиси кирган-у, суҳбатимизни эшитишини Дедрик истамаган, деб ўй-



лагандим. Дедрикнинг рухсатисиз бундай ишга полицияни аралаштириш учун ҳали эсимни еб қўйганим йўқ.

Брендон менга қаҳр билан қаради, сигарасининг кулини қоқиб, хўмрайиб деди:

– Ҳали менинг ҳузуримга борсанг сайратаман. Хўш, давом эт-чи. Сизлар келиб, бу ерда Суюкиннинг жасадини топдингиз. Шундайми?

– Суюки дейсизми? Ҳайдовчини айтяпсизми?

– Ҳа, унинг чўнтагидан топилган хатга қараб, шундай дейиш мумкин. Сизлар йўлда келишда бирор кишини учратмадингизми?

– Ҳеч бир тирик жон кўринмади. Ҳайдовчининг ўлганини билганимиз заҳоти мен Керманга полиция бошқармасига қўнғироқ қилишни буюрдим. Аммо у улгурмади, чунки қиз келиб қолди...

Брендон семиз тумшуғини олдинга чўзди.

– Дарвоқе, бу қиз тўғрисида. Унинг исми нима эди?

– Мэри Жером.

– Ҳм, демак, Мэри Жером... – У юзини қоплаб олган сигара тутуни тарқалгунча сабр қилиб турди, сўнг гапини давом эттирди. – У ўзини жаноб Дедрикнинг котибаси дедими?

– Ҳа, шундай.

– Бундай жувон «Орхид» меҳмонхонасида йўқ.

Мен индамадим.

– У котибага ўхшармиди?

– Йўқ.

– Нима деб ўйлайсан, Дедрикнинг ўғирланишига унинг озми-кўпми алоқаси борми?

– Эҳтимол. Аммо мен унга бу хабарни етказганимда, ниҳоятда ажабланиб қолди. Колаверса, Дедрикни

ўғирлашганидан кейин унинг бу ерга келишига нима хожат бор эди?

– Сен ҳақсан, Мэллой, – деди Брендон ва менга қувлик билан кулиб қўйди. – Сен тўғри йўлдан кетяпсан. Унинг, афтидан, дили сиёҳ бўлгандир... кхе-кхе?

– Ҳа, шунақа.

Капитан оромкурсига яхшироқ жойлашиб ўтирди ва ўзининг калласидан фикр-ўйларни сиқиб чиқара бошлади. Ниҳоят у мағрур туриб, сўзлай бошлади:

– Гап бундай, эшитгин, Мэллой! Мен сенга гапнинг пўсткалласини айтай. Газеталар ўғрилик тўғрисидаги хабарни тарқатишгач, қўрқинчли ваҳима бошланиб кетади. Дедрикнинг хотини катта обрўга эга. Боз устига у олий табақага мансуб хоним ҳисобланади. Яна бир муҳим ҳолат: унинг юқоридагилар билан алоқаси зўр. Агар эҳтиёт бўлмасак, бирдан пачавамиз чиқиши мумкин. Мен аҳмоқона иш қилмоқчи эмасман, сенга ҳам маслаҳат бермайман. Тушундингми?

Биз бир-биримизга қараб қолдик.

– Гаров ўйнаб айтаманки, ана шу Мэри Жером – Дедрикнинг жазмани, – деб гапини давом эттирди полиция бошлиғи. – Бу шундоққина кўриниб турибди. У уйни ижарага олиш учун келган. Дедрик хоним эса Нью-Йоркда қолган. Биз Дедрик тўғрисида тўлиқ маълумотга эга эмасмиз. Жиноят рўй берганига кўп бўлмади, аммо анча маълумотларни билиб улгурдик. Уларнинг никоҳи махфий равишда расмийлаштирилган. Дедрик Серена Маршленд билан Парижда бир ярим ой учрашиб юрган ва ўша ерда турмуш қуришган. Кекса Маршлендни яқиндагина турмуш қурган йигит-қиз сифатида Нью-Йоркка келишганидан сўнг хабардор қилишган. Мен уларнинг нега яширинча ни-

коҳдан ўтишганини билмайман: балки Дедрик кўпчиликнинг бундан хабардор бўлишини истамагандир. Серена эса уни кекса Маршлендга куёв эмас, унаштирилган йигити сифатида таништирамоқчи бўлгандир. Умуман, мен бу ўринда ҳеч нимани билмайман, билишни ҳам истамайман. Аммо барча ҳолатлардан шуниси аён бўлиб турадики, Дедрикнинг бунгача қандайдир аёли бўлган, эҳтимол, у Мэри Жером бўлиши ҳам мумкин. Улар бу ерда бир кечани ўтказмоқчи бўлганлари ҳам мутлақо аниқ, аммо Дедрик ўғирланган, шунинг учун уни огоҳлантира олмаган. Агар огоҳлантирилганида, Мэри Жером келмаган бўларди. Умуман олганда, даъволар бир-бирига тўғри келмоқда. Унинг нима учун полицияга учрашишдан бўйин товлагани энди аён бўлса керак. Шу боис биз келишимиздан олдинроқ Мэри ўқ узиб ғойиб бўлган. Мен шу боис унинг кетиб қолганидан хурсандман, буни сизларга айтиб ўтирмасам ҳам бўлади.

Брендон эътирозим бор-йўқлигини билиш учун бироз кутиб турди, аммо мен чурқ этмадим. Эҳтимол, у ҳақдир, деб ўйладим. Далиллар, худди ўзи айтганидек, бир-бирига тўғри келмоқда.

– Сени шунинг учун суҳбатга тортдим, Мэллой, – деб гапини давом эттирди полиция бошлиғи менга пўлатдек совуқ кўзларини тикиб. – Дедрик ўғирланган. Жуда яхши. Бунга қандайдир бирор чора кўрамиз, аммо қолгани бизнинг ишимиз эмас. Сен билан Керман ҳеч қаерда Мэри Жеромнинг номини тилга олмаслигингиз керак. Акс ҳолда ўзингиздан кўринг. Ҳар иккингизни асосий айбдор сифатида қамоққа тикиб қўяман ва токи панжара ортида ўтирар экансиз, йигитларим ҳар куни, кечаси-ю кундузи, тушлик ва

кечки овқатга танаффуссиз сўроқ қилаверади. Агар бу аёл тўғрисида зиғирча хабар матбуот юзини кўрса борми, сизларга ана шундай қувноқ ҳаётни кафолатлайман. Мен қандайдир фош этувчи шов-шувли чиқишлар қилмоқчи эмасман. Дедрик хонимга биз томонимиздан етарлича ҳурмат-иззат кўрсатилади. Унга эрини йўқотишнинг оғирлиги ҳам етиб ортади. Шу боис турмуш ўртоғининг хиёнат қилганини билдиришнинг ҳожати йўқ. Тушунарлими?

Мен Дедрик хонимнинг нуфузли танишлари тўғрисида ўйладим. Губернатор, афтидан, унинг кўрсатмаси билан бу газандани яксон қилиб ташлаши мумкин. Брендон эса хонимнинг манфаати ёки ҳис-туйғусини ҳурмат қилишдан олдин ўзининг шахсий хавфсизлигини кўпроқ ўйламоқда.

– Тушунарли! – жавоб бердим мен.

– О'кей! – хитоб қилди полиция бошлиғи ўрнидан турар экан. – Тилингни тий, акс ҳолда пушаймон бўласан. Қани, энди жўнаб қол. Бундан кейин ифлос бурнингни бу ишга суқма, акс ҳолда туғилганингга афсус қиласан.

– Бундан мен учун ҳеч қандай янгилик бўлмайди, – деди Керман эринчоқлик билан эшик томон йўл оларкан. – Ҳар куни эрталаб турганимда айнан шундан хурсанд бўлмайман.

– Йўқол, – қичқирди Брендон.

Биз жуфтакни ростладик.

## ИККИНЧИ БЎЛИМ

### 1

Мен эртаси куни кеч соат ўнларда бир масалани ҳал этиш учун беҳуда уринардим: ухласаммикан ёки дастурхон устида вақтни қисқартириш учун шотланд вискисининг бошқа шишасини очсаммикан?

Кутилмаганда телефон жиринглади. Қўнғироқ кескин ва қаттиқ чириллади. Бу мени шунинг учун саросимага солдики, айти соатга қадар кулбам тинч ва хотиржам, худди бой-бадавлатнинг тўйида иштирок этган шўрлик қариндошга ўхшаб қолган эди.

– Хэллоу!

Симларнинг бир текис гувиллаши ортидан менга-ча жаз оркестрининг вальс куйи етиб келди. Трубинанинг мослама орқали пасайтирилган баланд ноталари буни Глен Буснинг «Серенадерс» жаз оркестри ижро этмоқда, деган фикрга олиб келди. Демак, менга Кантри-клубдан қўнғироқ қилишган.

– Жаноб Мэллойми?

Овоз аёл кишига тегишли бўлиб, сўзларни чўзиб гапирарди. Шу билан бирга бу овоз эркакларда қизиқиш уйғотишга мўлжалланган эди.

– Эшитаман.

– Сиз билан Серена Дедрик гаплашяпти. Кантри-клубдан қўнғироқ қиляпман. Бу ерга кела олмайсизми? Агар қарши бўлмасангиз, сизга бир иш таклиф қилмоқчиман.

Мени ҳайрон қолдиргани – нега у эртагача сабр қила олмади? Афтидан, барча Дедриklar хизматдан ташқари вақтларда қўнғироқ қилишга мутахассис бў-

либ кетишган, шекилли. Шу билан бирга бу мени айрича ташвишга солгани йўқ, ундан буюртма олишни истар эдим.

– Ҳечқиси йўқ, Дедрик хоним. Ҳозир етиб бораман. Мен сизни қандай топаман? Дарбондан сўрасам бўладими?

– Мен сизни автомобиллар тўхташ жойида турган машинада кутаман. Қора тусдаги «Кадиллак». Сиз қачон келасиз?

– Ўн беш дақиқада...

– Мен сизни чорак соатгача кутаман, кўп эмас, – деди у кескин оҳангда ва гапини тугатди.

– Ҳозир бора... – деб жавоб бера бошлаганим заҳоти гўшакни қўйди.

Мен югуриб, ювиниш хонасига кирдим, ўзимни ойнага солиб кўрдим: кўринишим анча яхши. Бўйинбоғимни тўғрилаб, ўзимга-ўзим савол бердим: унга мендан нима керак? Балки эрининг ўғирланиши тўғрисида дастлабки маълумотлар зарур бўлгандир? Журналда босилган фотосуратлар ҳамда гапириш оҳангига қараганда, уни анча-мунча оддий нарса қаноатлантирмаслиги кўриниб турарди.

Гараждан машинамни олиб чиқдим-у, Росмор-авеню жойлашган майдон бўйлаб шитоб билан ҳайдадим. Майдончада бир-икки бемаъни одам ой нурида ялтираётган коптокча билан гольф ўйнарди. Сўнг Глендор-авенюдан чап томонга бурилиб, ўн бир ярим дақиқада Кантри-клубнинг ҳашаматли кириш эшигига бориб тўхтадим.

Автомашиналар тўхташ жойи клуб орқасида жойлашган. Машинамни ўша ёққа ҳайдадим ва бўш қолган биттагина жойга бир амаллаб қўйдим. Кабинадан тушиб, қаторлашган автомашиналарга қарар экан-

ман, бундан кўра, сомон ичидан игна топиш осонроқ эканлигини англадим. Ҳашаматли лимузинлар орасидан керакли қора «Кадиллак»ни топиш машаққатдан бошқа нарса эмас. Бу ерда беш юздан зиёд машина бўлиб, шулардан учдан бири, менинг назаримда, қора «Кадиллак»дан иборат эди.

Мендан чап томонда, узоқда стоп-чироқ ёниб-ўча бошлади. Умид билан ўша томонга қараб интилдим. Машинага яқин боргунимча стоп-сигнал ёниб-ўчаверди. Мен бу қора автомобилни «Оушен-энд»нинг қанотида икки кун олдин кўрган эдим.

Машина олдига бориб, ойнасидан ичкарига қарадим.

Рулда аёл киши чекиб ўтирар эди. Ойнинг совуқ ёғдуси тўғридан-тўғри унинг юзига тушиб турарди. Биринчи пайқаганим – аёлнинг сочларига тақилган кичик чироқчалардек ёғду таратувчи марваридлар шодаси бўлди. Бу аёл ой ёруғида гипсдан ясалган ҳайкалга ўхшаб кўринарди. Эгнида катта ўйма нақшли, олтинранг берилган парчадан тикилган кийим. Сочларидаги марварид шодасидан тортиб, токи совуқ, кишини сескантирадиган ифода ва кўзни қамаштирувчи чиройли чехрасигача шундай қиёфа акс этгандики, дунёдаги энг бой хотинлар эгаллаши керак бўлган кўриниш эди бу.

Унинг кўзлари шу пайтгача мен кўрган энг катта кўзлар эди. Узун силлиқ товланиб турган киприклари эса ясама бўлмай, унга табиат томонидан инъом этилган. Биз бир неча дақиқа индамасдан ошкора қизиқиш билан бир-биримизга қараб, гўё ўрганар эдик.

– Дедрик хоним, менинг ихтиёримда яна икки дақиқа қолди, аммо, назаримда, барибир сизни кутишга мажбур қилдим, – дедим мен. – Кечирасиз. Сиз мен

билан шу ерда гаплашишни хоҳлайсизми ёки бошқа бирор жойни танлайсизми?

– Яна қаерда гаплашса бўлади?

– Дарё бўйида гольф даласи бор, унчалик ёмон эмас. Бу ерга қараганда анча тинч.

– Яхши, ўша ёққа борамиз. Ўйлайманки, машинани сиз бошқарасиз, – деди у ён ўриндиққа ўтиб.

Мен «Кадиллак» рулига ўтириб, машинани ўт ол-дирдим. Кираверишдаги тўхташ жойига етгунча Дедрик хонимга зимдан қараб олдим. У ўйчан ҳолда олдинга қараб ўтирар, юзидан ҳеч қандай ифодани англаб бўлмас, худди фил суягидан ясалган ниқобдай силлиқ ва муздек қотиб қолган эди.

Клуб дарвозасини айланиб ўтиб, машинани рав-шан ёритилган кўприк томондаги йўлга бурдим. Сўнг дарё бўйида жойлашган қишлоқ йўлига тушиб олдим. Бир неча лаҳзадан сўнг керакли жойга етдик. Тезлик-ни ошириб, ой ёруғида ярқираб турган дарё бўйига бурилдим ва тўхтадим. Фақат ҳар замонда қамишлар орасидан бақаларнинг вақиллаши эшитилар, атроф-даги жимликни тўлқинларнинг овози бузиб турарди, холос.

– Тушишни истамайсизми? – деб сўрадим клубни тарк этгандан буён бизни қуршаб олган жимликни бу-зиб.

Хоним сесканиб кетди, бу дамда хаёли узоқларда кезарди, чоғи. Сўнг сигара кулини ташқарига улоқти-риб, рад этгандек бошини чайқаб қўйди.

– Йўқ, биз шу ерда, машинада гаплашаверамиз. Ўл-дирилган Суюкини биринчи бўлиб топган киши сиз-мисиз?

– Ҳа, эрингиз билан боғлиқ бирор маълумот борми сизда?



– Улар менга бугун кечқурун қўнғироқ қилишди. Унинг озодлиги учун беш юз минг сўрашяпти. Эримнинг соғ-саломат, ҳадемай мен билан учрашишидан умид қилаётганини айтишди.

Серена Маршленд бу гапларни совуқ, равон оҳангда айтди, уларнинг ортидаги ташвиш эса сезилиб турарди.

– Пулларни эртага кечқурун тўлаш керак, эримни пулни олганлари заҳоти озод қилишмоқчи.

Мен индамадим. Узоқ жимликдан сўнг Дедрик хоним менга бурилиб, синовчан назар ташлади.

– Кимдир бу пулларни уларга бериши керак. Бу ишни сиз қилишингизни истардим. Яхшигина тўлашади.

Мен айнан шундан қўрқардим. Талончилар билан юзма-юз бўлиш – ниҳоятда қалтис иш. Гаров пулини олиб борган кишини кўпинча ўлдириб юборадилар.

– Пулни қандай етказиш ҳақида улар билан келишиб олдингизми?

У «йўқ» дегандек бош чайқади.

– Ҳозирча фақат бир гап: ҳаммаси илгари ишлатилган йигирма долларлик пуллар бўлиши керак. Уларни учта пакетга солиб, ҳар бирини клеёнкага ўраш зарур. Пулни қаерга олиб боришни энг охириги дақиқаларда телефон орқали айтишади.

У менга тикилиб қаради.

– Хўш, қўрқмайсизми?

– Уларнинг шартларини билиб олсам, кейин жавоб бераман.

– Демак, сизнингча, бу иш анча хавфли-я?

– Ҳамма нарса бўлиши мумкин.

У сумкачасини очиб, бир қути сигарета олди. Биттасини менга таклиф қилди ва сўради:

– Нима деб ўйлайсиз, уни қўйиб юборишармикан? – хонимнинг овозида хаяжонланиш намоён бўлган эди.

Мен сигаретани олиб, бироз мулоҳаза қилгач, жавоб бердим:

– Эҳтимол, қўйиб юборишар.

Чекишиб бироз муддат жим бўлиб қолдик.

– Мен ростини айтишингизни истайман, – деб қолди Дедрик хоним тўсатдан. – Уни менга қайтариб беришармикан? Ҳами ёки йўқ?

– Билмадим. Бу эрингиз уларни кўрган ёки кўрмаганига боғлиқ. Агар кўрмаган бўлса, ҳеч нимадан кўрқмаслик керак ва уни қайтариб беришади.

– Борди-ю кўрган бўлса-чи?

– Аниқ айтиш қийин. Ўғрилар учун ўлим жазоси берилади, шунинг учун бу қалтис ишни ҳамма ҳам ёқтирмайди.

– Мен уни қайтариш учун ҳеч нимани аямоқчи эмасман. Буларнинг ҳаммаси мен туфайли рўй берди. Агар бунчалик бой бўлмаганимда, ҳеч ким уни ўғирламамасди. Йўқ, эрим орқага қайтиши шарт.

Мен жавоб тариқасида ҳеч нима дея олмасдим. Ҳар ҳолда Дедрик хоним эрини энди тирик кўра олмай-дигандек туюлди. Товон тўлашга шунча пул қўйилган экан, ўғрилар уни ўлдиришлари мумкин. Кўпгина ўғрилар гаровдагиларни қўйиб юборгандан кўра ўлдириб юборишни афзал кўришади. Шундай қилишса, ўзлари учун хавф-хатар бир мунча камаяди. Аксар ўғирланган кишилар полициячига жиноятчиларни топишда яхшигина илмоқ топиб беришган.

– Сиз полиция билан шу тўғрисида гаплашдингизми? – деб сўрадим мен.

– Йўқ, бундай қилмоқчи эмасман. Бугун оқшом менга қўнғироқ қилган киши ҳар бир қадамимни ку-

затиши ва полиция билан боғланадиган бўлсам, Ли ўлдирилишини айтиб огоҳлантирди. Полиция ёрдам бера олмайди. Бундай ишларнинг полицияга ҳожати йўқ.

– Қопқон қўйиш учун ҳали бизнинг вақтимиз бор. Пулга шундай белги қўйиш керакки, унга ҳеч кимнинг фаҳми етмасин. Бу ҳол эрингиз озод этилганидан сўнг ўғриларни ушлаш учун полицияга дастак бўлади, охирги чора сифатида.

– Йўқ, – деди у қатъий тарзда, – мен бу ишга ҳеч қандай найрангни аралаштирмасликка сўз берганман. Акс ҳолда улар билиб қолиб, Лини ўлдиришади. Бунинг учун ўзимни асло кечира олмайман, ҳеч қачон! Пулга тупурганман. Менга Ли керак.

– Сизга ким қўнғироқ қилди? Гапириш услубига кўра унинг қандай одам эканлиги тўғрисида бирор тасаввур пайдо бўлдими? Мен маълумоти, гапириш оҳангини назарда тутяпман. У билан учрашиб қолганда, овозидан таниб қолиш имконияти пайдо бўладими?

– Менимча, у оғзига дастрўмол тутиб гапирди. Қолаверса, овози ниҳоятда бўғиқ эди. Ҳеч қандай лаҳжа унсури йўқ. Сизга айтмоқчи бўлганим ана шулар, холос.

– У қай тарзда гапирди, қўпол эмасмиди?

– О, йўқ! У жудаям хушмуомала.

Мен дарёга ўйчан қараб қолдим. Афтидан, улар Дедрикни олиб кетишгач, дарров ўлдиришган. Ўйлаб ўтирмасдан ҳайдовчини ҳам ўлдиришган, бирор дақиқа мулоҳаза қилмай, пулни олган заҳоти мени ҳам асфаласофилинга жўнатишади. Йўқ, бундай иш билан боғланиб қолишни истамайман.

Дедрик хоним мен нима тўғрисида ўйлаганларимни англайдиган даражада ақлли эди.

– Агар сиз бу топшириғимни бажаришдан бош тортсангиз, яна кимдан ёрдам сўрашни тасаввур ҳам қила олмайман. Рози бўлсангиз, мен ўзим бирга борар эдим.

– О, йўқ! Бу ишни фақат бир киши қилиши керак.

– Бу ҳақда гап бўлиши мумкин эмас. Мен пул ўз жойига етиб боришига ишонч ҳосил қилиш учун қатъий қарорга келганман. Агар сиз кўнмасангиз, мен ёлғиз ўзим бораман.

Дедрик хонимнинг қизиққонлигига ҳайрон бўлиб, унга қараб қолдим. Анча вақт бир-биримиздан кўз узмадик. Бу аёлнинг юз ифодасига тикилиб, уни ҳеч қачон ўз аҳдидан қайтара олмаслигимни аниқ англадим.

– Хўп, яхши! Агар сиз зарур деб ҳисобласангиз, мен сиз билан бораман, – дедим.

Биз яна бир муддат чурқ этмай ўтирдик.

– Мен сиздан бир нарса тўғрисида сўрамоқчи эдим, – деди тўсатдан у. – Шахсий котибам деб ўзини таништирган қиз ким эди?

– Унинг кўринишини билишни истайсизми?

– Ҳа.

– Ёши ўттиз ёшларга етар-етмас, қорачадан келган. Кўриниши чиройли, яхши кийинган. Мен ўшандаёқ унинг котибага ўхшамаслиги ҳақида ўйлаган эдим.

– Жудаям чиройлими?

– Менимча, шундай. Иродали. Юзи одатдаги гўзалларники каби маънисиз эмас.

– У эримни шунчаки исми билан тилга олдимиз? Шунақами?

– Ҳа.

Мен унинг қўллари муштга айланганини кўрдим.

– Бу хомсемиз аҳмоқ полиция бошлиғи Ли ўша қиз билан севги ришталарини боғлаган, деб ўйлайди, –

тишларини гижирлатиб деди у. – Сиз ҳам шундай деб ҳисоблайсизми?

Дедрик хоним ҳаяжонланганидан овози кескин равишда кўполлашди.

– Билмадим. Мен эрингиз ҳақида ҳеч нимани билмайман. Шунақага ўхшайди, аммо у шунчаки ўртоғи ҳам бўлиши мумкин-ку.

– Ли бу қиз билан ҳеч қандай муносабат боғламаган, – деди Дедрик хоним, аммо шундай паст овозда гапирдики, зўрға эшитдим. – Мен биламан. У бундай қила олмасди, уйимга бошқа аёлни олиб келмасди. Бу унга хос иш эмас.

Хоним атрофга нигоҳ ташлаб, жим бўлиб қолди ва кўллари билан юзини яширди.

– Уни топишдими? – сўрадим мен.

– Йўқ. Ахтаришмади ҳам. Полиция бу қиз Лининг жазмани, деб ишонади ҳамда унга тегмасликни маъкул кўради. Аммо мен бунга ишонмайман. Бу қизга нимадир маълум бўлиши керак.

Мен ҳеч нима демадим.

Узоқ давом этган жимликдан сўнг Дедрик хоним бирдан сўз қотди:

– Сиз, афтидан, мени яна клубга қайтариб элтингизга тўғри келади. Индингача муҳокама қилдиган ҳеч нима йўқ. Ўша куни кечқурун менинг ҳузуримга келасиз. Эҳтимол, кутишимизга тўғри келар, аммо биринчи талаб бўйича боришга тайёр бўлиб туришимиз керак.

– Яхши, мен келаман.

Биз индамай клубга қайтдик. Машинани тўхташ жойига қўйганимда, у менга маъносиз беихтиёр табассум ҳадя этди-да, шундай деди:

– Эртадан кейин, оқшом соат олтида.

Мен унинг клубга қай тарзда кириб боришигача индамай кузатиб турдим: нозик қадди-қомати, енгил, ҳашамдор, заррин либос, сочларида бриллиантлар ялтирар, аммо айна дамда кўнглида, эҳтимол, қўрқув ва рашк ҳисси қайнарди.

## 2

Мен полиция бошқармасининг тўртинчи қаватида жойлашган Мифлиннинг кичкина кабинетига зина-поянинг тош пиллапоялари бўйлаб зўрға кўтарилдим. Лейтенант деразага қараб турарди: шляпаси кўзигача бостирилган, пастки лабида сигарета кули ёпишиб қолган. Юзи маъюс кўринар, фақат кўзлари зўр бериб фикрга берилганини англатар эди.

– Мана ниҳоят келдинг, – деди Мифлин тушкун ҳолда мен эшикни зарб билан очиб, унинг тангу тор идорасига кирганимда. – Қизик, ҳозиргина сени ўйлаб турган эдим. Қани кел, ўтир. Сигаретам тугаган, шундай экан, сўраб ўтирма.

Мен суянчиғи текис оғир стулни олдим-да, уни тескари қўйиб, суянчиқларига қўлимни тираб ўтирдим.

– Ҳуш, Дедрикни ўғирлаш билан боғлиқ иш қандай кетяпти?

– Жойидан силжигани йўқ, – деди Мифлин оғир хўрсиниб. – Қаердан ушлашни ҳам билмайсан, Брендон эса худди илондай алжиб, лақиллаб қолган. У жиноятчиларни ахтариб топса, шунинг шарафига штат полицияси бошлиғи бўламан, деб қарор қилган негадир.

Мен костюмнинг чўнтагини кавлаб, бир қути сигарета чиқардим-у, лейтенантни чекишга таклиф қилдим.

Биз бир-биримизга қараб индамай чекишдик.

– Анови жувон – Мэри Жером масаласи нима бўлди?

Мифлин яна чуқур ух тортди:

– Нима, сен бу ерга бурдалаш учун келдингми?

– Мутлақо ундай эмас. Қандайдир ахборотни ба-  
хам кўриш учун келдим.

Мифлиннинг кўзи тўсатдан чакнаб кетди ва менга синовчан назар билан тикилди.

– Сен бирор нарсани билиб олдингми?

– Ниманидир, аммо гап ўртамизда қолсин. Ўтган оқшом менга Дедрик хоним қўнғироқ қилди. Нима учунлигини тушунган бўлсанг керак?

– Ундан гаров пули талаб қилишган. Сен эса пулни белгиланган жойга етказишинг керак, шундайми?

Мен бош ирғадим:

– У бу ишга полиция аралашишини истамади.

– Истамадими? – алам билан деди Мифлин. – Аммо биздан эрини қайтаришни талаб қилиб ўтириб-ди тагин. Хўш, бу иш қачон амалга ошиши керак?

– Эртага кечқурун. Улар қўнғироқ қилишади ва унга охирги топшириқни беришади.

– Бу ҳақда албатта Брендонга хабар қилиш керак.

Мен елкаларимни қисиб қўйдим.

– Ўзинг биласан. Бу борада Брендон ҳеч нима қилмайди, у фақат гаров пулини олишга келган кишини ушлаши мумкин. Агар шундай қилса, Дедрикни айнан ўлдирган бўлади.

– Гаров ўйнаб айтаманки, Дедрик аллақачон ўлган.

– Эҳтимол, аммо биз бу ҳақда ҳали билмаймиз.

– Барибир Брендонга айтишга тўғри келади.

– Эҳтиёт бўл, бу ерда бўлганимни у Дедрик хонимга айтиб қўймасин, тагин. Сизлар нима қилмоқчисизлар – телефондаги сўзлашувни эшитмоқчимисизлар?

– Балки, – қовоғини уйиб жавоб берди Мифлин ва кўзларини юмиб олди. – Агар Дедрик хоним бу ишга аралашимизни истамаса, у ҳолда Брендон ҳеч нарсага қўл урмайди. У нотўғри қадам қўйишдан кўрқади. Гаров пули тўланса бас, шунда бизнинг ташвишларимиз ҳам арийди.

– Мэри Жером масаласига қайтсак. Сизларда бирор янгилик борми?

– Брендон уни бир четга суриб қўйди, аммо мен унинг «Оушен-энд»га миниб борган машинасини топдим. Жером ҳовлидан машинада чиққанида, навбатчиликда турган полициячи уни кўриб қолган экан. Бу ҳақда машина рақамларидан коллекция йиғадиган аҳмоқлардан бири Дедрикнинг ўғирланганини эшитиб, рапорт берди. Қиз машинани «Акме» гаражидан олган экан. Бу идорани билсанг керак? Уни Феррис деган кимса бошқаради. Биз анчадан буён унинг гиёҳванд моддалар олди-сотдиси билан шуғулланишидан шубҳаланиб кузатамиз, аммо ҳозирча ҳеч нима топганимиз йўқ. Мен ўша идорага кирдим, хўжайин Лос-Анжелесда экан, хотини билан гаплашдим. У Мэри Жеромни эслади. Қиз ўғирлик рўй берган куни кечқурун соат саккизлар чамасида келиб, Льют Феррисдан автомашина сўраган. Закаладга эллик доллар бериб, машина икки кунга керак бўлишини айтган. Ўзининг манзилини эса «Орхид» меҳмонхонаси деб кўрсатган.

– Феррис қизга машинани ҳеч қандай текширувларсиз бераверганми?

– У нимадан кўрқади? Машина суғурталанган бўлса.

– Сизлар аэропорт, вокзалларда кузатув ўрнатдингизми? У шаҳардан ташқарида беркинмадимикан?

– Бўлмасам-чи! Аммо ҳозирча натижа йўқ.

– Бундан бошқа ҳеч нима аниқланмадими?



– Яна нимани аниқлаш мумкин? – деб жавоб берди Мифлин сигаретани ўчириб. – Тергов қилинадиганлар ичида ўғирлик энг оғир иш эканлигини биласан. Агар улар ўғирланган одамни ўлдирган, пулни белгилаб кўйишмаган бўлса, ҳаммаси ҳавога учиб кетди деявер. У ҳолда фақат битта умид қолади – ўғирлардан бирортаси гаровга олинган пулнинг ўзига тегишли хиссасидан норози бўлиб, бошқаларини сотиб қўяди. Ҳозир эса Брендон ҳар бир қадамда қалтираб турганида, бу ишлар ўн барабар оғир. Мэри Жером бизнинг бирдан-бир ушлайдиган илмоғимиз, аммо у билан мен шуғуллана олмайман.

– Афтидан, тергов учун янги қотиллик юзага келди, ўша сизни шунга ундайди, – дедим алам билан. – Агар эртага кечқурун мени ҳам туртиб кетишса, бундан ажабланмайман.

Мифлин менга ўйчан қараб қолди.

– Шу ҳафтада эришадиган энг ягона янглигим шу бўлса керак, – деди у. – Ха, ўйлаб кўрилса, ҳамма шу ҳақда гапиради ва айнан шу ишни қилишади.

Мен кўлларини ишқалаётган Мифлинни қолдирдим-да, «Саул» операсидаги мотам маршини хуштак чалганча чиқиб кетдим.

### 3

– Шундай қилиб васият ёздингми? – деб сўради Керман мен ўттиз саккизинчи калибрли тўппончани ўқлаётганимда. – Умид қиламанки, пулларингнинг ҳаммасини менга қолдирасан. Уларни қандай сарфлашни биламан. Бўлмаса сариқ сочли шайтончам ир-кит нарсадан кўр бўлиб қолибди, деб ўйлайди.

– Жим бўл, Жек! – унинг гапини кесди Паула. У мен учун ташвиш чекаётганини билдиргиси келмас, аммо кўзларидаги ифода буни ошкор этиб турарди. – Сенда ҳеч қандай одамгарчилик туйғуси йўқ-а?

– Икковингиз ҳам оғзингни юминг! – деб ўшқирдим уларга. – Гап-сўзларингиз билан менда ваҳима кўзгаяпсизлар, холос. Жек, ҳаммаси келишганимиздай бўлсин. Уй ортидан кузатишлари мумкин, шундай экан, ўзингни худди қамалдагидек тутгин. Қаёққа бораётганимизни сенга билдираман. Шундай қилгинки, ҳеч ким пайқамасин, акс ҳолда ҳаммаси чиппақка чиқади. Қандай бўлмасин, ота-от бошланмагунча кўринма. Шундан кейин отишни бошла.

Керман қулт этиб ютинди:

– Нима, нима дединг?

– Отишни бошла, дедим.

– Менга ҳам шундай эшитилди. Агар ўйлаб кўрсам, ўзимга васият ёзишимга тўғри келади, шекилли.

– Худо хайрингни берсин, мўлжалга аниқ отишга ҳаракат қил, – деб гапимни тугатдим мен, сўнг кўл соатимга кўз ташлаб, ўрнимдан турдим. Костюмим остидаги ғилофга тўппончани солдим. – Кетиш вақтим бўлди. Паула, агар сиз соат ўн иккигача биз ҳақимизда ҳеч нима эшитмасангиз, Мифлиннинг олдига бориб, унга ҳаммасини айтиб беринг.

– Мен тўғримда у ҳаммасини эштади. – тўнғиллади Керман, унинг юзи кўрқувдан қийшайиб кетган эди. – Албатта эштади, жин урсин.

– Эҳтиёт бўлинг, Вик, – деди ҳаяжонланиб кетган Паула.

Мен қизнинг елкасига қоқиб қўйдим.

– Сизга ҳайронман, Паула. Ўғрилиқ каби арзимас ишга ҳам жон куйдирдингиз-у, аммо ўйлаб ўтирмас-

дан, мени гиёҳвандлар билан тўлиб-тошган уйга йўл-ладингиз. Ақлли бўлинг, сиз энди анча улғайдингиз. Яхшилаб ўйлаб олинг, биз бу ишдан қанча пул оламиз?

– Бўпти, бўпти. Фақат беъманиликка йўл қўйманглар, – деди у жилмайишга ҳаракат қилар экан. – Худо ҳақи, бу бой хотин олдида мақтанманглар тағин.

– Паула, жаҳлимни чиқарманг, – жавоб бердим мен, – Жек, кетдик. Қани, олға бос!

Биз йўлак бўйлаб лифтга яқинлашдик.

– Балки бир бордоқдан отармиз? – деди Керман умидвор бўлиб, биринчи қаватга тушганимиздан сўнг.

– Ҳозир эмас. Машинада бир шиша виски бор. Илтимос, бироз жиддий бўлгин. Акс ҳолда ишимиз ёмон тугайди.

Керман намойишкорона елкаларини қисди.

– Менга энди барибир, ҳаммаси жонимга тегди.

У «Бьюик»ка чиқиб, орқа ўриндиққа чўккалаб ўтирди, мен устига гиламча ташладим.

– Бу алфозда ўтирганимни зўр қониқиш билан эслайман, – деди Керман гилам остидан бошини чиқариб қарар экан. – Мен бунинг остида қачонгача ўтиришим керак экан?

– Уч-тўрт соат, ундан кўп эмас.

– Майли, начора, ўттиз беш даража иссиқда Калькуттадаги турманинг бир хонаси тўғрисида тўла-тўкис тасаввурга эга бўламан.

– Ҳечқиси йўқ, кечкурун иссиқ пасаяди, – дедим мен уни гап билан аямай ва машинани ўт олдирдим. – Сен учун бир шиша виски бор, у вақтни қисқартиришинг учун керак. Фақат чекма.

– Чекма дейсанми? – гиламча остидан умидсиз оҳвоҳ эшитилди.

– Кулоқ сол, йиғиштир ҳазилингни. Агар бу йигитлар сенинг машинада эканлигингни билиб қолишса, судраб чиқиб, чавақлаб ташлашади.

Керман бирданига ювош тортиб қолди.

Мен энди хусусий йўлдан анча секин борардим. Муюлишдан хотиржам бурилдим ва ички ҳовлиси панжара билан ўралган жойдан бир ярд нарида тўхтадим.

Ботаётган қуёш нурларида уй шунчалик мафтункор кўринардик, қурилишига миллион доллар сарфланган ҳашаматли саройгина шундай чирой касб этиши мумкин эди. Кираверишда катта лимузин турарди. Ундан унча узоқ бўлмаган жойда иккита хитойлик боғбон сўлиган гулларни кесиш билан овора. Улар шошмасдан ишлашар, гўё яқин тўққиз ойда гул буталари асосий даромад манбаларига айланиши керак эди (аслида ҳам эҳтимол шундайдир). Катта сузиш бассейни қуёш нурида ялтирар, аммо унда ҳеч ким чўмилмасди. Боғнинг пастки зинасида кенг бахмал каби майсазор устида олтита қизил ғоз менга тикилиб турарди: узун оёқли бу ажиб жониворлар худди италияликлар табрик хатидаги кўк лимондек нотабий кўринарди.

Бир сўз билан айтганда, «Оушен-энд»да ўша кунги ҳамма гўзаллик мухайё, дил яйрар, аммо бахт-саодат йўқ эди.

Мен ҳашаматли қасрга назар ташладим. Деразаларни яшил эшикчалар зич ёпиб турибди. Кираверишдаги эшик устини қизил ва яшил рангли чодир қоплаган.

– Хўп бўлмаса! Мен кетдим, – дедим Керманга шивирлаб.

– Вақтни кўнгилли ўтказ, – гилам остидан Керманнинг аламзада овози эшитилди. – Уялиб ўтирма. Содали вискига кўпроқ муз солгин.

Мен пешайвондан ўтиб, кўнғироқ тугмасини босдим. Ойнаванд эшик тирқишидан катта зал ва ним қоронғи орқа хоналарга туташ йўлак кўринди.

Баланд озғин кекса киши йўлакдан ўтиб, эшикни очди ва менга шубҳали нигоҳ ташлади. Назаримда, у эгнимдаги костюмимни фикран баҳолаб, бу ҳашаматли ҳовлига мос уст-бош сотиб олса бўлмасмикан, деб ўйлади. Балки адашгандирман, у ҳеч нимани ўйламагандир ҳам.

– Мени Дедрик хоним кутмоқда.

– Фамилиянгиз, сэр?

– Вик Меллой.

Чол ўрнидан қимирламади ҳам.

– Сизда ташриф қоғози борми?

– Бор, албатта. Қавм-қариндошлик холим ҳам бор. Эҳтимол, уни ҳам сизга бирваракай кўрсатишим керакдир?

Эшик оғаси илтифот билан жилмайди, бу нигоҳ кекса амакининг ҳаддан зиёд ўйноқи жиянига қарашини эслатар эди.

– Бу ерга Дедрик хоним билан гаплашиш учун ҳар қандай репортёрлар суқилиб келаверади. Шунинг учун эҳтиёт чораларини кўришга мажбурмиз.

Агар чолга ўзимнинг ташриф қоғозимни кўрсатадиган бўлсам, бу ерда келгуси ёзгача қолиб кетсам керак, деб ўйладим-у, ҳамёнимдан «Ишонч ёрлиғи»мни чиқардим. Эшик оғаси четланди ва мени қўйиб юборди:

– Мана шу ерда кутсангиз бўлади...

Мен айнан Суюки ўлдирилган хонага ўтдим. Мексиканча гилам аллақачон тозаланган. Полда ҳеч қандай

жасад чўзилиб ётмас, стол устида қўл теккизилмаган виски бордоғи ва сигарета кули кўринмас, стол юзасидаги доғ ҳам ғойиб бўлган, усти ялтираб турарди.

– Агар менга муз солинган икки ҳисса виски таклиф қилганингизда, рад этмаган бўлардим, – дедим эшик оғасига.

– О, марҳамат қилинг, сэр.

Чол буфет томон йўл олди. Стол устида «Хайг энд хайг» шиша идиши, бордоқлар, муз солинган кичкина пақирча ва «Уайтрок» турарди. Мен унинг қадам босишини диққат билан кузатар эканман бўғинлари қисирлашини эшитмадим. Бу ҳайрон қолдирди: эшик оғаси бўғин суяклари қисирлайдиган даражада кекса киши эди. Тўғри, у қанчалик кекса бўлмасин ичимликларни асло букчаймасдан аралаштирди. Бир бордоқ шу қадар ўткир виски узатдики, бу шаробнинг қандайдир ночор изқуварни эмас, балки отни ағдарिशга ҳам қурби етарди.

– Журнал варақлаб кутишни истамайсизми, сэр? Хозир уларни келтириб бераман.

Мен чуқур оромкурсига чўкдим, у мени гўё қучоқларига олгандай бўлди. Оёғимни узатиб, бордоқни эҳтиёткорлик билан дераза тоқчасига қўйдим.

– Сизнингча, кўп кутишга тўғри келадими? – деб сўрадим мен.

– Сэр, менда бундай ишларда етарли тажриба йўқ, аммо ўйлашимча, улар қоронғи тушмагунча қўнғироқ қилишмаса керак.

Мен бир қути сигарета чиқардим. Сигаретани оғзимга олиб бормасданоқ у гугуртни ёқди.

– Исмингиз нима? – деб сўрадим.

Қариянинг оқарган қошлари савол назари билан кўтарилиб кетди:

– Уэдлок, сэр.

– Сиз жаноб Дедрикда ишлайсизми ёки жаноб Маршленддами?

– Жаноб Маршлендда, сэр. Мени вақтинча жаноб Дедрикка ўтказишди, унга хизмат қилишдан бахтиёрман.

– Сиз уларда кўпдан бери хизмат қиласизми?

У камтарлик билан кулимсиради:

– Эллик йил бўлди, сэр. Йигирма йил катта Маршлендга хизмат қилдим ва, мана, ўттиз йилдан бери кичигининг хизматидаман.

Бу суҳбат дўстона руҳ олди, шунинг учун ундан сўрадим:

– Сиз жаноб Дедрикни Нью-Йоркда бўлганида кўрганмидингиз?

Эшик оғасининг юзидаги дўстона ифода шу заҳоти ғойиб бўлди, бармоқларни ёзганда, мушт ана шу тарзда йўқолади.

– Шундай, сэр. У бир неча кун жаноб Маршлендинг уйида турган эди.

– Мен эса у билан учрашишга муяссар бўла олмадим. Фақат телефонда гаплашдим. Жаноб Дедрик тўғрисида кўп эшитгандим. Қизик, бу ерда унинг бирорта ҳам фотосурати йўқ-а? Умуман, кўриниши қанақа ўзи?

Гарчи мен бунга амин бўлмасам-да, чолнинг зангори кўзларида хушламаслик ифодалари кўрингандай туюлди.

– Баланд бўйли ва кучли, жуссали жаноб, юз бичими ниҳоятда ёқимли буғдойранг киши. Бундан яхшироқ таърифлай олмасам керак.

– У сизга ёқармиди?

Чол гўё қотиб қолгандек бўлди. Жавоб бериш ўрнига деди:

– Сиз журналларни кўрмоқчи эдингиз, сэр. Кутиш кишини толиктириб қўяди.

Менга тушунарли бўлди. Чол бошқалар каби Дедрикка тоқат қила олмаган. Кўпчилик, жумладан, мен ҳам жағга туширилган зарбага чидай олмаган бўлардим.

– Йўқ, ташвиш тортманг. Ҳаётда хилма-хиллик бўлиши учун баъзан зерикиш ҳам зарар қилмайди.

– Яхши, сэр, – чол яна қуруқ ва хушмуомала бўлиб қолди. – Янгиликлар пайдо бўлиши билан дарҳол сизга хабар қиламан.

Сўнг у заиф букчайган ҳолда кексаларга хос қадам босиб, мени ўз қавми томонидан ёлғизлатиб қўйилган руҳоний каби хонада танҳо қолдириб кетди. Нохуш хотиротларга берилдим. Мана, мендан бир неча ярд нарида қонга беланган Суюки ётган эди. Камин олдидаги телефон ўша-ўша. Ундан Дедрик зўрға нафас олиб, бўғиқ ҳолда гапирган эди. Мен ўғрилар биқиниб кириб келган бўлиши эҳтимол тутилган ойнаванд эшикка назар ташладим, у ерда ўрта бўйли панамаси шляпа ва оқ тропик костюм кийган бақувват эркак менга қараб турарди. Қачон, қай тарзда кирган, пайқамай қолдим. Босқинчилар ва қотилликлар тўғрисида шунчалик ўй-фикрга берилган эдимки, уни кўрганим заҳоти кўрққанимдан сал бўлмаса шифтгача сакраб кетаёзим.

– Кечирасиз, мен сизни кўрқитиб юбордим, – деди у хушмуомалалик ва бирмунча бепарволик билан. – Бу ерда эканлигингизни билмаган эдим.

Шу сўзларни айтар экан, панамасини стол устига қўйди. Мен рўпарамда Франклин Маршленднинг айнан ўзи турганини фаҳмладим, ортидан Серенани кўз олдимга келтирдим, аммо у кўринмади. Кичик қай-



рилма бурни, оғир, соқоли қиртишлаб олинган ияги, кўнғир кўзларининг орзуманд, хотиржам боқиши офтобда куйган ажинли юзидаги ҳиссиётга тўла лаблари, оқарган сочлари, кўёшда тобланган очиқ елкалари бу одамни оқкўнгил қорбобога ўхшатиб турарди.

Мен оромкурсидан турмоқчи бўлганимда, у қўл ишораси билан тўхтатди:

– Ўтиринг, ўтираверинг. Мен сиз билан улфатчилик қиламан, – шундай деб билагининг орқа томонида тақилган юпқа олтин соатига қараб қўйди. – Еттидан ўн беш дақиқа ўтибди. Камина соат олтидан олдин ичишни соғлиққа зарар деб ҳисоблайман, сиз-чи?

Мен бу жуда яхши қоида эканлиги, аммо баъзан қоидани бузишга тўғри келиши, чунки инсон ўзининг эркинлик туйғусини гоҳ-гоҳида ҳис этиб туриши кераклигини айтдим.

У сўзларимга эътибор ҳам бермади. Юзида шундай ифода бор эдики, нима десангиз ҳам мутлақо қизиқмасди. Бу эса айтилган сўзларга кам қулоқ солиши, балки умуман эшитишни истамаслигини англатарди.

– Демак, сиз гаров пулини олиб борадиган ўша одамсиз, – деди Маршленд сўрагандан кўра, кўпроқ ўзи тасдиқлаб.

– Ҳа, ўша менман, – деб жавоб бердим.

У виски тўла бордоқни олиб, қаршимдаги оромкурсига келиб ўтирди. Ва бордоқ тепасидан ҳайвонот боғидаги йиртқич ҳайвонга қарагандек мени кўздан кечира бошлади.

– Серена менга сиз билан бирга боришини айтди.

– Ҳа, шундай.

– Мен бунга бутунлай қаршиман, аммо сўзларим унга мутлақо таъсир қилмайди, – Маршленд вискини хўплади ва ўзининг мўъжазгина, шу пайтгача бирор-

та эркакда учратмаганим – кичкина оёқларидаги ок буғу терисидан тикилган туфлисига қаради. – У менга ҳеч қачон қулоқ солмайди. Афсус. Нима ҳам килардим. Кексалар ҳамиша мижғов бўлишади. Аммо баъзан, агар ёшлар истаса, улар ёрдам бериши мумкин.

Назаримда, Маршленд бу гапларни менга эмас, кўпроқ ўзига гапираётгандек эди. Шу боис индамадим.

Чол жим бўлиб қолди ва бироз вақт ўйга ботганча ўтирди. Мен бошқа сигарета тутатдим ва Маршленд суҳбатни давом эттирадиган бўлса, қоматимни ростлаб олиш учун юзимга қуюқ ифодани бир нуқтага йиғиб ўтирганча руҳсиз равишда қаршилик кўрсатиш ҳақида ўйладим.

Уйдан унча узоқ бўлмаган жойда икки хитойлик боғбон ишларини тугатиб, бироз вақт гул буталарини кўздан кечирганларини кўрдим. Улар буталарга қўл теккизмай, дам олиш учун нари кетдилар.

– Сизда тўппонча борми? – деб сўради Маршленд.

– Ҳа. Аммо у керак бўлмайди.

– Лекин сиз менинг қизимга яхшилаб қаранг, унга хавф-хатар соя солмасин.

– Албатта.

Чол ярим бордоқ ичди, аммо шунга қарамай, виски унинг кайфиятини кўтармади.

– Бу ошналар чакана ўйлашмаган. Беш юз минг – катта пул.

У, афтидан, менинг жавобимни кутди, шу боис жавоб бердим:

– Шунинг учун одам ўғирлашган. Хавф-хатар ҳам катта.

– Ҳм-м... Сиз нима деб ўйлайсиз, улар шартни бажаришармикан?

– Ким билади уларни. Мен Дедрик хонимга айтганман, агар у ўғриларни кўрмаган бўлса...

– Ҳа, у менга айтган эди. Балки, сиз ҳақдирсиз. Мен илгари одам ўғирлаш билан боғлиқ воқеалар тўғрисида ўқигандим. Гаров пули қанча катта бўлса, жабрдийданинг тирик қайтиш имконияти шунчалик кам бўларкан.

Унинг кўзлари менга қандайдир синовчан ва ғалати тарзда тикилди. Шунда қариянинг унчалик хушмуомала ва бепарво эмаслигига ишонч ҳосил қилдим.

– Барчаси ўғриларнинг ўзига боғлиқ, – дедим унинг нигоҳини «ушлаб».

– Менда шундай бир ҳиссиёт борки, гўё уни энди тирик кўрмаймиз, – деди чол ва оромкурсидан оҳиста кўтарилиб, қовоғини уйганча нимадир излаган каби хонани кўздан кечирди. – Серенага ҳеч нима демадим, албатта, аммо улар ўлдиришганини билсам ҳам ҳайрон бўлмасдим. Сиз нима деб ўйлайсиз? – чолнинг оқарган қошлари савол назари билан юқори кўтарилди.

– Ҳамма нарса бўлиши мумкин.

– Нима бўлиши мумкин?

– Ҳақсиз, деб кўрқаман.

У рози бўлгандек бош ирғади. Мени чолнинг кўзларида йилт-йилт этган қувончли қониқиш ифодаси титратиб юборди. У димоғида ниманидир куйлаб, даядил ва тетик ҳолда хонадан чиқиб кетди.

#### 4

Соатим миллари кечаси ўн бирни кўрсатган пайтда телефон жиринглади. Беш соатлик кутиш шунчалик азоб эдики, азбаройи асабийлашганимдан телефонга

Ўзим жавоб беришимга сал қолди, аммо кўнглимнинг туб-тубида кимдир мендан ўзиб кетгандек бўлди.

Мана шу беш соат давомида мен хона бўйлаб мақсадсиз кездим, деразага қарадим. Уэдлок кечки овқатни олиб келганида, бу ёлғизлик фақат бир неча дақиқа мобайнида барҳам топди, холос. Аммо унга айтадиган гапим йўқ, шу боис мени яна ёлғиз қолдирди. Фақат соат саккизда мен бир неча дақиқага кўчага югуриб чиқиб, Керманга бир-икки оғиз гапириш ва ойнадан товук гўштини узатиш билан чегараландим. Ўша заҳотиёқ ортга қайтдим, уйни кузатиб турганлардан бирортаси шўрликнинг болохонадор қилиб сўкинганини эшитмасин дедим.

Энди эса нимадир рўй бериши керак эди. Гарчи Дедрик мен учун ҳеч қандай аҳамиятга эга бўлмасда, кутиш асносида ўлгудай азобландим. Тасаввуримга кўра, Серена ҳам шуни бошидан кечирган бўлса керак. У, афтидан жинни бўлаёзгандир.

Нихоят бир неча дақиқа ўтгач, мен катта залда шовқинни эшитиб, ўша ёққа ўтдим. Кенг қора шим ва калта мўйна куртка кийган Серена Уэдлок ҳамроҳлигида шошилиб пастга тушди. Унинг қўлида елим пакетга ўралган учта ўрам бор эди.

Дедрик хонимнинг ранги оқариб кетган, худди касалга ўхшарди. Униққан кўриниши узоқ вақтни азоб билан ўтказганидан далолат бериб турарди.

– Монте-верде кони... Унинг қаерда жойлашганини биласизми? – деб сўради Серена мендан заиф титраган овозда.

– Ҳа. Сан-Диего йўлида жойлашган. Агар транспорт ҳаракати қаршимиздан халақит бермаса, йигирма дақиқа юрсак, ўша ерда бўламиз.

Франклин Маршленд товуш чиқармай пайдо бўлди.

– Қаерда? – деб сўради у.

– Монте-верде конида. Сан-Диегога борадиган катта йўл устидаги унча узоқ бўлмаган ташландик мис кони, – изоҳ бердим мен. – Ўғрилар учун бундан яхшироқ жойни ўйлаб топмайсан, – мен Серенанинг худди бўр каби оқариб кетган юзига назар ташладим. Хонимнинг лаблари титрар эди. – Улар эрингиз тўғрисида сизга ҳеч нима дейишмадими, Дедрик хоним?

– У... Улар пулни қўлларига олишгач, уч соатдан сўнг озод қилишар экан. Қаердан топишни телефон орқали айтишармиш.

Маршленд билан мен кўз уриштириб олдик.

Серена қўлларимни маҳкам ушлаб олди.

– Айтинг, улар мени алдамайдими? Ахир пулларни бергач, ҳеч қандай таъсир кўрсата олмаймиз-ку!..

– Уларни шусиз ҳам қўлга ололмаймиз, Дедрик хоним. Айнан шу омил жиноятчиларни ифлос иш билан шуғулланишга ундайди. Сиз бутунлай уларнинг қўлидасиз, фақат сўзларига ишонишингиз қолади, холос.

– Азизим, пулни фақат жаноб Мэллойнинг ўзи олиб борса бўлмайдими? – деди Франклин Маршленд Серенага. – Сен эса бу ерда иккинчи қўнғироқни кутиб турардинг.

– Йўқ! – У, ҳатто отасига ўгирилиб ҳам қарамади.

– Серена, ақлингни йиғиб ол. Нега энди қалтис ишга бориш керак? Ахир улар сени ҳам ўғирлаши мумкин-ку. Жаноб Мэллойнинг ёлғиз ўзи бу ишни бе-малол эплайди.

Серена умидсизликка берилмаган ҳолда, отасига кескин ўгирилиб қаради.

– Мен бирга бораман. Нима дейишингиздан қатъи назар, мени асло тўхтатиб қола олмайсиз, – деди у телбалардек. – Сиз нима учун бунча оёқ тираб ту-

рибсиз? Биламан, Лининг бу ишдан соғ-омон, зарарланмай чиқишини истамайсиз. Уни кўрарга кўзингиз йўқ. Агар Лини ўлдиришса, сиз ҳаддан зиёд хурсанд бўласиз. Аммо мен уни қайтараман! Эшитяпсизми? Мен уни қайтариб олиб келаман!

– Сен ақлингни еб қўйибсан, – деди Маршленд қизариб кетиб. Унинг кўзлари гарчи ачингандек қараб турган бўлса-да, аммо ишонч билан боқарди.

Серена менга ўгирилиб қаради.

– Хўш, сиз мен билан бирга борасизми?

– Агар тайёр бўлсангиз, Дедрик хоним...

– Ундай бўлса, пулларни олинг ва кетдик!

Серена шахт билан бориб эшикни очди ва пешайвонга югуриб чиқди. Уэдлок менга учта ўрам берди, уларга пуллар солинган эди.

– Сэр, марҳамат қилиб, қизимни эҳтиёт қилинг, – деди у.

Мен зўрма-зўраки кулимсирадим:

– Асло безовта бўлманг.

Маршленд менга қарамай нари кетди.

– Хоним жудаям аччиқланган, сэр, – деди Уэдлок, ўзининг ҳам дили хуфтон эди.

Мен пешайвонга чиқдим ва «Кадиллак»ка яқинлашдим.

– Машинани ўзим бошқараман, – деб ўрамлардаги пулларни орқа ўриндиққа ташладим. – Бир дақиқа, тўппончани олиб келишим керак, югуриб бориб-келаман.

У машинага чиқиб ўтиргунича, «Бьюик» томон шитоб билан югурдим.

– Монте-верде кони, – деб шивирладим мумкин қадар паст овозда гапиришга тиришиб. – Жек, демак,

сен беш дақиқа кутасан, сўнг изимиздан борасан. Иккимизга ҳам қарагин.

Гилам остидан заиф оҳ-воҳ, инграш овози эшитилди. Аммо мен бунга чалғиб ўтирмадим-у, дарҳол «Кадиллак»ка қайтиб келиб, рулга ўтирдим. Серена бурчакка тиқилиб олган, у йиғларди.

– Хафа бўлманг, – дедим, ўзим эса «эҳтимол, йиғлагани яхшидир», деб ўйладим. Унга кўпам эътибор бермасдан, машинани катта тезлик билан ҳайдаб кетдим.

Орхид-бульварга етганимиздан сўнг дедим:

– Сиздан илтимос, тинчланинг ва менга нима қилишим кераклигини айтинг. Агар биттагина нотўғри қадам боссак ҳам эрингизни озод бўлиш имкониятидан бутунлай маҳрум этамиз. Бу разиллар бизга нисбатан кўпроқ ўзлари кўркишади. Шундай экан, ўзингизни кўлга олинг ва улар сизга нима дейишган бўлса, менга айтиб беринг.

У тинчланиб олгунича бир неча дақиқа ўтди.

– Пулларни, – деди Серена ниҳоят, – сарой томида қолдиришимиз керак, у эски шахтага киравериш олдада жойлашган. Билмадим, сиз бу саройни кўрганмисиз ёки йўқми?

– Кўрганман. Яна нима?

– Ўрамлар бир-биридан бир фут масофада қўйилиши лозим. Пулларни қолдириб, шу заҳотиёқ жўнаб кетишимиз керак.

– Хўш, кейин-чи?

У ҳиқ-ҳиқ йиғларди.

– Кейин... ҳар қандай тузоқ қўйишларга нисбатан таҳдидлар бўлди.

– Улар эрингизни телефон ёнига олиб келишмадими?

– Йўқ. Нима, бу ишни қилишлари керак эдими?

– Баъзан шундай қилишади.

Ўғрилар унга эрининг овозини эшиттиришмаган, бу эса Дедрик учун нохуш аломат, аммо мен индамадим.

– Илгари гапирган эркакнинг овози эдими?

– Ўшанга ўхшади.

– Ўша бўғиқ овозми?

– Ҳа.

– Хўп, яхши. Энди бундай қиламиз. Мен конга киравериш жойида машинани тўхтатаман. Сиз машинада қоласиз. Мен пулни олиб, уларни том устига қўяман. Қайтишда рулни сиз бошқарасиз. Вентури-авеньюда машинани тўхтатасиз, мен сездирмай тушиб қоламан, сиз ўзингиз ҳайдаб уйга якка қайтасиз. Тушунарлими?

– Сиз машинадан нега тушасиз?

– Мен уларнинг изига тушишим керак.

– Мутлақо керак эмас, асло – у қўлимдан маҳкам ушлади. – Сиз Дедрикни ўлдиришларини истайсизми? Биз пулларни қўямиз ва уларнинг топшириғини аниқ-тиник бажарамиз. Сиз менга сўз бергансиз.

– Майли, сиз айтгандек бўлсин. Ҳар ҳолда пуллар меники эмас, сизники. Борди-ю, ўғрилар сизни алдашса борми, улар билан бирорта иш қила олмайсиз. Ишонтириб айтаманки, мени кўришмайди.

– Йўқ, – деди у. – Мен улар билан тузган келишувимизни бузадиган ҳаракатлар қилмайман.

«Кадиллак»нинг узун тумшуғини Сан-Диего катта йўли томон бурдим.

– Майли, шундай бўла қолсин, аммо бу нотўғри.

У индамади.



Катта йўлдан машиналар қатнади. Мен ифлос қишлоқ йўлидан конга элтувчи йўлга чиққунимча анча вақт ўтди.

Машина нотекис йўлда ҳар дақиқада чайқалар, атроф қоронғи ва кимсасиз бўлиб, олдинги чироқлар ёруғида гоҳ буталар, гоҳ ахлат уюмлари кўзга ташланарди. Гарчи катта йўлни биздан бир неча ярд масофа ажратиб турса-да, бу ер худди қабристондагидек зимзиё ва жимжит эди.

Олдинда кон дарвозаси кўринди. Баланд ёғоч дарвозанинг бир тавақаси ошиқ-мошиқдан қўпариб олинган, ҳамон осилиб ётарди. Мен «Кадиллак»ни ҳовлига олиб кириб тўхтатдим. Чироқлар абжағи чиқиб кетган узун бетон йўлни ёритиб турарди. Бу йўл шахта устунни томон олиб борган эди.

Рўпарамизда шундоққина сарой – етти фут баландликдаги чириган, ташландиқ иншоот бўлиб, илгари у ерда, афтидан, шахтёрларнинг ишга келишини ҳисобга оладиган ҳисобчи ўтирган.

– Мана келдик, ниҳоят. Сиз мени шу ерда кутинг. Борди-ю, бирор кор-қол юз берса, машинани ташланг ва қочинг.

Хоним индамай саройга қараб турди, гўё у ердан Дедрик чиқиб келаётгандек умидвор бўлди. Юзи бамисоли муздан кесиб ясалгандек кўринарди.

Мен машинадан тушиб, орқа эшикни очдим ва пул солинган ўрамларни олдим. Уларни қўлтиғим остига қисиб, тўппончанинг ғилофини очиб қўйдим-у, тўппа-тўғри бепоён йўлакдан саройга қараб йўналдим.

Катта йўлдаги транспорт шовқинидан бошқа товушни айтмаса, атрофда жимжитлик ҳукмрон. Қўлида тўппонча тутган ҳеч ким йўлимда сакраб чиқмади. Саройгача йўл менга узоқ туюлди: очик ёниб турган авто-

мобиль чироқлари ёруғида қўли тўппонча тепкисида бўлган ҳар қандай киши учун яхшигина нишон бўлишим мумкин. Саройга етиб боргач, енгил нафас олдим. Ўнг қўлим беихтиёр костюм остига ўрмалади ва саройнинг ички томонидаги очиқ турган эшикдан ичкарига мўралаётиб тўппонча дастасини маҳкам чангалладим.

Мени синган стул, бир олам чанг-чунг, йиртилган қоғоз варақлари қарши олди. Эшик орасидан тушиб турган машина чироқлари ёғдуси ўргимчак тўри ёпишиб қолган деворда иккита катта очиқ доғ ҳосил қилди.

Бунча кўп пулни сарой деворига бекордан-бекорга қолдиришни истамасдим, албатта. Чунки Серена эрини ортга қайтаришига кўзим етмаганидек, пулларни энди мутлақо кўрмаслигини ҳис этардим. Аммо мени ақчани бериш учун ёллашган экан, вазифамни бажардим. Ўрамларни занглаган, майишган том устига бир-биридан бир фут ораликда худди товламачилар буюрганидек қилиб қўйиб чиқдим. Бундан ортиқ иш қилмаслик керак. Яқин атрофда беркиниб, нима рўй бераётганини билишни истадим. Аммо мени воқеа жойида топиб олишса, ўша заҳоти Дедрикни ўлдиришлари эҳтимолдан холи эмас. Ана шунда унинг ўлими учун виждоним олдида жавоб беришимга тўғри келади. Серена ҳақ. Унинг яккаю ягона умиди – ўғриларга тўла-тўқис ишо-ниш ҳамда уларнинг зиммасидаги мажбуриятларини бажаришларини кутишдан иборат эди.

Машина томон қайтганимда, бирдан баданим жи-мирлаб кетди: мен қон тўкишни истаган ҳар қандай киши учун ажойиб нишон бўлишда давом этардим. Қизиқ, улар мени кузатиб туришганмикан? Бу ташландиқ конда яшириниш ҳамда кутиб туриш учун яхши жойлар бор. Машина олдига бориб, зарб билан эшикни очдим-да, рулга ўтирдим.

Серена яна йиғлади.

– Агар сиз чиндан ҳам мен билан нима бўлишини кўздан кечиришимни истамасангиз, ортга қайтамиз, – дедим унга қарамай.

– Яхши, кетдик, – деди Серена бўғиқ овозда ва юзини ўгирди.

Дарвозадан чиқаётганимизда, қандайдир кишининг эски ёғочларга бағрини бериб ётган шарпасини сезиб қолдим. Керман бўлса керак, деган хулосага келдим, аммо бунга унчалик ишончим комил эмас. Агар Керман бўлса, у бирор кишини кузатиш имкониятига эга бўларди. Мен зимдан Серенага қарадим, аммо у дастрўмоли билан банд бўлгани учун ҳеч нимани пайкамади.

Мен олдингига нисбатан анча яхши кайфиятда яна «Оушен-энд»га қайтиб келдим.

## 5

Камин устидаги соат миллари чорак кам учни кўрсатарди. Мен катта залда бир ўзим ўтириб, деворга осиб қўйилган кумуш ва олтиндан ишланган мексиканча эгарга нигоҳимни тиккан, аммо ҳеч нимани идрок эта олмасдим.

Серена қаердадир юқорида.

Биз икки ярим соатдан бери кутяпмиз. Елкам оша кутилмаганда эшитилган ҳуштак овози мени кескин бурилиб қарашга мажбур этди.

– Асабларинг қақшаб қолибди, – деди хонага кириб келган Керман. – Нима учун қимматбаҳо ароқ қуйдинг?

– Ҳечқиси йўқ, у ерда яна бор, агар хоҳласанг, – жавоб бердим мен. – Ҳозир бу сенга зарар қилмайдиганга ўхшайди.

– Жоним билан.

У столга яқин келди ва ўзига бир бордоқ ичимлик тўлдириб олди.

– Ана шунақа! Нима дейсан, бугун ҳеч бўлмаса бир соат мизғиб олиш насиб этармикан?

– Ҳозир уйқу тўғрисида гап бўлиши мумкин эмас. Хўш, сен у ерда нимани кўрдинг?

Ёрдамчим қаршимдаги оромкурсига ўзини таппа ташлади.

– Ҳеч кимни. Ҳар ҳолда ўғрилардан ҳеч кимни кўрмадим-у, аммо пулни қандай қилиб олиб кетганларини кўрдим.

– Наҳотки сен ким олаётганига қарамаган бўлсанг? Керман бош чайқади ва шундай деди:

– Бу йигит аҳмоқ эмас. У афтидан, шахта устунларидан бирининг устида турган, у ер эса зим-зиё. Умуман, йигитча саройдан баланд жойда турган бўлиши керак. Унда, билишимча, қармоқ бўлган. Ўрамларнинг ҳаммасига ярайдиган жуда узун ва бақувват қармоқ. Буларнинг ҳаммаси тирик жонга на товуш, на имо-ишора берган. Қандайдир ғалати ҳолат: гўё ғира-шира ой ёғдусида ўрамларнинг ўзи кўтарилиб, номаълум ёққа ғойиб бўлади. Бу қандай ташкил этилганига ҳозиргача фаҳмим етмаяпти.

– Ҳа, жуда усталик билан қилинган, ҳеч нима дея олмайсан. У сени пайқамадими?

– Мутлақо!

– Бунчалик ўзингга ишонма! Масалан, мен сени кўрдим.

– Гаров бойлаб айтаманки, кўрмагансан. Сизлар у ердан кетгунча мен шахтага умуман кирганим йўқ. Машинангиз орқа чироғи ёруғини кўрдим. Шундан сўнг мен худди ҳиндулар каби ўрмалаб шахтага кирдим.

- Шахтадан чиқаётганда, кимни кўрган эканман?
- Ҳар ҳолда мени эмас.

Керманнинг бу жавобидан сўнг ғира-шира шарпаннинг кўринишини эшлашга ҳаракат қилдим. У маълум даражада Керманни эслатар, худди шундай баланд бўйли, озғин ва кенг елкадор эди. Бу гаров ўйнаш учун етарли эмас, аммо ҳар ҳолда...

– Демак, тўданинг бирор-бир аъзоси бўлган. Эҳ, унга синчиклаб қарашни нақадар истардим, – мен соатга назар солдим. – Умуман айтганда, агар улар кўнғироқ қилишни иташса, ўн беш дақиқадан сўнг боғланишади.

Керман мушти билан ҳорғин кўзларини артди ва деди:

– Мен бутунлай ҳолдан тойганман. Машинада беш соат кутиш адойи тамом қилди. Нима деб ўйлайсан, улар Дедрикни қўйиб юборишармикан?

– Билмадим. Агар қўйиб юборишса, бу катта ютук бўларди.

– Мана Брендон, агар Дедрик қайтмаса, у терисига сиғмай кетади, – деди Керман ҳомузасини зўрға тутиб.

– Ҳаммаси учун аёл жавоб беради.

– Ҳа, аммо биз унга ёрдамлашдик. Отаси қизи билан уришишдан кўрқади, аммо бизнинг адабимизни беради.

– Майли, – мен ўрнимдан туриб, столга яқин бордим ва ўзимга яна бир бордоқ содали виски қўйдим.

Хонага Франклин Маршленд кириб келди.

– Шундай қилиб соғ-омон ва шикаст топмай келдингларми? – деди у. – Ростини айтсам, сизлардан ниҳоятда хавотирланган эдим.

У Керманга савол назари билан қаради.

Мен уларни бир-бирига таништирдим.

– Кутиш ниҳоятда узоқ бўлди ва роса чарчатди, – гапини давом эттирди Маршленд. – Улар энди қўнғироқ қилишар балки?

– Келишиб олинган уч соат вақтга беш дақиқа қолди, – деб жавоб бердим мен ва бордоққа виски қуйиб Керманга узатдим-да, унинг ёнига, диванга ўтирдим. – Агар улар жаноб Дедрикни қўйиб юборишса, ўзлари олдинроқ шаҳарга етиб олиш чораларини кўришади.

Маршленд менга кўз қирини ташлаб деди:

– Дедрикни бекордан-бекорга қўйиб юборишмаса керак. Агар улар ярим соат ичида биз билан боғланишмаса, полицияга мурожаат қилишга тўғри келади, деб ўйлайман.

– Бу сизнинг ишингиз, – дедим мен, – аммо, ўйлашимча, шунчалик узоқ кутган эканмиз, энди тонг отгунча сабр қилиш керак. Ҳатто ҳозир ҳам ҳар қандай нотўғри қадам жаноб Дедрикни ҳалок этиши мумкин.

– Менимча, у аллақачон ўлган.

Мен бу беҳуда суҳбатни давом эттириш учун ўзимни ҳаддан ташқари чарчаган ҳис этдим.

– Жаноб Маршленд, сиз нега Ли Дедрикни шунчалик ёқтирмайсиз?

У менинг саволимга эътибор ҳам бермади ва айвонга чиқиб кетди. У ерда икки-уч дақиқа туриб, ортига қайтди ҳамда ички хоналардан бирига қараб йўл олди.

– Бориб кўрай-чи, қизим қай аҳволда экан? – деди биздан кўра ўзига гапириб. – Бу кутиш унинг учун жуда оғир.

Жаноб Маршленд эшик олдида тўхтаб, менга қаради ва:

– Пулни кўзлаб уйланган одам ҳамиша нафратга лойик, жаноб Мэллой, – деб қўшиб қўйди.

У хонадан чиқди ва бизга зинадан тушиб кетаётган қадам товушлари эшитилиб турди.

Керман афтини буриштирди.

– Дедрик пул учун уйланганми? – сўради у шивирлаб.

– Билмайман.

У бош бармоғи билан соатни кўрсатди.

– Қара, айтилган вақтдан беш дақиқа ўтиб ҳам кетибди.

– Ҳм, бу яхшиликдан дарак бермайди. Аммо кутишдан бошқа чорамиз йўқ. Биласан, менга Серена ёқади. Балки у ҳаддан зиёд бойдир, эҳтимол, талтайиб кетгандир, аммо кўнгли ниҳоятда латиф.

Керман кинояли жилмайди.

– Менга кўпроқ кўрс ва қурумсоқ кишилар ёқади, – деди у ва кўзларини юмди.

Дақиқалар кетидан дақиқалар ўтарди. Биз яна бир бордоқдан ичдик ва ниҳоят ухлаб қолдик.

Мени қуёшнинг илк нурлари уйғотиб юборди. Сесканиб кетдим ва соатга қарадим: олтидан йигирма дақиқа ўтибди. Керман қаттиқ ухларди. Денгизнинг нозик мавжли товуши ва боғ адоғидан табиий кўрфаз қирғоғига келиб урилган сувнинг сасини айтмаса ҳеч қандай овоз эшитилмасди.

Мен айвонга чиқдим.

Икки хитойлик боғбон аллақачон ишини бошлаб юборган, улар гул буталарини кўздан кечиришарди. Қўл атрофида қизил ғозлар кезиб юрар, эрталабдан қурбақа овлашарди. Айвон охирида денгизга туташиб

кетган болохонада Серена Дедрик ўтирар, эгнида ҳануз қора шим ва мўйна куртка бор эди.

Унинг юзидаги жонсиз, паришон ифода сўзсиз равишда ҳеч ким қўнғироқ қилмагани ва Дедрик ҳам қайтмаганини аниқ ва равшан намоён этарди.

## УЧИНЧИ БЎЛИМ

Кейинги тўрт кун ичида сокин, тинч ва одатда хотиржам, пинагини сира бузмайдиган Орхид-сити шаҳарчаси ғирт машмашали тўс-тўполон масканга айланди.

Газеталарда талончилар тўдаси беш юз минг долларни олгандан сўнг ўғирлаб кетилган одамни қайтармаганлиги тўғрисидаги хабар босилиб чиқди. Бутун қирғоқ бўйи – Сан-Францискодан тортиб шимолгача ва Лос-Анжелесдан жанубгача ҳаракатга келди.

Дастлаб бир неча соат давомида барча ишларни Брендоннинг ўзи бошқариб турди. У шиддатли фаолиятга киришди. Кейинги юз йилдаги энг катта ўғирликни излаш пайида ташкилий ишларни уюштирди. Аммо эндигина буйруқларни тарқата бошлаганида Сан-Франциско Федерал тергов бюроси агентлигидан бир тўда синчков одамлар келиб, барча ишларни ўз қўлларига олишди.

Миллий гвардия, доимий ҳаракатдаги қўшинлар, авиация, радио ва телевидение – бариси оёққа қалқиган эди.

Керман ва мен соатлаб полиция бошқармасида қаққайиб турардик. Бизни сўроқ қилишар, қайта-қайта сўрайверишарди. Даставвал қутуриб кетган алвон-қизил рангли Брендон муштларини дўлайтирди,



кейин Федерал разведка бюросининг сокин кўринган икки нафар агенти иккимизни алоҳида-алоҳида ажратиб, стол устига «териб» қўйиб, ҳар бир эҳтиёт қисмни ўзларининг узун бармоқлари билан пайпаслаб кўришди. Шундан сўнг бизни яна қайтадан йиғишга уринганларида, бунга фақат ҳайрон қолиш мумкин эди, холос.

Бизга таҳдид қилишди, бизни ҳақоратлашди, тумшуғимиз остида муштларини силташди. Бўйинлари ғазабдан қизариб, кўзларидан олов чакнади, оғизларидан сўлаклар эҳтирос тўлкинида атрофга сочилди. Улар биздан жиноятчиларга олиб борадиган ипни топишга уринишди. Аммо қани? Ҳаммаси натижасиз эди!

«Оушен-энд»нинг оғир вазмин чўян дарвозалари берк, телефон узиб қўйилган. Сарой устида ўлик сукунат ҳукмрон. Овозаларга қараганда, Серена Маршленд юрак хуружига учраб, касал бўлиб ётган экан.

Кўчада юриб бўлмаётган қолди. Ҳар ўн қадамда қандайдир ўткинчи мухбир ўзининг фотоаппаратини чиқиллатади. Керманни (газеталар уни «гаров пулини қандай қилиб олиб кетишганини кўрган киши» деб таърифлашарди) эртадан-кечгача, қуёш чиққанидан ботгунига қадар қуршаб олишар, дастхат ва тирноқ бўлаклари, соч қисмлари ҳамда қўйлак парчаларидан коллекция йиғувчи ҳаваскорлар ҳол-жонига қўйишмас, шу боис унинг идорадан ташқарига чиқишга юраги безиллаб қолган эди.

Кун бўйи шаҳар тепаси ва унинг атрофларида вертолёт айланиб, қум тепалар, баландлик ва чакалакзорларни кўздан кечирилади. Барча йўллар беркитилган, патруллар томонидан текширилади. Шаҳарда уйлар бирма-бир кўздан кечирилиб, шубҳали кишиларнинг

хаммасини тутиб сўроқ қилиш канда қилинмайди. Полициянинг катта отряди шаҳарнинг жанубий чек-каси – Корал Гейблсни ўраб, жиноятчиларни топиш илинжида унинг барча яшовчиларини қуршовга олган.

Умуман айтганда, ҳар томонда шиддатли фаолият қайнаган, аммо ФҚБ агентларининг бор саъй-ҳаракатига қарамай, полиция, миллий гвардия ва юзлаб хаваскор изқуварлар на Дедрикни, на уни ўғирлаган кишиларни топишга муваффақ бўлди.

Ниҳоят бешинчи куни Серена Маршленд тўсатдан ўзининг мотамини бузди-ю, эрини шахсан ўзи излашга киришди. Газеталар, радио ва телевидение орқали жар солиб, жиноятчиларни қўлга туширишга ёрдам берадиган маълумотларни тақдим этган кишига йигирма беш минг, одам ўғирлаш билан боғлиқ ҳар қандай ахборотни етказган фуқарога эса минг доллар беришини эълон қилди. Натижада шаҳарликларнинг деярли барчаси (бир неча бадавлат кишиларни ҳисобга олмаганда) изқуварларга айланди, шаҳар бамисоли дўзахнинг ўзи бўлиб қолди.

Ва ўша оқшом, гаров пулини тўлаган кундан олти кун ўтгач, мен бахтга эришган одам сифатида бу ёввойи тўс-тўполонни тарк этдим. Эртароқ қулфланиб олиш ва ухлаш учун ўзимнинг сокин гўшамга қайтиб келдим.

Коттеж уйим океандан унча узоқ бўлмаган дўнг кумтепалар ортида жойлашган. Қўшнилар билан орамиз чорак милдан иборат. Уйда кичикроқ боғ бўлиб, бегона ўтлар ўсиб ётади. Боққа жажжи хизматкорим Тони қараши керак, аммо у ўлгудай дангаса ва ишёқмас. Уй қуёшдан сақланадиган пешайвон, катта меҳ-

монхона, иккита ётоқхона, ванна ва ошхонадан иборат. Ошхона шу даражада «кенг»ки, унда фақат мушук ётиши мумкин, шунда ҳам думи бўлмаса.

Уйнинг асосий афзаллиги – хилват гўшада жойлашганида. Бу ерда кўшнининг радиоси овозини эшитмайсиз. Шу билан бирга ваннада бемалол хиргойи қилишингиз мумкин, деразага ғишт бўлаги келиб тегади, деб асло кўркмайсиз.

Бу – хилватда эканлиги билан томоғингиздан бўғизлашга тайёр ҳар қандай киши учун идеал жой: ёрдам сўраб қичқиришлар шунчалик беҳудаки, гўё пашша ғинғиллашидек туюлади, холос.

Мен калитни қулф тешигига тикқанимда, бирдан ортимда қандайдир ўғринча қадам товушини эшитдим. Аслида асабларим темирдек мустаҳкам, аммо кейинги беш кунлик ҳаяжонланиш ва зўриқиш оқибатида улар кучли равишда ишдан чиққан эди. Мен бурилиб, қандайдир қора шарпанинг юзига юзим урилиб кетди-ю, бақириб юбордим. Беихтиёр равишда уриш учун кўтарилган кўлим тўхтаб қолди: рўпарамда аёл киши турарди. Мен панжаларимни ёйиб нафасимни ростладим, иложи борича хотиржам оҳангда дедим:

– Одамни шу даражада билдирмай писиб келиб кўрқитиш яхшими? Мен сал бўлмаса сизни уриб юборардим.

– Сиз Мэллоймисиз?

Мен рўпарамда турган сиймога тикилиб қарадим. Айвон ҳаддан ташқари қоронғи бўлиб, яхшилаб тикилган билан ҳеч нимани аниқлаб бўлмасди.

– Ҳа, Мэллойман, ўзингиз ким бўласиз?

– Сиз билан гаплашиб олишим керак. Бирор ўтирадиган жойга ўтсак дегандим.

Хонани кесиб ўтар эканман, бу аёлнинг овози тошни тешадиган даражасида ўткирлигини ҳис этдим. Мен у билан деярли ёнма-ён турардим. Ниҳоят қўлимни чўзиб чироқни ёққанимда, бир жуфт жигаранг кўзни кўрдим. Уларда бу дунёдаги барча саволлар ва унга жавоблар зоҳир эди.

Рўпарамда йигирма тўрт-йигирма беш ёшлардаги қорачадан келган жувон турарди. Ўртасидан фарқи очилган қалин қора сочлари анчагина мафтункор чехрани кучган. Маҳкам қимтилган алвон лаблар ва кўзлар атрофидаги «соя» аёлга эҳтиросли кўриниш бериб турибди, бу ҳар қандай эркакни қайрилиб қараш, қизиқишга мажбур этади. Истаганига эриша оладими ёки йўқми, бу номаълум, албатта. Шим ва яшил курткага жипс турган вужуд дунёдаги энг яхши корсетларни етарли даражада реклама қилишга кифоя қиларди.

– Хэллоу, қизалоқ, – дедим унга қараб, – сенга айнан мен кераклигимга ишончинг комилми?

– Агар сизнинг жаноб Мэллой эканлигингиз аниқ бўлса, унда, албатта, ишончим комил, – жавоб берди у хонага кирар экан, қўлини шимининг чўнтагига чуқур тикиб, менга синовчан тикиларкан. – Мени Ник Пирелли юборди.

– Нега? – деб сўрадим диққат билан термилиб, мендан нима кераклигини билмоқчи бўлгандай. – У яна бирор кишини калтаклаб ағанатдими?

– Йўқ, Ник билан бахтсизлик рўй берди, – деди қиз. – Уни Дедрик иши бўйича қамашди.

Жимлик чўқди, фақат камин устида турган соат чиқиллаб ишлар, ошхонада эса совуткич гулдиранди, холос.

Қиз бошини бироз эгганча менга тикилишда давом этар, сигарета тутуни кўзига кирмаслигига ҳаракат қиларди.

– Пиреллиними? – хитоб қилдим ҳаяжонланиб.

Қиз бош ирғади.

– У сизни зеҳни ўткир йигит деди. Шундай экан, зеҳнингиз ўткирлигини намоён этиб, ҳаракат қилинг. Бундай айбловни олиб ташлаш учун зўр ақл-идрокли одам керак бўлади.

– Қачон қамашди?

– Бир соат олдин, – у елкаси оша соатга назар солди.

– Янаям аниқроғи, соат бирдан беш дақиқа ўтганда.

– Федерал разведка бошқармаси агентларими?

Қиз бош чайқади.

– Йўқ, қандайдир силлик, яхши кийинган бақалок одам иккита изқувар билан бирга. Полициячи кийимидаги икки киши кўчада машина ёнида навбатчилик қилиб туришди.

– Брендонми? Паст бўйли, семиз, сочлари оқарган киши?

– Ҳа, шунга ўхшаш. Ким ўзи у?

– Округ полицияси бошлиғи.

Қиз яна битта сигаретани суғуриб олиб, ўзининг тирноқларига қаради ва қовоғини уйди.

– Полиция бошлиғининг ўзи қамоққа олишини биринчи марта эшитяпман.

– Агар иш кенг тус олиб, қартага кўп пул тикилган, шу билан ном қозониш мумкин бўлса, шундай ҳолат юз беради. Бундан ташқари Брендон ФҚБ агентларидан ўзиб кетишни хоҳлайди.

– Мана, ўзиб кетди, – қиз каминдан узоқлашиб диванга ўтирди. – Ник айтдики, уни сиз турмадан чиқара оларкансиз. Эплейсизми?

– Билмадим. Аммо унинг олдида қарздорман, қўлимдан келганини адо этаман. Нима қилишим кераклигини Пирелли айтдими?

– Ҳеч нима демади. Ҳаддан зиёд ўзини йўқотиб қўйган. Бу қадар эсанкираб қолганини кўрмаганман. Ундан тўппончани топиб олишганида, менга тезда ҳузурингизга етиб боришимни тайинлади.

Мен буфет олдида бориб, бир шиша шотланд вискиси ҳамда иккита бордоқ олдим ва стол устига қўйдим. Совутгичдан совуқ сув қўйилган графинни чиқардим.

– Гап бундай, қани, бир бошдан гапириб берингчи. Ана шунда унга тезроқ ёрдам кўрсатган бўламиз. Сизга аралаштирилган вискими ёки аччиқроғими?

– Сиздаги зеҳни ўткирликда тасаввур етарли эмасга ўхшайди. У ерда Пиреллининг миясини чақиб ётишибди. Сиз эса шундай пайтда менга ичкилик таклиф қиляпсиз. Ҳозир кўнгилга сиғармиди?

Ўзимга ўткирроқ ичимлик тайёрлаб, ўтириб олдим.

– Балки билмассиз, кўрқувларингиз унга мутлақо ёрдам бермайди.

У ўрнидан сакраб турди, кескин икки қадам ташлаб, остонада тўхтади ва яна диванга қайтиб ўтирди. Муштини кафтига ура бошлади.

– Сизнинг ўзингиз унга ким бўласиз?

– Мен Майра Торес бўламан. Унинг маъшуқаси.

– Хўп, яхши. Энди келинг, ишингиз билан машғул бўламиз. Менга ҳаммасини бир бошдан гапириб беринг, дадилроқ.

– Мен унинг олдида полиция билан деярли бир вақтда келдим, – деди қиз гап бошлаб, сўнг тутилмай давом этди. – Ник иккимиз кинога боришга келишган эдик. У кечикди. Мен кўнғироқ қилдим. Шунда фикридан қайтганини айтди ва ҳузурига чақирди. Мен

уйига йўл олдим. Лифтда ана шу учта нусха билан бирга кўтарилдик. Мен дарров уларнинг полициядан эканлигини фаҳмладим. Тўртинчи қаватда лифтдан чиқдик. Мен уларни олдинга ўтказдим. Улар Никнинг эшиги олдида тўхташди. Иккитаси эса тўппончасини чиқарди. Нима қилишларини кузатиб турдим. Мени пайқашмади. Семизи эшикни тақиллатди, эшик дарров очилди. Ник, афтидан, уни мен деб ўйлади. Полициячилар унга ташланиб, қўлларига кишан солишиб, сўнг уйни тинтишга тушиб кетдилар. Ник нима бўлаётганини билолмай гангиб қолган эди. Эшик очилгича қолди, мен у ёққа қарадим. Ник девор олдида тураркан, менга кўзи тушиб, эҳтиёт бўлиш тўғрисида ишора қилди. Мен йўлакка чекиниб, кузатишни давом эттирдим. Шунда улар диван тагидан тўппонча топиб олишди. Брендон даҳшат ичида ғазабланиб кетди. У бу қуролни Дедрикнинг ҳайдовчиси Суюки отилган тўппончанинг айнан ўзи, деди. Ана шунда Ник ҳақиқатан бу ҳазил эмаслигини билиб, эсанкираб қолди. Биз қарта ўйнаб, шундан тирикчилик қиламиз ва лабларнинг қимирлашига қараб, уни ўқий оламиз. Қарта ўйини иш бермай қолган пайтда ана шу ёрдам беради. У менга дарров олдингизга боришим кераклигини «айтди». Полициячилар бақириб, Никка ташланиб, калтаклашни бошлашганда, мен кетдим.

– Брендон Суюки отилган ўша тўппончани қай тарзда топиб олди ёки қандай билди?

Майра бош чайқаб деди:

– Билмадим.

– Хўш, кейин-чи?

– Мен кўчанинг нариги томонида кутиб турдим. Ярим соатдан сўнг уни уйдан судраб олиб чиқишди – оёқлари зўрға судралар, юзи ва кўйлаклари қон-

га беланган эди. Уни полиция машинасига ўтқазиб олиб кетишди. Мен эса дарҳол сизга қараб югурдим.

Майра кулдондан сигарета қолдиғини олиб, анча вақтгача тикилиб қолди.

– Сизга Дедрикнинг ўғирланиши билан боғлиқ бирор маълумот аёнми?

Майранинг жигарранг кўзлари менинг кўзларимга термилди.

– Бу ҳақда фақат газеталардан огоҳ бўлдим.

– Шундан бошқасини билмайсизми?

– Йўқ.

– Ник-чи?

– У ҳам билмайди. Ник бундай ишларга ўзини тикиштирамайди, йўқ. Биз, албатта, ўйинда товламачилик қиламиз, аммо бу ҳам кейинчалик асло иш бермайди.

– Уни илгари ҳам ҳибсга олишганми ёки шунга ўхшаш...

Қизнинг қарашлари ниҳоятда қатъий тусга кирди.

– Бўлган.

– Ўтириб чиққанми?

– Ҳа. Сан-Францискода икки йил беришганди.

Аммо бор-йўғи тўрт ой қамоқда ўтирди, холос.

– Бунга қадар-чи?

– Сиз ҳаддан зиёд кўп билишни истамаяпсизми?

– Мен унинг таржимаи ҳолига доир ҳамма маълумотни билишим керак. Бу жуда муҳим!

– Саккиз йил давомида Ник уч марта қамоққа тушган. Биринчи марта олти ой, сўнг бир йил, шундан кейин яна икки йил.

– Қаллоблик қилгани учунми?

У бош ирғади.

– Бирор кишини калтаклашига тўғри келмаганми?



– Йўқ, бу ҳақда ҳеч ким шикоят қилган эмас.

– Энди Дедрикнинг ўғирланиши хусусида. Унинг бу ишда иштирок этмаганига ишонасизми? Балки, сиздан яширинча қатнашгандир?

– Ник иштирок этмаган. Бундай ишлар унга тўғри келмайди. Сиз тушундингизми ёки йўқми?

Мен Майрани текширишга аҳд қилдим.

– Хўп, яхши. Энди келинг, нима қилишимиз керак-лигини ўйлаб кўрайлик.

Мен телефондан рақам тердим. Кимдир хушмуомала овозда жавоб берди:

– Франкон турар жойи эшитади.

– Жаноб Франкон уйдами? Вик Мэллой гапиряпти.

– Ҳа, сэр. Ҳозир сизни улайман.

Бир дақиқадан сўнг Франкон гўшакни олди:

– Хэллоу, Вик, сизда кечаси нималар рўй берди?

– Бир соат муқаддам Брендон ўзининг йигитлари билан дўстларимдан бири Ник Пиреллининг Жефферсон-авенюдаги уйига бостириб кирибди. Тинтув пайтида тўппонча топиб олган ва Ли Дедрикнинг ҳайдовчиси шу қуролдан отиб ўлдирилган, деган. Шунга кўра Дедрикни ўғирлашда иштироки бор, деб Пиреллини ҳибсга олган. Мен бу ишга аралашингизни истайман, Юстин, ҳақ тўлашни кафолатлаймиз. Сиз зудлик билан полиция бошқармасига бориб, уни ўз ҳимоянгизга олишингиз керак. Улар ҳозир Пиреллининг ичак-чавоғини ағдариб, тинкасини қуритишаётгандир. Бу ишни албатта тўхтатиш керак. Хўш, бажарасизми?

– Унинг ҳақиқатан ўғирликка қандайдир алоқаси борми?

– Билмадим. Аммо Пиреллининг маъшуқаси билиши керак. Лекин у ҳам алоқаси йўқ, демоқда. Бу иш

кимдир томонидан ўйлаб қилинган, акс ҳолда Брендон тўппончага бир қараб, ундан ҳайдовчи ўлдирилганини қаердан билади? Брендоннинг ўзи ёки ўша одам тинтув пайтида қуролни қўйиб қўйган ёки Пиреллинг уйдан топиб олишини аниқ билган.

– Шундай дейиш мумкинми, Мэллой? – деди анча қарахт бўлиб қолган Франкон.

– Мен буни расмий равишда айтаётганим йўқ. Агар Брендон бу ишни очиб, ФҚБ агентларидан ўзиб кетса борми, бошлиқлар олдида шунчалик юқорига кўтарилади. Шу боис ундан ҳамма балони кутиш мумкин.

– Пирелли деганингиз ким ўзи?

– Қарта қиморбози, ўтмишда қаллоблиги учун қамалган шахс.

– Бу ёмон. У сизга қайси томондан яқин?

– Пирелли менга бир вақтлар катта ёрдам берган эди. Ва менинг сизга шахсан топширигим шундаки, Юстин, у ерга тезроқ етиб бориб, қонун бузилишини тўхтатинг.

Тоқатни тоқ қиладиган жимлик чўқди. Франкон эшитганларини қайта мушоҳада қиларди. Мен уни шоширмадим.

Ниҳоят Франкон шундай деди:

– Мен-ку, умуман бу ишга аралашмоқчи эмасман, Брендонда, афтидан, бундан бошқа янада ишончлироқ далиллар бўлса керак. Фақат битта шу тўппонча бўлмагандир?

– Балки бордир, аммо гап фақат бунда эмас. Пирелли илгари судлангани боис бу ишни унинг бўйнига қўйишга мойил эмасмисиз, мабодо?

– Албатта, йўқ. Майли, Вик, мен бориб кўриб чиқаман. Аммо олдиндан огоҳлантириб қўяй, борди-ю йигит айбдор бўлса, у ҳолда ўйиндан чиқаман. Бу иш

ҳаддан зиёд овоза бўлиб кетган, Пиреллини ҳимоя қилиш ютқазिश билан баробар.

– Барибир, менинг назаримда, бу иш тўқиб чиқарилганга ўхшайди. Нимаики бўлмасин, полиция идорасига бориб, ўзингиз ишонч ҳосил қилишингизни истардим. Уни қанчалик бураган бўлишмасин, сиз кўрқиб ўтирманг. Юстин, бу иш билан мен, ўзим ҳам шуғулланиб кўрмоқчиман.

– Майли, бораман. У ерда нималар борлигини кўрайлик-чи! Сиз эса эрталаб, ишхонамга бир кириб ўтинг.

– Мен сизга бугун кечқурун қўнғироқ қиламан.

У эътироз билдиришга улгурмасданоқ гўшакни осиб қўйдим. Майра менга савол назари билан қаради.

– Ким бу?

– Юстин Франкон. Қирғоқ бўйи ҳудудида энг яхши адвокатлардан бири. Агар Пиреллининг иши оқ ришта билан боғланган бўлса, уни турмадан чиқармагунча асло тўхтамайди.

– У ҳозир ўша қаёққа борадими?

– Ҳа, бориб Брендонга халақит беради.

Майра янги сигарета чекди. Қўллари сезиларли даражада титрар эди.

– Ник менга сизнинг манзилингизни бежиз бермаган экан.

Бу гаплар унинг лабларидан худди мақтовдай эшитилди.

Мен бордоқдаги ичимликни охиригача сипқориб ўрнимдан турдим.

– Сизни қаердан топишим мумкин?

– Монте-верди-авеню, 245. Кўчанинг ўртасида турганда, чап томонидаги кичкина яшил уй. У ерда ёлғиз ўзим яшайман.

Мен манзилини ёзиб олгунимча Майра қўшиб қўйди:

– Эҳтимол бир олам пул керак бўлар?

– Бир пайтлар Пиреллига ёрдам беришга ваъда берганман, бунинг устига бепул. Бу ваъда ҳозиргача ўз кучида турибди.

– Раҳмат.

– Арзимаёди. Мен унга ҳаётимни бағишласам ҳам арзийди. Энди гапларимга диққат билан қулоқ солинг. Мен ҳозир полиция бошқармасига бормоқчиман. Полицияда Пиреллига қарши қандай далиллар борлигини билмай туриб, кўп ишни амалга ошира олмаслигим ўз-ўзидан маълум. Эҳтимол, Ник билан бир-икки оғиз гаплашишимга тўғри келар.

– Полиция у билан гаплашиб олишингизга рухсат беради, демоқчимисиз?

– Билмадим. Қотиллик бўйича ишларни тергов қилишга масъул лейтенант дўстим бор. Балки ўша менга кўмаклашар.

Қандайдир сониялар ичида Майранинг кўзлари чарақлаб кетди, ёрқин бўялган лаблари титради.

– Никка айтинг, мен уни севаман, – деди сокин овозда.

## 2

Мен Принцесс-стрит – Сентрал-авеню чорраҳасидан ўтган вақтимда, Пиреллининг қамоққа олингани тўғрисидаги хабар бутун шаҳарга тарқалиб бўлган эди. Полиция бошқармасига боришим учун машинада беш юз ярд масофани босиб ўтишим керак. Принцесс-стрит муюлишига қараб ҳаракат қилдим, аммо

қандайдир полициячи калтаги билан менга таҳдид қилиб, Сентрал-авенюга, ортга қайтишни буюрди. Бошқа учта полициячи эса қолган машиналар йўлини тўсарди. Орхид-бульварга қайтишдан олдин мен Принцесс-стрит йўлакларигача чиқиб кетган улкан оломонни кўрдим, одамлар кўприк устида чайқалиб туришарди.

Машинани тўхтатиб, пиёда одимладим.

Полиция бошқармаси рўпарасида оломон тўдаси дақиқа сайин кўпайиб борарди. Полициячилар томонидан ҳақорат, ҳар қандай таҳдид уларга заррача таъсир кўрсатмасди: одамлар жиноятчини ўз кўзлари билан кўриш учун келишган, ҳатто фиръавнларнинг ҳар қандай лаънати ҳам уларни тўхтата олмасди.

Бино эшиги олдида қўлларида оғир тунги калтакларни ушлаганча Брендоннинг шахсий гвардияси турарди. Уларнинг сафини ёриб ўтиб, бинога кириш чақирилмаган яҳудий динига эътиқод қилувчи кишининг Оқ уйга кириши имкониятидан ҳам камроқ.

Мен кўчанинг нариги томонида жойлашган дорихонага минг машаққат билан ўтдим. Эшик ёнида ўйланиб турган оқ халатли тунги навбатчини ҳисобга олмаганда, ичкарида одам йўқ эди.

– Мен фақат қўнғироқ қиламан, холос, – дедим унга.

Навбатчи нигоҳини истар-истамас оломондан узиб, пештахта олдида келди.

– Ана шунақа ишлар! – деб хитоб қилди у. – Айтишларича, Брендон ўғрилардан бирини тутиб олган эмиш. Хўш, энди йигирма беш минг доллар мукофотни олармикан, сизнингча? Уҳ, бу пуллар менда бўлса эди! Агар топганимда, бир дунё пулни нималарга сарфлашни яхши билардим.

Мен тушуниб бўлмас тарзда сўкиниб, телефон-автомат будкасига кирдим-да, телефончи қиздан полиция бошқармасини улаб беришини илтимос қилдим.

– Иложи йўқ, – деди у. – Тармоқларнинг ҳаммаси банд. Йигирма дақиқадан бери ўша ёққа кўнғироқ қиляпман, ammo натижа чиқмаяпти. У ерда нималар бўляпти ўзи?

– Қандайдир полициячи тугмаларини тозалади, бу вақтда эса бутун полиция иш ташлашни эълон қилди, – дедим мен ачитиб ва гўшакни жойига қўйдим.

Яна дорихонанинг совуқ залига қайтиб келдим. Навбатчи дераза олдидаги стулга чиқиб олиб, яхшироқ разм солиб қарар эди. Бу вақтга келиб, оломон дорихона деразаларини бутунлай тўсиб қўйганди. Менинг бу ердан чиқиб кетишим қийинга ўхшаб қолди.

– Ана, ФҚБ агентлари ҳам келишди, – деди дорихоначи ҳаяжонланиб нафас олар экан. – Гаров ўйнаб айтаман, улар доғда қолишди. Бу Брендон дегани шунчаки аҳмоқ эмас. Энг яхши полиция бошлиғи, бундайини биз кўрмаганмиз.

– Бу ердан кўчага қандай қилиб чиқиб кетсам бўлади? – тоқатсизланиб сўрадим мен дорихона олдида девордай қалин турган одамлар орасини ёриб ўта олмагач.

– Кетиб нима қиласиз? Яхшиси стулни олинг-у, ёнимда туринг. Кўриш учун бундан яхшироқ жой топа олмайсиз.

– Хўш, нимани кўриш керак ўзи?

Дорихоначи менга ҳайрон бўлиб, ковоғини уйиб қаради:

– Нимани кўриш керак дейсизми? Балки ҳозир жиноятчини олиб ўтишар ёки Дедрик хоним уни ўз кўзи

билан кўриш учун келар. Ҳамма нарса бўлиши мумкин. Қани менинг Люсим шу ерда бўлса эди: бундай томошалар унинг жону дили.

– Сизда бошқа чиқиб кетадиган эшик борми?

– Ҳув анови чап томондаги эшик. Тўппа-тўғри Орхид-бульварга чиқасиз.

– Раҳмат.

Чап тарафдаги эшикни очар эканман, оломон ўзини орқага ташлаганини кўрдим: синган ойналарнинг овози эшитилди – дорихона ойнаванд деразаларидан бири оломоннинг босимини кўтара олмади ва чидаш бермай синиб кетди. Мен келтирилган зарарга гувоҳ бўлиш учун қараб турмадим ва орқа эшик ортидаги узун йўлакдан ўтиб, Орхид-бульварнинг охириги қоронғи хиёбонига тушиб қолдим.

### 3

Мифлин хотини, икки фарзанди, немис бульдоги ити, бир жуфт ангор мушуги ва саъваси билан Вествуд-авенюдаги мўъжазгина уйда истиқомат қилади. Хизмат муддати тугагач, у хонанишин бўлиб қолади. Лейтенант кичкина, қилтириқ хотинидан бошлиғи Брендонга нисбатан кўпроқ кўрқади, деган овозалар юради. Мен қандай бўлмасин, ёмғир, момақалди роқ ёки қорга қарамай, у билан кўришишни хоҳлардим.

Уй яқинига келиб, дарвоза олдида машинани тўхтатдим. Соат миллари ўн биру йигирма дақиқани кўрсатиб турарди. Мен Мифлин ишини қачон тугатишини тасаввур ҳам қила олмайман, аммо бугун бошқармада ҳукм сурган тўполондан сўнг унинг уйга кеч қайтиши очик-ойдин аён.

Кулай жойлашиб ўтирдим-у, узоқ кутишга тайёрланиб чекдим. Пастки қаватлардан бирида чироқ ёнди ва вақт-вақти билан парда ортида аёл кишининг сояси кўриниб турди. Тахминан ўн бирдан қирқта ўтганида пастки чироқ ўчди ва иккинчи қаватда ёнди. Бироз вақтдан сўнг у ҳам ўчди ва уй бутунлай қоронғилик ичида қолди.

Мен кўзларимни юмиб, Пирелли тўғрисида ўйла-масликка ҳаракат қилдим. Барча далилларга эга бўлмасдан туриб, тахмин ва чамаларга берилишни асло истамасдим. Франкон Брендон бахтсизлик келтирган бу тўппончадан ташқари бошқа анча ишонарли далилларга эга бўлиш керак, деганида ҳақ эди, албатта. Кимдир йигирма беш минг долларга кўз олайтирган-у, полицияга махфий равишда хабар қилиб, тағин ўзи (шу мўмай пул учун) жўрттага айбловга мос далилларни ўйлаб топган – шундай деб айтиш мумкин эди.

Қандайдир машина ўкирганча тоққа кўтарилди. Бир дақиқа ўтгач, чироқлар ёғдуси автомобилнинг олд ойнасига урилиб, сал бўлмаса мени кўр қилаёзди. Машина ёнимга келиб тўхтади. Мен умид билан бошимни ойнадан чиқардим. Бу ўша полиция лейтенанти Мифлин эди. У машинага ирганиб қарар эди.

– Эй, бу занглаган темир-терсакни йўлдан олинг ва денгизга улоқтиринг! – деди у аччиқланиб. – Сиз ҳовлимга кирадиган йўлимни тўсиб қўйгансиз!

– Хэллоу, Тим! – дедим мен «Бьюик»дан тушиб.

У ҳайрон бўлиб менга тикилиб қаради.

– Сенмисан? Жин ургур, бу ерда нималар қилиб юрибсан?

Мен Мифлиннинг машинаси эшигини очиб, у билан ёнма-ён ўтирдим.



– Ҳа, биласан, ёлғизликдан даҳшатга тушдим ва сен билан бироз чақчақлашай дедим.

– Туёғингни шиқиллат, бугун бўларимча бўлдим. Мен ухламоқчиман.

– Улгурасан, Тим. Брендон нега Пиреллини қамоққа олди?

– Сен буни қаердан биласан? – норози бўлиб тўнғиллади Мифлин. – Эртага бу ҳақда газеталардан ўқиб биласан, ҳозир эса мени тинч қўй. Бугун етарлича бўлди. Бизда ҳамма эздан оғиб қолай деди – қандайдир оломон дабдурустан йиғилиб қолди.

– Биладан. Мен ҳам тўдани кўрдим. Тим, менга кулоқ сол! Пирелли – менинг дўстим. У Дедрикни ўғирламаган. Бундай ишлар қўлидан келмайди.

Мифлин оғир хўрсинди.

– Қани, чекишга бер-чи. Меники аллақачон тамом бўлган.

Мен унга сигарета ва гугурт узатдим.

– Тим, сен уни Дедрикни ўғирлаган, деб ҳисоблайсанми?

– Билмайман. Балки, шундайдир, аммо кўпроқ ўғирламаганга ўхшайди. Франконни сен юборганмидинг?

– Ҳа. Демак, Пиреллининг олдига кириб боришга улгурибди-да?

– Франкони тўхтатиб бўлармиди! У Пирелли билан кўришган, ана шу ҳаётини сақлаб қолди. Бизнинг каллаварам зўравонлар сал бўлмаса сўроқ пайтида ўлдираёзган эдилар.

– Пирелли тўғрисида кимдир телефон орқали полицияга қўнғироқ қилган, шундайми?

Мифлин бош ирғади.

– Ҳа, айнан ана шу иш мени ўйлашга мажбур қилади. Бу ёлғон хабар бўлиши керак. Қандайдир нусха

телефонда Брендонни сўради. Кўряпсанми, уни бошқа киши қизиқтирмаган. Брендон у билан гаплашиб қолди. Бу нусха кимлиги, қанақалигини айтмади, демак, йигирма беш минг долларлик мукофотдан воз кечди. Ана шу менга жуда шубҳали туюлди. Соғлом фикрга эга одам бунча мўмай пулдан юз ўғирмаган бўларди. Бу ишга ўзи аралашмаган бўлса, албатта. Шундай қилиб, ўша одам Брендонга Пиреллининг манзилени маълум қилди ва диван тагидан тўппонча ва бошқа далилларни полиция топиб олади, ана шуларнинг ўзи уй эгасининг Дедрикни ўғирлаши учун етарли асос бўла олади, деди. Брендон мен ким билан гаплашяпман, деганида, у кўрқиб, гўшакни дарҳол қўйди. Биз унинг Корал-Гейблсдаги телефон-автоматдан қўнғироқ қилганини аниқладик. Аниқлаганимиз ана шулардан иборат.

– У Пиреллини ўлгудай ёмон кўрадиган одам бўлиши керак.

– Эҳтимол, аммо қуён юракли ўғрилардан бири бўлиши ҳам мумкин. Билмадим. Ҳар ҳолда, нима бўлса ҳам Брендоннинг ўзи шахсан қамоққа олди. Биласанми, у нимани топди?

– Тўппончани.

– Фақат шуни эмас. У юз минг долларлик учта лойга ботган илгари ишлатилган клеёнкани ва афтидан сарой тоmidан пулни олишга ёрдам берган қармоқни ҳам топди.

Мен ҳайрон бўлганимдан астагина ҳуштак чалиб юбордим.

– Уларни қаердан топди?

– Пуллар жавондаги жомадончада, ўрамлар эса буфет орқасида, қармоқ эса каравот остида ётган экан.

– Қани, айт-чи, қайси эсли-ҳушли одам шундай хавфли жиноят белгиларини ўз уйида сақлайди? На-

хотки уларнинг ҳаммаси кимдир томонидан ўша ерга ташлангани аниқ-равшан бўлмаса?

– Кулоқ сол, Вик! Брендон қандай бўлмасин ФҚБ агентларини тезроқ шаҳардан ҳайдаб чиқаришни истайди. Пиреллининг ўтмиши эса жинойт билан боғлиқ, у қамоқда ўтириб чиққан. Брендон учун у жуда яхши топилма. Шундай экан, капитан қайси томондан қараса ҳам, барибир бу ишнинг ўйлаб топилганини кўрмайди.

– Пиреллида ўзини оқлайдиган асослар борми?

– Бор, лекин унчалик ишончли эмас. У Дедрик ўғирланган пайтда Дельмоника барида Жо Бетильо билан алоҳида хонада қарта ўйнаб ўтирганини айтган. Биз Жони сўроқ қилдик. Унинг айтишича, Пирелли у билан фақат кечаси соат ўн яримгача ўтирган. Жо вақтни яхши эслаб қолган, чунки Пирелли уни ўйинда ютган, сўнг бирдан учрашувим бор, деган-у, кетиб қолган. Жо қаттиқ ранжиган, чунки ютиб олишдан умидвор бўлган. Пирелли эса қасам ичиб, соат ўн бир яримгача ўйнаганини айтади. Ўғирлик эса, сен эсланг керак, ўн бирдан ўн дақиқа ўтганда содир бўлган.

– Пирелли бардан чиқиб кетганини ҳеч ким кўрганми?

Мифлин рад этиб, бош чайқади.

– У яширин эшикдан чиқиб кетган.

– Аммо Бетильога ўхшаш каламушга ким ҳам ишонарди?

– Брендон! У ФҚБ агентларини шаҳардан чиқариб юборгунча ҳар қандай кишига ишонаверади. Мени ҳаммадан кўпроқ пуллар саросимага солади, Вик. Қандайдир Пиреллини қамоққа тиқиш учун бунча катта пулни ташлаб юбориш даҳшатдан иборат. Бунинг учун икки мингнинг ўзи етарли эди.

– Ҳаммаси уни нега ташлаб юборишганига боғлиқ. Ўғриларда яна тўрт юз минг қоляпти. Бу пулга қўшиқ айтиб яшашлари мумкин. Бунча катта миқдордаги маблағ барчани худди сен каби ўйлашга мажбур этади.

– Аммо бунча пулнинг кадрига етмасликни ҳам мутлақо тушунмай турибман.

– Сабаби шундаки, сенга кам тўлашади. Бизнинг шаҳарда ўйлаб-нетиб ўтирмасдан юз минг пулни со-вуриб юборадиган бир ҳовуч одамлар топилади.

– Судьяларга ҳам кам тўлашади, шунинг учун улар ҳам ишонишади.

Мен сигарета кулини деразадан улоқтириб, елкаларимни қисдим. Турган гапки, Мифлин ҳақ эди.

– У ўзини қандай ҳис қиляпти, Тим?

– Ким, Пиреллими? Нисбатан ёмон эмас. Терговчилар қанчалик ҳаракат қилишмасин, аммо у ўзини айбдор ҳисобламади. Агар Франкон бу ишга аралашмаганида, албатта бўйин эгарди. Кўряпсанми, анови икки разил: Макгроу ва Хартсел – улар мени аллақачон безорижон қилишган – одамларни уришдан бошқа ишга ярамайдилар.

– Бу ҳам шунга ўхшайди, бир куни менинг ичимни тўкишларига ҳам озгина қолган. Улар билан гаплашиб бўлмайдими?

– Мутлақо мумкин эмас. Улар Брендоннинг шахсан ихтиёридаги маҳбуслар. Ҳатто Федерал разведка бюроси агентлари ҳам уларнинг олдига Брендоннинг рухсати билан киради.

Мен яна битта сигарета чекиб, Тимга қутини узатдим.

– Мен барибир бу ишни Пирелли қилмаганига ишонаман.

– Начора, у суд олдида жавоб бераётганида, шундай деб ўйлаган киши фақат сен бўласан. Сабр қилиб тургин: эртага газеталар Пиреллини айбдор деб ёзади. Шўрликни кулфатдан чиқаришнинг битта имконияти – ҳақиқий жиноятчини излаб топишдир.

– Мен айнан шу иш билан шуғулланмоқчиман. Энди Брендон нима қилади?

– Ҳеч нарса. Унинг учун иш тугаган. Пиреллини қамоққа олди ва барча зарур далилларни қўлга туширди. Шундай қилиб, ҳамма иши жойида.

Мен машинадан тушиб, эшикни ёпдим.

– Демак, бу ҳолда менинг қўлларим боғланган. Терговни ўзим бошлашни мўлжалладим.

– Омад тилайман, – деди Мифлин. – Олдингда ёқимли иш турибди. Нимадан бошламоқчисан? Қайси ишларни бажаришга улгурдинг?

– Деярли ҳеч нимани. Ишни Мэри Жеромдан бошлаш ниятим бор. Назаримда, у сизлар ўйлагандан кўра кўпроқ маълумотни билади.

– Балки, аммо мен бундан шубҳадаман. Агар у Дедрикни ўғирлашга алоқадор бўлганида, жиноят рўй берганидан кейин ортга, уйга қайтмасди.

– Мэри ниманидир унутиб, шунинг учун қайтган бўлиши мумкин. Менинг у ерда эканлигимни билмасди-да. Мэри ҳеч нарсадан беҳабар бўлиши ҳам мумкин, аммо уни излаб топиш ва бунга ишонч ҳосил қилиш керак.

– О'кей. Агар мен керак бўлиб қолсам, айтгин. Пирелли айбдор эмас деб ўйлайман, аммо бу гап ўрта-мизда қолсин.

– Раҳмат, Тим. Мен, эҳтимол, сен учун ниманидир излаб топарман. Ҳозирча эса хайр!

Мен «Бьюик» машинамга ўтирдим. Мифлинга қўлимни силкитиб, Сентрал-авеню томон йўл олдим. Йўл устида телефон будкасини кўриб, бурилиб чекка-роқда тўхтадим. Рақам териб, Франконнинг овозини эшитгач, сўрадим:

– Хуш, Пирелли тўғрисидаги фикрингиз қандай, Юстин?

– Менимча, у ўғирликда иштирок этмаган, – дадил хитоб қилди Франкон. – Аммо бу уни бутунлай қутқара оламан, деган маънони билдирмайди, албатта. Мен, ўз-ўзидан кўриниб турибдики, уриниб кўраман, аммо иш умидни узадиган даражада. Ҳаммаси фавқулодда усталик билан сохталаштирилган, моҳирона ўйлаб топилган. Буни ким қилган бўлмасин, ўз ишини яхши билган. Энг асосий хавф, бу – пул. Эртага идорада учрашсак, яхши бўлармиди дейман? Бу ишни ҳар томонлама синчиклаб кўриб чиқамиз, нима қилиш кераклигини келишамиз. Эрталаб соат ўнда, бўладими?

– Бўлади, – жавоб бердим мен.

– Вик, сиз кўп нарсага умид боғламанг. Бундай де-йишимнинг асосий сабаби Пиреллининг иши анча мужмал.

– Ҳали унчалик мужмал эмас, – дедим қисқа қилиб ва гўшакни қўйдим.

#### 4

Юстин Франкон тишлари орасида ўчиб қолган сигара билан стол ортида, оёғини оромкурсининг тирсакқўйгичига осилтириб ўтирарди. Қўллари нимча ўмизига суқилган.

У кичик жуссали, мўйлови икки томонга, ёноқлари олдинга туртиб чиққан бўлиб, йирик, суяқдор бурни устидаги кичик, ўйноқи кўзлари сассиқкўзан тусини берарди. Юстинга қараб туриб, Тинч океани қирғоқларидаги машҳур ва оқил адвокатлардан бири деб бўлмасди. Аслида у айнан шундай сифатларга эга.

Бу биринчи тоифали адвокатнинг мамлакатдаги бошқа ҳар қандай ҳуқуқшуносдан кўра миллионер мижозлари тўлиб-тошиб ётибди.

Биз, яъни мен, Керман ва Паула унинг вазмин столи атрофида тизилиб ўтирардик. Франкон бизга ўзининг ёввойи тарздаги ўнг томонлама кўринишини тақдим этиб, ўзи эса йигирманчи қаватдаги идорасидан пастда ястаниб ётган олтинранг пляжга назар ташлади. Кенг, мўл офисда юракни сиқадиган жимлик чўккан эди. Ниҳоят у елкаларини қисиб, оёқларини тирсакқўйгичдан олди ва бизга қараб ўгирилди.

– Менга гапириб берганларингиз билан маслаҳатчиларни Пиреллининг Суюкини ўлдирмагани ва Дедрикни ўғирламаганига ишонтириб бўлмайди, – деди адвокат. – Сизлар кўпроқ қурол-яроғ жамғармоғингиз лозим. Ҳозирча эса улар йўқ ҳисоби. Пиреллига қарши далиллар етарли, маслаҳатчилар суд залини тарк этмай туриб, соф виждон билан уни айбдор деб топадилар. Сизлар бунга ҳисобга олишингиз керак. Эҳтирослар тўлқини ҳаддан зиёд юқори. Уни қонун бўйича суд қилишмайди. Агар сизлар менга округ прокурорини судда тор-мор қилиш учун янада кўпроқ, етарли далиллар тақдим этмасангиз, ҳавони қуруқдан-қуруқ силкитиш билан Пиреллига ёрдам бера олмайман. Унга ҳайдовчини ўлдириш айби қўйилмоқда, агар суд давом этаётган вақтгача Дедрикнинг жасади топилса,

Пиреллига иккита қотилликни тақаб қўйишади. Шундан сўнг иш электр стули билан ниҳоясига етади.

Юстин ўчиб қолган сигарага қаради, қовоғини уйди-да, сўнг уни саватга ташлади.

– Энди келинг, Пиреллида қандай жиноят белгилари борлигини кўриб чиқамиз. Уйидан топилган тўппонча, бу – бир. Маслаҳатчиларни тўппонча четдан ташланган деб ишонтириш мумкин. Қармоқ – икки, у билан ҳам бир амалласа бўлади, ҳар қандай киши қармоққа эга бўлиши мумкин, ҳеч кимга тақиқланмайди. Аммо пул-чи? Ҳеч ким пуллар ташланганига ишонмайди. Мана шу уни ташлаган киши каллали эканлигини кўрсатган. Юз минг жуда катта маблағ. Шундай эмасми?

Биз дўстона тарзда бош ирғадик.

– Жуда яхши. Шундай қилиб, асло рад қилиб бўлмайдиган далил, бу – пуллар. Маслаҳатчилар пуллар ташланмаган, деган қарорга келгач, тўппонча ҳам, қармоқ ҳам, клеёнка ҳам ташланмаганига ҳеч қандай шубҳа қолмайди. Демак, прокурор ҳам ўз айбловини хатосиз, деб билади. Сизларга тушунарли бўлдимми?

– Ҳа, тушунарли. Аммо биз пуллар ташланганини аниқ биламиз. Наҳотки, маслаҳатчиларни ўғри ўзининг ирkit жонини қутқариш учун ўмарган пулининг бешдан бир қисмидан воз кечганига ишонтириб бўлмаса?

Франкон бош чайқади:

– Йўқ, бундан бирор натижа чиқмаса керак. Ҳаддан зиёд қалтис иш. Агар Пирелли яхши далилларга, ўзини оқлайдиган даъволарга эга бўлса, ана шу билан судга бориши мумкин, аммо унда бундай даъволар йўқ. Яна бир гап – тўппончада унинг бармоқ излари топилган.

– Мен бу ҳақда эшитдим, аммо ишонмайман.



Франкон алам билан бош чайқади.

– Аммо бу аниқ. Уларни ўзим кўрдим.

– Ахир Пирелли тўппончани ушлаган эмас-ку?

– Пирелли айтишича, Брендон унинг қўлига тўппончани берган ва бу қурол ҳақида биласанми, деб сўраган. Шундай қилиб, тўппонча топилгандан сўнг ҳам унинг қўлига ўтиб қолган.

– Ё Худо! Сиз Брендонга шундай ноҳақ йўллар билан ютиб чиқишига имконият яратиб бермаяпсизми, мабодо?

– Округ полицияси бошлиғининг кўрсатмаларига Пирелли сўзларининг қарама-қарши туриши қандай аҳамиятга эга?

Оғир жимлик чўкди, сўнгра адвокат деди:

– Кўрдингизми, бунда ҳаммаси унга қарши. Шунинг учун мен қандайдир янги далилга эга бўлиб, судга боришим керак. Агар далил бўлмаса, ўйиндан чиқишимга тўғри келади. Менга далиллар керак, сизларнинг вазифангиз эса уни излаб топишдан иборат.

– Қандай бўлмасин, уларни топаман, – дедим мен. – Бу қаттиқ данакни чақишнинг ягона йўли – ҳаммасини бошидан бошлаш ва қўлга нимадир киритилгунча излашдан иборат. Менинг тахминимга кўра, бу ерда оддий ўғрилар тўдаси ҳаракат қилмаган. Балки ақлдан озаётгандирман, аммо бу тахмин менга тинчлик бермайди.

– Тушунмадим, сиз нимани назарда тутяпсиз? – деди Франкон менга диққат билан қараб.

– Ўзим ҳам ҳеч нарсани англаганим йўқ, – деб ғўлдирадим кулиб. – Менга, масалан, Серенанинг отаси Франклин Маршленд Дедрикнинг йўқолганига ўлғудай хурсанд бўлгани аниқ. Нега шундайлигини тушунтириб бераман. Бу Маршленд оддий беозор мўйсафид

кўринади, аммо унинг кўзига бир бор назар ташласангиз борми, ниҳоятда хавфли одам эканлигини англаб оласиз. Никоҳ махфий равишда тузилган. Нима учун? Айтайлик, ўғрилар тепасида Маршленд турибди. Дейлик, у Серенанинг товламачи ва таваккалчи кишига турмушга чиққани, Дедрикка фақат пули кераклигини билади. Айтайлик, Маршленд Дедрикни йўқотиш мақсадида ўғирлашни гўё ўйлаб ташкил этган. Мен айнан шундай бўлган демоқчи эмасман, аммо бу шундай фикрлаш, холос! Дедрик ўтмишда Мэри Жером билан қандайдир алоқада бўлган, дейлик. Нимани назарда тутганимни англадингизми? Агар бу оддийгина ўғирлаш бўлиб, шунчаки йўл-йўлакай ўғрилар тўдаси ҳаракат қилган бўлса, биз бирор иш қила олмаймиз. Аммо бу ишга ўзларининг одамлари қўл урган, ўғирлик тепасида Маршленд турган бўлса, у ҳолда балки уни очишга муваффақ бўламиз.

Франкон эшитганларига қизиқиб қолгандай кўринди.

– Вик, дарҳақиқат, бу ердан ниманидир топиш мумкин. Ҳар ҳолда уриниб кўриш керак.

– Бу биз қилишимиз керак бўлган ягона иш. Мен Мэри Жеромдан бошлаш ниятидаман. Илк бор уни «Акме» гаражида кўрган эдим. Терговни ҳам шу жойдан бошлаймиз. Агар унинг гаражидан «Оушен-энд» саройигача бўлган йўлни синчиклаб текшириб чиқсак, эҳтимол, йўл-йўлакай яна бирор далилга дуч келармиз. Ҳайдовчи Суюкининг ўтмишини ҳам кавлаб кўриш керак. Ахир бу билан ҳеч ким шуғуллангани йўқ. Ваҳоланки, жуда керак. Кейин Дедрикка навбат келади. Мен ҳозирнинг ўзидаёқ Керманни Парижга жўнатаман. У ердан Дедрикка оид ҳар қандай маълумотни тўплаш зарур бўлади. Албатта, буларнинг

барчаси вақтни бекордан-бекорга ўтказишга ўхшаб кўринади. Аммо бу – яккаю ягона имкониятимиз. Биз катта ер майдонини қазишга киришамиз, тўсатдан қандайдир қимматли нарса чиқиб қолар. Аммо ҳеч нима топилмаса, иш ниҳоятда ёмон бўлади.

– Менинг назаримда, тергов ўтказиш учун энг ишончли йўл – Мэри Жером, – деди Франкон бурнини тортиб кўяр экан. – Аммо Суюкининг ўтмишини суриштиришдан фойдали жиҳатни кўрмаяпман.

– Шунинг учун ҳам шуғулланиб кўрмоқчиман. Бу иш билан машғул бўлиш ҳеч кимнинг хаёлига келгани йўқ. Кўпчилик учун у шунчаки ўлим. Шусиз ҳам бизда имкониятлар кам, шу сабабли ҳеч нарсага бепарво қарамаслик керак.

– Хўп, ундай бўлса, ҳаракат қилаверинг. Фақат унга ҳаддан зиёд вақт сарфламанг. Пиреллининг душманлари бўлганмикан, билмайсизми? Бундай ўта пасткашлик қилиш учун кимдир уни ҳаддан зиёд ёмон кўриши керак эди.

– Тўғри. Мен ҳам шу ҳақда ўйладим. Бундай ифлос ишни қилиши мумкин бўлган бир кишидан гумонсираяпман. Жеф Баррет, сассиқ каламуш, гиёҳванд ва разил. У Пиреллининг уйи қаршисида истиқомат қилади.

Мен Франконга Барретга қандай дуч келганим ва Пирелли ҳаётимни қай тарзда сақлаб қолганини гапириб бердим.

– Брендон буни биладимми?

– Йўқ, аммо билганида ҳам ўзининг нуқтаи назарини асло ўзгартириб ўтирмасди. Мен ана шу Баррет билан ҳам шуғулланишга қарор қилдим. Қармоқ шундай анжомки, уни уйга яширинча олиб кириб бўлмайди. Қандай олиб киришганини кўрган гувоҳларни то-

пиш мумкин... Энди бизнинг кетиш вақтимиз бўлди, – мен ўрнимдан турдим, – бирор нарсани билиб қолсам, дарҳол сизга хабар қиламан.

– Қанча тез бўлса, шунча яхши, – жавоб берди Франкон.

Аллақачон йўлакда турган Керман сўради:

– Мен Парижга борар эканман, ростми?

– Ҳа. Тезроқ жўна. Паула ҳаммасини тайёрлаб беради. Пулни истаганингча сарфлашинг мумкин, аммо ақл доирасида бўлсин. Умид қиламанки, сен Парижга бориш тўғрисида эътироз билдирмайсан?

Керман кўзларини чақчайтирди, афтидан қувончини яширишга уринди.

– Менинг бу қайғули зарурият билан келишимга тўғри келади, – деди у. – Эзгу иш учун, албатта. Қолаверса, мен эшитдимки, парижлик аёллар ғоят сулув бўлишар экан.

– Улар ёнида гирдикапалак бўлиб юрган кишига шундай сулув кўринади, – деди Паула кесатиб.

## 5

«Бендикс – уй хизматкорларини ёллаш» агентлиги бошлиғи Марта Бендикс бизнинг идорага қўшни бўлиб, жуссаси катта ва ғайратли аёл. Сочини эркакча қирқтирган, кулгиси йирик калибрли тўппонча отишига ўхшаб кетади.

Биз у билан йўлакда дуч келиб қолдик. Мен идорадан, Марта ҳам ўзининг агентлигидан чиққан эдик. Уни кўрган заҳоти суҳбатлашим кераклиги эсимга тушди.

– Салом, Вик! – деди Марта гумбурлаб. – Жин урсин, қаерларда гум йўқолдинг? Сени ҳафталаб кўрмайман.

– Марта, сен билан гаплашиб олишим керак. Вақтинг борми?

У кўлидаги сал бўлмаса араванинг гилдирагича келадиган соатига қаради-ю, ҳеч қаерга шошмаётганига ишонч ҳосил қилиб, идорасининг эшигини очди:

– Қани, кир. Нима, яна менинг миямни ижарага олмоқчимисан? Учрашувим бор эди, аммо унча муҳим эмас.

Биз қабулхонадан ўтдик, у ерда қандайдир сарик сочли озғин, мажмағил қиз ўтириб, бир бармоғи билан машинкани чиқиллатиб ўтирар, юзи кулиб турган қуённинг башарасини эслатарди. У бизга камтарона табассум ҳадя этди.

– Мэри, – деб мурожаат қилди қизга Марта. – Агар жаноб Меннерс қўнғироқ қилса, мени кетди, деб айтиб қўй.

Биз директорнинг яшил-қизил тусли кабинетига кирдик.

– Эшикни зичлаб ёп, – деди Марта овозини пасайтириб, аммо унинг овози йўлакнинг охиригача эшитилар, худди фитначилар гапирадиган гап оҳангига ўхшар эди. – Менда бир шиша аъло навли виски бор, анчадан бери мени ким очар экан, деб кутиб ўтирибди. Ўзим эса котибам ишда ичар экан, деб ўйлашини истамайман.

Мен оромкурсида ўтирганимда, Марта олдимга каттакон уч дюймли бордоқ қўйди.

– Қани, томоғингни ҳўллаб олгин-чи.

– Баъзан, Марта, мен сенинг тараққийпарвар хотин эканлигинга ишонмай қоламан, – дедим қадахни кўтариб, – Хўп, соғ бўлайлик!

– Тилинга чипқон чиқсин, ичмасам бўлмайди, – хахолаб кулиб юборди у ва бир сипқоришда бордоғини бўшатди. – Хўш, қандай экан? Яна истайсанми?

Мен бош чайқаб, рад этдим. Сўнг спирт ҳидини кетказиш учун олдимга қўйилган қаҳва донасидан бир нечтасини оғзимга солдим.

– Хўш, менда қандай ишинг бор? – деб сўради Марта стол ортида ўтириб, оғзига қаҳва доналарини солар экан.

– Мен Серена Маршленднинг собиқ ҳайдовчиси Тоа Суюки номли филиппинлик тўғрисида баъзи маълумотларни билмоқчи эдим. Суюки уларга хизмат қилиш учун Нью-Йоркда ишга кирган эди. Мен у сизларнинг Нью-Йоркдаги бўлимларингиз орқали ёлланиб, расмийлаштирилган эмасми, шуни билмоқчи эдим.

Марта ўзини ҳақоратланган каби сизди.

– Азизим! Сен шуни яхшилаб тушуниб олгинки, менинг идорам танаси рангли одамларни ёллаш билан шуғулланмайди. Сен, нима, Дедрикнинг ишини текширишга киришдингми?

– Ҳа, мен ўша Суюки тўғрисида маълумотларни олмоқчи эдим.

Марта Бендикс қоғоз кесадиган пичоқ билан бошини қашлади.

– Мен бунга сен учун билиб олишим мумкин, албатта, – деди у истар-истамас. – Нью-Йоркда бошқа ирқдаги кишиларни ёллаш билан шуғулланувчи йирик агентликни Сид Сильверс бошқаради. Бу сассиққўзан – менинг дўстим. Ундан сўраб кўраман. Агар чипқонни оғримаса, изоҳлаб беради. Эвазига у нимага эга бўлади?

– Юз долларга.

Мартанинг кўзлари олайиб кетди.

– Ақлдан озганмисан? Ахир бу нусха юз долларга онасини пиво идишга ғарқ қилишдан ҳам тоймайди.

Мен унга онасини шундай фожиали тарзда ҳалок қилиши шарт эмас, фақат Суюки тўғрисида маълумотлар кераклигини айтдим.

– Иш битди, деб ҳисоблайвер. Икки кундан сўнг бу маълумотларни сенга бераман. Келишдик!

– Мен яна элик доллар қўшаман, агар улар эрталаб қўлимда бўлса ва шунга арзиса.

– Сен уларни оласан, – деди Марта ўрнидан турар экан. – Бу сассиққўзан лойқа сувдан балиқ тутишга устаси фаранг. Гапинг тугадими?

– Ҳа, раҳмат сенга. Сен дўстларга ёрдам беришдан ҳечам бош тортмайсан. Билмайман, сенсиз нима қилардим?

Марта кулимсиради:

– Сен менга айт-чи, Вик, қачон анови жигарранг кўзли нозанинга уйланасан? У бир оғиз гапингни кутиб, идорангда тоқати тоқ бўлиб кетди-ку!

– Агар Паулани назарда тутаётган бўлсанг, мен унга уйланмайман. Биз учрашган пайтимизда ҳар сафар ўшани гапираверма. Мен сенга у тезроқ эрга тегишни ўйлайдиган қизлардан эмас, деб неча марта айтганман.

Марта елкамга шу қадар куч билан туширдик, сал бўлмаса, умуртқам синиб кетаёзди, сўнг шундай кулдик, дераза оналари зириллаб кетди.

– Сен... сен ундан сўраганимда билиб олардинг. Табиатда бирорта ҳам жонзот аёл каби турмушга чиқишни истамайди. Фақат таклиф этилмаганлар турмушга чиқа олмайди.

Мен машинани Жефферсон-авенюдаги турар жойлар биноси ёнига қўйиб, сокин вестибюлга кирдим.

Баланд стол ортида бир қиз ўтирар, у айёр башарали Грация эмасди. Қиз сақич чайнар ҳамда қисқа-қисқа матнларда берилган расмларни томоша қиларди. Юзидаги ифодага қараб, комикслар уни мутлақо кулдирмаётганига ишонч ҳосил қилдим. Мен илк бор бу ерга келганимда, Грация ҳам айнан шу тарзда ўқиб ўтиргани эсимда.

Устунлар ортидан мушти йўғон Макси югуриб чиқди ва рўпарамда туриб қолди.

– Салом, – дедим мен тиржайиб. – Биз қаерда гаплашиб олишимиз мумкин?

Истеъфодаги полициячининг кип-қизил майда томирчалари чиқиб турган гўштдор юзидаги чуқур ботган митти кўзлари шубҳа ва ҳайратга тушганча менга тикилиб турарди.

– Сиз мен билан нима ҳақида гаплашмоқчисиз? – тўнғиллади у ва мўйловлари сергак тортиб ҳурпайди. – Сиз билан гапирадиган гапим йўқ. Бунинг устига бандман.

Мен бу гапни савдони бошлаш учун таклиф ўрнида қабул қилдим ва ҳамёнимдан ўнталикни олиб кўрсатдим.

– Юринг-чи, бирор тинчроқ жой бўлса, ўша ерда гаплашиб оламиз.

У пулга ўйчан қараб қолди ва йўғон ифлос бармоқлари билан тишини кавлаб, панжаларини ўзининг иштонига артди. Сўнг стол ортида ўтирган қизга қаради.

– Эй, эшит! Агар зарур бўлсам, ертўлада бўламан. Ҳеч кимни қўйма!



Қиз кўзини газетадан узмай, фақат бошини енгил ирғаб қўйди, холос. Бу билан ҳаммасини эшитиб, тушунганини кўрсатди.

Макси лифт томон равона бўлди.

Лифт ертўла қаватига тушгунича биз ёнма-ён, юзимизга нафасимиз урилиб турардик. Макси хира чироклар билан ёритилган сим тўрлар осилган қоронғи, оқ кошин қопланган кичкина йўлакдан юриб, мўъжаз идорага кирди. Унинг бор-йўқ жиҳози икки стул, стол ва қурум босган камин тепасида осилган дастхати туширилган Жек Демпси суратидан иборат эди.

Стол атрофида жойлашиб ўтириб олган Макси бош кийимини бўйни томон суриб қўйди, стулда ялпайганча семиз ялпоқ бурнини торта бошлади. У бир дақиқа ҳам ўнталик пулдан кўз узмасди.

Мен ўн долларни Максига бердим, уни олмасдан туриб, ҳеч нимани ўйлай олмаслигини тушунардим. Макси никотиндан сарғайиб кетган йўғон бармоқлари билан пулни чаққон олиб, дарров чўнтагига солди.

– Пирелли... – деб гап бошладим мен.

Макси костюмининг енги билан бурнининг учини артди, сўнгра қандайдир аччиқ саримсоқ пиёз ва пиво ҳидини бурқситиб деди:

– Жин урсин, яна Пиреллими?

– Ҳа, албатта, Пирелли. Нима учун у бўлмасин?

– Шунинг учунки, шаҳардаги ҳар бир полициячи мен билан Пирелли тўғрисида гаплашади. Мен уларга ҳаммасини гапириб бердим, бошқа ҳеч нимани билмайман.

– Бунинг аҳамияти йўқ. Мен уларга нима деганингизни эшитмаганман, билмайман. Сизга бир нечта савол бераман, ишончим комилки, бу ҳақда бирорта ҳам полициячи сўрамаган.

– Майли, – деб гўлдиради Макси ортиқча шавқ-завқсиз. – Менга барибир, ахир иш вақтим учун тўланган-ку!

– Нима деб ўйлайсиз, Пирелли Дедрикни ўғирлаб кетиши мумкин эдими? – тўғридан-тўғри сўрадим ундан.

Макси бундай саволни кутмаган эди, унинг митти бит кўзлари пирпираб кетди.

– Менинг нима деб ўйлашимнинг қандай аҳамияти бор?

– Аҳамияти бор-да. Келинг, вақтни бекор ўтказмасликка келишиб олайлик. Агар менинг саволларимга жавоб беришни истамасангиз, тангани ортга қайтаринг, уни кимга беришни биламан.

Биз столнинг икки томонида туриб, бир-биримизга тикилиб қолдик. Макси менинг ҳазиллашмаётганимни тушунди.

– Пиво ичишни истайсизми? – деб сўради у. – Бемалол ўтириб гаплашсак ҳам бўлади-ку!

У икки банка пиво олиб, буклама пичоқ билан қоғини очди ва биттасини менга узатди.

– Бахтли кунлар учун!

– Тунлар учун ҳам!

Биз ичдик, бошқа эркаклар каби чуқур нафас олиб, банкаларни стол устига қўйдик.

– Бу ишни у қилган, деб ўйламайман. Бу Пиреллига тўғри келмайди.

– У ҳам менга айнан шуни айтди, – мен олдинга энгашиб, банканинг ичида қолган томчи билан стол устида қинғир-қийшиқ қилиб чиза бошладим. – Агар иложи бўлса, мен унга ёрдам бермоқчиман. Сизнинг кўрсатмаларингиз мақсадимни амалга оширишга ёрдам беради.

Макси даставвал яна тишини кавлашга тушди, сўнг ўйланиб қолди ва энди қулоғини кавлай бошлади.

– Пирелли унчалик ёмон йигит эмас. Бағри кенг, саховатли, вазмин, жанжалкаш эмас. Маъшуқаси ҳам ажойиб. Сиз уни кўрганмисиз?

Мен кўрганимни айтдим.

У қойил қолгандек ўнг кўзини қисди, сўнг яна очди.

– Оҳ, қадди-қоматини айтмайсизми, роса кетворган! Наҳотки бу қомат унинг ҳамма айтганларини ба-жарса?

– Эҳтимол. Сиз қизнинг қармоқни қандай олиб келганини кўрмадингизми?

Мушти йўғон йўқ дегандай бош чайқади.

– Йўқ, кўрмадим, аммо менга шуниси маълумки, Пирелли ҳеч қачон уйида қармоқ сақламаган. Мен уйни йиғиштирадиган оқсочдан сўрадим. У ҳам ҳеч қачон уйда қармоқ кўрмаганини айтди.

– Оқсоч каравот остига қараганми?

– Бўлмасам-чи! Ахир у полларни ювиб чиқади-ку.

– Кеча кечқурун полиция Пиреллининг уйдан қармоқ топиб олган. У кеча эрталаб каравот остини йиғиштирган эдими?

Макси бош ирғади.

– Қачон?

– Тушдан кейин. Пирелли уйда соат бир яримгача бўлган, оқсоч эса уйни соат бирдан аввал йиғиштира олмасди.

– Полиция қармоқни қачон топган?

– Кечқурун, соат етти яримда.

– Демак, кимдир икки яримдан етти яримгача у ерга қармоқни ташлаб қўйган, шундай эмасми?

– Агар у ташланган бўлса.

– Яхши, сўзларга ёпишиб олмайлик. Демак, соат бир ярим билан етти ярим ўртасида Пирелли ёки кимдир уйга қармоқни олиб келган. Шундайми?

Собиқ полициячи бу мулоҳазадан қусур топа олмади.

– Ҳа, шундай.

– Уйга киришга асосий эшикдан ташқари яна бирор чиқиб кетиш жойи борми?

– Ертўла орқали яширинча эшик бор.

– Бу эшикдан бирор киши ўта оладими?

– Йўқ.

– Аниқми?

– Мутлақо аниқ. Уй шундай қурилганки, асосий кириш жойи ёки яширин эшикдан кирасизми, қайси томондан бўлсаям, вестибюль орқали ўтишингиз керак ва сизни пайқаб қолишади.

– Сиз кеча соат бир яримдан саккизгача қаерда эдингиз?

– Кинода.

– Демак, кеча бу ерда бўлмагансиз?

– Мен кинода эдим.

– Дам олиш кунингиз эдими?

– Ҳа.

– Вестибюлда ким навбатчилик қилган?

– Грация Леман, – Макси бироз пиво хўплаб қўшиб қўйди: – У бугун дам олади.

– Полиция Грацияни сўроқ қилдими?

– Нега энди?

Мен пиво сипқордим. У ҳақ эди, албатта. Дарҳақиқат, нега? Полициячилар Пиреллининг уйидан қармоқ топиб олишган, шунинг ўзи уларга кифоя.

– Қармоқни ким келтирганини у пайқаган бўлиши мумкин эдими?

– Агар кимдир келтирган бўлса, албатта, кўрган бўларди.

– У шу вақтда қўлини ювиш учун ёки бирор иш билан чиққан бўлиши ҳам мумкинми?

Макси «йўқ» дегандек бош чайқади.

– Вестибюль бир сония ҳам қаровсиз қолдирилмайди. Бу уйда ана шундай қатъий қоида ўрнатилган. Санитария узели шундоқ идоранинг орқасида жойлашган. Агар навбатчи у ерга киргудай бўлса, эшик олдигаги резина гиламчанинг тагидаги сигнализациyani босиб кўяди. Асосий ва яширин эшиқдан кирадиган ҳар қандай киши шу сигнални босади ва бирдан хавфни билдирувчи сигнал кўтарилади. Бу текшириб кўрилган. Бизда жуда кўп уй ўғирликлари рўй бергани учун чоралар белгилаганмиз. Шундай экан, бирор киши қармоқ олиб келса, навбатчи уни албатта кўрган бўларди.

– Демак, уйга Пирелли ёки қандайдир бошқа киши қармоқ олиб келганини аниқлаш зарур. Ва Грация буни кўрган бўлиши керак, шундайми?

– Худди шундай.

Мен пивони охиригича ичдим ва чекдим. Ичичимни ҳаяжон қамраб олди.

– Яна пиво истайсизми? – деб сўради Макс.

Мен бош ирғадим ва унинг стол устига яна иккита банка қўйганини нигоҳим билан кузатиб турдим.

– Афтидан, ҳаммасидан кўра Грациядан сўраган яхшироқ, – дедим у банкаларни очаётганида. – Грация менинг ҳақиқий гувоҳим бўлиши мумкин.

– У эртага навбатчилик қилади. Сабр қилинг. Аммо унга бироз кўпроқ ҳақ тўлашга тўғри келади.

– Қаерда яшайди?

Макси бироз ўйланиб турди, сўнгра рад этган каби бошини чайқади:

– Мен сизга унинг манзилени бера олмайман – кўрсатма бўйича мумкин эмас.

Мен қўлим билан совуқ банканинг сиртини силадим ва Жек Демпсининг суратини кўздан кечиришга тутиндим.

– Гаров боғлаб айтаманки, бу қармоқни Жеф Баррет олиб келган!

Макси айна шу вақтда банкадан пиво хўплаётган эди, томоғига нимадир қолгандай йўталиб қолди. Мен бўғилиб қолмаслиги учун ўрнимдан сапчиб туриб, елкасига урдим. Албатта, мен уни бироз қаттиқроқ урдим: ахир берган пулларим туфайли ўзимни нима биландир мукофотлашим керак эди-ку.

– Баррет дедингизми? – у ўзига келди. – Қандай... нима дедингиз?

– Баррет Пиреллидан ўлгудай нафратланарди. Қармоқни қўйган йигит ҳам уни ниҳоятда ёмон кўрган. Баррет Пирелли турган хона қаршисида яшаган. Баррет – патент олмаган разил. Булар судда аҳамият касб этмас, аммо мен учун кўп нарсани англатади.

Макси лабларини тишлади ва ниҳоят бош ирғади:

– Балки, шундайдир.

Биз яна бир неча қултум пиво ичдик.

– Сиз Грацияга бекордан-бекорга вақт кетказманг. У Барретга қарши боради, деб умид қилманг, – деди Макс товушини пасайтириб. – Грация ўша учун қайгуради.

Берган пулим учун қандайдир қиммат нимадир олиш фурсати келди, деб хаёл қилдим.

– Нима учун? – сўрадим мен. – Наҳотки, Баррет шу даражада пасткашликка бориб, унга ўхшаса?

– Биласизми, бу уйнинг хўжайини уни ҳурматга сазовор кишига айлантириш учун ҳаракат қилмоқда. Нима

учунлигини сўраманг. Унинг ана шундай ғалати қилиқлари бор. Бизда ўрнатилган қоидага кўра, меҳмонга келадиган аёллар кечаси соат биргача уйни тарк этишлари шарт, акс ҳолда уй соҳибига билдиришнома ёзилади. Грация тунлари бир ҳафтада бир марта навбатчилик қилади. Баррет олиб келадиган аёллар эса тунда уникида қолиб кетади, у бу ҳақда хабар қилмайди.

– Қандай уддалайди? Ортиқча пул тўлайдими?

Макси пивони охиригача ичди, шимига тўкилган кулни қоқиб, ўрнидан турди:

– Энди мен жойимга қайтишим керак.

– Ўтиринг, гапириб беринг. Мен берган ўн долларимга ҳали ҳеч нима олганим йўқ.

– Нима десам экан? Яна ўн беринг. Сизга шундай гапни айтаманки, оғзингиз ланг очилиб қолади.

– Беш.

– Ўн.

– Етти ярим.

– Саккизга келишдик.

Мен Максига пул узатдим. Сўнг у қайтиб, яна стулга ўтирди.

– Қиз гиёҳванд, тушунарлими? Баррет уни марихуана билан таъминлаб туради. Шундай экан, сизнинг ҳеч қандай имкониятингиз йўқ.

Мен айтилганларни мулоҳаза қилиб кўрдим, ҳеч қандай имкониятларим бўлмайди, деган қарорга келдим, аммо шунга қарамай, барибир оёқ тираб туриш керак.

– Менга унинг манзилини беринг.

Яна икки доллар пул собиқ полициячини кўрсатмага риоя қилиш мажбуриятидан озод қилди.

– Фелман-стрит, 274, мебеллар билан жиҳозланган уйда.

Мен ўрнимдан турдим.

– Макси, суҳбатимиз тўғрисида чурқ этманг. Ким сўраса ҳам мени кўрмагансиз.

У «ҳм» деб қўйди-ю, кўкрагига уриб деди:

– Асло ташвиш тортманг. Дўстлар учун мен – қабрман.

Чиқиш томон юрдим. Остонада бурилиб қарадим. Макси столда ўйланиб ўтирар, бурнини тортиб, кўзларини банкага маъносиз тиккан эди.

## 7

Фелман-стрит, 274 уйнинг кириш эшиги тамаки дўкони ва учинчи даражали кафе ўртасида жойлашган эди. Эшикдаги ифлос жез лавҳада шундай деб ёзилган:

### ИШБИЛАРМОН АЁЛЛАР УЧУН ХОНАЛАР. ИТ БОҚИШ ВА ЭРКАКЛАРНИ ОЛИБ КЕЛИШ МАН ЭТИЛАДИ!

Сал юқориқоқда осилган қоғозча бўш жойлар йўқлигидан огоҳ этарди. Қўшни кафенинг кўчада тўртта столи бўлиб, уларда ёши ўтган официант хизмат қиларди. Официантнинг озғин юзида шунчалик адоқсиз ғам-алам муҳрланган эдики, ҳатто уст-боши қуёшнинг ярқироқ нурида кексалик туфайли яшил \тус олиб кетгандай кўринарди. Уй олдида машинамни тўхтатганимдан сўнг у мени пайқаб, ифлос латта парчасини силкитиб, столлардан бирига таклиф қилди. Аммо мен унинг индамай қилинган манзиратини қабул қилмадим.



Учта тош зинани босиб, эшикка яқин келдим. Ва унинг бир табақасини очиб, қоронғи, жимжит ва кимсасиз вестибюлга кирдим. Деворнинг чап томонида почта кутилари осилган эди. Яқин келиб, унда уйда яшовчиларнинг исми ва фамилиясини ўқиб чиқдим. Улар орасида хотин-қизлар ҳаддан зиёд кўп эди.

Ўнг томондаги қутидан ўзимга зарур фамилияни топдим:

### **Грация ЛЕМАН хоним, 23-хона, 2-қават.**

Юқорига кокос толасидан ясалган бўйра билан қопланган зина элтарди. Биринчи қават зина майдончасини эгаллашдан олдин енгил ҳарсиллаб қолдим ва анча узоққа, қоронғиликка бориб туташадиган узун йўлакка дуч келдим, унда эшиклар кўп эди. Уларнинг олдида сут солинган шишалар билан эрталабки газеталар турарди. Гарчи соатлар бирдан ўн дақиқани кўрсатиб турган бўлса-да, менинг назаримда «ишбилармон кишилар» бўлмиш хотинлар ўз мажбуриятларини очикдан-очик назар-писанд қилмасдилар. Улар умуман қаердадир ишласалар, албатта.

Мен иккинчи қаватга кўтарилганимда, юқорида баланд бўйли, юз бичимлари бўртиб турган эркак кўринди. Унинг эғнида енгил матодан тикилган оч қизил костюм, бошида оқ наматсимон шляпа, кўзида қора кўзойнак бор эди. Мени кўриб, у асабий равишда титраб қўйди. Катъиятсизлик билан тўхтаб қолди, олдинга ҳам, орқага ҳам қайтишни билмай, сўнг бекорчи кишилардек пастга туша бошлади.

У тушиб кетгунича мен кутиб турдим.

Ёнимдан ўта туриб, бош бармоғининг тирноғи билан соқоли қирилмаган иягини қашлаб қўйди. Менга

унинг қора кўзойнак тагидаги кўз ифодаси ташвишли ва енгил саросимага тушгандек кўринди.

– Ит сақлаш ва эркакларни олиб келиш тақиқланади, – дедим мен бу эркак зинапоя майдончасини кесиб ўтганида.

У асабий тарзда елкаси оша қайрилиб қаради, тўхтади ва қаҳрли овозда:

– Нима-а-а? – деди.

Мен елкаларимни қисиб қўйдим:

– Ҳеч нарса! Мен фақат шунчаки сизнинг виждонингизни гапга тутдим.

Зинадан юқорига қараб ҳаракат қилдим, у эса то-вонида тик турганча, мен бурилишда кўздан ғойиб бўлгунимча термилиб турди.

Иккинчи қават ҳам худди биринчи қаватнинг айнан ўзи: сутли шишалар, газеталар турар эди.

Мен йўлакдан товуш чиқармай, хона эшикларидаги рақамларга қарадим. Керакли хона йўлакнинг ўртасида, ўнг томонда эди. Мен Грация билан қандай гапириш кераклигини ўйлаб, эшик олдида тўхтаб қолдим. Агар Максининг гапи тўғри бўлса, Грация истаса, Пиреллини қутқариб қолиши мумкин. Ҳозир уни кўндиришга мушарраф бўлармиканман? Ҳамма гап шунга боғлиқ. Қўпол қилиб айтганда, Барретни бўрилар ўртасига хомталаш қилиш учун ташлаш керак.

Қўлимни чўзиб эшикни тақиллатмоқчи бўлган аснода елкам оша енгилгина йўтал товушини эшитдим. Мен ўғринча қарадим: бу ердаги ҳаво ҳам қандайдир ғалати бўлиб, ҳатто архиепископнинг кўнглини юмшатиб юборишга мажбур қиларди.

Баланд бўйли, тўладан келган, сариқ сочли қиз эшикка эринчоқ ҳолатда суяниб, менга мафтункор табассум билан қараб турарди. У очикдан-очик нима-

гадир шама қиларди. Яшил шойи халат белини ўраб турар, шиппак кийган оёқлари чиройли ва нафис эди. Жисмоний меҳнатни билмаган нозик бармоқлари сариқ жингалак кокилларини тўғрилаб қўяр, қора қошлари қайрилма эди.

– Хэллоу, дўстим, сиз кимнидир ахтаряпсиз, шекилли?

– Ҳа, албатта, – деб жавоб бердим мен. – Назаримда, уни топдим. Марҳамат қилиб, мен учун нонуштангизни тарк этманг.

Унинг оғзи кулгудан янада ёйилиб кетди.

– Уни безовта қилиб ўтирманг, ҳали ухлаб ётибди. Мен эса оёқда туриб, ўқланган ўқдай тайёр турибман.

Мен шляпамни кўтариб қўйиб, унга сабоқ бергандай таъзим қилдим:

– Мадемуазель, мен бугун бир мажбурият юзасидан бандман. Балки кейинги сафар, нима дедингиз? Ҳозирча эса мени кўз ёшларингиз ва орзу-армонларингиз манбаи деб ҳисобланг. Мен ҳам уларни сизники, деб ўйлашга ваъда бераман. Эсингизда бўлсин: эрта бугунга қолдирилган кун, биз эса эртага бахт қолдирилган бўлса ҳамки, кўнгилхушлик қилишимиз мумкин.

Қизнинг юзидаги кулги аста-секин ўчди, яшил кўзлари хира тортди.

– Фу, жин урсин, яна битта ҳуши йўқ тентак, – деб аччиқланди у ва эшикни қаттиқ ёпиб олди.

Мен чуқур хўрсиниб, Грациянинг эшигини тақиллатиб, кута бошладим. Бир дақиқа ўтгач, яна тақиллатдим – энди дадилроқ ва кучлироқ. Жимлик, эшик очилмади. Мен атрофга қараб олдим, эшик тутқичидан ушлаб, уни итардим. Оҳиста очилди.

Хонага назар ташладим, каравот, иккита стул, шкаф ва пардоз-андоз столи, ойна сиғадиган даражада кенг

мўл эди. Хонада ҳеч ким кўринмас, каравотдаги тўшак йиғилмаган, чойшаблар деярли олти ойдан буён алмаштирилмагани шундоқ кўриниб турарди. Ойна чанг билан қопланган, гиламга сигарета кули тўкилган эди. Мен турган жойдан каравот остига ахлат тўпланиб қолгани кўриниб турарди. Умуман олганда, бу бир неча кунлардан буён йиғиштирилмаган хона бўлиб қолмай, кўринишидан менинг елкам тиришадиган ёкимсиз бир гўша эди.

Каравотнинг бош томонида яна бир эшик бўлиб, у ваннага тегишли эди. Мен хона бекаси ўша ерда бўлса керак, деб ўйладим ва, эшигини қаттиқ тақиллатдим. Сўнг кутиб турдим. Аммо қанча кутсам ҳамки, ҳеч ким жавоб бермади.

Нима қилишимни билмай, яна хонадан чиқиб, ортимдан эшикни беркитдим. Сўнг қўшнининг ортиқча қизиқишидан ҳайиқиб, яна кирдим.

Стуллардан бирида аёлларнинг бир қучоқ кийим-кечаклари ётарди.

Хонада марихуананинг ҳиди кескин анқир эди. Янгиси эмас, анча туриб қолгани, бир неча ойлик. У деворга, дераза пардалари ва тўшакка ўрнашган, хонада жинойтнинг соқов шоҳиди каби туриб қолган эди.

Мен каравот ёнидан жимгина ванна эшиги ёнига келдим ва кескин равишда тақиллатдим, аммо ҳеч нимани эшитмадим. Яна жавоб йўқ. Аммо бирдан юзимдан тер чиқиб кетганини ҳис этдим.

Дастакни бураб, эшикни очдим. У зўрға очилди. Эшик ортида оғир тахта ёки бошқа нимадир тиралгандек эди. Юрагим ҳапқириб кетди. Мен қизил тусли иркит ваннани, унга ташлаб қўйилган сочик, дастмолқовоқ мочалкаси ва эндигина бошланган тиш пастасини кўрдим.

Биламан, Грация эшик ортида турибди, бошқа қаерда ҳам бўлиши мумкин? Мен ванна томон қадам ташладим ва елкамга ёмон совуқ нарса ўрмалагандай туюлди. Грация шу ерда эканлиги аниқ бўлди: у кўм-кўк тунги кўйлақда қайрилма илмоқда осилиб турарди. Боши бир ёнга қийшайган, халат белбоғидан қилинган сиртмоқ қулоғининг ўнг томонидан ўтиб, нозик бўйнини қийиб ўтган эди.

Мен унинг қўлини ушлаб кўрдим.

Қўли совуқ ва қотиб қолган эди.

## ТҶРТИНЧИ БЎЛИМ

### 1

Мен йўлакка назар ташладим. Ҳеч ким йўқ. Кўп сонли эшикларнинг ожиз товуши ниҳоят бу ерда истиқомат қилувчиларнинг уйқудан уйғонганликларини англатиб турарди.

Йигирма учинчи хонани эҳтиёткорлик билан тарк этиб, ортимдан эшикни ёпдим-у, шляпамни ечиб, юзимни дастрўмол билан артдим. Чекиб чуқур нафас олдим. Гарчи унчалик бўлмаса-да, бу ҳар ҳолда ёрдам берди. Ҳозир менга яхшилаб аралаштирилган бир бордоқ виски керак бўлади.

Йўлақдан ўтиб, сариқ сочли қизнинг эшиги томон бордим. Пешлавҳада шундай деб ёзилган эди:

ЖОЙ ДРИДОН хоним.

Иш кунлари уйда, фақат соат бешдан сўнг

Мен эҳтиёт бўлиб тирноқларим билан эшик тахта-сини тирнадим, ертўлада худди сичқон қитир-қитир қилгандай бўлди. Аммо эшитилмади.

Эшик ярим фут очилди ва бу тирқишдан менга Дридон хонимнинг ўзи қараб турарди. Унда олдинги хурсандчилик ва хушмуомалалиқдан асар ҳам қолмаган эди.

– Нима керак?!

Қизнинг катта-катта зангори кўзлари менга шубҳа ва эҳтиёткорлик билан қараб турарди.

Вақтни бекор ўтказмасликка қарор қилиб, бундай пайтда аниқ ва қулай тарзда ишлатиладиган тилда:

– Мен унча катта бўлмаган бир маълумот сотиб олмоқчиман, – дедим ва бурни яқинига ташриф қоғозимни тутдим. – Ўн дақиқада йигирма доллар тўлайман, менинг берадиган пулим шу, нақд тўлайман. Сухбат сири кафолатланади.

Қиз ташриф қоғозимни юзида аламли ифодани сақлаган ҳолда ўқиди, бундай ифода одатда кам ўқийдиган ҳамда узундан-узоқ сўзлар учраганда қийналадиган кишиларда учрайди. У лабларини пичирлатмасликка очиқдан-очиқ уриниб, сўзларни ўзича талаффуз қилишга интилди.

Ўқиб бўлгач, эшикни сал каттароқ очди ва ташриф қоғозимни ўзимга қайтариб берди.

– Пулни кўрсатинг-чи.

Оддий айёрликдан холи кўнгил ана шундай тўғридан-тўғри мақсаддан гап очади ва ортиқча савол бермайди, деб ўйладим мен ва ҳамёнимни чиқариб, икита яп-янги шалдираган ўнталикни кўрсатдим. Йўқ, уларни бермадим, фақат кўрсатдим, холос.

Дридон хоним буларга худди қорбобога маҳлиё бўлган болалардек қаради ва эшикни очди.

– Кириг. Мен сизнинг қаердан эканлигингиз, кимлигингизни билмайман, билишни ҳам истамайман. Аммо бу расмли қоғозларни кўргач, кафтларим кичишиб қолди. Сизга қандайдир маълумотлар керак, бошқа ҳеч нима эмасми?

Мен ичкарига кирдим, бу ер Грациянинг хонасига нисбатан бироз кенг, анчагина шинам ва ёқимли эди. Диван, ўтирғич, иккита оромкурси, деворда эса фабрика гиламига иккита шойида ишланган хитой сура-ти осилган. Стол устидаги шиша вазада қизил ва сариқ ола-була баргли майда чиройли гулли манзарали ўсимлик – бегония яшнаб турарди.

Стул устига шляпамни ечиб қўйдим, менга ҳақиқатан фақат ахборот кераклигини айтдим.

У тўқ қизилга бўялган бармоқларини чўзиб деди:

– Олдиндан ярмини беринг. Бу сизга ишонмасликдан эмас, балки менинг шундай қоидам бор. Эҳтимол, қаҳва истарсиз? Ёки вискими?

Мен унга ўн долларлик пуллардан бирини узатдим. Бу иш учун эрталаб бериладиган бўнак пулларни бутунлай сарфлашимга тўғри келади, деб ўйладим.

Қиз пулни буклаб, қўйнига яширди. Мен, келишувимизни яхшилаб ювсак бўларди, деб қўйдим.

У хасислик қилиб ўтирмади. Менга бир шиша виски, қадаҳ берди-да, қанча бўлса, қуйиб ичаверинг, деди.

– Бироз сабр қилинг, мен ўзимга қаҳва келтираман.

У ошхонадан қайтганида, мен икки қадаҳни ичиб бўлган эдим. Қиз қаҳва қўйилган патнисни столга қўйиб, диванга ўтирди ва менга узун, нафис оёқларини кўрсатиб қўйди. Бу мени тўғри йўлдан оздириши мумкин, лекин айти дамда хаёлим мутлақо бошқа ўйлар билан банд эди. Синчков нигоҳимни илғаб олган

қиз оёқларини халатининг этаги билан ёпиб, менга саволомуз қаради.

– Демак, сиз хусусий изқувар экансиз-да?

– Шунга ўхшаш. Унчалик эмас-у, аммо шунга яқин.

– Тушунарли. Мен сизни кўрганим заҳоти оддий хотинбоз эмаслигингизни пайқаган эдим. Кўзларингиз чиройли экан. Ростдан ҳам бироз вақтихушлик қилишни истамайсизми?

Мен хушмуомалалик билан рад этишга чоғланган эдим, у қўл ҳаракати билан гапиргани қўймади ҳамда шодон кулиб юборди.

– Кечирасиз, азизим. Мен шунчаки ҳазиллашдим. Бу ерда келишган эркакни ҳар доим ҳам учратавермайсан, деярли ҳаммаси эшикни ёпгани заҳоти дарров ташланади. Бу янгилик менга жуда ёқди. Хўш, шундай қилиб, сиз нимани билишни истайсиз?

Мен учинчи қадахни тўлдирдим.

– Мени Грация Леман қизиқтиради. Сиз уни била-сизми?

Дридон хоним хуш кўрмайдиган қиёфага кириб, қовоғини уйди:

– Жин урсин, ана шу иркитни билиш учун шунча пул сарфлаб ўтирибсизми?

Виски кайфиятимни кўтариб юборган эди. Ростини айтсам, ичимлик мени кучли равишда жунбишга солди.

– Мен полиция билан боғлиқ нохуш ишга аралашиб қолган бир мижоз учун ишляяпман. Грация уни ана шу кулфатдан қутқариш учун ёрдам бериши мумкин эди. Мана, ҳамма гап шу.

– Ундай бўлса, олдига бориб, ҳаммасини билиб олинг. Менинг нима даҳлим бор?



– Грация ҳозир менга ёрдам бера олмайди, деб ўйлайман. У ўлган.

Қиз сесканиб кетди ва қаҳвани тиззасига тўкиб юборди. Овозини пасайтириб, шайтон сўзини аралаштириб сўкинар экан, қаҳва идишини стол устига қўйдида, тиззасини дастрўмоли билан артишга тушди.

– Бу қанақа аҳмоқона ҳазил? – деди у. Аммо мен жавоб бермасдан индамай қараб турганимни кўриб, қўшиб қўйди: – Сиз Грацияни ростдан ҳам ўлган деяпсизми?

– У ўлган, бу аниқ. Мен ҳозиргина ўша жойдан келдим. У ваннахонадаги илмоққа ўзини осган экан.

Дридон хоним эсанкираб қолди. Қўллари билан юзини беркитиб, елкаларини қисди, виски шишасига кўлини чўзди.

– Грация ҳамиша аҳмоқ эди, аммо бунчалик телбаликка боради, деб асло ўйламагандим. Ҳамма кулфати шундаки, Грация марихуана чекарди.

– Мен ҳам шундай деб тахмин қилдим. Хонасида ана шу расво нарса анқиб ётибди.

Мен сигарета олиб, биттасини унга таклиф этдим. Бирга чекишдик.

– Биласизми, кўрқувдан бутун аъзойи баданим қалтираб кетяпти, – деб иқрор бўлди қиз. – Мен бундай ишларга асло чидай олмайман.

– Сиз уни кеча кечқурун кўрганмидингиз?

– Ҳа. Мен тез-тез унга дуч келиб турардим.

– Қачон кўрдингиз?

– Биринчи марта тушликка кетаётганимда. У уйига қайтаётганди. Кейин яна учрашиб қолдим ва иккаламиз уйга бирга қайтдик. У қаергадир чиқди, шекилли. Мен бу пайтда тушлик қилаётгандим.

– Ўшанда соат неча эди?

Дридон хоним эснашга уринди, аммо бунда хушёрлик кўрсата олмади.

– Кеча кечаси. Аниқ эслайман, аммо соат уч бўлиши керак. Умуман айтганда, жуда кеч эди.

– Грация ёлғизмиди?

Қиз бош чайқади.

– О, йўқ. Доимгидай бир эркак билан бирга эди. Улар бу ифлос, кичкина...

У гапани ўртасида тўхтади-ю, қовоғини уйди:

– Майли, яхшиси, бундай демаслик керак. Ахир у ўлган-ку!

– Эркак қанақа эди?

– Ундан кўра бироз хушрўйроқ. Бундайлар билан дунёнинг нариги чеккасига боришга ҳам тайёр эдим. Актёр Кларк Гейблга ўхшаб кетарди. Ташқи томондан эмас, қилиқлари билан.

– Кийиниши қандай эди?

– Эгнида урфга кўра очиқ қизил тусдаги матодан тикилган костюм, оқ наматсимон шляпа, бўйнида эса қўлда тўкилган бўйинбоғ. Кўзойнаги катта, қора эди. Эҳтимол, буни бирорта таниш билиб қолмасин, деган ниятда таққандир. Грацияникига ўралашаётганини биров сезиб қолишини истамаган. Эркаклар кўпинча ана шунақа лўттибозлик қилишади.

Мен стул четида ўтирар ва бутун кучим билан хотиржам кўринишга интилардим.

– Ингичка қора мўйловли, юзи тиришган, қотма эдими?

– Худди шундай. Сиз уни билармидингиз?

– Мен ўша одам билан hozиргина зинада дуч келиб қолдим. Пастга тушиб кетаётган эди.

– Ҳозир дейсизми? – Дридон хонимнинг кўзлари ола-йиб кетди. – Агар Грация ўлган бўлса, у қандай қилиб...

– Ҳа, мен ўйлашимча, Грация бундан саккиз соат муқаддам ўлган.

– Сиз ўша эркак хонада бўлган пайтида, у ваннага кириб, ўзини осиб қўйган демокчимисиз?

– Эркакни йигирма дақиқа бурун зинадан тушиб кетаётганида кўрган эдим. Қиз бундан саккиз соат муқаддам, тахминан соат тўртларда ўлган. Бу эркак уникида меҳмонда бўлганида, ўзини осган. Эркак агар олдин кетиб, сўнг эрталаб ортига қайтмаган бўлса.

Жой Дридон ўзини диван ёстиғига ташлади юзини кўллари билан елпишга тушди.

– Уни ўша эркак ўлдирган бўлиши мумкин, шундай эмасми? Ана холос! Бошим айланиб кетди.

Мен бирдан ўша нотаниш кишининг соқоли қирилмаган ияқларини эсладим. Агар у кеча кечкурун бу ердан кетган бўлса, нега уйда эрталаб соқолини қирмаган экан? Шу аҳволда кўчага чиқдимикан? Бу саволга аниқ жавоб топиш зарур. Аммо жавоби йўқ. Шунда мен негадир бу нотаниш одам тунни Грация-никида ўтказган бўлса керак, деган қарорга келдим.

Масала жиддий. Уни эътиборсиз қолдириб бўлмасди. Изоҳлаш керак эди, назаримда.

– Мана сизга беришим керак бўлган яна ўн доллар. Ёрдамингиз учун раҳмат. Менинг маслаҳатимга қулоқ солинг: бу ишлардан иложи борича узоқроқ юринг. Майли, уни биров ўлик ҳолда топсин.

– Э, худоё... Мен энди у ўзини осиб қўйган, деган фикрни ўйлайвериб, мутлақо ухлай олмайман.

– Агар бирор полициячи сизни ҳибсга олиб, бошқармага элтиб, тергов қила бошласа борми, умуман ухламайсиз.

– Сиз полицияга хабар бермоқчи эмасмисиз?

Мен бош чайқадим.

– Айни дамда бу қотилликка вақт сарфлай олмайман. Ташвиш тортманг, уни тезда пайқаб қолишади. Ҳамиша шундай бўлади, – дедим-у, ҳамёнимни чиқариб, яна битта ўнталик доллар олдим. – Агар сиздан сўраб қолишса, мен ҳақимда асло гапирманг. Уларга энгил матодан костюм кийган киши тўғрисида айтинг, аммо сўрамасларидан олдин эмас.

У пулни олиб, қўйнига яширди.

– Яхши, мен уларга сиз ҳақингизда ҳеч нима демайман.

Жой лабларини тишлаб, ниманидир ўйлаганча диванда ўтириб қолди. Унинг кўриниши анча эсанкираган, кўрқиб қолган эди.

Мен хонадан чиққач, атрофга қараб, ортимдан ҳеч ким кузатмаётганига ишонч ҳосил қилдим. Сўнг йўлакни кесиб ўтиб, йигирма учинчи хонага кирдим. Эшикни ортимдан беркитиб, тезгина, аммо қунт билан уйни кўздан кечириб чиқдим.

Менга ўша озғин эркакнинг квартирада тунни ўтказганини исботловчи далиллар зарур. Аслида айнан нимани ахтараётганимни билмасам-да, шунга қарамай, синчковлик билан излашни давом эттирдим.

Даставвал тўшакни кўздан кечириб, ёстикдан икки тола қора сочни топиб олдим. Грация сариқ сочли. Албатта, агар у бошини шу ёстикқа тегизган бўлса, бу унинг бутун тунни шу ерда ўтказганини англамайди. Шунга қарамай, арзимас бўлса-да, бу барибир белги эди.

Хонани қаричма-қарич кўздан кечириб чиқсам-да, ҳеч вақо топа олмадим. Ахтаришдан воз кечмоқчи эдим, ниҳоят нимани излаган бўлсам, ўшанга дуч келдим. Муъжаз ошхонада иккита кичкина жавон бўлиб, бирида финжонлар, ликопчалар, чой идишлари ва

бордоқлар, бошқасида эса ошхона анжомлари – това, кастрюллар, косалар, япасқи идишлар, чўмичлар бор. Ана шу ерда това, кастрюллар орасида идишлар билан финжон ҳам мавжуд эдики, унинг жойи бу жавонда эмаслиги очик-ойдин кўриниб турарди. Бу мени ўйлантириб қўйди. Мен ахлат солинадиган пақирга эътибор бериб қарадим. Унда оддий ахлат тепасида кичкина қаҳва қуйқаси бор эди. Хато бўлиши мумкин эмас: қуйқани яқингинада ташлашган.

Бугун эрталаб Грация қаҳва қайната олмасди. Бу аниқ. Агар ўша нусха ниманидир эсидан чиқариб, қайтиб келган бўлса ҳамки, қаҳва қайнатиб ўтирмасди. Бундай бўлишига ишонмайман, аммо у тунни шу ерда ўтказган бўлса, эрталаб туриб кетишидан олдин қаҳва қайнатиб ичиб кетган бўлиши мумкин эди. У Грациянинг жасади ваннада осилган ҳолда турганини билган – наҳотки шу даражада совуққон бўлган? Агар ўйлаб кўрилса, афтидан, эркак ётишидан олдин бу ҳақда билган, бу эса нафақат совуққонлик, балки...

Шунда ўчиб қолган неон чироғи қоронғи тунда кўчани бирдан ёритиб юборгани каби сергак тортдим – ахир ўз-ўзини ўлдириш эмас, бу ерда яққол кўриниб турган қотиллик рўй берган.

## 2

Қоронғи вестибюлнинг узок бурчагида телефон будкаси турарди. Мен эшикчани очиб, ичкарига кирдим. Бу ерда шундай қўланса ҳид бор эдики, гўё эчкини, аниқроғи, қари такани сақлагандай туюлиб кетди.

Мен нафас олмасликка ҳаракат қилдим. Телефон гўшагини кўтариб, микрофонга дастрўмолимни қўй-

дим-да, рақам тердим. Бир дақиқа ўтгач, қалин бўғиқ овоз янгради:

– Полиция бошқармаси. Сержант Харкер эшитади!

– Мени лейтенант Мифлин билан боғланг, – дедим ўзимни микрофондан бироз узоқ тутиб.

– Ким гапиряпти?

– Гарри Трумэн, – жавоб бердим мен. – Қани, тезроқ бўл! Сенга барибир бўлиши мумкин, мен учун эса вақт пул, дегани.

– Бир дақиқа тўхтанг, – деди сержант.

Гўшакдан унинг кимнидир сўраётгани аниқ эшитилиб турарди: лейтенант қаерда? Бу ерда уни қандайдир нусха сўраяпти. Ўзини Гарри Трумэн, дейди. Ҳа, қандайдир таниш фамилия. Мен ҳам қачонлардир эшитгандайман. Сержантни қандайдир киши уят сўзлар билан сўкиб ташлади ва шу заҳоти гўшакдан Мифлиннинг овози эшитилди.

– Полиция лейтенанти Мифлин эшитади, – деди у совуққина тарзда. – Кимсиз?

– Хабарни эшитинг: Фелман-стритдаги 274-уйнинг йигирма учинчи хонасида бир киши ўзини осиб қўйган. Агар тезроқ ҳаракат қилсангиз, ахлат челагида жиноят аломатини кўрасиз. Ўз-ўзини ўлдириш, деб хулоса чиқаришга шошилманг, яхшиси унинг ўтмиши ва алоқаларини текшириб кўринг. Зарар кўрмайсиз.

– Ким гапиряётган? – қатъий талаб қилди Мифлин. Мен айтган манзилни ёзиб олаётган сиёҳнинг қитирлаётганини аниқ эшитдим.

– Бу ҳақда тушунчага эга эмасман, – деб жавоб бердим ва гўшакни жойига қўйдим.

Даструмолимни чўнтагимга солиб, шовқин чиқармасликка ҳаракат қилдим ва эшик томон интилдим. Менинг бу уйдан тезроқ чиқиб кетишим учун уч да-

қиқа вақт қолган. Гарчи бизнинг полициямиз тезкорлиги билан ажралиб турмаса-да, баъзан фавқулудда ҳодисалар пайтида у анча жадал ҳаракат қилади.

Мен эндигина автомашина эшигини ёпганимда, қандайдир йиртиқ куртка кийган ва ифлос иштондаги бола машинага яқинлашди-да, ойнадан кир-чир башарасини тикди.

– Эй, амаки! Сизнинг Корал-роуддаги иккинчи уйга боришингизни сўрашяпти. Ҳозирнинг ўзида боришингиз керак.

Мен стартерни босдим, чунки орқа томонни ойнадан кузатар эканман, шу сониянинг ўзида полиция машинаси зудлик билан келиб, мени ушлаб олади, деб хавфсирардим.

– Ким айтди?

– Бир одам. У менга бир доллар бериб, шу гапни етказишимни тайинлади. Жуда муҳим, сиз бу ҳақда билар экансиз, у шундай деди.

Бола ортига югуриб кетди. Мен қувиб бориб ушламоқчи эдим, аммо вақт қолмаганди. Бу уйдан тезроқ нари кетиш керак. Мен полиция машинасининг сиренаси етиб келган заҳоти газни охиригача босиб, Бичроуд томон йўл олдим.

Корал-роуд қаерда жойлашганини билмайман. Аммо тахминимча, у Корал-Гейблс ҳудудида. Мен ўша ёққа йўл олдим, чунки ким чақирганига қизиқиб қолгандим. Кафедаги официант мени эслаб қолган-қолмагани, машинанинг рақамини пайқаган-пайқамагани ҳақида билмоқчи эдим. Ҳозир мен учун Мифлин билан учрашув унчалик қизиқ эмас. Грациянинг ўлими билан боғлиқ ишни у менинг ёрдамимсиз ҳам хал қила олади. Агар Мифлин бу ишни кавлаб, официантга қадар етиб борадиган бўлса, у ташқи қиёфам бўйи-

ча маълумотга эга бўлади. Мен кутиб турмай кетиб қолганим боис унинг анча аччиқланишига аминман.

Бич-роуд охирида чапга бурилдим. Соҳилдан ўтгач, машинамни кўрфаздаги пўлат арқонлар ва мой солинган бочкалар ўртасидаги бўш жойга тўхтатдим. Шунга айтиш керакки, Корал-Гейблс ёлғиз сайр қилдиган ёки тўппончасиз юрадиган маскан эмас. Ҳатто полициячилар ҳам дадилроқ бўлиш учун бу ерга икки киши бўлиб келишади. Шу билан бирга бирор ой йўқки, кўчанинг қоронғи бурчагида орқасига пичоқ урилган одамнинг жасади топилмаган бўлса.

Машинадан тушиб, қайиқлар ҳамда траулерларга лиқ тўлган узун соҳилни кўздан кечирдим. Чақчақлашиб ва офтобда тобланганча хушманзара жойда ўтирган бир гуруҳ эркак менга термилиб турганини ҳис этдим. Уларнинг айёрони боқувчи кўзлари синовчан назар билан мени кузатарди.

Мен бу эркаклардан бирига мурожаат қилдим. У чеккароқда турар, нима қиларини билмай, кичкина юпқа тахтачадан қайиқча яшаш билан банд эди.

– Корал-роудга қандай бориш мумкин?

У менга назар ташлади-ю, ўгирилиб кўрфазнинг мойли сувига тупурди. Ўнг қўлининг катта бармоғи билан елкаси оша тамадихоналар турган томонга ишора қилди. Одатда дунёдаги ҳар қандай порт атрофини ана шундай дўкон ва дўкончалар ўраб туради.

– Ята бари орқасида, – деди эркак узук-юлуқ қилиб.

Ята бари – икки қаватли ёғоч бино бўлиб, у ерда ўн йиллик молюска ва инглиз пивосини тамадди қилиш мумкин. Агар эҳтиёткорликни унутсангиз, хаш-паш дегунча оёқдан қолдиради. Мен Керман билан у ерда икки марта бўлганман. Шундай муассасаки, у ерда ҳар ким бориши ва ҳар қандай воқеа рўй бериши мумкин.



– Раҳмат, – дедим мен.

Бар ортидан бошланадиган ёғоч иморатлар томон энсиз кўча берк, ундаги баланд деворда «Корал-роуд-га» деб ёзилган эди.

Мен тўхтаб чекишга тутиндим ва ўтиб кетадиган жойни ҳеч бир ҳаяжонсиз кўздан кечира бошладим. Баланд деворлар куёшни тўсиб турарди. Кўчанинг охирида қандайдир қора туйнук бўлиб, у бутунлай шубҳали сукунат ва захликка бурканган эди.

Қўлимни костюмим остига тикдим ва «ўттиз саккизинчи калибр»имни дарҳол қўлга олишим мумкинлигига ишонч ҳосил қилгач, аста-секин қоронғилик томон юра бошладим.

Кўча адоғида уч томондан қандайдир ташландиқ иморатлар билан ўралган зулмат босган ҳовли жойлашган эди. Тепасида кўм-кўк осмон манзарасида кўзга алоҳида ташланадиган қоп-қора чортоқлар осилиб турарди.

Мазкур иморатларни кўрдим-у, ўз-ўзимдан: «У ерга кирсанг, қопқонга тушиб қолмайсанми?» – деб сўрадим.

Рўпарамдаги яроқсиз эшик ошиқ-мошиғида ўртача катталиқдаги тахтачанинг жез пешлавҳасида «2» рақами ёпиштирилган эди. Демак, Корал-роуддаги мен излаган уй мана шу. Янада ичкарироқ кириб, атрофга тикилиб қарадим. Ҳамма жой қоронғи. Менинг эса фонарим йўқ, тахталар чириб қолган, шундай экан, уларнинг устидан товуш чиқармай юриб бўлмайди.

Сигаретамни улоқтирдим-у, ҳовлини кесиб ўтиб, гижирлаётган эшик томон юрдим. Юрагим безовта урар, аммо мен одимлашда давом этардим, чунки руҳни мустаҳкамлаш учун вақт-вақти билан шунга

ўхшаш машқларни ўтказишни фойдали деб биламан. Шу асосда иродамни тоблашим керак.

Товуш чиқармай, астагина тош зиналардан кўтарилиб, узун қоронғи даҳлизга тушиб қолдим. Шундоқкина рўпарамда зинапоя оралиғи кўринди, у зимзиёликка чулғанган эди. Пиллапоялардан айримлари бутунлай қулаб тушган, панжара йўқ. Тахталалар чириган ва ғижирлар эди. Мен эҳтиёт бўлиб, зах хиди анқиб турган зулмат сари юришда давом этдим. Олдинда қаердандир каламушларнинг шитирлаб, чийиллаб юргани эшитилди, ана шу товуш мени серрайиб қотиб қолишга мажбур этди. Ҳар эҳтимолга қарши тўппончамни чиқариб, қўлимга олдим.

Даҳлиз охирида очиқ эшик кўринди. Мен унга етмай эҳтиёт бўлиб тўхтадим ва ичкарига қарадим, аммо қоронғиликдан бошқа ҳеч нимани кўрмадим. Киришга шошилмадим, сўнг бир неча сония ичида тахталар орасидан силжиётган ингичка ёруғликни фарқлай бошладим. Бу тахталар деворга қоқилган бўлса-да, барибир қоронғилик жуда қуюқ эди.

Мен эҳтиёткорлик билан икки қадам ташладимда, эшик ёнида тўхтаб қолдим. Ёнимда турган тахта бирдан қисирлаб кетди. Ана шунда ҳавода визиллаб келаётган дарра товушини эшитиб, беихтиёр ўзимни четга отдим. Қандайдир нарса елкамга тушиб, оғрииб юборди, қўлимдаги тўппончам учиб кетди. Бошимга мўлжаллаб берилган зарба нишонга текканида борми, мени бир умрга ётқизиб ташлаган бўларди.

Юзтубан йиқилиб тушдим. Кимдир оёғи билан биқинимга туртди, бармоқлари елкамни пайпаслаб, юзим бўйлаб ўтди-ю, бўйнимга ёпишди. Кучли қўллар гарданимга ўрмалаб, томоғимдан бўға бошлади. Мен зўр бериб иягимни кўкрагимга тирадим, ҳамла қил-

ган киши бўғмаслиги учун ўрнимдан туришга уриниб, уни чангаллаб ушлаб олишга ҳаракат қилдим. Қўлим костюм енгига тегди ва кучли мушакни ушладим. Тезда ўзимни ўнглаб олиб, қаттиқ зарб бердим, назаримда, муштим рақибимнинг қулоғига тегди.

Ўлдираш эшитилди, сўнг камида қандайдир юз кило оғирликдаги юк устимга ағдарилди. Мени полга ёпиштириб, қапиштиришга ҳаракат қилди. Бармоқлари юзимга ёпишди, улар иссиқ эди. Тез-тез ҳансираб олинган нафас юзимга урила бошлади.

Бу одам ожиз бир қиз билан олишмаётганди, албатта. Энди унга Грацияни осиб билан боғлиқ иш дуч келмаган. Бу томошаси менга ўтмайди.

Мен унинг катта бармоғини маҳкам қисиб олдим-у, орқага қайира бошладим. Рақибимнинг оғриқдан нафаси қайтиб қолаёзди, буни сездим. Аммо у бир амаллаб бармоқларини қўлимдан ажратиб олди. Мен бўш келмадим: шиддат билан ҳайқариб, қичқирганча яна зарба бердим. Рақибим бир томонга учиб кетди.

Бироқ мен ҳали ўрнимдан туришга улгурмасимдан, у яна ҳужумга ўтди. Рақибимнинг яқинлашаётганини қоронғилик ичида илғадим-да, ғира-шира шарпага қарши ўзимни урдим.

Миямнинг туб-тубида ваннахонадаги илмоқда тунги иркит кўйлақда осилиб турган Грация тимсоли «лип» этиб ўтди-ю, бу манзара бутунлай ғазабимни тошириб юборди. Ҳамла қилишни давом эттирдим. Худди қутуриб кетгандай ўнг ва чап томондан зарблар бера бошладим, муштларим ҳар доим ҳам нишонга тегмас, аммо текканида гангитадиган даражада эди. Аммо ўзим ҳам иягимга яхшигина зарба едим.

Рақибим қийинчилик билан нафасини ростладиди, шоша-пиша чекина бошлади. Менинг ҳам тўхта-

шимга тўғри келди – уни кўздан йўқотиб қўйдим. Рақибимнинг фақат узуқ-юлуқ нафас олишини эшитар ва мендан шундоққина бироз нарида эканлигини сезиб турардим. Биз қоронғилик қаърида бир-биримизга тикилганча турардик. Ҳар бир қадамимизга сергаклик билан кулоқ солардик.

Назаримда, мендан чап томонда, бир ярд нарида унинг қўланкаси силжигандек бўлди. Оёғимни силтадим. Рақибим эса худди мушукдай эпчиллик билан ўзини бир томонга отди. У мувозанатини ўнглаб олмай туриб, ўша томонга ташландим. Муштим тўғридан-тўғри гарданига тегди. Рақибим хириллаганича орқаси билан ерга қулади ва тезда ўрнидан туриб, ўзини эшикка урди. Мен ортидан югурдим, аммо оёғим чириган ёғоч орасига тушиб қолди. Ёғоч синиб кетди, мен гурсиллаб йиқилиб, сал бўлмаса ҳушимни йўқотаёздим.

Агар у орқасига қайтса, мени асфаласофилинга юбориши мумкин, аммо бунгача анча бор.

Жойимдан туришга уриндим, аммо оёғим ёғочлар орасида қисилиб қолган эди. Оғриқдан инграб, ҳар ҳолда елкаси кенг шарпани кўзим билан илғадим. У эшиқдан сал-пал сизиб турган ёруғликда кўришиб қолди. Оёғимни бир амаллаб бўшатиб суғуриб олганимда, унинг ортидан югуришга кечиккан эдим. Корал-Гейблсда етарли даражада овлоқ жойлар кўп, шу боис уни ахтариб топиш мушкул эди.

Мен ўзимни ўзим лаънатлаб, оқсай-оқсай ташқарига чиқдим. Бўсағада нимадир ётарди, ўша менинг диққатимни тортди. Энгашиб уни олдим

Бу оқ наматсимон матодан тикилган шляпа эди.

## 3

Бармен кўринишидан профессионал боксчини эслатарди. Гарчи унинг ёши ўтган бўлса-да, барда тегишли тартиб ўрнатиш учун етарли даражада бақувват. У менга қовурилган, жавдар унида тоблаб тайёрланган дудланган чўчка гўшти ва бир кружка пиво берди. Кейин эса қорнимни тўйдиргунимча кучли қўлларини пештахта устига тираганча мендан кўз узмай ўтирди.

Бу пайтда барда жимлик чўккан эди. Залнинг ҳар жой-ҳар жойида мижозлар ўтиришар, улар асосан баликчилар ва тошбақа овловчилар бўлиб, сувнинг қайтишини кутишарди. Бу одамларнинг бирортаси ҳам менга эътибор бермади, аммо мен, назаримда, барменнинг диққатини ўзимга тортдим. Унинг жанговар тиртиқлар билан қопланган юзи тундлашган, ўзи эса устарада обдон қирилган улкан бошини дудланган чўчка сони гўштини силагандай уқаларди. Бу билан мияни силжитиш қувонарли демокчими, номаълум эди.

– Мен бу башарани қачон кўрган эканман? – деб сўради у япалоқ бурнини тортиб. – Илгари бу ерда бўлганмисан?

У шунчалик баланд овозда гапирдики, ҳар қандай муваққат ҳокимни саросимага солиб қўйиши мумкин эди.

– Ҳа, бўлганман, – тан олдим мен.

Бармен хурсанд бўлиб, бош ирғади, қачонлардир қулоғи бўлган жойини қашиди ва икки қатор бақувват оппоқ тишларини кўрсатди.

– Ана кўрдингми, мен бирорта башарани эсдан чиқармайман. Барга эллик йилдан кейин келсанг ҳам барибир танийман. Бу аниқ!

Ахир биз қанча яшаймиз ўзи, деб эътироз билдирмоқчи эдим, аммо баъзи мулоҳазаларга бориб индамадим.

– Айримларнинг хотираси нақадар зўр-а, ҳайратга тушаман, – дея маъқулладим. – Мен ҳам шундай неъматга эга бўлсам эди. Масалан, бугун бир киши билан танишаман, аммо эртаси куни ёнидан ўтиб кетсам, эслай олмайман. Бу ишга зиён етказди.

– Тўғри, – гапимни тасдиқлади бармен. – Мана кеча бу ерга бир киши кириб келди. Уч йил давомида қаергадир гумдон бўлганди. Мен унга буюртма бермасидан олдин эски инглиз виносидан қуйиб бердим. Чунки ҳар доим шунақасидан ичарди. Мана буни хотира деса бўлади.

Агар бармен мендан ҳам сўрамай эски инглиз виносини берганида, эътироз билдирмасдим: у тортишиш мумкин бўлган қариялар тоифасидан эмасди.

– Қани, хотирангизни бир текшириб кўринг-чи, – дедим мен. – Баланд бўйли, озғин, енгил матодан тикилган костюм ва оқ наматсимон шляпа кийган киши! Бу ерга шундай одам кирмаганмиди?

Улкан жуссали бармен сесканиб кетди. Абжағи чиққан юзи тошдай қотди.

– Сен унчалик ақллига ўхшамайсан, оғайни, бизнинг муассасада бундай саволларни беришмайди, – деди у овозини пасайтириб. – Тилингни тий, акс ҳолда олд тишларингдан айриласан.

Мен пивони кўтариб, унга кружка тепасидан қарадим.

– Бу саволимга жавоб эмас, – дедим кружкани қўяр эканман ва беш долларлик пулни олиб, кўринмайдиган тарзда унинг қўлига қистирдим.

Бармен атрофга назар ташлади-да, қовоғини уйиб, пулни олишга иккиланди. Яна бир бор теваракка боқди, бу қарашини худди чет эл разведкачиси Хардирон ролини илк марта ўйнаётган киноактёр каби бажарди.

– Уни менга сигарета билан бирга узат, – деди лаблари пичирлаб.

Мен барменга сигарета ва пулни бердим. Залда ўтирганлардан олти кишидан фақат биттаси бармен пулни қандай олганини кўрмади, холос. Чунки у орқа ўгириб ўтирганди.

– Бу Барретнинг йигитларидан бири, – деди бармен шивирлаб. – Улардан нари юр. Баррет хавфли одам.

– Албатта, хавфли. Агар қўйиб берса, худди чивиндай чакиб олади, – дедим мен пиво ва егулик ҳақини бера туриб.

Бармен пештахта устидаги пулни сидириб олгач, сўрадим:

– Унинг исми нима?

Бармен менга қовоғини уйиб қараб қўйди, сўнг барнинг охирига кетди. Мен бироз қараб турдим, сўнг қайтиб келмаслигига ишонч ҳосил қилгач, стулдан тушиб қоқ пешин қуёши тутаган кўчага чиқдим.

Демак, Жеф Баррет!

Аниқ шу бўлса керак, деб ўйладим мен, аммо унинг одамлари борлигини билмасдим. Хўш, Барретда Грациянинг тилини тийишига сабаб бўладиган асослар етарли. Дедрикни ўғирлашнинг асосий ташкилотчиси ўша эмасмикан? – деб сўрадим ўз-ўзимдан. – Агар шундай бўлса, булар бир-бирига жуда яхши боғланыпти, ҳатто ортиқ даражада.

Мэри Жером мана шу Баррет билан қандайдир алоқадор бўлса, масала ойдинлашади, деб ўйладим.

Мен «Бьюик»им томон борар эканман, бу иш билан шуғулланиш вақти етганини англадим.

Бир қатор масалаларга ойдинлик киритиш учун дарҳол «Акме» гаражи томон йўл олишга қарор қилдим.

Бич-Роуддан Готори-авенюга қадар жадал юриб, машинани чапга, Футхилл-бульварга қараб бурдим.

Ярқираган қуёш кўзларимни қамаштирарди. Офтоб нуридан ҳимояловчи кўк экранни олд ойнага туширдим. Ундан ўтган қуёш нурлари кабина ичини кўк рангга тўлдирди, ўзимни гўё аквариум ичида ўтиргандек ҳис этдим.

«Акме» гаражи саҳрода, Голливуд-авеню ва Футхилл-бульвар кесишган масканда жойлашган. Бу ер ҳеч қандай тижорий фойда олиш жойи сифатида даъво қила олмасди. Мен беихтиёр равишда ўзимга ўзим, Льют Феррис нега бензин қуйиш станциясини шундай хилват, асосий йўллардан четда жойлаштирган экан-а, деб савол бердим.

Қат-қат буралган катта темир тунукали айвонча олдидаги таъмирлаш устахонаси сифатида хизмат қиладиган жойда олтита бензин колонкаси ва битта сиқилган ҳаво ҳамда битта водопровод колонкаси бор эди. Ўнг томондаги ярим вайрона бино дам олиш ва тамаддихона вазифасини бажарар, айвон ортида тўртбурчак шаклдаги ясси томли қоронғи ҳужра кўзга ташланарди.

Қачонлардир бу станция, афтидан, чиройли бўлган, деворларидаги яшил ва оқ чизиқлардан буни пайқаш мумкин. Аммо денгизнинг шўр ҳавоси саҳро куми билан қўшилиб, шамол ҳамда ёмғир туфайли ўзининг қора ишини бажариб бўлган, ҳеч ким бу бинони мислсиз курашдан ҳимоя қила олмаган.



Бензин колонкаларидан бири олдида ярқираган қуёш тиғи остида икки ўринли «Бентли» машинаси, нишаб йўлнинг охирида эса, устахонага элтувчи йўл устида тўрт тоннали юк автомобили турарди.

Атрофда ҳеч ким йўқ. Машинамни бензин колонкалари олдида оҳиста тўхтатдим. Менинг «Бьюик»им «Бентли»дан икки ярд орқада турарди.

Гудок босиб, кутиб турдим. Кўзларим ён-атрофни тезгина «тит-пит» қилиб чиқди. Аммо ҳеч қандай қизиқарли нарсани илғамади.

Ниҳоят устахонадан қандайдир ифлос кўк коржом кийган йигит мен тарафга аста-секин шошмасдан кела бошлади.

У «Бентли» ёнидан ялқовланиб ўтди-да, қошларини кўтарганча менга мутлақо қизиқишсиз қаради. Гарчи йигитчанинг ёши ўн бешларда бўлса ҳам, гуноҳ ва туллаглик гирдобидан анча қари кўринарди. Озғин, қоқсуяк юзига мой теккан, кичкина зангори кўзлари айёрлик ва ғазаб билан боқарди.

– Ўн галлон, – дедим мен папирос чиқариб, чекар эканман, – Қарагин, асло шошма! Мен барибир ярим кечагача ётмайман.

Йигитча менга совуқ нигоҳ ташлаб, автомобилнинг орқа томонига ўтди. У мени бопламаслиги учун қурилма кўрсаткичини кузатиб турдим.

Ниҳоят, йигитча яна олдимда пайдо бўлиб, ифлос кўлини чўзди. Мен пулларни узатдим.

– Жаноб Феррис қаерда?

Зангори кўзлар менга аланг-жаланг бўлиб қаради.

– Кетди.

– Қачон қайтади?

– Билмадим.

– Феррис хоним қаерда?

– У киши банд.

Мен бош бармоғим билан кулба томонга ишора қилдим.

– Ўша ердами?

– У киши қаерда бўлмасин, барибир банд, – деди йигитча ва нари кетди.

Мен унга бақирмоқчи эдим, ногаҳонда айвон тагидан баланд бўйли хушқомат киши кўринди. Эгнига катак костюм кийган, бир кўзи устида эса четлари қайрилган малла шляпа қийшайиб турибди, ёқасида қип-қизил гулдастача қадалган.

Жеф Баррет!

Мен жойимда ўтирганча қолдим ва қуёш нурини қайтарувчи экран орқали қарай олмайди, деган ўйда уни кузата бошладим. Баррет «Бентли» машинасига ўтиришдан аввал мен томонга бир марта бепарво назар ташлади-ю, машинасини Бичвуд-авеню томон бурди.

Йигитча устахонада ғойиб бўлди ва гарчи уни кўрмасам-да, мени кузатиб турганини ҳис этдим. Бироз мулоҳаза юритиб, ўйланиб ўтирдим. Бу ерда Барретнинг пайдо бўлиши тасодифмикан? Ундай бўлмаса керак. Мен Мифлиннинг Льют Феррис гиёҳванд моддалар контрабандасида гумон қилинаётгани тўғрисидаги гапларини эсладим. Баррет марихуана чекишини биламан. Уларни фақат гиёҳванд моддалар боғлаб турганмикан? Мэри Жером-чи? Йўлдан четда жойлашган бу гаражни бекордан-бекорга танламагандир хойнаҳой, машинани ижарага олишда ниманидир назарда тутган бўлиши мумкин-ку! Бу очикдан-очик тасодиф эмас, дедим ўзимга ўзим. Шунда кашфиётлар остонасида турганим, шу билан бирга тергов ўтказишнинг ибтидосида биринчи бор йирик қадам

қўйганимни англаб етдим. Мен дарҳол Феррис хоним билан гаплашиб олишга қарор қилдим.

«Бьюик»дан тушиб, бетон йўлак бўйлаб гараж ёнидан ўтдим-да, кулба сари юрдим. Эшик ёнида сояда йигитча турарди. Ёнидан ўтар эканман, у қимтиниб менга қаради. Мен синчковлик билан унга назар ташладим. Йигитча ўрnidан қимирламади, ҳеч нима демади ҳам. Мен эса юриб бориб, сарой бурчагига етдим, сўнг кулбага яқинлашдим.

Боғча ташландиқ бўлиб, унда дор тортилган, эркеклар майкаси, аёллар кофтаси, пайпоқлар, аёллар пайпоғи ҳамда уринган ишчилар шими осилиб турарди.

Мен эгилиб, арқон дор тагидан ўтдим-да, титиғи чиқиб кетган эшикни тақиллатдим. Узоқ давом этган жимликдан сўнг яна тақиллатмоқчи эдим, эшик очилди.

Остонада кичик жуссали, қип-қизил юзли тикмачоқ аёл турарди. Мен ҳатто яқинроқ турсам-да, унинг неча ёшда эканлигини била олмадим: йигирмадами, ўттиздами – ноаниқ. Юзидаги ифодага кўра, ҳаёт уни шундай синовларга дуч қилганки, ҳазил нима эканлигини унутиб юборгандек кўринади. Аёлнинг водород перикси билан нотекис бўялган сочлари юмшоқ ва майин. Юзи шишинқираган, кўзлари эса яқинда тўкилган ёшлари туфайли қизарган эди. Фақат лабларининг бир четидаги ажинлар унда ҳали ирода кучи мавжудлигини англатарди.

– Нима керак? – деб сўради аёл менга ишончсизлик билан қарар экан.

Мен хушмуомалалик билан қўлимни шляпамга теккиздим:

- Жаноб Феррис уйдадилар?
- Йўқ. У сизга нега керак бўлиб қолди?

– Биласизми, у машинани Мэри Жеромга ижарага берган экан, шу ҳақда гаплашмоқчи эдим.

Аёл секин ортга чекинди, қўли эшик дастасига тегди ва бир неча сония ичида эшикни нақ бурним тагида ёпмоқчи бўлди.

– У бу ерда эмас, менинг эса сизга айтадиган гапим йўқ.

– Мен маълумот учун пул тўлайман, – дедим бидирлаб эшик ёпила бошлаганини кўриб.

– Қанча?

Худди шу онда у суякни кўриб қолган очофат итнинг нақ ўзгинасига айланди гўё.

– Бу менинг қандай маълумот олишимга боғлиқ. Юз долларгача тўлашим мумкин.

У қонсиз тили билан лабларини ялаб қўйди.

– Қанақа маълумот?

– Кирсам бўладими? Мен сизни узоқ тутиб ўтирмайман.

Аёл иккиланиб қолди. Унинг юзига қараб, қалбида кўрқув, шубҳа ва очкўзлик кураш олиб бораётганини англадим. Шундан сўнг мени ўтказиб юбориш учун бир четга ўтди.

– Майли, киринг. Фақат хонамиз йиғиштирилмаган.

У мени орқа томондаги ташландиқ хонага олиб ўтди. Бу ердаги мебелларни эски-туски йиғадиган саройбон омборидан келтиргандай туюлди. Ўнгиб кетган, полга ташланган гилам устида чанг булути сузиб юрарди. Мен уни босиб ўтиб, гилам устига чиқдим. Мебель ва деворларда ифлос қўлларнинг излари кўриниб турибди. Умуман олганда, хона йиғиштирилмаган деган сўз тошириб айтишнинг айнан ўзгинаси!

Феррис хоним юмшоқ оромкурсига ўтирди ва менга ташвиш ва ишончсизлик билан термилди. Унинг оғирлигидан оромкурси майишиб кетгандек бўлди.

– Анави йигитча менга эрингиз шаҳарга кетганини айтди, аммо бу гапга ишонмадим, – дедим хонимни суҳбатга тортиш учун.

– Мен унинг қаердалигини билмайман, – аёлнинг кўзлари ёшга тўлди ва юзини ўгирди. – Менимча, у бутунлай кетди.

Елкам узра ёқимсиз сесканиш ўрмалагандек бўлди.

– Нега бундай деб ўйлаяпсиз?

У муштлари билан кўзларини артди.

– Менда бир чақа ҳам йўқ. У ҳамма пулларни ўзи билан олиб кетди. Ҳатто нонга ҳам пулим йўқ.

– Агар менга арзирли бирор хабар айтсангиз, уларни оласиз.

– О, мен сизга кўп гапларни айтиб беришим мумкин. Улар мени ҳеч нимани билмайди, деб ўйлашади. Хато қилишади. Менда кўз ва қулоқлар бор. Улар ҳақида ҳаммасини биламан. Мен бу туйнукда роса азоб еганман! Бу ердан кетишим учун етарлича пул берсангиз, уларнинг барини ўтқазиб қўярдим.

– Ўтқазиб қўярдим дейсизми? Кимни?

– Ҳаммасини. Льютни, Барретни...

Мен ҳамёнимни чиқардим. У бўшаб қолганди. Бор-йўғи ўтгиз доллар қолган экан. Йигирматаликни олиб, аёлга силкитиб кўрсатдим.

– Бу ерда яна бор, – дедим мен. – Сизга қанча керак?

Аёл ўзини олдинга ташлади ва қўлимдан пулни юлқиб олди.

– Беш юз! Ана шунда кўриб чиқишингиз учун етарлича иш пайдо бўлади.

– Сиз мени пул ишлаб чиқаради, деб ўйладингиз, шекилли? Юз, бир цент ҳам ортиқ эмас.

У менга тешиб юборгудек совуқ назар ташлади.

– Йўқ, менинг нархим – беш юз! Пулни беринг, истамасангиз – тўрт томонингиз қибла! Мен бу ердан кетишим керак. Сизга ёзма кўрсатма бераман ва уларнинг қаллобликларидан иборат ташкилотининг барча сирларини очиб ташлайман. Пулни беринг ёки жўнанг.

– Ахир нима сотиб олишимни билишим керак. Менга нима кераклигини айтсангиз, ана шунда беш юз долларингизни оласиз. Қани, сўзланг.

У менга қўрқа-писа қаради.

– Сиз ким учун ишлайсиз?

– Пирелли учун. Хўш, гапирамизми?

– Майли, гапираман, аммо фақат бир қисмини, – ниҳоят гап бошлади аёл. – Ҳаммасини эса пулни тўлиқ олганимдан кейин сўзлаб бераман. Льют, Баррет ва Дедрик Ғарбий соҳилдаги энг йирик контрабанда ташкилотларни гиёҳванд моддалар билан таъминлаб туради. Улар миллионлаб наша солинган сигареталарни АҚШ, шу билан бирга, Париж, Лондон ва Берлинга жўнатиб туришади. Льют Лос-Анжелес ва Сан-Францискода, Баррет эса Лондон, Нью-Йоркда, Дедрик Париж ва Ғарбий Берлинда иш олиб боради. Хўш, қалай, мос келадими?

– Сиз Дедрик тўғрисидаги фикрларга ишонасизми?

– Бўлмасам-чи! Мен уларнинг суҳбатларини эшитганман. Улар мени аҳмоқ ва ҳеч вақони тушунмайди, деб ўйлашади. Агар мен билан яхши муомала қилишганда, индамаган бўлардим. Уларнинг гиёҳванд моддаларни қаерда яширганликларини ҳам биламан. Мен кўп нарсани биламан. Сиз буларнинг барчасини беш юз нақдига билиб оласиз ва бу анча арзонга тушади.

– Мэри Жером тўғрисида нималарни биласиз?

У қуйи лабини тишлаб, менга кескин қаради.

– Ҳаммасини. Ҳатто ҳозир қаерда эканлигини ҳам биламан.

– Қаерда?

– Мэри «Бин-отель» меҳмонхонасида яшарди, аммо ҳозир у ерда эмас. Пулни олмасдан туриб, қолганини айтмайман. Дедрикни нима учун олиб кетишганини ҳам биламан. Мен ҳаммасини айтиб бераман, бу ишнинг барча сирларини очаман, аммо аввал пулни тўланг.

– Яхши. У ерда менинг машинам турибди. Мен билан идорага юринг. Ўша ерда пулни оласиз ва биз сиз билан хотиржам гаплашамиз.

– Мен ҳеч қаёққа кетмайман. Алдайман, деб уринманг, мени бу ердан олиб кета олмайсиз.

– Мен сизни ўзимнинг идорамга олиб бораман. Қани, кетдикми?

– Йўқ, мен ҳали эсимни еб қўйганим йўқ.

– Нима учун ҳозиргина бу ерга Баррет келганди?

– Билмадим. У бу ерга йигитча билан гаплашгани келади. Кўрдингизми, улар мен билан қандай муносабатда бўлишади? Ҳатто олдимга киришни ҳам истамайди. У фақат Боб билан гаплашади-ю, дарров ғойиб бўлади. Мен Льют ўша аёлнинг олдига борганидан бери ҳеч гапни эшитганим йўқ.

– Сиз Мэри Жеромни назарда тутяпсизми?

– Уни нима деб аташларини билмайман. Балки, ўшадир. Уни кўрганим йўқ. Телефондан қўнғироқ қилган эди. Льют унга: «Ол райт, бэби. Ташвишланма, ҳаммасини жойига қўямиз. Ҳозир мен бораман», – деганини эшитгандим. У, ҳатто мен билан хайрлашиш-

ни ҳам эп кўрмади. Машинани олди-ю, кетиб қолди, шундан буён кўрганим йўқ.

– Бу қачон рўй берган эди?

– Дедрик ўғирланганида, негадир ўша кунни мен эслаб қолганман.

– Соат нечада?

– Тахминан кечки соат саккизда.

– Дедрикнинг ўғирланишига Барретнинг қандайдир алоқаси борми?

Аёл менга нигоҳ ташлади ва хунук тарзда кулиб юборди.

– Жудаям алоқаси бор-да! Пулни беринг ва қолганини билиб оласиз. Мен бу ҳақда ҳаммасини биламан, аммо сиз берадиган пулни қўлимга олмасдан туриб, бир оғиз ҳам гапирмайман.

– Борди-ю, мен полицияни таклиф этсам-чи? Ўшанда ҳаммасини бемалол гапириб беришингизга тўғри келади.

У менинг юзимга кулиб қаради:

– Мени бекордан-бекорга гапиртириб кўрадиган кишини бир кўрмоқчи эдим. Умуман, гап тамом. Пулни олмасдан ҳеч нима айтмайман.

– Мен билан идорага борсангиз, яхши бўларди. Агар бу ерда қолсангиз, улар сизни ўлдириб кетишлари мумкин. Ахир Грация Леманни ҳаддан зиёд кўп билгани учун ўлдирдилар-ку аллақачон.

– Мен ҳеч кимдан кўркмайман. Ўзимни ўзим кўриқлайман. Боринг, пулни олиб келинг.

– Яхши, мен ярим соатдан кейин келаман.

– Кутаман.

Мен кулбадан чиқдим ва шоша-пиша бетон йўлак бўйлаб ўзимнинг «Бьюик»им томон одимлаб кетдим.



Идорага шиддат билан кириб келганимда, стол устидаги қоғоз уюмлари ортидан Паула менга диққат билан қараб қолди.

– Менга зудлик билан беш юз доллар керак, – дедим шоша-пиша нафасимни ростламай туриб. – Ура, иш жойидан силжиди. Ён дафтар, ручкани олинг, кетдик. Ҳаммасини йўлда айтиб бераман.

Паула вазмин – ҳеч қачон ҳовлиқмайди – у ўрнидан туриб, сейфга яқин борди. Йигирма беш долларлик йигирмата купюрани олиб, стол ғаладонини очди. Ён дафтар, ручка ва ўзининг сумкачаси ҳамда қандайдир айлана шаклидаги кичкина чой идишга ўхшаш анжомни (буни шляпа деб атарди) чиқариб, йўлга тушишга тайёр бўлди. Бу ҳаракатлари учун йигирма сония вақт кетди.

Йўлакка чиққач, у матн терувчи Триксига қайтиб келгунимизча идорадан кетиб қолмаслигини тайинлади. Трикси хафа бўлгандай кўринди, аммо биз бунга ортиқча аҳамият бериб ўтирмадик.

Паула билан бирга лифтга томон шошдик.

– Эй, тўхтанглар!

Йўғон овозли Марта Бендикс яғринимга бир туширди.

Мен елкам оша қарадим.

– Марта, ҳозир вақтимиз йўқ. Жудаям шошиляпмиз!

– Янгилик бор. Суюки тўғрисида. Ҳозиргина олддим. Ҳеч қандай ёмон гап йўқ. Ажойиб йигит бўлган. Маршлендда ўн йил хизмат қилган, – деди шоша-пиша Марта. – Мен пулни қачон олишим мумкин?

– Пул менда, уни қайтганимдан кейин оласан, – қичқирдим мен, Паулани лифт эшиги томон итарар эканман.

– Бу кампир бақироқлар мусобақасида биринчи ўринни олса керак, – деб луқма ташлади Паула лифт пастга эниб тушаётганида.

– Юз эллик доллар шамолга совуриладиган бўлди, – маънос ҳолда тўнғилладим мен, – Суюкини беобрў қиладиган маълумот топиладими, деб ўйлагандим. Майли, ёмонлик бор жойда яхшилик ҳам бўлади, аллақачон бу ёнғоқни чақиб бўлдим.

«Бьюик»да Орхид-бульвар, Бич-роуд ва Готори-авеню йўлида жадал борар эканман, Паулани кўрмаганимдан бери ўтган соатларда нималар рўй берган воқелар ҳақида тўхтовсиз гапирардим. Ниҳоят Футхилл-бульварга бурилганимда, Феррис хоним тўғрисидаги ҳикояга етиб келдим.

– Мана шу ерда ҳақиқатан нимадир бор, – дедим мен. – Биласизми, Дедрик – контрабандачи, гиёҳванд моддалар сотувчиси экан! Аёл беш юз доллар эвазига бизга ёзма кўрсатмалар беради.

– Аммо сиз унинг алдамаётганини қаёқдан биласиз?

– Мен ёзма кўрсатмалар оламан, сўнг уни куч билан полицияга олиб бораман. Феррис хоним ўзининг пулини олади, албатта. Аммо шу билан бирга ёзганлари текшириб кўрилади.

Тезликни ошириб, бензин қуйиш шохобчаси томон жадалладим. Йигитча кўринмасди. Мен Паула ҳамроҳлигида «Бьюик»дан тушдим.

– Кулба хув анови ерда, гараж орқасида.

Биз таъмирлаш устахонаси ёнидаги бетон йўлакдан одимлаб кетдик. Мен тўхтаб, айвон тагига қа-

радим. Йигитча қайгадир ғойиб бўлибди. Кўксимни омбур қисгандай бўлди ва оёғимни қўлга олганча кулбага қараб югурдим. Шу онда Паула менга қўшилиб қолди. Кучим борича эшикни муштим билан тақиллата бошладим.

Ҳеч ким жавоб бермади.

– Буёғи қандоқ бўлди, ахир уни огоҳлантирган эдим, – дедим мен кўнглим чўкиб, сўнг сал ортга чекиниб, эшикни елкам билан урдим.

Эшик катта очилиб кетди.

Паула билан бирга кичкина қоронғи даҳлизга тушиб қолдик.

– Феррис хоним! – кичқирдим мен. – Феррис хоним!

Жавоб фақат жимликдан иборат эди.

– Ҳа, бу чиябўрилар тез ишлайди. Паула, сиз шу ерда тулинг, мен эса уйни кўздан кечириб чиқаман.

– Эҳтимол, у қўрқиб қочиб кетгандир?

Мен «йўқ» дегандек бош чайқадим.

– Ҳеч қачон. Унга пул ниҳоятда зарур эди. Барретни ярамас йигитча огоҳлантирган бўлиши керак.

Паулани даҳлизда ёлғиз қолдириб, уйни айланиб чикдим. Ҳеч зоғ йўқ эди.

Орқага қайтдим.

– Бўм-бўш. Агар хонимни олиб кетишган бўлса, у ҳолда, албатта, қўрқиб қолишгани аниқ.

Мен ваннахонада осилиб турган жасадни эсладим. Агар Феррис хоним фақат имо-ишоралар билан шунча биладан, деган бўлса, унинг ҳаёти учун синиқ тангани ҳам раво кўрмаган бўлардим.

– Қани, ваннага қаранг-чи, у нарсаларини олиб кетганмикан, – дедим Паулага. – Юклари унчалик кўп эмасди.

Паула ваннани текширгунича мен аёл билан гап-лашган орқа томондаги хонага кирдим ва атрофни синчиклаб кўздан кечириб чиқдим, аммо ҳеч нарса унинг ғойиб бўлганини англамасди.

Паула икки дақиқадан сўнг қайтиб келди:

– Менинг тушунишимча, у ҳеч нимани олмаган. Жавонга ҳам, қутилардаги нарсаларга ҳам қўл теккизилмаган.

– Бу лаънати йигитча қайси гўрга йўқолганини билганимда эди. Агар ундан ҳаммасини сўраб олганимда...

– Вик!

Паула иккала кўзи билан деразадан боққа тикиларди. Мен тезда унинг ёнига бордим.

– Қаранг, будкада нима оқариб турибди?

Боғнинг ичкарасида турли-туман анжомлар қўйиладиган омборча бор эди. Унинг эшиги очиқ бўлиб, полида қандайдир оқ нарса ётгани аниқ кўриниб турарди.

– Шу ерда тулинг, мен ҳозир кўриб келаман.

Яширин эшик орқали ўқдай сакраб, боққа чиқдим. Омборчага яқин келиб, тўппончамни чиқардим-да, эшикни каттароқ очдим ва ним қоронғилик қаърига тикилдим. У бошини гўё яширгандай қўллари билан ушлаб, юзтубан ётарди.

Мен Феррис хоним рақибларини кўриб, уйга яқинлашаётганига кўзи тушгач, қўрқувдан ақлини йўқотиб, боққа сакраб тушгани, умидсизлик ичида омборчага чошиб бориб яширинганини тасаввур қилдим. Улар, чамаси, орқа томонидан ўқ узишган ва боққа тушиб, ўлганини текшириб кўришни зарур ҳисоблашмаган.

Мен бурилиб, тез-тез қадам ташлаганча кулбага қараб кетдим.

«Бич-отель» меҳмонхонаси вестибюлида бир неча бадавлат, ўзини авайлаб-асраган ва яхши кийинган кишилар бекорчиликдан сандирақлаб юришарди. Биз маъмурнинг идораси томон борар эканмиз, уларнинг барчаси худди бир кишидай Паулага тикилиб қолишди.

Маъмур баланд бўйли алпқомат киши бўлиб, сочларига оқ оралаган, оқиш-қизил юзларида, зангори кўзларининг қарашларида тушкунлик кайфияти акс этган эди.

– Хайрли оқшом, – деб қарши олди у Паулага ярим таъзим қилиб. – Хонага сиз буюртма берганмидингиз?

– Йўқ, биз бошқа масалада келдик, – дедим мен ва стол устига ташриф қоғозимни кўйдим. – Умид қиламанки, сиз бизга қандайдир маълумотларни хабар қилишдан бош тортмайсиз.

Маъмурнинг ингичка қошлари тепага кўтарилди. У ташриф қоғозимга кўз югуртириб чиқди. Сўнг қўлига олиб яна бир бора кўздан кечирди.

– Хўш, сизга нима керак, жаноб Мэллой?

У яна Паулага назар ташлади-ю, беихтиёр равишда бўйинбоғини тўғрилади.

– Биз бир қизни топишимиз керак. Тахминимизга кўра, у сизларда шу ойнинг ўн биринчи ёки ўн иккинчисида турган.

– Жаноб Мэллой! Биз меҳмонларимиз тўғрисида ҳеч кимга ҳеч қандай маълумот бермаймиз, қоидalarимиз шуни тақозо этади.

Маъмур хушмуомала ва ўтакетган расмиятчи эди, унинг ҳолати ёши ўтган хонимнинг тантанали кечада ўзини тутишига ўхшаб кетарди.

– Мен тушунаман. Аммо у мана бу ёш қизнинг синглиси, – деб маъмурга тикилиб турган Паулани кўрсатдим. Маъмурнинг тиззалари қалтираб кетди. – У уйдан қочиб кетган, излаш билан оворамиз.

– А-а, тушунарли! – ходим тараддулланиб қолди. – Ҳм, бундай пайтда мен, балки... Унинг исми нима эди?

– Ўйлашимизча, у бу ердан бегона исм остида жой олган. Сизларда, эҳтимол, ёлғиз ёш қизлар баъзан шунақа қилиб хона олишса керак-а?

У афсусланган каби бош тебратиб қўйди.

– Ҳа, албатта. Сиз ким ҳақида гапираётганингизни биламан, шекилли. Агар тўғри эслаган бўлсам, у Мэри Гендерсон хоним.

Маъмур келганларни рўйхатга оладиган дафтарни варақлади, бармоқлари саҳифа бўйлаб югуриб бир фамилия қаршисида тўхтади.

– Мутлақо тўғри. Гендерсон хоним. Баланд бўйли, қорачадан келган, жуда чиройли. Шуми?

– Шунга ўхшайди, ҳа. Ўн иккинчида кечқурун унинг эғнида кечки малла кўйлак, қора шойи устки кийим бор эди.

Маъмур бош ирғаб, қордай оппоқ дастрўмоли билан лабларини артди ва Паулага кўз қамаштиргудай табассум ҳадя этди.

– Ҳа, у Гендерсон хонимнинг ўзгинаси.

– Ажойиб. У қачон сизнинг китобингиздан ўрин олган?

Ходим журналга тутинди.

– Ўн иккинчида, кечқурун соат олтида.

– Манзили кўрсатилганми?

– Кўрсатилмаган бўлса керак.

– У қачон жўнаб кетди?

– Ун учинчида. Энди ҳаммасини эсладим. Мен ҳатто бундан бироз ҳайратга тушган эдим. Ахир у хонани бир ҳафтага деб олганди.

– Машинаси бормиди?

Маъмур ковоғини уйди ва Пауланинг чиройли қатъиятли юзига қараб, афтидан ундан илҳомланиб, жавоб берди:

– Ростини айтганда, йўқ. Ўзи шундай деганди. Аммо хонага кўтарилар экан, машинани ижарага олиш тўғрисида гапирди.

– Ва сиз машинани ижарага олиб бердингиз?

– Албатта. Биз «Акме» гаражи билан ҳамкорлик қиламиз. Ундан хабарингиз борми?

Мен «ҳа» деб жавоб бердим.

– Феррис кечқурун соат етти яримда машинани олиб келиб, уни Гендерсон хоним учун қолдирди.

– Феррис у билан кўришганмиди?

– Нима зарурати бор? Бунинг ҳожати йўқ эди, – деди маъмур ҳайрон бўлиб қошларини кўтарганча.

– Сиз унинг хоним билан кўришмаганига аниқ ишонасизми?

– Мутлақо аниқ.

– Машина билан нима рўй берди?

– Аслини олганда, машина ҳозиргача гаражда турибди. Раҳмат, эслатганингиз учун. Одатда Ферриснинг ўзи келиб, уларни олиб кетарди. Буни унга айтиш керак.

– Биз машинани кўрсак бўладими?

– Бўлмасам-чи! Марҳамат.

– Қайси русумда?

– Қора «Линкольн». Ҳозир йўлак навбатчиси сизни кузатиб боради.

Маъмур Паула билан энди кўриша олмаслигини билиб, кайфияти бузилди.

– Раҳмат, яна битта савол. Гендерсон хоним сизда яшаганида, унинг олдига бирор киши келдими?

Маъмур бир дақиқа ўйланиб қолди. Сўнг шундай деди:

– Битта жентльмен келгандай бўлувди... Ҳа, аниқ. Ўн учинчида эрталаб унинг олдига келганди. Шундан кейин хоним дарҳол хонани топшириб жўнаб кетди.

– Сиз эркакни кўрдингизми?

– Ҳа. У хонимнинг ишини ҳал қилиш учун ҳузуримга кирганди.

Маъмур яна ўзининг қордай оппоқ рўмолчаси билан лабларини артди, кўз қири билан тезгина Паулага эҳтиросли назар ташлади.

– Сиз унинг қиёфасини тасвираб бера олмайсизми?

– Ёши ўтган жентльмен. Пўрим кийинган. Жуда бадавлат эканлиги кўриниб турарди. Ўзини Франклин Маршленд деб тилга олди.

Мен ҳаяжонланиб кетганимдан нафасим тиқилиб қолаёзди ва сўрадим:

– Бўйи унчалик баланд эмас, офтобда қизарган, қирғийбурун, товони кичкинами?

– Товони кичкинами, каттами, бунга эътибор берганим йўқ, жаноб Мэллой, қолганлари эса аниқ.

– Гендерсон хоним шундан сўнг бирдан жўнаб келдими? У аччиқланганмиди?

– Йўқ. Тўғри, у менга шошилгандай кўринди, меҳмонхонани тезроқ тарк этишга уринди. Мен бундан бироз ҳайратга ҳам тушдим. Юқорида айтганимдек, у хонани бир ҳафтага деб олганди.

– Такси ёлладими?

– Балки ёллагандир. Ҳозир қаватда турган навбатчидан сўраб биламиз, у эслаб қолган бўлиши керак.



– Агар биз ўша таксичини топсак, балки унинг қаерга кетганини айтиб берар.

Энди ходим янада кўпроқ қизиқишини намоён этди.

– Ҳозир мен дарбондан сўраб келаман. Бир дақиқа тўхтанг.

У вестибюлни кесиб ўтиб, дарбон пештахтаси томон йўл олар экан, Паула мен билан кўз уриштириб олди.

– Омадга эришаётганга ўхшаймиз, – дедим мен. – Қизиқ, Маршлендга ундан нима керак бўлган экан? Дедрикнинг ўғирланишига Маршленд қайсидир жиҳатдан алоқадор деган ғоямга ишона бошляпман, бу унчалик нотўғри эмасга ўхшайди.

– Ўғирланиш рўй берганида, у қаерда бўлганлиги маълумми?

– Бунинг нима аҳамияти бор? Унинг ўзи бажариши шарт эмас, ахир! Бу иш учун одамларни ёллайди, холос.

Маъмур қайтиб келди.

– Афсуски, омадимиз чопмади. Дарбон Гендерсон хонимни эслади, аммо такси ҳайдовчисини хотирлай олмади, чунки у тўғри келган таксини тўхтатишга мажбур бўлган экан.

– Барчаси учун сиздан миннатдормиз, бизга шунчалик вақт ажратдингиз. Энди машинага бир нигоҳ ташлаймиз. Гараж ҳовлидами?

Маъмур «ҳа» деди.

– Умид қиламанки, сиз синглингизни албатта топасиз, – деди у Паулага.

Паула ҳам миннатдорчилик билдириб, шундай кулимсираб қарадики, маъмур беихтиёр қўлини кўтариб, оқишга мойил сочларини силаб қўйди.

Биз вестибюлни кесиб ўтаётганимизда, сандирақ-лаб юрган бекорчилар суҳбатларини тўхтатиб, яна Паулага тикилдилар.

Гараж механиги бизни қора «Линкольн» олдига бошлади.

– Мана шу. Билмадим, нега Феррис шу пайтгача олмади экан, – деди у ҳам Паулага шавқ-завқ билан қарар экан.

– Машина ўн учинчида тунги соат нечада сизга қайтганини эслай оласизми? – деб сўрадим мен.

– Ҳозир айтаман. Бизда машинанинг кетиши ва қайтиши журналда қайд этилади.

Механик идорада бўлганида мен машинани кўздан кечирдим, қўлим билан ўриндиқлар тагини пайпасладим, оёқ остидаги гиламчани қайириб кўрдим. Ўриндиқ чўнтақларини синчиклаб назардан ўтказдим, бирор илмоқ топармиканман, Мэри Жером шошиб ниманидир тушириб қолдирганмикан, деб ўйладим, аммо ҳеч нарса топа олмадим.

Механик қайтиб келди.

– У ерда: «Ўн-у қирқ» деб ёзилган.

– Сиз Гендерсон хонимни кўрдингизми?

– Умуман олганда, кўрган бўлишим керак, аммо эслай олмаяпман. Агар эслаганимда, яхши иш бўларди.

– О'кей, – дедим мен унга бир доллар узатиб, – катта раҳмат.

Биз «Бьюик» машинамизнинг ёнига қайтиб келдик. Соат етти яримни кўрсатиб турарди.

– Мен сизни идорага ташлаб ўтаман. Триксига жавоб бериб юборинг, – дедим Паулага.

– Сиз-чи? – сўради у.

– Мен бориб Маршленд билан гаплашиб кўрмоқчиман.

## БЕШИНЧИ БЎЛИМ

### 1

«Оушен-энд» йўлидан кетар эканман, кашфиётларим ва изланишларимни бўлак-бўлак қилиб, чуқур ўйга толдим.

Моҳиятан қараганда Пиреллини қамоқхонадан чиқариш учун бир қадам ҳам одимлаганим йўқ, аммо бундан буён яна излашни давом эттирсам, эртами-кечми зарур далилларни албатта қўлга киритаман. Ҳар ҳолда Мифлиндан кўра менинг кўпроқ ишлашим учун асослар бор, албатта.

Грацияни Пиреллига қарши айбловчи аломатларни ким қалаштириб ташлаганини билгани учун ўлдирдилар. Бу эса Пиреллининг айбсиз эканлигини англатади. Ростини айтсам, ўзим ҳам ҳозиргача юз фоиз ишонмагандим, буни тан оламан. Шундай қилиб, муваффақият манаман деб бўй кўрсатиб турибди.

Агар текшириб кўрилса, Феррис хонимнинг айтишича, Дедрик Серенани учратгунга қадар Парижда гиёҳванд моддалар контрабандаси билан шуғулланган. Уни ўғирлаш билан боғлиқ жумбоқ шунга боғлиқ эмасмикан? Эҳтимол, Дедрик Серенага уйлангач, Барретга ишлашдан бўйин товлагандир, шунинг учун уни ўлдириб, Серенадан пул ўмариш учун ўғрилиқ сахнаси ўйлаб топилгандир? Ахир шундай бўлиши мумкин-ку!

Менинг бутун фикр-хаёлим Маршлендга кўчди. У қайсидир даражада Дедрикнинг ўғирланиши билан алоқадор эмасмикан? Балки Дедрикнинг ҳайдовчиси Суюки унинг гиёҳванд моддалар контрабандаси би-

лан шуғулланаётганини билиб, бу ҳақда Маршлендга айтиб бергандир? Роса овоза бўларди-да: бойлиги бўйича дунёда тўртинчи ўринда турган аёл гиёҳванд моддалар савдоси билан шуғулланувчи кишига турмушга чиққан!

Маршленд қизини ана шундай рекламалардан қутқариш учун ҳамма ишни қилиши мумкин эди. У Дедрикни ўлдириш учун одам ёллаган бўлиши ҳам эҳтимолдан холи эмас. Шу билан бирга ўғирланиш саҳнасини Баррет эмас, айнан шу инсон ўйлаб топган бўлиши мумкин. Дедрикни ҳовлининг бирор чеккасида, боғда кўмиб ташласа ҳам бўларди, ҳеч ким билмай, излар босилиб кетарди. Бир метр қалинликдаги ер остидан Дедрикни ахтариб ўтириш кимнингдир хаёлига келармиди?

Хўш, Мэри Жером-чи? Бўлиб ўтган воқеаларда унинг ўрни қай даражада? Ким ўзи Мэри? Брендон уни ахтаришга уриниб ҳам кўрмади. Биз тўсатдан билдикки, Маршленд ҳеч бир қийинчиликсиз уни дарров топган. Қаерда яшаётганини қандай билди экан? У билан нега учрашди? Учрашгач, Мэри нега дарҳол кетиб қолди?

Буни жумбоқ деса бўлади. Мен уни ечишга анча яқин бориб қолдим, аммо яна қўшимча маълумот керак.

Маршленд билан қай тарзда боғлансам, дуруст бўларкан? Ахир у унча-мунчага тутқич бермайдиган одам. Асосли равишда ўйлаб кўриб, мен учун ягона йўл – Маршленд билан қатъий гаплашиш керак, деган қарорга келдим. У менга ёки Брендонга ҳаммасини гапириб беришига тўғри келади. «Бич-отель» меҳмонхонасига борганини рад қила олмайди. Агар менга сир бой бермаса, у ҳолда Брендонга иқрор бўлади,

чунки меҳмонхона маъмури уни таниганини айтади. Майли, бирини танласин.

Машина хусусий йўлдан кетар экан, ҳашаматли ҳовли томон бораётиб, ботаётган қуёш олд ойнада экс этарди.

Биринчи марта ташриф буюрганимда бўлганидек, айвон олдида бу сафар ҳам қора «Кадиллак» турарди. Икки хитойлик боғбон гулларни шундай хушвақтлик билан парвариш қилишардики, бу тиш дўхтири ором-курсисида тиши оғриб ўтирган беморнинг аҳволини эслатарди. Улар кичкина қўл паншахаси билан қора тупроқнинг ҳосилдор қисмини қўпориб олиб, бегона ўтларни ажратишар, сўнг саватга ташлашар ва яна паншахани тикишарди.

Мен айвон орқали ўтиб, бош бармоғим билан қўнғироқ тугмасини босдим ва кутиб турдим. Қайноқ қуёш елкамни қиздирар эди.

Эшикни Уэдлок очди. Унинг қуюқ қошлари чимирилиб, нигоҳи хуш кўрмасликни ифодалади.

– Салом! – дедим мен. – Жаноб Маршленд билан гаплашмоқчи эдим. Марҳамат қилиб, илтимосимни унга етказсангиз.

– Кираверинг, жаноб Мэллой, – сарой оғаси четланди. – Хўжайин уйдаи ёки йўқми, билмайман.

Мен зал томон йўл олдим. Иссиқ айвонга нисбатан бу ер салқин ва ғира-шира қоронғи эди. Шляпамни ечдим ва қарияга қарамасдан ҳеч бир сабабсиз дедим:

– Пароль «Бич-отель». Унга шундай деб айтинг.

– «Бич-отель» дейсизми?!

– Худди шундай! Унинг бунга муносабати сизни ҳам кам даражада ҳайрон қолдирмайди. Мен залда кутиб тураман.

– Сизга қулай бўлса бўлгани, сэр.

– Дедрик хонимнинг аҳволи қалай? Уни касал деб эшитдим.

– Ха, нимаям дейиш мумкин, сэр. Бундай аҳволга тушган одам қандай бўлса, у ҳам ўзини шундай хис этмоқда.

Мен қарияга диққат билан тикилдим, аммо хизматкорнинг башараси ҳеч нимани ифодаламасди. Оромкурси томон юрдим. Бу ерда охирги марта бўлганимдан буён анча вақт ўтган эди. Яна айвонга қайтиб бордим, Серена бир пайтлар ўтириб, эрини ўйлаб йиғлаганларини эсладим-у, балконга умид билан қардим. Ҳозир балкон бўм-бўш. Мен залга қайтиб, қулай оромкурсини танладим ва ўтирдим. Бугун шунчалик кўп хаяжонланишимга тўғри келдики, толиққанимни хис этдим. Хонани майин гулларнинг ҳиди тўлдирган эди.

Бироз вақт ўтиб (эхтимол ўн дақиқа) зинапояда қадам товушларини эшитдим.

Хонага Серена Дедрик кириб келди. Эғнида оддий оқ матодан тикилган кўйлак, сочларига эса гул тақилган. Кўзлари остида кўкарган ҳалқалар кўринар, лабларининг чети осилган, юзида эса ёқимсиз ифода бор эди. Мен оромкурсидан турмоқчи бўлганимда, Серена қатъиятли назар ташлаб, совуқ жилмайиб қўйди:

– Илтимос, ўрнингиздан турманг. Содали виски хоҳлайсизми?

– Раҳмат, фақат ҳозир эмас. Мен отангиз билан гап-лашгани келдим. Уэдлок сизга бу ҳақда айтмадими?

У катта бар томон юриб, икки бордоқда виски тайёрлади. Улардан бирини менга берар экан, стол устида турган сигарета қутисига имо қилди ва рўпарамда ўтириб олди.

– Отам кеча кечқурун Нью-Йоркка кетганди, – деди Серена менга қарамасдан. – У сизга нима учун керак бўлиб қолди?

Мен вискидан бироз ҳўпладим. «Тўрт атиргул» деб номланган бу виски – ажойиб ичимлик. Нима учун Уэдлок Маршленд тўғрисида ҳеч нима демади экан, деб ўйладим мен. Нега у Серенани мендан, бу истакдан ташқари бўлган учрашувдан четга тортмади? Шунда калламга, афтидан унинг ўзи мен билан учрашишни истаган, деган фикр келди. Лекин нима учун?

– Ундан айрим гапларни сўрамоқчи эдим, Дедрик хоним, – дедим мен. – Аммо начора, йўқ экан. Сиз менга унинг Нью-Йоркдаги манзили ва телефонини айта олмайсизми?

– Бирор муҳим гапми?

– Унга муҳим саволим бор эди. Қўнғироқ қилишим зарур...

– У жўнаб кетди. Бу... бу иш отамни роса ҳолдан тойдирди. Энди уни уйдан топиб бўпсиз, – деди Серена анча чўзилган жимликдан сўнг.

– Ростини айтганда, – мен ўрнимдан турдим, – бу иш унчалик муҳим ҳам эмас эди.

Энди унинг кўзлари менга бироз ажабланиб боқди.

– Сиз менга нима гаплигини айта олмайсизми?

– Биласизми, жаноб Маршленд эрингиз ўғирланган куннинг эртасига ўзини шахсий котибангиз деб таништирган аёл ҳузурига, Мэри Жеромнинг олдига борган экан. Учрашув «Бич-отель» меҳмонхонасида ўтказилган. Аёл шу меҳмонхонада турар экан. Мен улар нимани гаплашгани ва унинг манзилини отангиз қандай билгани ҳақида сўрамоқчи эдим.

– Менинг отамми?!

– Ҳа, сизнинг отангиз. У ўзининг исмини айтиб, навбатчи маъмурга таништирган, маъмур осонгина таний олади.

– Аммо мен мутлақо тушунмаяпман, отам у ерга қандай бориб қолади? Бу аёлни умуман танимайдикун?

– Отангиз у билан кўришиб гаплашган ва мен улар нима ҳақида суҳбатлашганини билмоқчиман. Агар менга айтиб бермаса, бу ҳақда Брендонга хабар қиламан!

Унинг кўзлари чарақлаб кетди.

– Сиз бизга таҳдид қиляпсизми?

– Сизга қандай маъқул бўлса, шундай ўйлайверинг.

– Отам бугун Европага учиб кетади. Балки, ҳозир учгандир. Мен унинг таътилни қаерда ўтказишини билмайман. Отам дам олишни истаса, кўпинча ана шундай, ҳеч кимга лом-мим демай жўнаб кетади.

– Нима ҳам қилардик, у дам олиш учун анча қулай пайтни танлаган.

Серена айвон деразаси олдига келди.

– Дедрик хоним, улар нима тўғрисида гапирганини сиз биласизми?

– Билмайман.

– Тахминан ҳам айта олмайсизми?

– Йўқ.

Мен дераза олдига яқин келдим.

– Дедрик хоним, сизга бир савол бермоқчиман.

У дераза ойнасидан боқишда давом этди. Боғда уйга қараган тик ўсган атиргуллар бор эди.

– Қулоғим сизда.

– Сиз эрингизни Пирелли ўғирлаган деб ўйлайсизми?

– Албатта.



– Нега энди «албатта»? Нега бунчалик ишонасиз?

– Мен бу ҳақда гапиришни истамайман. Агар бошқа саволларингиз бўлмаса, унда мени кечирасиз...

– Мен эрингизни Пирелли ўғирлаган, деб ўйламайман, – эътироз билдирдим мен. – Эрингизни орадан олиб ташлаш учун отангизнинг етарли асослари бўлган, шундай фикр каллангизга келмадими?

У мен томонга кескин ўгирилди. Юзи оқарди. Катта кўзларида қўрқув акс этди.

– Қандай ҳаддингиз сиғди? Етар, мен сизни эшитишни ҳам истамайман. Бегона хонадонга келиб, саволларингиз билан уй эгаларини ҳақорат қилишга асло ҳаққингиз йўқ. Мен полицияга мурожаат қиламан.

Ва у шиддат билан хонани тарк этди. Зинапоядан чиқар экан, йиғлаб юборди.

Мен босиб келаётган ғира-шира қоронғиликда ёлғиз қолиб, мулоҳаза юритардим. Серена нега бунчалик ўзини йўқотиб қўйди? Наҳотки, у Дедрикнинг ўғирланганини айнан Маршленд ташкил этганини билмаса?

Ортимдан одоб билан йўталган овоз эшитилди.

Мен бурилиб қарадим.

Даҳлизда Уэдлок кутиб турарди. Мен зални кесиб ўтиб, унинг ёнига бордим.

– Афтидан, жаноб Маршленд Европага жўнаб кетган, шекилли, – дедим.

Дарбоннинг қатъий интизомига ўрганган кўзлари менга жавоб бераётган пайтда ҳеч нимани ифодаламасди.

– Шундай бўлса керак, сэр.

– Айтинг-чи, Дедрик гиёҳванд моддалар савдоси билан шуғулланганини сизга Суюки айтдимми ёки ўзингиз тахмин қилиб билдингизми?

Менинг саволим худди тахмин қилганимдек, уни бутунлай саросимага солиб қўйди.

Уэдлок билан бундай муомалада бўлмаслигим керак эди. Чунки у ўзининг ҳис-туйғуларини етарли даражада бошқара олмайдиган ҳолатда кекса, мен эса айнан шу ҳолатни изоҳлашни ғоят истардим.

Уэдлок кўзларини чақчайтирди, жағи осилиб қолди:  
– Албатта, Суюки айт...

Чол индамай қолди, аммо кеч эди. Унинг юзи бироз оқарди, аммо жиддий аччиқланиб, ғазабга минишига ҳаддан зиёд кексалик қиларди.

– Мана шлаяпангиз, сэр.

Мен шляпани олдим-у, елкасига қоқиб қўйдим.

– Узр сўрайман, – деб ғўлдирадим жанжал қўзғайдиган саволимни назарда тутиб. – Буларнинг барчасини унутинг.

У индамай ортимдан эшикни ёпди. Ўгирилиб қараб, қариянинг ойнаванд эшик тирқишидан менга термилиб турганини кўрдим. Айвондан тушаётиб, унинг нигоҳини ҳис этдим.

Шундай. Агар Суюки гапириб берган бўлса, у ҳам Маршлендга бу ҳақда айтгандир. Нима бўлганда ҳам, гарчи аста-секин бўлса-да, мен олдинга қараб одим-лаяпман.

«Бьюик»имга ўтириб, парк орқали океанга қараб йўналдим. Ҳозир бир жойда ўтира олмасдим. Махфийлик устини босиб турган нарсани улоқтириб ташлайдиган қандайдир бир иш қилишим керак. Аммо қайси ишни?

Мен сигарета чекиб, ёниб турган гугурт чўпини машина ойнасидан океанга ташладим ва ўз ўйларим билан банд бўлиб, аста-секин юриб кетдим.

Пирелли сўроқ пайтида ўғрилиқ содир этилган кечаси Жо Бетильо билан Дельмонико барида қарта

ўйнагани тўғрисида кўрсатма берган. У билан соат ўн бир яримгача бирга бўлганини айтган. Хўш, Бетильо нима учун соат тўққизгача деб кўрсатма берди экан? Нега? Балки у сотилгандир? Агар шундай бўлса, ким томонидан?

Олдинда ҳали бутун бошли кеча бор. Нега Пиреллининг айбсизлигини кўрсатувчи аломатларни текшириб кўрмаслигим керак? Мен фаолликка ташна эдим. Ўша куни икки аёлни ўлдиришди. Қандайдир новча эркак кўҳна саройда менинг ҳам абжағимни чиқармоқчи бўлди. Дунёда бойлиги билан тўртинчи ўринда турувчи аёл менга бир олам ёлғонни гапириб ташлади. Мен нега Дельмонико барига ташриф буюриш билан кунни ниҳоясига етказмас эканман? Ушбу бар Фарбий қирғоқдаги энг қалтис босқинчилар уяси ҳисобланади. Менинг кайфиятим ниҳоят жанговар эди. Ўша ёққа боришга қарор қилдим.

## 2

Гўшакдан Пауланинг бир маромдаги овози эшитилди: «Хайрли оқшом! «Универсал хизматлар бюроси» эшитади».

– Сиз ҳозиргача идорада ўтирибсизми? – дедим шляпамни елкамга томон суриб ва терлаб кетган пешанамни артиб. Телефон будкаси печкали хонадан ҳам баттар иссиқ эди.

– А, Вик сизмисиз? Ҳа, мен шу ердаман. Нима янгилик бор?

– Айтарли эмас. Маршленд тўсатдан Европага дам олгани жуфтакни ростлабди. Менга Серена шундай деди. Аммо унинг иккинчи қаватда қаердадир ғазаб-

ланганидан тирноқларини ғажиётганини биламан, бунинг учун тортишишга ҳам тайёрман. Мен Дедрик иши бўйича асосий айбдор отаси бўлиши мумкинлигини айтдим. У тўнғиллаб, кўз ёши тўкиб, чиқиб кетди.

– Ростданми?

– Ҳа, у ҳақиқатан ўзини йўқотиб қўйди. Менга шундай туюлди. Афтидан, у ҳамиша шундай деб ўйлаб юрган. Бу бойлар олий табақа билан алоқадор бўлиб, тарихга тушиб қолишдан ўлгудай кўрқишади. Эшик оғаси ҳам талмовсиради. У ажойиб хизматкор, аммо эскича таълим олган. Мен нишонга олиб туриб, тўсатдан Суюки тўғрисида сўраб қолдим. Қария эса мулоҳаза юритишдан олдин Суюки унга Дедрик гиёҳванд моддалар билан савдо қилувчи контрабандачи эканлигини гапириб берганига иқрор бўлди. Хўш, нима дейсиз, маъқулми?

– Аммо бу Пиреллига умуман ёрдам бермайди-ку!

– Ҳақсиз, бу унга умуман ёрдам бермаслиги мумкин. Аммо мен ҳозироқ Пирелли учун бевосита нимадир қилмоқчиман. Сизнинг ёрдамингиз керак бўлади. Дедрик бўйича мен аниқлаган ишлар ҳақида Мифлинга телекс орқали хабар қилсангиз. Ундан текширишни тезлаштиришни ҳам сўранг, бажара оласизми?

Паула бу ишга ҳозироқ киришишга ваъда берди.

– Ўзингизни эҳтиёт қилинг, Вик.

Мен ўзимни Хитойнинг қадимий вазаси каби асрашга ваъда бериб, гўшакни осиб қўйдим, у ниманидир сўрашга улгуролмай қолди.

Шундан сўнг машинага ўтириб, Монте-верди-авеню томон йўл олдим. Майра Торесча айтган 245-уй кичкина, яшил рангга бўялган, ўнқир-чўнқир асфальт йўлли бўлиб, боғча ўрнида жойлашган эди. Тевараги икки метрли девор билан ўралган бу уй ҳаддан зиёд

қизиқувчи қўшнилари нигохларидан пана қилиб олинганди.

«Бьюик»ни кўчага қўйиб, пастаккина омборчани очдим ва йўлакдан уйнинг қаноти томон юрдим. Деразалардан бирида чироқ ёниб турарди. Эшикни тақиллатганимда, пардада қандайдир шарпа кўринди. Эшик икки дюйм энликда очилди ва Майранинг овози эшитилди:

– Ким у?

– Бу мен, Мэллойман.

Қиз занжирчани тушириб, эшикни очди ва мени қоронғи даҳлизга бошлади.

– Кириг. Мен қачон келаркан, деб ўз-ўзимни сўроқ қилиб ўтиргандим.

Майранинг ортидан кенг меҳмонхонага кириб, беканинг диди ғоят юксаклигига қойил қолдим. Диван ёстиқчаларидан тортиб, шарқона сопол ниқоблар ва декоратив қўғирчоқларгача бениҳоя тартиб билан жойлаштирилган эди.

Қизнинг эғнида ўша куртка ва шим бўлиб, кўзлари ҳорғин боқар, юзи бўзарганди. Менинг кўзимга у кўрганимдан бери мутлақо ухламаганга ўхшаб кўринди.

– Хўш, қандай янгиликлар бор? – сўради у бир шиша шотланд вискиси ва иккита қадах ҳамда музник стол устига қўяр экан. – Мен ўтган кечадан буён ҳали ухлаганим йўқ.

Ўтган кечадан буён?! Бўлиши мумкин эмас, ахир йигирма тўрт соат ичида қандай воқеалар рўй бермади!

Мен ўзимни юмшоқ оромкурсига ташладим.

– Янгиликлар бир дунё, аммо улар бизга қандайдир ёрдам беришига ишонмайман. Майра, сиз менга бир ишда ниҳоятда кераксиз, аммо даставвал бугун нима воқеа рўй берганини гапириб бераман.

Тафсилотларни айтаётганимда, у совуқ камин олдида қатъиятли қиёфада тик турар, лабида ёниб турган сигарета, қўллари эса шимининг чўнтагига чуқур солинган эди. Баён этаётган ҳикоям бутун икир-чирлари билан бирор жойи қолдирилмаган ҳолда ҳаммаси бўлиб ярим соатдан ортиқ вақтни олди.

– Мана эшитдингиз, шунча воқеа, аммо ҳеч қандай далиллар йўқ, – гапимни тугатдим мен. – Биз, қандай бўлмасин, далил топишимиз керак. Шундай қилайликки, бу далил билан судда енгиб чиқайлик. Менинг айтиб берганларимдан мароқли воқеа келиб чиқади, аммо шу тарзда Франкон ундан судда фойдалана олмайди. Бизнинг кейинги қадамимиз – далилларга эга бўлиш, бунинг энг яхши усули – Барретнинг куроли билан ишга киришишдир. Биринчи иш, назаримда, Никнинг айбсизлигини исботлашдан иборат оддийгина ҳаракат бўлади. У Франконга соат тўққиз яримдан ўн яримгача Жо Бетильо билан қарта ўйнаганини айтган, аммо Бетильо, Пирелли олдимдан тўққиз яримда кетган эди, дейди. Бетильо учига чиққан ашаддий разил, у пул учун онасини сотишдан ҳам тоймайди. Ҳозир мен Дельмонико барига бормоқчиман, у ерда Пиреллининг бардан соат нечада кетганини бирор киши кўргандир, шу одамни топишга ҳаракат қиламан. Бетильога қарши борадиган ва ҳақиқатни айтадиган кўрқмас одам топилса керак. Агар бундай гувоҳни топишнинг иложи бўлмаса, Бетильонинг ўзини ушлашга, бу ёққа олиб келиб, кўрсатмаларини ўзгартиришга мажбур қиламан, ўшанда Ник Пирелли билан қачон ажралиб кетганини айтиши мумкин. Менинг режаларим сизга маъқулми?

Қиз зўрма-зўраки кулимсиради.

– Нима ҳам дердим, яхши ўйлаган, – деди у. – Агар сиз гапиришга мажбур эта олмасангиз, балки мен уйдларман.

– Иккимиз ҳам уриниб кўрармиз. Айтинг-чи, Никнинг дўстлари бормиди? Бирорта бақувват киши Бетильони енгилгина айлантириб ташлар балки? У билан, билишимча, анча овора бўлишга тўғри келади.

Майра рад этгандек бош чайқади.

– Ник одамлар билан қийин тил топишарди. Бунинг устига, биз бу ерда яқиндан бошлаб яшаяпмиз. Мен ўзим сиз билан бирга барга бораман.

– Қўйсангиз-чи! Бу чорбоғ эмаски, қизларни ҳам бирга олиб борсанг. Ҳатто ўйлаб ҳам ўтирманг. Мен Майк Финнеганни ҳамроҳ қиламан. У бундай жойларга жону дили билан боради.

– Мен сиз билан бораман, – ўжарлик билан такрорлади Майра. – Ҳеч нима қилмай ўтиришдан чарчадим. Дўстингизга нисбатан анча дадилроқ отиш қўлимдан келади. Нима қилиш кераклигини айтсангиз, мен бажараман.

Майрага синовчан тикилдим ва таваккал қилишга аҳд қилдим.

– Фақат эҳтиёт бўлинг, бирор ғалва чиқмасин. Биз Бетильони ўлдирмоқчи эмасмиз, уни бироз кўрқитиб қўймоқчимиз, холос. Тушундингизми?

Қиз менга шундай қарадики, шу заҳоти томоғим қақраб қолди.

– Уни бу ёққа олиб келинг ва мен гапиришга мажбур этаман.

Мен ўрнимдан турдим.

– Ундай бўлса, кетдик.

У стол ғаладонини очиб, йигирма бешинчи калибрли кичкина тўппончани олди. Ўқдонни текшириб кўр-

ди ва ён чўнтагига солди. Вискини охиригача ичиб, ойна қаршисига борди.

– Жин урсин, худди жодугарга ўхшаб қолибман. Яхшиям, Ник мени кўрмайди.

– Қандай бўлманг, у сизни кўрганидан фақат қувонади, – деб тўнғилладим мен ва эшикка чиқиш учун йўл олдим.

Майра чирокни ўчирди. Биз уйдан чиқиб, «Бьюик» томон одимладик.

– Нима, Барретни ўзимиз ушлаб, гапиришга мажбур қила олмаймизми? – деб сўради Майра машинага мен билан ёнма-ён ўтирар экан. – Вақтни ҳам анча тежаган бўлардик.

– Бундай нусхаларни куч билан гапиришга мажбур этиш мушкул, – эътироз билдирдим мен машинани порт томон бурар эканман. – Бетильо билан амалга ошиши мумкиндир, аммо Барретда бундай бўлмайди. У йирик шахс. Бизнинг олдимизда ҳаммасига иқроп бўлиши мумкин. Аммо кейин судда қасамёд қилаётганида, қийнаганимиз учун шундай кўрсатма беришга мажбур бўлганини айтишдан тоймайди. Бундай далиллар ишончсиз.

– Агар сиз Никни қутқармасангиз, мен ўша Барретни ўлдираман, – деди қиз қатъий жазм қилиб. – Ўзимга сўз берганман.

Машинани бардан бир неча ярд берида қоронғи жойда тўхтатдим.

– Ҳозирча Никни қутқариш учун шуғулланиб кўрайлик-чи, – дедим мен. – Барретдан қасос олиш учун ҳали вақтимиз етарли. Агар қонуний йўл билан амалга ошириш мумкин бўлмаса, шу йўлни қўллашга тўғри келар. Сиз бирор марта бу барда бўлганмисиз?

– Кўп бўлганман. Ник эса деярли ҳар оқшом келарди.



– Мен Ник билан Бетильо қарта ўйнаган ўша хонага бир қараб қўймоқчиман. Сиз шуни ташкил эта оласизми?

– Албатта, агар у ерда ҳеч ким бўлмаса, бу ишни унда далайман.

– Унда кетдик, кўриб чиқамиз.

Биз бешта ёғоч пиллапояни босиб, барга кўтарилдик. Зал нурга тўлган ва одам билан лиқ тўла эди. Мусикий автоматдан мусиқа овози отилиб чиқарди. Гавдаси йирик, кўриниши таҳдид соладиган йигитлар бар пештахтаси олдида тўпланиб туришарди. Залдаги кўплаб столларда енгил кийинган қизлар шериклари бўлмиш йигитларга завқ-шавқ бағишлашдан кўра бир шиша винони афзал билиб ўтиришарди. Бундай манзарани баъзан ака-ука Уорнерларнинг фильмларида кўриш мумкин. Уйда телевизор қаршисида актёр Хэмфри Богартни оғзидан олов чиқарадиган тўппончаси билан ҳис этиб ўтириш етишмасди, холос.

Майрага бу вазият, афтидан, одатий ҳол. У қипик қопланган пол узра ўтиб, бар пештахтаси томон борди ва барменлардан бирига қўли билан ишора қилди. Мен жанжал чиқишини ўйлаб, изидан эргашдим. Пештахта олдида турган бир неча йигит яғриндор бўлса-да, унга индамай тикилиб қолишди. Елкалари оша менга назар ташлаб, беписанд тиржайиб қўйишди-ю, сўнг яна Майрага нигоҳ қадашди.

– Салом, қушча, – деди улардан бири эркалаб.

Мана, бошланяпти, – ўйладим мен. Уни бу ерга бошлаб келган мен аҳмоқман. Далил-исбот тўплаш ўрнига манови безорилар билан муштлашишга тўғри келади энди.

Майра оҳиста ўгирилиб уларга қаради ва қаҳр-ғазаб билан тўртта сўз айтиб жойига михлаб қўйди, кейин эса барменга мурожаат қилди.

Улар нимадир рўй берган хонага кўз ташлагандай, индамай, тош юраклари ҳатто ҳаяжонга тушган каби пештахтадан нари кетиб, залнинг охиридаги стол атрофидан жой олишди.

Майра барменга шивирлаб нимадир деди. Бармен унга диққат билан қараб, бош ирғади ва зинапоя юқорисида жойлашган томонга бош бармоғини нуқиб кўрсатди.

– Кетдик, – деди Майра менга. – Ҳов, анови томонга кўтарилишимиз керак.

Биз тўда орасидан ўтиб, зинапояга яқинлашдик.

– Сурбетлар билан жуда яхши муомала қилар экансиз, айниқса, аччиқланган пайтда, – дедим мен юқорига чиққанимизда.

– Иложим қанча, кўпинча ўзимни эҳтиёт қилишимга тўғри келади. Безорилар ташқи томондан даҳшатли кўрингани билан ич-ичидан ўлгудек кўрқоқ. Мен эр-какка шунчаки, бекордан-бекорга кўполлик қилмайман, – унинг юзида совуқ, сал ғазабкор ифода намоён бўлди. – Бармен Бетильонинг ярим соатдан кейин бу ерга покер ўйнаш учун келишини айтди.

– Бармен унга биз тўғримизда айтмайдими?

Қиз бош чайқади.

– Йўқ. У менинг дўстим. Шундай қилиб, биз нима қиламиз? Бетильо келгунича кутиб турамиз ва уни ушлаб оламизми?

– Келинг, аввало, жойни ўрганиб олайлик.

Мен зинапоянинг охирида узун йўлакни кўрган эдим. Унинг икки томонида эшиклар қатор жойлашганди.

– Ўн бешинчи хона, – деди Майра йўлакдан ўтар экан. Сўнг эшикни очди. Деворни пайпаслаб, чироқни ёқди ва биз хонага кирдик.

Кенг бинонинг яшил чироқ тагидаги юмалоқ стол устида ўйин қарталари ва ёғочдан қилинган покер соққалари, ғўлалари турарди. Стол атрофида ўнта юмшоқ стул қўйилган, иккита мис тупдон хона жиҳозини охирига етказган эди.

– Яхши, – дедим мен. – Аммо Ник одатда фойдаланадиган яширин чиқиш эшиги қаерда?

Майра чироқни ёқди ва биз йўлакнинг охиригача бордик. Очiq айвондаги эшикдан ўтиш мумкин эди. У катта бўлмаган ёғоч зинапояга олиб тушар, сўнг тор кўчага чиқиларди.

– Ажойиб. Биз Бетильони кутиб турамыз. Агар у қаршилиқ кўрсатса, бошига келиштириб бир соламыз, аммо, яхшиси, ўзимиз билан бирга боришга кўндирамыз. Ахир Бетильонинг вазни оғир, олиб юриш осон эмас.

Яна йўлакка қайтдик.

– Анови хоналар бўшми, сиз билмайсизми?

– Ҳозир кўрамыз, – деди Майра ва дуч келган биринчи эшикни очиб кирди ва чироқни ёқди. Қулоқни тешадиган даражадаги қичқириқ эшитилди ва ортидан саралаган сўкиниш оҳанги қаторлашди. Майра шоша-пиша чироқни ўчириб, йўлакка югуриб чиқди.

– Қўшни хонага қараб кўрамыз, – деди у кейинги эшикка томон йўл олиб.

– Тўхтанг, – дедим қўлидан ушлаб. – Ахир бу аҳволда биз бутун уйни саросимага солиб қўямиз-ку! Келинг, яхшиси, ўн бешинчи хонанинг рўпарасидагини кўриб чиқамиз.

Йўлакдан ўтиб, ўзимизга керакли хона олдида тўхтадик. Мен эшикни оҳиста тақиллатдим. Ичкарида қандайдир ҳаракат сезилди ва эшик очилди.

Баланд бўйли, тўладан келган сарғиш сочли аёл елкасига шол рўмол ташлаганча менга тикилиб турарди. Унинг бўялган юзи енгилгина жонланди, бўялган лаблари эса жилмайишни ифодалади.

– Хэллоу, гўзалим, сен менга келдингми?

Майрани кўрган заҳоти у қовоғини уйди.

– Сизга нима керак? – деб қуруққина сўради у.

Аёлнинг юзи менга таниш кўринди. Хотирамни ишга солиб, ўша ноқулай воқеага тушиб қолган оқшомимни эсладим. Ўшанда ойнаванд девордан ошиб, бу уйга кирган эдим ва у мени қутқарган эди.

– Мени танимаяпсизми? Икки йил муқаддам сиз билан бу ерда мутлақо ўйлаб кўрилмаган бир воқеа рўй берган эди, – деб эслатдим унга. Мен хонадаги чироқ нури юзимга тушиб турадиган жойда туриб олгандим. – Эсингиздами, сизнинг деразангизга полициячилар таъқибидан қочиб киргандим?

Сариқ сочнинг қовоқлари уйилиб, менга қаради. Сўнг юзи бирдан ёришиб, ажинлари текисланди.

– Вой, Худойим-ей! Бу учрашувни қаранг. Бирдан таниб ололмайсан, киши. Энди эсладим: сиз ўшанда деразадан тушиш учун менинг энг яхши чойшабимни йиртган эдингиз. Бу ерда нима қиляпсиз? Яна қандайдир нохушликми?

– Хонангизга кириб, гаплашсам бўладими?

У Майрага саволмуз қараб қўйди.

– У ҳамми?

– Ҳа. Бир иш бўйича юрибмиз.

Сарғиш сочли биринчи учрашувдаёқ менинг хасис эмаслигимни эслаган бўлса керак, четланиб бизни хонасига киритди.

– Майли, нима ҳам дердим, кининглар. Менинг хонам меҳмонларни қабул қиладиган даражада кенг-

мўл эмас, – деб қўшиб қўйди у Майрани назарда тутиб.

Биз кичик, анчагина ночор мебеллар қўйилган хонага кирдик. Каравот, кийим жавони, чиничаноқ ва уринган, анча эски гилам – хонанинг мақтагулик жиҳози бор-йўғи шу эди.

– Мен шошганимдан исмингизни ҳам эслолмай қолгандим ўшанда, нима эди?

– Лола, – жавоб берди сарғиш сочли аёл ва каравотга ўтирди. У Майранинг олдида ўзини унчалик қулай ҳис этмаётганди.

Майра чиничаноқнинг жойлашган ўрни ва хона жиҳозларига очиқ-ойдин қизиқиш билан қаради. Лола уни рашк билан кузатиб, эътирозларини кутмоқда эди. Аммо Майра усталик кўрсатиб индамади.

– Мен яна Бетильо масаласида келдим, – дедим хотиржам гап бошлаб. – Эсингиздами? Ўшанда унинг учун махсус тайёрланган калтак қўлимда бор эди.

– Бу сафар у сизга яна нима ҳунар кўрсатди? – сўради Лола қизиқиб. – Бу нусхани кўрарга кўзим йўқ.

– Менга-ку, ҳеч нима қилгани йўқ, аммо мановининг дўсти Ник Пиреллига... – дедим мен Майрани қўлим билан кўрсатиб.

Лоланинг кўзлари катта очилиб кетди.

– Қайси, ўша Дедрикни ўғирлаган йигитми? – хитоб қилди у. – Бу ҳақда ўқигандим. – У Майрага ғайирлик билан қаради ва қўшиб қўйди. – Дўстингиз беш юз мингни олиб кетгани ростми?

– Бир дақиқа, – дарров гапга аралашдим мен Майранинг юзи тундлашганини кўриб. – Сиз адашибсиз. Пирелли бу ишда иштирок этмаган. Унга тухмат қилишган. Ўғрилик содир этилган пайтда у бу ерда Бетильо билан қарта ўйнаб ўтирган, аммо айғоқчилар

сотиб кўйган. Шунинг учун бу аблаҳни топишимиз керак.

– Аммо бу шоқол кимни бўлса ҳам беш чақага сотиб юборади-ку, – деди Лола нафрат билан.

Шунда бир фикр миямга «лип» этиб келди.

– Сиз, мабодо ўша куни Пирелли соат нечада кетганини кўрмаганмисиз?

– Қаёққа кетган? Нимани назарда тутяпсиз?

– У бу ерда Бетильо билан ўн бешинчи хонада қарта ўйнаган. Пиреллининг айтишича, Бетильони соат ўн яримда қолдириб чиққан, Бетильо эса бу воқеа бир соат олдин рўй берган, яъни тўққиз яримда бўлган эди, деяпти. Дедрикни ўн бирнинг бошида ўғирлашган. Тушундингизми?

Қиз гўё ўйланиб қолгандек кўзларини юмди.

– Йўқ, мен уни кўрганимни негадир эслай олмаяпман, – деди ниҳоят. – Кечқурунлари шунчалик кўп эркакка кўзим тушадики, ҳаммаси ёдимда қолмайди.

– У ўша куни оқ матодан тикилган костюм кийиб олганди, – деди Майра. – Эгнида кўк кўйлак ва қўлда тўқилган оқ бўйинбоғ бўлган.

Лола ҳайрон бўлганидан димиқиб қолди.

– Қанақасига, бу ўша йигитми? Бўлмасам-чи, мен эсладим. У менга исмини айтган эди. Исми... – қиз бирдан жимиб қолди ва эҳтимол, кейинги ўн йил мобайнида биринчи марта қизарди.

Таранг жимлик чўкди.

Уни биринчи бўлиб Майра бузди.

– Давом этинг, – деди у. – Менга эътибор берманг. Демак, ўша кечаси у сизнинг ёнингизда бўлган?

Лола ўрнидан сакраб турди. Унинг юзидан хижолат изи кетмаган, аммо кўзлари ғазабдан қорайган, қарашлари қатъий эди.

– Қани, иккингиш ҳам чиқиб кетинг бу ердан! Мен шусиз ҳам анча гапириб юбордим. Кетинглар!

– Сиз хавотирланманг, – дедим мен қизни тинчлантириш учун. – Бу иш, Лола, ниҳоятда жиддий. Йигит оғир аҳволга тушган. Агар унга ёрдам бермоқчи бўлсангиз, бу ишни қилинг. Агар бу ердан соат ўн яримда кетганлиги аниқ бўлса, уни қутқара оласиз. Шундай қилиб, Пирелли ўша кеча сизнинг ёнингизда эдимиз?

Лола Майрага зимдан тезгина синовчан назар ташлади.

– Мен сизларга ҳеч нимани айтмайман, – деди у кўполлик билан гапимни бўлиб. – Иккингиш ҳам кетинг!

– Яхши, – дедим мен ва эшик томон йўл олдим. Эшикни очиб, ҳамроҳимга мурожаат қилдим: – Майра! Мени пастда машинада кутиб туринг. Лола билан бир масалани махфий тарзда ҳал қиламан. Икки дақиқадан сўнг тушаман.

– Бетильони нима қилдик? – сўради Майра. – Ахир у ҳозир келиши керак-ку.

– Ҳозирча уни эсдан чиқарайлик. Мени машинада кутинг.

Майра худди мрамор ҳайкалдек карахт бўлиб қолган, шунинг баробарида ранги оқариб кетган эди. Мен унинг ортидан эшикни ёпдим.

– Мана ишнинг ўнг келмагани, – деб минғирладим ва бир қути сигарет чиқариб, Лолага ҳам узатдим. У менга ижирганиб қаради, аммо сигаретани олди.

– Келгуси сафар қизларни бундай жойга олиб келгунча икки карра яхшилаб ўйлаб кўринг, – дарғазаб оҳангда уқтирди менга Лола. – Сиз мени қанчалик ноқулай аҳволга солганингизни билияпсизми?

– Ҳа, узр сўрайман, аммо мен ўйламагандимки... Дарвоқе, агар мулоҳаза қилиб кўрилса, бу яхшилик билан тугаши ҳам мумкин. Лола, сиз хижолат бўлманг. Айтинг-чи, Пирелли ўшанда сизнинг ёнингизда эдими?

– Ҳа. У Бетильо билан ўн яримгача қарта ўйнади, сўнг мен томонга келди. Биз Пирелли билан баъзан учрашиб турамиз. У доимий мижозларимдан бири.

– Эсланг, Пирелли ҳузурингиздан соат нечаларда чиқиб кетган эди?

– Тахминан, соат бир яримларда. Аниқ эслай олмаيمان, албатта, аммо тахминан шундай.

– Жин урсин! Демак, Бетильо рост айтган экан, анови олифта алдаган, – хитоб қилдим мен ўкинч билан. Қиз жимиб қолди.

– Афтидан, Пирелли қаерда бўлганини Майра билишини истамаган бўлса керак, – дедим мен бош чайқаб. – Бетильо унинг тахминини қўллаб-қувватлашини яхши билган бўлса керак. Лола, сизнинг судда гувоҳ сифатида қатнашишингизга тўғри келади. Унга айбсизлигини исботловчи далил керак.

Мен юз долларлик пул чиқардим.

– Мана, ўша йиртган чойшабим учун қарзим, – дедим. – Лола, сиздан илтимос, Пирелли тўғрисида ҳеч кимга ҳеч нима гапирманг. Судда зарур бўлиб қолсангиз, мен ўзим хабар қиламан.

Лола пулни олиб букди-да, пайпоғининг орасига солиб қўйди.

– Барибир эркаклар чўчка бўлишади, – деди у нафрат билан ва чекиб улгурмаган сигаретани каминга улоқтириб юборди.



Мен машина эшигини очиб, рулга ўтирдим ва стартерни босдим. Майра эса чекар ва ниманидир ўйларди.

– Демак, биз энди Бетильони олиб кетмаймиз-а? – деди у қандайдир эринчоқ, бефарқ оҳангда.

– У ростини айтган экан, – дедим мен Майрага қарамай. – Ник у билан ҳақиқатан соат тўққиз яримгача ўйнаган экан.

– Ва бир соатни мана шу аёлнинг ёнида ўтказган, – деди Майра. – Жуда ажойиб!

Мен бутун диққатимни йиғиб, машинани Монте-верди-авеню томон бурдим.

– У бу сирни сиздан яшириш учун айтмаган, – дедим мен. – Бу эса ўз фойдасини кўзлаганини англатади.

– Э, қўйсангиз-чи, – деди қиз ғазабдан қалтираган овоз билан. – Уни оқламанг. Пирелли учун ҳеч нимадан қайтмасдим. Қамокда ўтирганида, интизорлик билан кутганман. Уйдан чиқиб кетганида... остонада туриб қолардим. Пули йўқлигида (унда ҳеч қачон пул бўлмасди), едириб-ичирардим. Тунлари Пиреллини ўйлаб, ўртаниб ухламасдим. У эса мана шу расвойирадди суюқоёқни топиб, менга хиёнат қилган, ҳатто пул ҳам берган.

– Юрагимни кўп ҳам тирнаманг, – дедим мен. – Хўп, яхши, у сизга хиёнат қилибди дейлик. Бундан нима келиб чиқади? Энди сиз эркинсиз, шундай экан, ундан воз кечинг ва ўзингиз хиёнат қилинг. Сиз билан вақтини ўтказмоқчи бўлган юзлаб эркаклар топилади. Сиз нега шу қадар безовта бўласиз?

Майра оғир нафас олганича менга кескин ўгирилиб қаради. Унинг юзи ғазабдан бўғриқиб кетган эди.

Мен кулимсирадим.

– Қўйсангиз-чи, азизам, аразламанг, сизга ярашмайди.

Қиз пастки лабини тишлаб, менга тикилиб қолди, сўнг зўрма-зўраки кулди.

– Ҳа, афтидан, сиз ҳақсиз. Ҳаммангиз бирсиз. Аммо мен бу ярамасни қанчалик яхши кўрардим. Бу ишқалликдан қутулиб чиқса бўлгани, кейин унинг тумшугига тушираман. Ҳар қандай сариқ сочлиларга бўлган қизиқишини бир умр бурнидан чиқараман.

Биз Майранинг уйига етиб келдик.

– Боринг, бироз ухлаб олинг. Мен эса баъзи нарсаларни пухта ўйлаб олишим керак.

– Полицияга мурожаат қилсак ва бу сариқ сочлини гапиришга мажбур этишса-чи? Ахир унинг кўрсатмаси Никнинг турмадан чиқишига ёрдам бериши мумкин.

Мен рад этиб, бош чайқадим.

– Бефойда. Полицияда унга бир оддий сабаб туфайли ишонишмайди: бундай аёллар судда ишончсизлик туғдиради. Бошқа гувоҳлар эса сиз билан бизда йўқ. Ник буни тушунган.

– Демак, бугунги оқшом зое кетибди-да.

– Нима бўлса, бўлди. Яна ниманидир ўйлашга тўғри келади. Мен сиз билан алоқада бўлиб тураман.

Энгашиб машинанинг эшигини очдим.

– Сиз кўп ҳам сиқилиб, хафа бўлаверманг. Ҳаяжонланманг. Биз барибир олға қадам ташладик, эртага эса каттароқ қадам ташлаймиз. Кўришгунча.

Майра елкамга қўлини ташлади.

– Сизга катта раҳмат, мен учун кўп ҳаракат қилдингиз. Давом эттираверинг. Мен барибир бу аблаҳни фалокатдан халос қилмоқчиман.

Унинг йўлак бўйлаб ўтиб, қоронғи муъжаз уйига боргани ва эшикни очиб, чироқни ёққанини кўриб турдим...

#### 4

Мен кенг асфальт йўлдан ўтиб, қум тепалар ортидаги уйим олдида машина чироқлари ёруғидан узун, худди қайиқ каби лимузин турганини кўрдим. У дарвоза олдида эди.

Мен тезликни узиб, дастакни нейтрал ҳолатга қўйдим-да, машинани тўхтатдим. «Бьюик»дан тушиб, қора «Кадиллак»ка яқин бордим. Қурилмалар тарафдан тушган ёруғликда Серена Дедрикнинг оқариб кетган хижолатли юзи кўринди. Бизнинг нигоҳларимиз учрашди.

– Мени маъзур тутинг. Узоқ кутмаган бўлсангиз керак, деб умид қиламан, – дедим уни уйим ёнида кўрганимдан ҳайратим ошиб.

– Бунинг аҳамияти йўқ... Мен сиз билан гаплашиб олишим керак.

– Ундай бўлса, марҳамат, киринг.

Мен «Кадиллак» эшикчасини очиб, унинг тушишига ёрдамлашдим. Серена тўқ олча рангидаги шойи рўмолига ўраниб машинадан тушди. Серена ой ёғдусида чиройли ва сулув кўринарди! Биз сукут ичида айвонга қараб юрдик. Мен кириш эшигини очиб, чироқни ёқдим ва четланиб, унга савол назари билан қарадим.

У меҳмонхонани кесиб ўтди. Мен унинг ортидан юрдим, эшикни ёпиб, диван ёнидаги торшерни ёқдим.

– Вискими ёки қаҳвами?

– Ҳеч нарса керак эмас, – қисқа жавоб берди у ва диванга ўтирди. Шол рўмол бўйнидан сирғалиб тушди. Унинг махсус кийиниб келгани кўриниб турарди. Атласдек силлиқ оқ кўйлак оғир зарҳал парча билан безатилган ва фақат тантанали баллар учун мўлжалланган эди. Бўйни атрофида марваридлар ярақларди. Чап қўлининг билагида тўрт дюймдан иборат кенг олмос билагузук. У бойлиги бўйича дунёдаги тўртинчи аёл эканлигини алоҳида таъкидламоқчи эканлиги кўриниб турарди.

Мен виски қўйиб, ўзимнинг севимли юмшоқ оромкурсимга чўкдим. Ҳаддан ташқари толиққан ва тушкун кайфиятда эдим. Майранинг уйдан ўзимнинг кулбамга қадар Пиреллини қандай қилиб ҳибсдан озод қилиш йўллари ахтариш билан миямни қотириб келдим, аммо бу бошни тош деворга уриш билан баробар эди.

Бирдан калламга, табиатан ишонувчан кишининг калласига битта фикр келиб қолди. Бу фикрни миямда у ёқ-бу ёққа қалқитиб қўйдим ва моҳиятан маъқул кўринди. Оромкурсидан туриб, хонани кесиб ўтдим, девордаги ёққични босдим. Сўнг ортга қайтиб, яна оромкурсига ўтирдим.

Серена менинг хатти-ҳаракатимга гумонсираб қараб турарди.

– Мен фақат ётоқхонадаги телефонни бу ёққа уладим, холос, – изоҳ бердим мен. – Хўш, сизга қандай хизмат кўрсатсам бўлади, Дедрик хоним?

– Сизнинг эримни ўғирлаш билан боғлиқ ишга аралашмаслигингизни истайман, – деди у.

Мен эшитганларимдан бутунлай ҳайратга тушиб, бундай бўлишига ишониб-ишонмай, савол назари билан қарадим:

– Қандай қилиб, сиз буни жиддий айтяпсизми?

Унинг лаблари шафқатсиз равишда қимтилди.

– Шунақага ўхшайди. Сиз кам учрайдиган хирақасқон одам экансиз, сўралмаган жойларга ҳам тумшугингизни тикаверар экансиз. Полиция жиноятчини топиб қамади. Мен айнан ўша одам эримни ўғрилаганига ишонаман, сизнинг яна ниманидир ахтараверингизга асос йўқ эди.

Мен сигарета тутатиб, ёниб турган гугурт чўпини каминга ташладим ва юқорига тутунни пуфладим.

– Полиция қамоққа олган киши ҳеч кимни ўғирламаган, Дедрик хоним, – дедим мен. – У иттифоқо дўстим эди. Шундай экан, мен терговни охиригача олиб бориб, уни оқлаб, турмадан озод қилишга қадар ишни давом эттираман.

Серена оқариб кетди, кўзларидан олов сачрагандай бўлиб, тиззасида турган қўллари муштга айланди.

– Бу ишга халақит бермаслигингиз учун қанча бўлса тўлайман, – деди у овозига зўриққан оҳанг қўшилган ҳолда.

– Пули кўпайиб кетган чиройли аёллар виждонига қарши бориб, мени кўп марта сотиб олишга ҳаракат қилган, ўзим қизиққан ишдан қайтаришга мажбур қилишган, – жавоб бердим мен. – Кечирасиз, мен пулга унчалик ружу қўйган эмасман.

– Нархингизни айтинг, – деди у қалтираган товушда.

– Такрорлайман: пул менинг ҳаётимда катта ўрин эгалламайди. Агар айтмоқчи бўлган гапларингиз шундан иборат бўлса, кечирасиз, мен чарчаганман, ухламоқчиман.

– Эллик минг доллар, – деди у менга қаттиқ тикилиб.

Мен кулимсирадим.

– Дедрик хоним, сиз одам ҳаёти билан савдолашяпсиз. Агар мен текширишни бас қилсам, Пирелли электр курсисига дучор бўлади. Наҳотки сиз шуни хоҳласангиз?

– Мен ҳеч қанақа Пирелли тўғрисида ҳеч нимани билишни истамайман! Агар уни суд қилиб, айбдор деб ҳисоблашса, айбдор бўлиб қолади. Мен сизга эллик минг доллар бераман, бу ердан бир ойга кетинг.

– Мен бир ойга кета олмайман, Дедрик хоним. Сизнинг эрингизни ким ўғирлаганини аниқлашим керак.

– Етмиш беш минг!

– Дедрик хоним, сиз нимадан бунча кўрқяпсиз? Нега ҳаммасини аниқлаш, уни изоҳлашни истамаяпсиз?

– Етмиш беш минг, – деб такрорлади у.

– Дедрикка нима бўлган? Ким унга лой чаплади ва нима учун? Балки сиз буларнинг барчаси ортида отангиз турганини пайқаб қолгандирсиз ва унинг ҳаётини ана шу сабабли сақлаб қолмоқчи бўлгандирсиз? Ёки бу ишларнинг ҳаммаси обрў-эътиборга боғлиқ, шунинг учун сизни қандайдир гиёҳванд моддалар билан савдо қилувчи аҳмоқ қилиб кетганини одамлар билмасинлар деяётгандирсиз?

– Юз минг! – деди у оқарган лаблари орасидан.

– Йўқ, ҳатто миллион бўлса ҳам, – дедим мен ўрнимдан туриб. – Сўзни бекорга зое қилманг. Мен кўп ишларни бажаришга улгурдим ва уларни яқунласам дейман. Хайрли тун.

Серена ҳам ўрнидан турди.

Унинг хотиржамлигида кишини кўрқитиб юборадиган нимадир бор эди. Бу мени тезгина қайрилиб қарашга мажбур этди. Унинг сумкасида тўппонча бўл-

масин, тагин! Аммо сумка йўқ эди. Ҳозирги ҳолатида у мени бемалол отиб ташлаши мумкин эди.

– Хўш, нима бўлди? – деб сўради Серена.

– Мен «Хайрли тун» дедим! Ҳар сафар айтганимга эришаман, деб ҳисоблаш ҳам мумкин эмас, албатта. Етарли, Дедрик хоним. Сиз жонимга тегиб кетдингиз.

– Начора! Сиз билан келишишнинг яна бир йўли бор, – у хунук гапириб, совуқ, карахт кулимсиради. – Охирги марта сўрайман: икки юз минг?

– Чиқиб кетинг, – дедим мен зарда билан эшикни очиш учун хонани кесиб ўтарканман.

У зудлик билан телефон ёнига ўтди, рақамларни терди. Икки сония кутиб турди ва шундай даҳшатли товуш билан қичқирдики, мен тери ташлагандай бўлдим:

– Полиция! Ёрдам беринг! Тезроқ!

У гўшакни ташлаб юборди ва яна лабларидаги ўша совуқ, карахт тиржайиш билан менга қаради.

– Зўр ўйлаб топилган, ҳеч нима дея олмайман, – тўнғилладим мен ва оромкурсига ўтириб қолдим. – Ва мен, сизнингча, нима иш қилдим? Зўрлашми?

У кўйдагининг енгини ушлаб, этагигача йиртиб юборди. Сўнг елкаларини тирноғи билан тирнади. Оппоқ териси қонаб, танасида тўртта қизил чизикча пайдо бўлди. Сочларини тўзғитди-да, столни оёғини осмонга қилиб ағдариб юборди, диванни камин ёнига сурди, гиламни турган жойидан кўзғатди. Серена хонадаги мебелларимга қасдлашиб юрган экан. Мен телефонга яқин бориб, керакли рақамни тердим ва бироз кутиб турдим.

– Хеллоу! – симнинг нариги томонидан Пауланнинг товуши эшитилди.

– Менда нохушлик рўй берди. Бу ёққа зудлик билан келинглар. Нима иш қилиш кераклигини биласиз.

Ўзингиз билан Франконни ҳам олинг. Фақат тезроқ полиция маҳкамасига бирга боринглар. Беш дақиқадан сўнг мени зўрлашда айбашлари мумкин. Ҳозир Дедрик хоним сахна декорацияларини қўйиш билан банд.

– Яхши, боряпман, – деб жавоб берди Паула ва гўшакни қўйди.

Мен ҳам гўшакни жойига қўйиб, сигарета чекдим.

– Агар сизнинг ўрнингизда бўлганимда, пайпоқни ечардим. Бу жуда катта таассурот қолдиради, – дедим мен юмшоқ қилиб.

– Сен ҳали пулни олмаганинг учун пушаймон бўласан, мияси йўқ мол, – деди Серена. – Энг камида икки йилга кесиласан.

– Афсус, ўзингизни бекордан-бекорга юлиб ташладингиз, – дедим мен бош чайқаб. – Бекор қилдингиз. Ахир экспертлар терингизда менинг тирноқларим изини топа олишмайди.

Кўчадан машина тормозларининг овози эшитилди. Серена юракни ларзага солувчи нола тортиб, айвонга отилди.

Мен жойимдан жилмадим.

Боғ йўлагидан оғир қадам товушлари гурсиллаб эшитилди.

– Ҳаммаси жойида. Биз шу ердамиз, хоним! – кимнингдир кўпол овози янгради.

Эшикда қўлида тўппонча тутган полиция сержанти Макгроу кўринди. У мени кўргач, қонхўр жаллоддай тиржайди.

– Жойингдан қимирлама, акс ҳолда пешанангдан ўқ ейсан! – деб қичқирди у кўзларимга синовчан тикилиб.



– Келинг, шу драматик воқеаларсиз бўлсин, – дедим мен сигарета кулини қоқар эканман. – У сизни алдаяпти!

– Наҳотки?! – киноя билан сўради Макгроу. – Қани тур-чи, қўлингни кўтар!

Мен буйруқни бажардим.

Сержант эҳтиёткорлик билан менга яқинлашди.

– Демак, сен шаҳватпараст васвачи ҳам экансанда. Мен калланг жойида эмаслигидан ҳамиша гумон-сирардим.

Хонага Серена қўллаб-қувватлайдиган яна бир полициячи кирди. Серена курсига йиқилди. Энди елкасидаги тўртта чизикдан қон оқарди.

У ўзининг ролини ажойиб қилиб бажармоқда эди.

– Ё Худоё! – деб ҳайратга тушди Макгроу. – Бу ахир Дедрик хоним-ку! Қани, мана бу газандага кишан сол, – деб буйруқ берди полициячига.

У олдимга келиб, қўлимга кишан солди-да, қорнимга бир мушт туширди.

– Қани, азизим, энди бошқа хотинни тез орада кўра олмайдиган бўлдинг, – деб шивирлади у менга.

Макгроу Серенанинг ёнида уймалашиб қолди. У кичқириб, нола қиларди. Макгроу аёлга бир бордоқ сув олиб келди. Унинг юзи хижолатдан бироз қизарди.

– Менга рўмолимни олиб беринг, – деди Серена. – Бироз ўзимга келдим... Мен... мен бу ерга эрим хусусида гаплашиш учун ташриф буюргандим, аммо у... бирдан менга худди ёввойи ваҳший ҳайвондай ташланиб қолди...

– Бирорта ҳам ваҳший ҳайвон сизга ташланмайди, – дедим мен вазмин ҳолатда. – Уларнинг сиздан қанчалик жирканишини ҳатто тасаввур ҳам қила олмай-сиз.

Макгроу менга бурилиб қараб, қўли билан оғзимга урди.

– Шошма, мен ҳали сен билан бўлимда шуғулланаман! – кичқирди у. – Бу фурсатни анчадан бери кутардим.

– Хўш, ундай бўлса, хурсанд бўлавер, – дедим мен. – Фақат бу қувончинг узоққа чўзилмаса керак.

– Хоним, биз билан бошқармага боришга қарши бўлмасангиз керак? – деб сўради Макгроу Дедрик хонимдан. – Агар истамасангиз, бормаслигингиз мумкин.

– Албатта, бораман. Мен капитан Брендон билан гаплашмоқчиман. Бу аблаҳга келиштириб сабоқ бериб қўйишга тўғри келади.

– Безовта бўлманг. Ҳаммасини адо этамиз, – деб мен томонга қаҳр-ғазаб билан бақирди Макгроу. – Агар сиз тайёр бўлсангиз, хоним, у ҳолда кетамиз.

Иккинчи полициячи мени қўлимдан ушлаб, эшикни кўрсатди.

– Агар зиғирча қайсарлик қиладиган бўлса, калласига ўхшатиб сол, – деб гап ташлади Макгроу ёрдамчисига.

Биз полициячи билан машинанинг панжарали орқа томонига ўтиб ўтирдик. Серена билан Макгроу олдинги ўриндиқдан жой олишди.

Орхид-бульвардан ўтиб бурилганимизда, яқинимиздан кичик спорт машинаси кўринди. У Пауланики эди.

Мени полиция бошқармасига судраб кирганларида, Мифлин эндигина ишдан уйга бормоқчи бўлиб турган экан. У столга энкайганча, бошида шляпа, устида плашч, навбатчи сержантга охирги топшириқларни бераётганди. Мени кишанланган ҳолда кўриб, кўзлари олайиб кетди ва талмовсираган ҳолда Макгроуга назар ташлади.

– Бу қанақа майнавозчилик?! – кичқирди Мифлин.  
– Уни нега бу ёққа олиб келдиларинг?

– Зўрлашга уринган, жаноб лейтенант, – деди Макгроу. У тўғридан-тўғри ғазабланиб, тўғри иш қилаётгандек шишиниб кетган эди. – Бу шоқол Дедрик хонимни зўрламоқчи бўлибди. Яхшиям, мен ўз вақтида улгурдим.

Мифлиннинг юзида ишончсизлик аломати акс этди, кўзлари олайиб, пиёладай катталашиб кетди.

– Шу гап ростми, хоним? – деб сўради у Серенага қараб. – Сиз Мэллойни зўрлашга уринганликда айблайсизми?

– Ҳа, айблайман, – деди у узук-юлуқ гапириб. – Капитан Брендон қаерда?

– У бугун дам оляпти, – жавоб берди Мифлин, товуш оҳангида енгиллик ҳолати сезилди. – Миссис Дедрикка стул беринг.

Серена ўтирди, аммо шундай ўтирдикки, натижада шол рўмоли енгилгина сирғалиб тушиб кетди ва Мифлин ҳамда навбатчи сержант зўравонлик аломатларини яққол кўришди. Лейтенант ҳайратга қолганидан сал бўлмаса нафаси тиқилиб қолаёзди ва менга таънали назар ташлади.

– Буни сиз қилдингизми? – сўради мендан.

– Йўқ, мен қилганим йўқ, – жавоб бердим.

Макгроу мени урмоқчи бўлиб хезланди, муштини тугди, аммо Мифлин тўсатдан унинг гавдасини ўзига хос уйғунлик билан нари итариб юборди, натижада сержант қалқиб кетди.

– Тўхтатилсин! – кескин гапирди у. – Сиз нима қилмоқчисиз?

Макгроу менга қараб қичқирди:

– Бу разилни бўғизлаб ташламоқчиман.

– Жим бўл! – буйруқ берди Мифлин ва Серенага мурожаат қилди: – Бу қандай рўй берди?

– Мен эрим ҳақида маълумот олиш учун бунинг олдига келгандим, – ҳикоя қила бошлади қатъий осойишта овозда Серена, – аммо беш дақиқа ҳам бўлмай, бирдан кутилмаганда менга ташланиб қолди. Қаршилик кўрсатдим, айёрлик қилиб телефонга бир амаллаб етиб бордим-у, полицияни ёрдамга чақирдим. У кўйлагимни йиртиб ташлади, елкаларимни тирнади. Яхшиям манови зобит ўз вақтида етиб келди, сал бўлмаса мен ўсал бўлардим.

Мифлин шляпасини елкаси томон суриб қўйди, пешанасидаги терлаган жойларини артди. У, афтидан, қаттиқ таъсирланган эди.

– Асло ишонманг, – дедим мен хотиржам оҳангда. – У ёлғон гапиряпти. Жаноб лейтенант, келинг, гувоҳларсиз учовимиз гаплашиб олайлик. Ахир у газеталарга тушишга уриняпти-ку.

– Мен бу ерда барча газеталарнинг мухбирлари бўлишини истайман! – қичқирди Серена. – Мен уни йўқ қилиб юбораман! Қандай одам эканлигини ҳамма билиб қўйсин! Уни турмага тиқиб, ишидан маҳрум этиш керак!

Шу аснода навбатчи хонасига мўъжазгина чарм жомадон кўтарганча Паула кириб келди. У умрида биринчи марта тўзғиган ҳолатда, ҳаллослаб қолган эди.

– Мен Франкон билан боғлана олмадим, – деди у зўрға нафасини ростлар экан. – Уйида йўқ экан. Сизга аллақачон айблов эълон қилишдими?

Макгроу Пауланинг елкасидан чангаллади.

– Бу ерга бегона кишиларнинг кириши тақиқланди. Қани чиқинг!

– Қолаверсин! – буйруқ берди Мифлин. – Нима истайсиз? – деб мурожаат қилди у Паулага. Макгроу истар-истамас Паулани кўйиб юборди.

Яқин турган курсилардан бирига жомадонни кўйган Паула уни очди ва барчанинг кўзи кичкина магнитофонга тушди.

– Эсладингизми, Дедрик хоним, – дедим мен осойишта оҳангда, – суҳбатимизнинг бошида деворда турган тугмачани босган эдим, телефонни уладим, деб изоҳ бергандим. Аслида мен магнитофон тасмасига ёзишмани ишга туширган эдим. Уйда бадавлат аёл билан яккама-якка, бунинг устига кечаси қолар эканман, ҳамиша эҳтиёт чораларини кўриб кўяман, токи мени нохосдан зўрлашга уринганликда айблашмасин.

Серена менга адои тамом бўлгандек назар ташлади.

– У ёлғон гапиряпти! – қичқирди аламидан. – Нега имиллаяпсиз, уни авахтага солинг!

– Марҳамат, Паула ёзувни кўйиб беринг, – дедим мен.

Паула тугмачани босди. Қандайдир узук-юлуқ товушлар, бақир-чақир эшитилди, аммо ҳеч қандай сўзни англаб бўлмасди. Хаёлим ағдар-тўнтар бўлиб кетди. Қалламга келган ваҳимали ўйдан тамом бўлдим, асбоб ишдан чиққан бўлсайди, деган ўй «лип» этиб ўтди. Мен магнитофонга ўзимни ташладим, у ерда нима бўлга-

нини билмоқчи бўлдим, аммо қўлимдаги кишан ва Макгроу халақит берди. У анчадан бери ҳар бир ҳаракатимни пойлаб турарди. Макгроу мени орқага, бурчакка итариб юборди ва овозининг борича қичқирди:

– Жойингдан қимирлама!

Паула ҳамма аёллар каби техникага яхши тушунмас, шунинг учун беихтиёр равишда бир тугмача ўрнига бошқасини босган эди. Нихоят, мен ўзимнинг аниқ, худди металл каби жарангдор товушимни эшитдим-у, елкамдан тоғ ағдарилгандек, енгил нафас олдим.

Серенанинг: «Нархингизни айтинг», – деган овози эшитилган заҳоти у курсидан сакраб туриб, аппаратга ташланди, майдалаб ташламоқчи бўлди, аммо Паула ярим йўлда ушлаб қолди.

– Ўзингизни босинг! – деди у. – Жойингизга ўтинг!

– Буни ўчиринг! – қичқириб юборди Серена. – Мен уни эшитишни истамайман. Тўхтатинг!

Мен бошим билан Паулага ишора қилдим ва у тугмачани босди.

– Балки, биз охиригача ўйин кўрсатармиз, Дедрик хоним? – деди мулойимгина қилиб Мифлин. – Ёки сиз бу одамга қўйган айбингизни олиб ташлайсизми?

У мағрур туриб, худди кироличалар каби қаддини ростлади. Бир неча сония менинг юзимга индамай термилиб турди, кўзлари ғазабдан ёниб кетгудай, оғзи эса қийшайиб кетганди. Сўнг эшик томон қадам ташлаб, зарб билан эшикни очди-ю, ташқарига чиқди, эшик очиқлигича қолаверди.

Ҳеч ким қимирламади ва бир оғиз гапирмади. Унинг қадам товушлари тош йўлак охирида сингиб кетди.

– Қўлларидаги кишанни ечинг, – деб буюрди Мифлин ортиқча сўз демай.

Макгроу буйруқни бажарди. Унинг кўриниши панжасидан ўлжасини тушириб юборган арслонга ўхшаб кетарди.

– Эҳ, яшавор! Сен ўзингга ғамхўрлик қилишни биласан, – деди Мифлин очиқ-ойдин шавқ-завқ билан. – Акс ҳолда машмашадан бошинг чиқмаган бўларди.

– Бу аниқ, – дедим мен увишган қўлларимни уқалаб. – Кабинетингизга борайлик, гаплашиб олишим керак, – мен Паулага ўгирилдим. – Яшанг, ажойиб бўлди. Аниқ ва тез. Раҳмат. Мен сизни ухлашга қўймадим, шекилли?

– Ундан ҳам баттар! Сиз мени ваннадан судраб чиқардингиз, – жавоб берди у. – Агар қайтадан мушкул аҳволга тушиб қолмайман десангиз, мен уйга қайтиб бориб, тўлиқ ювиниб олсам, дегандим.

– Начора, бора қолинг. Сизга катта раҳмат, Паула. Мени ана шу қонхўр тимсоҳлар чангалидан халос этдингиз, – дедим Макгроуга истехзоли қараб. Бу нусха навбатчи хонасидан жуфтакни ростлаётганида яғрини ғазабдан қизариб кетди.

Паула уйига қайтди, биз эса Мифлин билан унинг иссиқ, дим хонасига кирдик.

– Биласанми, агар бу иш шундай давом этса, газеталар ҳаддан зиёд ваҳима кўтаради, деб ҳисоблайман, – дедим мен.

Мифлин чўнтаklarини кавлади ва ҳеч нима топа олмай, менга савол назари билан қаради.

– Чекишдан топиладими? Сен «ваҳима» деганда нимани назарда тутяпсан?

Мен унга сигарета бердим ва ўзим ҳам чекдим.

– Мана, Дедрикни ўғирлаш ортида катта Маршленднинг ўзи турганини далиллар айтиб турибди. Дедрик гиёҳванд моддалар контрабандаси билан шу-

ғулланади. У Баррет билан бирга ишлайди. Парижда-  
ги ишларни бошқаради. Нима бўлса ҳам тортишишга  
тайёрман, буни Маршленд билиб қолган, уни ўртадан  
олиб ташлаш учун кимнидир ёллаган. Мана шунинг  
учун Дедрик хоним мени сотиб олмоқчи бўлди.

Мифлин эшитганларидан анграйиб қолди.

– Унда Дедрикни қаерга яшириб қўйишди?

– Мен айнан шуни аниқламоқчиман. Эҳтимол,  
Баррет буни билар. Иштирок этувчилар орасида яна  
битта шахс бор, Баррет тўғрисида кўп маълумотларни  
билади; баланд бўйли, енгил матодан костюм кийган  
ва оқ наматсимон шляпали.

– Биз уни ахтаряпмиз. Грациянинг ўлими тўғриси-  
да бизга сен хабар қилганмидинг?

– Ҳа, ўшанда ишим кўп эди. Шунинг учун сизларни  
кутиб тура олмадим. Сизлар ахлат челагидан бирорта  
аломат топдингизми?

– У, демак, ўша ерда тунаб қолганми?

– Худди шундай.

– Биз бу шахсни излаяпмиз. Нега сен Дедрикнинг  
ўғирланишида Маршленд алоқадор деган қарорга  
келдинг?

Мен «Бич-отел»да нимани аниқлаган бўлсам, бар-  
часини Мифлинга батафсил гапириб бердим.

– Дедрик хонимнинг сўзига қараганда, у Европага  
кетган эмиш, аммо мен бунга ишонмайман.

– Ҳозир «Оушен-энд»га бориб, Маршленд билан гап-  
лашиб кўришга уринсаммикан? – деб сўради Мифлин.

– Қулоқ сол, – дедим унга, – сен бу иш билан эрта-  
га оқшомгача сабр қилиб тур. Айт-чи, агар қўлингда  
Барретнинг гиёҳванд моддалар контрабандаси билан  
шуғулланаётганлиги тўғрисида ишончли далиллар  
бўлганида, уни гапиришга мажбур қила олармидинг?



Мифлин маъюс кулимсиради.

– Уриниб кўрамиз.

– Кимдан марихуанали сигарета топиш мумкин, билмайсанми? Икки юз дона.

– Гиёҳванд моддаларга қарши кураш бўлимидан. Сенга нега керак?

– Олиб бер, илтимос. Баррет жиноят белгисини ташлаш мумкин бўлган ягона киши эмас. Эртага сенга кўнғироқ қилиб, уйининг фалон жойида марихуанали сигареталар сақланаётганини айтишади. Сен уни камоққа олиб, яхшилаб сўроқ қиласан. У сўроққа чидайдиган кишилар тоифасидан, деб ўйламайман. Менимча, ростини айтишга мажбур бўлади.

Мифлин менга ҳайрон бўлиб қаради.

– Мен буни қилолмайман! Агар Брендон билиб қолса...

– Унга ким ҳам айтарди?

Лейтенант менга қаради, ўйланиб энсасини қашлади ва бош чайқади.

– Бу алғов-далғов иш менга ёқмаяпти, Вик.

– Менга ҳам, аммо нима ҳам қила олардик, бошқа йўли йўқ. Кел, озгина марихуана топиб бер.

– Бўпти. Аммо у ҳеч нима демаса, аҳволимизни кўрасан.

– Бу ишни қай даражада уддалашларингга боғлиқ. Унга Макгроуни қўйиб юборасан, у менга муштини ишлатолмай, роса норози бўлиб қолганди.

Мифлин хонадан чиқиб кетиб, йигирма дақиқалар ғойиб бўлди. Сўнг қўлида ёғоч кутичани кўтарганча қайтиб келди.

– Бўлим бошлиғига сигареталар бизга нимага кераклигини гапириб беришга тўғри келди. Биласанми, у сенинг ғоянгни маъқуллади, Барретни анча вақтдан

бери қўлга олишни ният қилиб юрган экан, – Мифлин гоятда ҳайратга тушган эди. – Шуниси ажабланарлики, бизнинг полициячилар ахлоқ меъёрларига камриоя қилишади.

Мен қутичани кўтариб ўрнимдан турдим.

– Ўзим ҳам бундай меъёрларга риоя қилмайман, айниқса, Барретга ўхшаш разиллар билан иш тутганимда.

– Кўзингга қара, Вик, эҳтиёт бўл. Қўлга тушиб қолма. Дедрик хоним хайрлашаётганида, сенга қараб қўйгани менга сира ёқмади-да.

– Менга ҳам. Хўш, бизнинг ҳимоямиздаги киши ўзини қандай ҳис қилмоқда?

– Ёмон эмас. Жойида. Франкон у билан фақат эрта-лаб учрашди. Ҳар ҳолда сен хавотирланма.

– У билан учрашиб гаплашиб бўлмайдим, имкони борми?

– Мутлақо мумкин эмас. Брендон алоҳида кўриқчи қўйган. Ҳеч ким, фақат адвокатдан ташқари бирор кимса унга яқин бориши мумкин эмас.

– Барретни қўлга туширгандан кейин ҳаммасини айтиб беришга албатта мажбур қилинглар, Тим. Сезишимча, Дедрикнинг ўғирланиши ва Пирелли иши бўйича асосий ҳаракат қилаётган шахс фақат ўша бўлиб чиқяпти.

– Уриниб кўрамиз, – ваъда берди Мифлин.

Мен навбатчининг хонасидан магнитофонни олиб, кўчага чиқдим ва таксига қўл кўтардим.

Соат миллари ўн бирдан ўн дақиқа ўтганини кўрсатиб турарди.

Ҳа, бугун чекимга жуда оғир кун тушди.

## ОЛТИНЧИ БЎЛИМ

### 1

Эртаси куни мен тушгача идорада ўтириб, майда-чуйда, аммо зарур ишлар билан шуғулландим, одатда бу юмушлар Керманга тегишли бўларди. Ҳозир у сафарда, ишлар эса кутиб турмайди, шу боис ўзим шуғулланишимга тўғри келди.

– Мен Барретни кўришим керак, – дедим Паулага, идорада шоша-пиша тамадди қилаётганимизда. – Менда муъжазгина мукофот бор, билдирмасдан унинг уйига қўйиб чиқмоқчиман.

Паулага кутилмаган совға тўғрисида гапириб бердим. Уни Мифлин билан бирга Барретга тақдим этишга қарор қилганимизни айтдим.

– Барретни қамоққа олиб, айблов эълон қилинган, ўшанда балки уни бутунлай бўйсундириш ва гапиртириш, бўйнига олишга мажбур қилишга эришармиз. Ҳар ҳолда Тим шуни кўзлаяпти.

Паула ғоямни маъқулламади, у ҳамиша у ёки бу даражада мос келмайдиган ахлоқни асло қўллаб-қувватламасди.

– Сиз бу ишни қандай бажарасиз, уйдан чиқиб кетгунича уни кутиб турасизми? – деб сўради Паула.

– Дуруст фикр! Албатта, бу ўринда чўнтакни кавлашга тўғри келади, аммо бошқа иш қила олмаймиз. Макснинг чўнтагига яхшигина чойчақа ташлаймиз, у бизга захирадаги калитни беради.

– Эҳтиёт бўлинг, Вик, ўзингизни асранг.

Мен кулдим.

– Кейинги пайтда мендан тез-тез эхтиёт бўлишимни сўраяпсиз. Сизга нима бўляпти ўзи? Энди мен билан бутунлай бошқача тарзда гаплашяпсиз.

Пауланинг лабларида хижолат аралаш табассум намён бўлди.

– Афтидан, мен сизни яхшироқ билиб олганга ўхшайман, – жавоб берди у. – Мен ўша хатарли, қалтис ғоядан воз кечиб, ўзимизнинг кундалик ишларимиз билан машғул бўлишингизни истардим.

– Биласиз, Паула, мен бу иш билан кўнгилхушлик учун шуғулланмайман. Агар ўшанда Пирелли ҳаётимни сақлаб қолмаганида, бошимдан зар сочишса ҳам бу ишга киришмаган бўлардим. У мен учун жонини тикишдан ҳам тоймади, қалтис ишдан чекинмай, таваккал иш тутди. Баррет ўшанда мени бир зумда бўғизлаб ташлаши мумкин эди. Шундай экан, мен қарзни қайтариш учун тергов-суриштирув ишларини охиригача давом эттиришим керак, деб ўйлайман.

\* \* \*

Машинамни Жефферсон-авеню олдидаги уйда тўхтатганимда, шаҳар бошқармасидаги минора соати бир яримга занг урган эди.

Вестибюлга кирдим. Макси идорада бекорчиликдан тирсагига суяниб ўтирарди. Телефончи киз ўрнида эса ҳеч ким йўқ, аммо кулоқчин микрофон билан бирга стол устида турар, уни осонгина олиш мумкин эди.

– Бироз пул ишлашни хоҳлайсизми? – деб мурожаат қилдим дангалига. – Менда сиз учун бир нечта ўнталик тўпланиб қолди, агар ёрдам бераман десангиз.

Макси худди газанда илонга қарагандек менга гумонсираб назар солди.

– Мен ҳеч қачон пулдан юз ўгирмайман, – деди у. – Сизга бу сафар нима керак?

– Уйнинг захира калити.

Агар мен Максининг рўпарасида тўппончани ўқлаганимда, бунчалик ҳанг-манг қилиб қўймаган бўлардим.

– Калит дейсизми? Қанақа калит?

– Захира калит. Тезроқ! Эллик доллар, мана улар, нақд, кассадан кетмай турибди.

Мушти йўғоннинг митти кўзлари пирпиради.

– Нақд... эллик... – у қандайдир ғамга ботиб талмовсиради.

Мен стол устига бешта ўнталик ташладим, айти дамда, агар пулларни шу тариқа сочаверсам, бир неча кундан сўнг ҳемирсиз қоламан, деб кўнглимдан ўтказдим.

Макси пулларга еб қўйгудек бўлиб қаради, лабларини ялаб, бурнини қашиб қўйди.

– Агар бу ишни қилсам, мени ишдан ҳайдаб юборишади, – деди у ниҳоят сал-пал шивирлаб.

Мен стол устига яна иккита бешталик пул ташладим-у, энгашиб у томонга суриб қўйдим.

– Бундан ортиқ беролмайман, – дедим кулимсираб.  
– Калит бор-йўғи ўн дақиқага керак, холос.

– Қайси уйники?

– Барретники. У уйдан чиқиб кетдими?

Максининг кичкина кўзлари сал бўлмаса жойидан чиқиб кетаёзган, дум-думалоқ бўлиб қолганди.

– У икки соат бурун чиқиб кетган.

– Шундай экан, нимадан қўрқасиз? Агар у сизнинг дўстингиз бўлганида, бошқа гап эди.

– Тўғри, аммо мен ишимдан маҳрум бўламан, – деди Макси бўғиқ овозда. – Ҳафтада олтмиш доллар

етади, бу ҳам фақат нонга, холос. Йўқ, бу иш овора бўлишга арзимади.

– Хўп, майли! Агар сиз шунчалик ланж одам экансиз, нима ҳам дердик, – мен пулларни йиғиштириб, икки буклаб, ён чўнтагимга солиб қўйдим. – Шундай арзимас ишлар туфайли ярим тунда уйқунгиз қочшини мутлақо истамайман.

– Шошманг, – деди у шляпасини орқага суриб ва терлаган пешанасини артар экан. – Майли, уйқуни ҳам жин урсин! Яна ўн қўшинг – калит қўлингизда бўлади.

– Олтмиш – менинг чегарам. Олинг ёки гапни шу билан тугатамиз.

У бир амаллаб виждонини енгди-ю, боши билан бир томонга ишора қилиб зорланди:

– Калит ҳув нариги томонда, тахтада, коммутатор ёнида осилган. Қани, тангани чўзинг!

Мен Максига олтмишта кўкидан қистирдим, у дарҳол чўнтагига солди.

– Сиз Баррет уйда йўқлигини аниқ биласизми? – деб сўрадим кейин.

– Ҳа. Мен унинг чиқиб кетганини ўз кўзим билан кўрдим. Ҳеч ким йўқ, – Макси вестибюлга ўғринча назар ташлади. – Бориб пиво ичаман. Сиз эса тезда, бирикки дегунча нима керак бўлса, барчасини бажаринг. Худо ҳаққи, ҳаракат қилинг, токи бирор киши билиб қолмасин.

У кўздан йўқолгунча икки сония кутиб турдим, сўнг ёзув столи устига энгашиб, тахтадан калитни олдим.

Лифт мени тўртинчи қаватгача олиб чиқди. Йўлак орқали 4В15 рақамли уй томон йўл олдим. Кўшни эшик ортидан мусиқа товуши эшитиларди. Йўлакдаги бошқа уйдан эса бўғиқ овозли аёл кулгиси эшитиларди. Мен Барретнинг эшигига қулоғимни теккизиб,

қулоқ солдим: жимлик! Тақиллатдим ва яна қулоқ солдим – жавоб осудалик бўлди! Атрофга аланглаб қарадим: ҳеч ким йўқ! Калитни қулф эшигига астагина солиб, дукирлаётган юрагим билан уни эҳтиёткорона бураддим. Сўнг дастакни босиб, эшикни очдим.

Оромкурсида менга қараганча оч қизил енгил матоли костюмда бир одам ўтирарди. Қўлида қирқ бешинчи калибрли тўппончани тўппа-тўғри кўкрагимга нишон қилиб тутган.

У совуқ ва хуш кўрмай кулиб қўйди.

– Кириг, – деди. – Ўзим ҳам сиз бўлсангиз керак, деб ўйлагандим.

Бу йўғон овозни эшитганим заҳоти қаршимда ким турганини англадим. Мен фақат битта нарсани тушунмагандим: нега уни илгари фаҳмламаган эканман-а?

– Салом, Дедрик, – дедим мен ва хонага шахдам қадам ташлаб, ортимдаги эшикни ёпдим.

## 2

– Ўзингизни босинг, Мэллой, қимирламанг, – деди енгил матоли костюм кийган киши тўппончани қўлида ўйнар экан. – Ўқ овозини эшитиб, бу уйда ҳеч ким шовқин кўтармайди. Мен сизни осонгина ота-боболарингиз олдига жўната оладиган кайфиятдаман.

Дедрик менга каминнинг иккинчи томонини, рўпарасидаги курсини қўли билан кўрсатди:

– Ўтириг.

Бундай масофадан отишда у асло хато қилмасди. Мен ҳазиллашмаётганини жуда яхши тушунардим, шу боис бўйсунушга қарор қилдим.

– Сизнинг зарбангиз зўр экан, – гапани давом эттирди у бўйнини уқалаб. – Жин урсин, бошимни яна икки ҳафта кўтара олмасам керак. – Унинг қора кўзлари мени синчиклаб кузатишда давом этарди. – Не бахтки, бу ерга қадам босдингиз. Акс ҳолда, биз ўзимиз тезроқ олдингизга бормоқчи эдик. Сиз ҳаддан зиёд жонимизга тегиб кетдингиз.

– Шунақами?! Буни билмаган эканман, – дедим мен. – Энг ёмони шуки, менда тахминлар жуда кўп, аммо уларга далиллар йўқ... Серена сизнинг бу ерда эканлигингизни биладими?

Эркак рад этиб бош чайқади ва истехзоли тиржайди:

– Бу унинг хаёлида ҳам йўқ. Худди уйингизда ўтиргандек ўтираверинг. Хув нариги томонда қўлингиз остида сигарета бор. Чекинг. Сиз билан шуғулланиш учун бироз бўш вақт бор. Баррет сиз билан гаплашишни кўпдан бери интиқлик билан кутади. Агар яшашни истасангиз, найрангбозлик қилманг, тушунарлими?

Мен чекдим, у эса тўппонча учини олдингидек тўғридан-тўғри юзимга қаратган эди.

– Тўппончани эҳтиёт бўлиб ушланг, – дедим мен. – Бу томондан ниҳоятда хавфли кўриняпти.

– Хавотирланманг, агар сиз шунга мажбур қилмасангиз, отилиб кетмайди, – Дедрик кулди, кулини ташлаб, бошқа сигарет олиб чекди. У бу ишларни бажаргунича мен қилт этмай ўтирдим. Кўз чизикларидаги қатъий ифода агар мен ортиқча ҳаракатга уринсам, отишга тайёр эканлигини англатарди.

– Агар ўшанда мен сизга кўнғироқ қилмаганимда, ҳамма тешикка бурнингизни тикқан бўлардингиз, буни билардим, – деб гапани давом эттирди у менга қия қараб. – Бу ажойиб ғоя эди, шундай эмасми?



Мен сизни телефон орқали келиштириб алдадим. Қўл теккизилмаган виски бордоғи, қизиб турган сигарета кули – буларнинг барчаси чакки ўйлаб топилмаган.

– Ҳа, топиб ўйналган сахна, – дедим мен. – Суюкини сиз ўлдирганмидингиз?

– Начора, шундай қилишга тўғри келди.

У қовоқларини уйди. Ўтган воқеаларни эслаш ёқимсиз туюлди, шекилли.

– Суюкининг ўзи нохушликка йўл қўйди ва хизматига яраша олди, – деди.

– Пиреллининг ишини ҳам сиз ўйлаб топдингизми?

– Йўқ, буни Баррет эплади. У ҳисоб-китоб учун шундай усулни танлади. Ҳар ҳолда Пиреллининг ўзи бизга тасодифан дуч келиб қолди. У бир пайтлар бизни яхшилаб куйдирган, энди эса полиция панжара ортига тикқанидан кейин ҳамма тинчиди.

– Ўзингизга бунчалик ишонаверманг. Полиция сизни Грация Леманни ўлдиришда айблаб ахтаряпти.

– Қўйинг, мен учун кўркиб ўтирманг, – деди у қувноқ оҳангда. – Яхшиси, ўзингиз ҳақингизда ўйланг.

Эшик очилиб, уйга Баррет кириб келди. У бир неча муддат менга тикилиб, қоққан қозикдек тик туриб қолди, узунчоқ мафтункор юзиде ваҳший ифода акс этди.

– У бу ерга қандай келиб қолди? – деб хитоб қилди сўнг.

– Эшикни калит билан очди, – жавоб берди ҳамроҳи оромкурсидан турар экан. – Баррет, Худо хайринг-ни берсин, яхшилаб қара-чи, курули йўқмикан.

– Тур! – деб буюрди Баррет.

Мен қаддимни ростладим.

У ортимдан келиб, ҳамма томонимни пайпаслаб чиқди. Тўппончамни топиб, ғилофидан суғуриб олди.

Сўнг чўнтагимдан марихуанали сигарета қутичасини чиқарди.

Мендан узоқлашиб, қутини очди-ю, ёвузларча кулимсиради.

– Жуда ақлли ўйланган. Буни қаерда менга ёпиш-тирмоқчи бўлдингиз?

– Қаерда бўлишининг нима фарқи бор? – дедим мен. – Ўзингиз ҳам бундай жиноят аломатини қолдириш услубингизга патент олганингиз йўқ-ку!

У қутини стол устига улоқтирди, менга яқин келиб, тўппонча билан туртди.

– Бу ерга қандай тушиб қолдингиз?

– Захира калитни олгандим, у пастда тахтачага илинган ҳолда туради, наҳотки шуни билмасангиз?

Баррет яна бир бор чўнтақларимни тинтиб чиқди. Калитни топиб, стол устига ташлади, сўнгра Дедриikka қаради.

– У алдаяпти. Калитни Макси берган. Майли, бу хайвон билан ҳисоб-китоб қилиш вақти етди.

Баррет чўнтагидан кумуш портсигар чиқариб, сигарета олди ва оғзига солди. У чекар экан, кўзлари олазарак бўлиб, менга эътиборсизлик билан тикиларди.

– Мен сиздан қарздорман, Мэллой, – деди у ниҳоят. – Кимдан қарздор бўлсам, уни ҳалоллик билан тўлайман. Буни ўз кўзингиз билан кўрасиз.

– Сизнинг ҳалоллигингизни тасаввур ҳам қилиб бўлмайди, – дедим мен.

– Буни нима қиламиз энди? – сўради Дедрик.

Баррет камин ёнидаги ойна олдига келиб, ўзини завқ билан томоша қила бошлади.

– Шахтага жўнатсак бўлар, – деди у. – Мэллой учун қулай жой. У ерда ўлим олдидан истаганича мулоҳаза юритади.

Дедрик захархандалик билан кулди.

– Бош чаноғида тешик қолдириб, бу ерга ташлаб кетсак бўлмайдими? Менинг яна шахтага тушгим йўқ, у ер ҳаддан зиёд кўрқинчли.

– Сенга нима дейилган бўлса, шуни бажар, – деди Баррет ва бош бармоғининг тирноғи билан ингичка мўйловларини силаб қўйди. – Қани, қўлларини боғла-чи!

Дедрик хонадан чиқди ва бир неча сониядан сўнг ортига қайтди. Унинг қўлида икки дюйм энлиликда лейкопластир ўрама бор эди.

– Агар озгина ножўя қадам ташласангиз пешанангиздан ўқ ейсиз, – деб огоҳлантирди мени Баррет тўппончани кўрсатиб. – Қани, қўллар орқага!

Мен қўлимни орқамга қилдим. Бу вазиятда ҳеч нарса қила олмасдим. Дедрик бармоқларимни лейкопластир билан чирмаб ташлар экан, бу ишни қийналмай бажарди.

– Энди унинг оғзини елимлаб ташла! – буюрди Баррет.

Дедрик оғзимни пластир билан елимлади.

Баррет рўпарамда туриб, ёвузларча тиржаярди.

– Хўш, менинг йўлимга тўғаноқ бўлганингиздан энди афсус чекмасангиз керак, – бўғиқ оҳангда гапирди у ва юзимга тўппонча дастаси билан қаттиқ урди.

Мен бир томонга қалқиб кетдим, оромкурси оёғига чалкашиб, гурсиллаб полга йиқилиб тушдим.

– Эй, секинроқ, – деди Дедрик ташвишланиб, – Шовқинни эшитиб, бирон киши келиб қолмасин тагин.

Баррет унга ўшқирар экан, устимга энгашиб, биқинимга қаттиқ тепди. Зарба қовурғамга тегиб, сал бўлмаса синдириб юбораёзди.

– Максини нима қиламиз, Жеф? – деди Дедрик. – Шошилиш керак.

– Уни бу ёққа телефонда чақир, – деди Баррет ва мени яна бир марта тепди.

Дедрик гўшакни кўтариб, рақам терди ва: «Сизни жаноб Баррет кўрмоқчи. Марҳамат қилиб, унинг ҳузурига чиқинг», – деди.

Баррет костюмнинг ёқасидан ушлаб, мени полдан узиб олди ва оромкурсига улоқтирди.

– Ҳозир Макси билан орани очамиз-у, сўнг бу ердан жуфтакни ростлаймиз, – деди у Дедриikka. – Энди манзилни ўзгартириш вақти келди. Максини менга қўйиб бер.

У кириш эшиги ёнига ўзини олди.

Дедрик эшик рўпарасига туриб қолди.

Орадан беш дақиқа ўтди ва эшик тақиллади.

– Киринг, – деди Баррет.

Эшик очилиб, бўсағада Макси кўринди. Унинг юма-лоқ семиз юзи дарғазаб, пастки лаби тажовузкорона чўччайган эди.

Дедрик қўлини орқасига яшириб, қирқ бешинчи калибрили тўппончани ушлаб турарди.

– Киринг ва эшикни беркитинг, – деди у.

Мушти йўғон хонага кириб, ортидан эшикни ёпди ва мени кўриб, юзи бутунлай ўзгариб кетди.

– Нима бўляпти бу ерда? – деди у ғазаб билан.

Дедрик тўппонча учини собиқ полициячининг корнига тиради.

– Унга захира калитини сиз берганмидингиз?

Макси менга қаради.

– Агар шундай деган бўлса, алдабди. Нима жин уриб, менга тўппонча тираяпсиз? Нима, сиз унинг хавфли эканлигини билмайсизми?

– Фақат хавфли бўлиб қолмай, ўлимдан ҳам баттар хавфли, – деб истехзоли кулди Дедрик.

Баррет индамай, унинг ортидан келиб, елкасига энгил қоқиб қўйди.

– Салом, дўстим, – деди у.

Макси қўрққанидан сал бўлмаса ҳушидан кетиб қолаёзди.

– Бу яна қанақаси? Тўппонча тутган йигит ким ўзи?

– У ўзининг овозига қатъийлик бермоқчи бўлар, аммо кўзларида ташвиш, ҳаяжон бор эди.

– Уйда ўқотар қуроллар сақлаш ман қилинади. Мен рапорт бераман...

– Бунга вақтинг бўлмайди, деб қўрқаман, – мингирлади Баррет. – Кулоқ сол, Макс, мен сенинг найранглариңдан бешиб кетдим. Энди Грация ғойиб бўлгач, сени ҳам ўшандай гумдон қилиш пайти келди.

Мушти йўғоннинг ияги қалтиради. Шоша-пиша қўлини кўтариб, даҳшат ичида ҳар иккаласига жавдираб қаради.

– Жаноб Баррет, – деб ғўлдиради у. – Мен сизга ҳеч қачон ёмонлик қилганим йўқ-ку. Менга суянишингиз мумкин.

Барретнинг қўлида тўсатдан пичоқни кўриб қолган Максини ҳиқичоқ тутиб қолди.

– Узр, Макс, – Баррет у тарафга қараб пичоқни нуқиди. – Сен ҳаддан зиёд кўп маълумот биласан ва ўлгудай жонимизга тегдинг. Қани, мен билан ваннага юр-чи.

Макс тиззалаб, юзи даҳшатдан кўкариб кетди.

– Менга тегманг, жаноб Баррет, худо ҳаққи, ўлдирманг, – деди у қўрққанидан тишлари тортишиб. – Қасам ичиб айтаманки, мен...

Баррет унинг бошига тўппонча дастаги билан урди. Макси полга ағдарилиб тушди. Инграб йиқилар экан, қўли билан бошини маҳкам ушлади.

– Қани, менга ёрдам бер-чи! – деб ўшқирди Баррет Дедрикка.

Икковлон мушти йўғонни кўтариб, ванна томон судрашди. Дедрик ванна эшигини очмоқчи бўлиб, Максини қўйиб юборганида, у бирдан оёққа турди-да, калласи билан Барретнинг қорнига уриб, эшикка чиқиш учун интилди. Баррет қулочкашлаб тўппонча билан туширди ва оёғидан чалиб йиқитди.

Уни ваннага судраб киришди, ичкарида олишув бўлаётгани эшитилиб турди, бир вақт Макси бирдан ваҳшиёна бўкириб юборди. Шундан кейин бўғиқ хириллаш эшитилиб, қичқириқ тўхтади. Худди бўғиш-гандек яна хириллаш товуши келди ва ваннадан Дедрик ранги оқариб, юзи буришиб чиқиб келди.

Бу овозлар тоқатимни тоқ қилиб юборган эди. Икки дақиқадан сўнг у ерда ҳаммаси тинчиб қолди. Эшикда Баррет кўринди. У менга тишларини ғижирлатиб қаради.

– Сенинг навбатинг, дўстим, сал кейинроқ келади, – деди у, – аммо шундай осон ўлиб кетмайсан, – ва Дедрикка қараб қўшиб қўйди: – Хўш, ҳаммаси жойида, уни олиб кет. Эҳтиёт бўл. Хавф-хатар туғиладиган бўлса, гап-сўзсиз отиб ташла.

– Сен бир ўзим олиб боришимни истайсанми?

– Нима бўпти? Мен бу ерда Максининг жасадини бир ёқли қилишим керак, шундан кейингина кетишим мумкин. Сен нимадан қўрқяпсан? Агар у бирор қилиқ кўрсатса, отиб ташла, шу билан тамом.

– Мени полициячилар тутиб олишсин-да.

– Уларни ҳам отиб ташла! – деди Баррет ва кулиб юборди.

Дедрикнинг жаҳли чиқди, сўнг елкаларини қисиб деди:

– Ҳа, майли! Қани, менга плашчни бер-чи! Уни ўраб олай. Манови каптарни жойига қўйгандан кейингина қайтариб бераман.

Баррет ётоқхона томон ўтиб кетди. Орадан бир дақиқадан сўнг очиқ рангли плашч олиб келди.

Дедрик мени бир зарб билан оёққа қўйди.

– Кетдик, – деди у. – Мен сизнинг машинангиздан фойдаланаман. Агар ортиқча ҳаракат рўй берса, сизни худди итдай отиб ташлайман.

Баррет елкага плашчни ёпди ва пластирни ниқоблаш учун бўйнимнинг атрофига шойи шарф ўраб қўйди.

– Хўш, Мэллой, энди сен билан бошқа учрашмай-миз, – деди у менга. – Эҳтимол, сени яна кўрарман, аммо сен мени кўрмайсан, – у кўксимдан Дедрик томон силтаб, қўшиб қўйди: – Қани, юр энди!

Дедрик мени қўлимдан тутиб, йўлакка олиб чиқди. Йўлак бўм-бўш бўлиб, ҳеч ким пайқамади. Биз лифт орқали пастга, пойдевор қаватигача тушиб бордик.

Дедрик биқинимга тўппонча билан туртди.

– Эсингизда бўлсин, агар зиғирча ножўя ҳаракат қилсангиз, ҳаёт билан хайрлашаверасиз, – деб вишиллади у. Дедрикнинг юзи терлаб кетган эди.

Биз вестибюлга чиқдик. Дедрик мени гилам солинган йўлакдан олиб ўтиб, зинапоялардан «Бьюик»кача судраб борди.

Қандайдир икки қиз рўпарамиздан йўлак бўйлаб келишаётганди. Улар бизни ҳеч қандай қизиқишсиз олдинга ўтказиб юборишди-ю, уйга киришди.

Дедрик машинанинг орқа эшигини очиб:

– Утиринг! – деди.

Машинага ўтириш учун бироз энгашганимда, у тўппонча дастаги билан бошимга қаттиқ урди.

3

Менинг миям коп-кора чуқур жарликдан машаққат билан зўрға халос бўлди. Ўзига келган шуурим эрталабки тумани эслатарди. Дастлаб бошимда сим-сим оғриқни ҳис этдим, кўзимни очганимда, ерга елкамни бериб ётар, юзимга чўнтак фонарининг нурлари урилди. Мен оҳ чекиб, юзимни ўгирдим, ўрнимдан турмоқчи бўлдим, аммо кўкрагимда ётган қандайдир қўл менга халакит берарди.

– Жимгина ётинг, – деб бақирди Дедрик, – бир дақиқа.

Унинг ингичка бармоқлари оғзимни зич ёпган тасмани пайпаслади ва аста-секин сидириб ола бошлади. Қўлида пластирнинг етарлича узун учи кўрингач, уни тезгина узиб олди. Бу шундай оғриқ бердики, яна инграб юбордим.

Мени фонарнинг ёруғи безовта қилди, аммо совук нам ҳаво ва атрофнинг қоронғилиги янада хавотирга соларди.

– Мен қаердаман? – деб инграб юбордим.

– Ҳадемай биласиз, – деган жавоб бўлди.

Қандайдир оғир нарса белимдан ушлаб турганини ҳис этдим.

Бошимни энгаштириб, белимни ўраб турган қалин занжирга кўзим тушди. Дедрик уни осилган қулфга маҳкамлаган эди. Орқага қараб, вақт ўтиши билан қо-



райиб қолган ёғочлар тутиб турган қўпол тарашланган тош деворларга кўзим тушди.

– Нима бу, шахтами? – сўрадим мен.

– Ҳа, биз юз фут ер остидамиз.

У қўлфни ширк этиб ёпди ва ўрнидан турди.

– Мана, ҳаммаси жойида. Буни мен ўйлаб топганим йўқ. Мазлой. Унинг нима деганини эшитдингиз. Мен сизга ёмонлик қилмоқчи эмасман, агар у бўлмаганида сизни шу ерда отиб ташлаган бўлардим ва шу билан тамом бассалом эди, аммо у эртага келиб, сизни кўради.

– Ҳали у мени бу ерда очликдан ўлдирмоқчимми? – хайрон бўлиб сўрадим ва тасманинг қувватини текширмоқчи бўлдим. Боғланган қўлимдан уни узишга уриндим, аммо ҳаракатларим бефойда эди!

– Сиз очликдан ўлмайсиз, – деди Дедрик. У сигарета чекиш учун жим бўлди. Қўли майин титрарди. – Ҳатто оч қолишга ҳам улгурмайсиз.

– Бу билан нима демоқчисиз?

– Кейин биласиз. Агар қарши чора қўлламасликка сўз берсангиз, мен кетмай туриб, қўлларингизни ечиб қўяман. Ҳар ҳолда ҳимояланишингиз учун имконият бўлади.

Мени титроқ қамраб олди.

– Агар қўлларимни ечиб қўйсангиз, сизни бўғиб ўлдираман, – дедим мен. – Мени осонликча кўрқитиб бўпсиз.

– Бемаъни гапларни қўйинг. Сизни нима кутаётганини ҳатто тасаввур ҳам қила олмайсиз. Қани, ўгирилинг-чи, қўлларингизни ечай.

Мен ўгирилдим. У елкамга тиззасини тираб, тасмани сидира бошлади. Сўнг ушлаб олмаслигим учун ўзини орқага ташлади.

Мен ўтирдим. Тура олмас, чунки калта занжир халақит берарди. Қўлларимни бемалол ҳаракатлантириб, пайпаслаб кўриш ёқимли эди.

– Мана сизга фонарча, – деди Дедрик. – Сизга қилишим мумкин бўлган ҳамма яхшилигим шу.

– Демак, сизда озми-кўпми виждон қолган экан, – дедим мен қўлларимни қони юришиши учун уқалар эканман. – Хўш, мени нималар кутар экан?

– Билмайман.

У қия қавланган узун ерости йўли томонга фонарчани кўтариб, зим-зиё қоронғиликни ёритди.

– Ҳув нариги томонга қаранг. Нима эканлигини тахминан биласиз.

Ёруғ нур қоронғилик ичидан қандайдир бир уюм латтани ёритгандай бўлди. Диққат билан тикилиб, костюмнинг эгни эканини кўрдим.

– Бу латталар тагида суяклар ётибди, – деди Дедрик, мен унинг кўксидан ҳавони қандай чиқариб хўрсинганини эшитдим. – Бу одамни шу ерда қолдирган эдик, мана қандайдир ўн икки соат ичида нима бўлганини кўринг. Латта-путта ва суяк – бор-йўғи шу.

– Ким бу? – деб сўрадим мен ғамгин товушда.

– Аҳамияти йўқ.

Мен бу Лют Феррисдан бошқа киши эмас, деган қарорга келдим.

– Феррис, шундайми?

– Йўқ, бу ҳаддан зиёд қизиқувчан майда одам, – жавоб берди Дедрик терлаб кетган юзини дастрўмоли билан артар экан. – Кўрдингизми, уни қандай еб кетишган. Бу ерда қандайдир ёввойи махлуқ бор. Эҳтимол, силовсин бўлиши мумкин.

У чўнтагидан иккинчи фонарчани олиб, менга ташлади.

– Ушлаб олинг. Майли, у сизда бўлсин. Агар Баррет келаётганини эшитсангиз, яширинг. Сизга фонар қолдирганимни билиб қолса, мени ўлдиради.

– Начора, шунисига ҳам раҳмат, – дедим мен ва унинг юзини ёритдим. – Дедрик, нега сиз мени бутунлай озод эта олмайсиз? Бу ишлар кўнглингизга ёқмай турибди-ку. Қани, бўлинг! Сиз қилмишларингиз учун жавобгарликдан халос бўлишингиз мумкин. Агар мени бу мушкулотлардан қутқарсангиз, қутулиб кетишингиз учун кўлимдан келган барча чорани ишга соламан.

– Йўқ, энди менга ҳеч нима ёрдам бера олмайди, – деди у. – Сиз Барретни яхши билмайсиз. У соғлом ақлга эга ҳолда қасддан қарши бориш мумкин бўлган охирги одам. Хайр, Мэллой! Умид қиламанки, сизнинг узоқ азоб тортишингизга тўғри келмайди.

Мен қимирламасдан ўтириб қолдим. Чўнтак фонарчасининг камайиб бораётган нури орқали Дедрикнинг тобора олислаб қоронғи ерости йўлига кириб кетаётганини кўриб турардим. Атрофдаги зулмат мени тобора ўзига қамрай бошлади ва бўғиб юборувчи бутун оғирлиги билан совуқ терга ботирди. Мен фонарчани ёқдим. Ёркин нур қора, ёпишқоқ, худди мазут каби зим-зиёликни итқитиб юборди, зулмат худди жонлидай ортга чекинди ва ерга қапишиб, ёруғлик атрофига жойлашди. У қайтадан менга ёпирилиш учун қулай фурсатни пойлаб турганга ўхшарди.

Биринчи ишим мени деворга парчинлаб қўйган занжирни текширишдан иборат бўлди. Занжир кам учрайдиган даражада мустаҳкам эди. Уни узиб бўлмас, қулф эса янада маҳкам ва залворли эди. Мен девордаги занжирни кўздан кечирдим. У қояга қоқилган темир илгакка маҳкамланган эди. Иккала кўлим би-

лан занжирни маҳкам ушлаб ўзимга тортдим – фойдаси бўлмади!

Оёғимни деворга тираб, занжирни қайта-қайта силтадим, бу ишни токи томирларим, пайларим чирсиллагунча давом эттирдим. Мен худди шундай муваффақиятим билан Эмпайр стейг билдингдаги юз қаватли бинони жойидан қўзғатишга уриниб кўришим мумкин эди.

Аммо худди буғ билан ишловчи болға каби полга ағдарилиб тушдим. Бу жойдан чиқиб кетишим учун девордаги илгакни бир амаллаб суғуриб олишим керак. Мени бу ердан излаш ҳеч кимнинг хаёлига ҳам келмайди. Яхшиям Паула Жефферсон-авенюдаги турар жой биносига киради. У ердан Максининг жасадини топади, аммо бу ҳам мени қутқаришга кафолат бера олмайди. Паула Мифлиннинг ҳузурига боради. У ерда нимаям қилиши мумкин? Мени ташландиқ шахтанинг эски ерости йўлидан ахтариш кимнинг калласига келади?

Мен ваҳимага берилдим. Ахир бу сени тириклайин кўмиб юборишнинг айнан ўзи-ку! Кўзларим беихтиёр мендан ўн ярд нарида ётган йиртиқ латта-путталар тўдасига, шўрлик Феррисдан қолган уюмга тушди.

«Бу ерда қандайдир йиртқич ҳайвон санқиб юради», – Дедрик шундай деди. Начора, бўлиши мумкин! Агар бу ердан қоча олганимда, гувиллаганча чиқиб кетиб, хаммасини унутиб, бир бурчакда беркинган бўлардим. Агар ҳайқириғим эшитиладиган бўлса, бор кучим билан ёрдам сўраб қичқирардим. Умрим давомида қўрқувларнинг кўпини ўтказганман, аммо ҳозиргиси ҳеч бирига ўхшамас, уни синаб кўрмаган эдим.

Гўё қимирламай бир умр ўтиргандай, ўлик каби жимман. Ўзимни қўлга олиб, хотиржам бўлишга уриндим. Ваҳимага берилмаслик учун ўзимни ўзим қўрқок

ва ҳоказо деб калламга келган турли-туман ҳақоратларни ишлатиб, овунишга уриндим. Бир қути сигарета чиқариб, ярмидан кўпини иккига бўлиб чиқдим. Чекиб деворга суяндим ва фонар ёғдуси теварагида тарқалган оқ ёрқин доирани кўздан кечирар эканман, кўзларимни юмдим.

Менинг бу ерда қанча туришим, қанча вақт ўтиши тасаввуримга ҳам сиғмайди. Агар фонар доимий равишда ёқиб қўйилса, қуввати камида икки соатга етади. Қоронғиликда ўтиришга тўғри келса ҳамки, қувватини тежаш керак.

Сигареталарни санаб кўрсам, ўн еттита экан. Ҳатто унинг хира, зўрға кўринадиган чўғи ҳам мени тинчлантирадиган даражада, демак, чекаётганимда, фонарни ўчиришим мумкин.

Шундай қилдим.

Бошим узра яна бўғувчи, тинкамни қуритувчи оғир зулмат ёпирилди. Зим-зиёлик шунчалик қалин ва қуюқ эдики, бутунлай унинг домига тушдим. Зулмат билан бирга ваҳима, кўрқув қайтиб келгандек бўлди.

Сигарета чекар эканман, тутаётган чўғга тикилиб нам қоп-қоронғи зулмат кўйнида бир соатга яқин ўтирдим. Бутун фикр-ўйларимни сигарета чўғига қаратдим, устимга осилиб турган қоп-қора тахта қуббалари намлигига эътибор бермай, уни унутишга ҳаркат қилдим.

Ниҳоят ортиқ чидай олмай, фонарни ёқдим. Бутун аъзойи баданим терлаб кетган, соат эса бу қоронғилик қаърида менинг бор-йўғи саккиз дақиқа ўтирганимни кўрсатарди.

Ростакамига ўзимни йўқотиб қўйдим. Агар саккиз дақиқа ичидаги аҳволим шу бўлса, унда бир соат, бир ёки икки кундан кейин ҳолим не кечади?

Фонарни пол устига қўйдим ва занжирга ёпишдим. Уни ҳақорат ва ҳайқириқларимни мутлақо эшита олмас даражага етгунимга қадар силкитиб, узишга ҳаракат қилдим. Кейин занжирни ташлаб, яна жойимга ўтирдим. Шу даражада толиқдимки, гўё ўн миля масофани югуриб ўтгандай бўлдим, ҳатто оёғимнинг болдирлари тортишиб қолди, улар оҳиста титрар эди.

Бирдан қандайдир ноаниқ шитирлаш сезилгандай бўлди. Шу пайтгача ер остидаги юз фут чуқурликда жойлашган ташландиқ шахтада ягона товуш фақат юрагимнинг уриши-ю, қўлимдаги соатнинг заиф чиқиллаши эди, холос. Энди эса қандайдир бошқа, менга мутлақо ноаниқ бир товуш қўшилдики, у бошимни буриб, қоронғилик қаърига тикилишга мажбур этди.

Нафасимни ичимга ютиб, ярим очик оғзим ва ҳаддан зиёд қаттиқ ураётган юрагимга қулоқ солиб турдим – бирорта товуш эшитилмади.

Эҳтиёт бўлиб пол устидан фонарни кўтардим ва нуруни ерости йўлига қаратдим – ҳеч ким йўқ!

Чироқни ўчириб, кута бошладим. Дақиқалар ортидан дақиқалар ўтди. Шундан сўнг мени яна сергаклантирган товуш эшитилди. Енгил шитирлаш, кимдир эҳтиёткорлик билан майда тошларни босиб, менга томон писиб келаётгандек. Қабристонга хос жимжитликда товуш ниҳоятда кескин эшитилади. Шитирлаш бу шахтадан бошқа жойда мутлақо эшитилмасди. Ҳатто бу ер тупроғи устига баргнинг тушиши ҳам худди гумбурлашдай эшитилади.

Фонар тугмасини босдим. Ёруғлик нури қоронғиликни худди қилич каби кесиб ташлади. Мен бир неча лаҳза ичида ёниб турган иккита нуқтани сезиб қолдим. Бу ваҳший ҳайвоннинг кўзлари бўлиши мумкин, у дарҳол яширинди. Мен эса тамоман вужудим қал-

тираб, тиззамга таяниб ўрнимдан турдим. Энгашиб олдинга қарай бошладим. Унинг нима эканлигини билмоқчи бўлдим.

«Мен кимдан қарздор бўлсам, уни ҳалоллик билан тўлайман, мана кўрасиз».

Баррет айтган бу сўзларнинг аҳамиятини энди тўла-тўқис англаб етдим. Назаримда, умрим давомидаги энг қўрқинчли лаҳзалар эди ҳозир. Қўрқув туфайли қорним бураб оғрий бошлади.

Иккинчи сигаретани чекиб бўлгач, фонарни ўчирмай, яна сирли ваҳший ҳайвон пайдо бўлишини кутишга қарор қилдим. Шундай қилсам, ундан ҳимояланиш учун чора қўллашим мумкин. Чирок ёниб турса, ваҳший ҳайвон қандай бўлмасин менга ҳамла қилмаслигига қатъий ишонардим.

Мен ўтириб яна чекар, юрагимнинг дук-дук уришига қулоқ солар ва девордаги илмоқни суғуриб ташлаш ҳақида ўйлардим. Бироқ худди бошимга пахта тўлдириб қўйилгандай ҳеч нимани фикрлай олмас, барча ўйларим чувалашган ва ҳимоясиз ҳолда қоронғиликка қаратилган эди.

Яна кизил бурчакларга кўзим тушди. Улар айнан фонардан тарқалган нур тўғарагида пайдо бўлиб қолди. Қимирламасликка ҳаракат қилар эканман, қоронғиликда осилиб ва менга қараб турган иккита ёниқ нуқтага тикилиб қолдим.

Орадан икки дақиқа ўтди. Билмадим, бу икки ёниб турган нуқта яқинлашдимми ёки менга шундай туюлдими, ҳар ҳолда, мен ўтирган ҳолда уни кутиб, қўрқувдан ғужанак бўлиб олдим. Нафасимни ичимга ютган, фақат оғзимни очиб, нафас олиб ўтирардим.

Йиртқич ҳайвон мен томонга эҳтиёткорлик билан жимгина яқинлашарди. Унинг муайян белгиларини

ўргана бошладим. Энди ўткир тумшуғи ва орқа томонининг ғира-шира юмалоқ шарпасини фарқлайдиган бўлдим. Мен қимирламай, бир оёғим устида ўтирар, аммо буни зўрға илғар эдим. Энди қандай жонзотга дуч келаётганимни билишни хоҳлардим. Кўп кутишимга тўғри келмади. Ёруғлик нурида каламуш кўринди, аммо у оддий эмас, балки росманасига кўрқинчли бир махлуқ эди. Катталиги мушукка тенг келадиган, думининг охиридан ўткир тумшуғигача икки фут бўлган улкан каламуш!

У сира хавфсирамай ёруғлик доирасига кирди-ю, менга қарай бошлади. Ялтираган малла териси электр ёруғлигида товланарди.

Менинг қўлим тагида катта қиррали тош ётарди. Бармоқларим уни маҳкам ушлади. Каламуш хушёр тортиб, серрайиб қолди. Мен тошни олиб, унга қарата отдим.

Шитирлаган овоз эшитилди, малла яшин чақнагандай бўлди, махлуқ эса тўхтаган жойига тош бориб урилгунча ғойиб бўлди.

Шундай қилиб, энди мени нима кутаётганини билдим. Феррисни қайси жонивор бир уюм латта ва суякка айлантирганини англадим. Шу билан бирга бу махлуқ оч қолса, ҳеч нарсадан қайтмаслигини ҳам тушуниб етдим.

Тош топиш учун атрофимга назар ташладим ва уларни бир тўда қилиб йиғдим. Пойабзалимнинг пошнаси билан ерни кавлаштириб, чанг қатлами ва тош бўлаклари остидан калтак топиб олдим. Гарчи унча мустаҳкам бўлмаса-да, ҳар ҳолда қурол. Мен деворга парчинланган бўлсам ҳам, каламушни бартараф этишга ярайман, аммо миямнинг туб-тубида улар битта эмас, бир нечта бўлса-чи, қанча экан, деган са-



вол бор эди. Кўзларим беихтиёр латта-путталар уюмига тикилиб қолди – буни битта каламуш эмас, бир нечтаси қилгани аён эди.

Калтакни ўнг қўлимга олдим, чап қўлим билан эса фонарни маҳкам ушлаб, деворга суяндим. Кейин кутиб турдим, қаердадир узоқроқда, қоронғиликда каламуш ҳам мени кутарди.

#### 4

Соатнинг ёруғлик берадиган миллари бешдан йигирма дақиқа ўтганини кўрсатарди. Демак, менинг шахтада бўлганимга икки соатдан зиёд вақт ўтибди. Захирамда бешта сигарета қолди, фонарнинг батареяси эса хиралашиб, ёруғлиги аста-секин тўқ сарик тусга кирган. Охирги ярим соат давомида мен кутиш ва қулоқ солиш билан вақтни ўтказиб, фонарни ҳар беш дақиқа орасида ўчириб ёкиб турдим.

Ҳеч нимани кўрмадим ва эшитмадим. Нам, нафасни қайтарадиган оғир ҳаво мени оғир мудроқ ҳолатга гирифтор қилди. Фақат тўхтовсиз чекиш ва сигаретанинг учқунли қолдиғига тинимсиз қарайвериш туфайли ўзимни бир амаллаб уйқудан тиярдим. Бўйнимни дастрўмолим билан боғлаб олдим, мақсадим томоғимни эҳтиёт қилиш эди. Борди-ю, каламуш менга ташланиб қолса, бу дастрўмол ҳимоя қобиғини ўтарди.

Мен кўрқувни енгдим ёки, аниқроғи, кўрқувим «учиб кетди». Ҳар қандай кўрқувнинг чегараси бор, шахтада бўлганимнинг биринчи соатида ана шуни бошимдан ўтказдим. Аммо бу ердан тирик чиқиш борасида барча умидларни ҳам рад этдим. Менинг якка-ю ягона истагим томоғимни узиб ташламасидан

олдинроқ каламушни ўлдириш бўлди, бошқа ҳеч нимани ўйламасдим.

Икки соат бамисоли икки суткадай ўтди. Чекиш, соатга қараш, каламушни ўйлаш, унга қулоқ солишдан бошқа сираям ишим йўқ. Соат миллари циферблат узра аста-секин ўрмаларди.

Яна шитирлаш эшитилди! Тош сатҳига қаттиқ, қадок бўлиб кетган думнинг учи тегиб ўтган эди. Мен товуш чиққан томонга навбатдаги тошни улоқтирдим ва каламуш қандай қочиб кетганини эшитдим. Аҳа, демак, у ҳали оч қолмаган. Мавжудотни яна нарироқ ҳайдаш учун бошқа тошни отдим.

Мени фонар чироқчасининг тобора хиралашиб бораётгани ташвишлантирди. Уни ўчириб, бутунлай қоронғилик ичида қолдим. Нафас олмасликка ҳаракат қилиб, атрофимни ўраб олган зим-зиё зулматга қулоқ солишга уриндим. Кўзларимни юмган ҳолда тахминан ўн дақиқа ўтирдим, эҳтимол, пинакка ҳам кетгандирман. Бирдан қандайдир даҳшатли ҳол рўй берди, юрагимдаги бутун қон сапчиб, миямга чиқиб кетгандек бўлди. Туйқус уйғониб кетдим – қандайдир махлуқ товонимдан оёғимга чиқа бошлаган эди.

Ёққични босдим, орқамга совуқ игналар санчилгандек бўлди, ўнг қўлим беихтиёр калтакни маҳкам чангаллади. Шу даҳшатли лаҳзада ўзимдан бир неча дюйм нарида мен томонга қип-қизил ёвуз кўзларини тикканча ўрмалаб келаётган қонхўр каламушни кўриб қолдим. Унга ёруғлик тушганида, хуркиб яшин тезлигида бир томонга қочиб, кўздан ғойиб бўлди. Мен даҳшатдан гангиб қолганим кўйи зўрға нафас ростладим, бутун аъзойи баданим муздек терга ботди.

Сал ўтмай, ёруғлик доираси атрофида аллақачон тўрт жуфт қизил чўғ ёниб турганини пайқаб қолдим.

Улар рўпарамда бир-биридан бир фут масофада ярим доира шаклида жойлашган эди. Демак, каламушлар энди битта эмас, балки тўртта!

Мен уларга қараб нотабий, даҳшат ичида қичқириб юбордим, аммо бу жониворлар жойидан жилмади. Йиғиб қўйган тошларни бирин-кетин олиб, газандаларга улоқтира бошладим. Аммо улар қандайдир дақиқалар ичида кўздан ғойиб бўлишди-ю, сўнг яна да яқинроқ, аввалгига нисбатан олдинроқ жойда пайдо бўла бошлади.

Яна бақириб юбордим.

– Вик! Қаердасиз?

Шундай эшитилдими ёки олис зулмат қаъридан менга жавоб беришдими, тушунмай қолдим. Кўксимни тўлдириб нафас олдим-у, бор кучим билан момақалди роқ овозида ҳайқириб юбордим, унинг акс-содоси ерости йўлининг охиригача етиб борди.

– Вик, қаердасиз?! – яна овоз келди.

– Мен шу ердаман, ерости йўлининг охиридаман!

Шунчалик ҳаяжонланган эдимки, ҳатто каламушларни ҳам унутиб юбордим. Мен худди жиннилардек қичқирдим. Шу пайт қандайдир олғир махлуқ ёруғлик ичида «ялт» этиб кўринди ва бўйнимдаги дастрўмол тахламини тишлари билан ғажий бошлади.

Кўксимда қандайдир оғирлик ва димоғимда каламуш терисининг қўланса ҳидини туйдим. Каламуш нам тумшуғини юзимга тираганча томоғимга тезроқ етиш учун бўйнимга ўралган рўмолча қатларини тишлари билан йиртарди.

Жирканиш ва кўрқувдан сал бўлмаса эсим оғиб қолаёзди. Силлиқ семиз биққи танани ушлар эканман, каламушнинг қўлимда типирчилаётганини сездим ва уни томоғимдан куч билан ажратиб олдим. Ана шунда

иркит, ўтқир тумшуғи бирдан мен томон бурилди ва худди устара каби ўтқир тишлари бармоқларимга ботди. Мен ҳаддан зиёд асабийлашиб, жунбишга келиб, бу иркит махлуқни елкамдан узиб олдим ва қулоқни тешгудай чийиллашни эшитдим. Унинг тишлари қўлимни қўйиб юборди, мени такрор тишламасидан туриб умуртқа поғонасини синдирдим. Бармоқларим орасида худди шохча сингандай суяқлар мажақланди. Мен жирканиб, кўнглим айниб, каламуш ўлигини бир чеккага улоқтирдим.

– Вик?!

– Мен шу ерданман!

Товушим ҳаяжон туфайли бўлиниб-бўлиниб чиқди.

Ерости йўлининг энг адоғида кичик ёруғлик нуқта-си кўринди.

– Боряпман! – Пауланнинг овози етиб келди. Мен шу пайтгача умримда бунчалик ширали товушни эшитмаган эдим.

– Бу ёққа! Оёғингиз остига қаранг. Бу ерда каламушлар тўлиб ётибди.

– Боряпман, боряпман!

Ёруғлик тобора яқинлашар экан, янада ёрқин ва равшанроқ бўла борди. Бир неча дақиқадан сўнг Паула ёнимга ўзини ташлаб тиззалади ва қўлларимни маҳкам қисди.

– Ох, Вик! – инграб юборди у.

Мен энтикиб, чуқур нафас олдим ва Паулага кулиб қарамоқчи бўлдим, аммо уддасидан чиқмадим: юзимдаги мушаклар гўё тахтадай қотиб қолган ва ўзимга мутлақо бўйсунмасди.

– Паула! Сизни кўрганимдан хурсандман. Бу ерга қандай тушиб қолдингиз?

Унинг қўллари юзимни сийпалади.

– Шошманг, сиз жароҳатланганингиз йўқми?

Мен қўлимни кўтардим. Жароҳатимдан қон ирмоқдай оқарди. Агар бўйним атрофида даструмолим бўлмаганида, каламуш томоғимни ғажиган бўларди.

– Ҳаммаси жойида. Бу ерда битта каламуш менга ёпишиб олган эди.

Паула катта шойи шарфини ечиб, қўлимни маҳкам боғлади.

– Наҳотки бу ишни каламуш қилган бўлса?

– Ҳа. Мен уни ўлдирдим. Сизнинг орқангизда ётибди.

Паула тезгина елкаси оша қараб олди. Ёруғлик нури қоронғилик ичида жирканч махлуқни ёритди. Пауланнинг нафаси ичига тушиб кетди, лабларида қичқирик қотиб қолди.

– О-о-о! Бу ерда улар кўпми?

– Ҳа, яна бир жуфти бор. Бу каламуш ҳаддан зиёд тиришқоқ эди.

У яқинроқ келиб, каламушга диққат билан тикилди, елкаларини қисди.

– Бу ердан тезроқ кетайлик.

– Иложим йўқ. Деворга занжир билан боғланганман. Баррет мендан шу тариқа қасос олмоқчи бўлди.

Паула занжирни текшириб кўрди, мен унга бўлиб ўтган воқеаларни қисқача гапириб ўтдим.

– Вик. Мен ўзим билан тўппонча ҳам олганман. Нима деб ўйлайсиз, бирорта ҳалқасини отиб кўрсак бўлмайдими?

– Қани, уриниб кўрайлик-чи! Уни менга беринг, ўзингиз нарироқ туринг, ўқ сапчиб, сизни жароҳатлаб қўймасин тагин.

Паула йигирма бешинчи калибрли тўппончани узатди ва ўзини шахта ичига олди. Ўқ овози сал бўл-

маса қулоғимни қар қилаёзди. Учинчи ўқни отганимдан сўнг бир халқа занжир учиб кетди.

Бўғинларим қақшаб, секин оёққа турдим. Паула ортига қайтиб, мени суяди.

– Ҳечқиси йўқ, беш дақиқадан сўнг дуруст бўлиб қоламан. Мен бу ерда шунчаки совқотиб қолдим, холос.

Қон айланиши жойига тушиши учун тиззаларимни бир неча бор букиб ёздим.

– Сиз барибир шахтага қандай тушиб қолганингизни айтмадингиз. Менинг бу ерда эканлигимни қандай билдингиз?

– Менга қандайдир аёл қўнғироқ қилди. Исмини айтмасдан: «Уни Монте-верде конига олиб кетишди», – деди-ю, гўшакни қўйди. Мен аёлнинг кимлиги, бундан қандай хабар топганини сўрашга ҳам улгуролмай қолдим. Вақтни ўтказмасдан тўппонча, фонар олдим-у, худди телбалардек бу ёққа чопдим. – Паула бош чайқаб, қўшиб қўйди: – Мифлинни ҳам олиб келишим керак эди, аммо шунчалик ўзимни йўқотиб қўйгандимки, буларнинг ҳаммасини унутиб юбордим. Нималарни ўйламадим дейсиз!

– Ҳечқиси йўқ. Сиз шу ердасиз, мен эса озодман, яна нима керак?

– Ҳаммаси тўғри, аммо бу ерости йўли ва кесишув жойларида қанчалик тентирадим. Агар сизнинг қичқириғингизни эшитмаганимда, ўзим ҳам қўрқувдан бутунлай гангиб, додлаб юборардим. Сиз бунинг қанчалик даҳшат эканлигини тасаввур ҳам қила олмайсиз – ҳамма ерости йўллари бир-бирига шунчалик ўхшашки, асти қўяверинг.

– Ҳечқиси йўқ. Мен сизни бу ердан олиб чиқаман. Кетдик.

Паула бирдан латта-путта ва суяклар уюмини кўриб қолиб сўради:

– Бу нима?

– Бу – Льют Феррис, – дедим латта парчалари томон яқинлашиб ва фонар билан ёритиб, ҳатто бош чаноғи ҳам тозалаб еб кетилган эди. Пешананинг ўрта-сида кичкина тешикча кўриниб турибди. Демак, уни отишган! Қизик, нима учун?

Мен илгари костюм бўлган кийим чўнтагини кавлаб, ҳамён топиб олдим. Унда Льют Феррис номига ҳайдовчилик гувоҳномаси, иккита беш долларлик ва бир аёлнинг сурати бор эди. Мен дарҳол унинг Феррис хоним эканлигини фаҳмладим. Ҳамённи жойига қўйиб, ўрнимдан турдим.

– Бу ерга Мифлинни олиб келиш керак, – дедим мен.

Паула суяклар уюмига диққат билан қараб қолди.

– Наҳотки каламушлар уни шу даражага келтирган бўлса? – дея бўғиқ овозда саросимага тушиб сўради.

– Бошқа нима ҳам бўларди. Кетдик. Бу ердан чиқиб кетишимиз керак.

Паула қоронғиликка ҳадиксираб назар ташлади.

– Вик, борди-ю, улар ортимиздан қувса нима бўлади?

– Йўғ-е, ортимиздан тушишмаса керак. Кетдик.

Биз ерости йўли бўйлаб одимладик. Мен ўзимнинг фонаримни ёқдим, у зўрға ёнарди. Пауланинг фонарини кейинроқ ишлатишга қарор қилдик, чунки унинг ёруғлиги анча вақтгача керак бўлади.

Кўп ўтмай, чап томонга бурилиб кетган ерости йўлига ўтиб олдик. Мен Дедрик кета туриб, шу томонга бурилганини эсладим.

– Шу ерда буриламиз, – дедим мен.

– Нима учун тўғрига қараб кетмаймиз?

– Дедрик шу ердан кетган эди.

Биз чапга бурилиб, юз одимча юрдик. Ерости йўли адоғида йўлимизни кесиб ўтган бошқа йўл чиқиб қолди. У қоп-қоронғи томонга қараб кетган эди.

– Энди қаёққа юрамиз?

– Қаёққа бўлса ҳам кетаверамиз. Мен ҳам сиздек биламан.

– Унда ўнг томонга юрамиз.

Ўнг тарафга юрдик. Бу жой нишаблик бўлиб, бир неча дақиқадан сўнг биз пастга қараб кетаётганимизни сезиб қолдик.

– Қани, бир дақиқа тўхтанг-чи! Бу ётиқ кавланган жой пастга эниб боряпти, биз эса юқорига чиқишимиз керак. Келинг, орқага қайтиб, чапга юришга уришиб кўрамиз.

– Мен нима тўғрисида гапирганимни энди англадингизми? – Пауланинг овозида аччиқланиш аломатларини сездим, бу ҳолатни илгари мутлақо англамаганман. – Менда ҳам айнан шундай бўлди. Бу ерда бир соатдан ортиқ тентираб юрдим.

– Майли, кетдик.

Биз орқага қайтиб, икки ерости йўли кесишган жойга келдик ва чап томонга қараб кетдик. Беш дақиқа чамаси юрган эдик, бутунлай берк тош деворга дуч келдик.

– Назаримда... назаримда сизнинг йўлингиз меникидан афзал кўринмади, – деди Паула қандайдир умидсиз оҳангда.

– Сабр қилинг, аччиқланишнинг ҳожати йўқ, – дедим мен унинг ҳолатидан ташвишга тушиб. Паула ҳаммиша хотиржам ва ўзини сипо тутарди, бу ерда эса... жазаваси тутиб кетмаса эди, деб кўрдим. – Эҳтимол,



анови ерости йўли дастлаб пастга, кейин юқорига қараб кетгандир. Келинг, текшириб кўрамиз.

– Бу ёққа нега бир ўзим тушдим-а, ана лапашанглик! Нега Мифлинни олиб келмадим? Вик, биз адашдик! Бу ерда ҳафталаб қолиб кетиш мумкин, шу ҳолда юқорига чиқа олмасак керак.

– Нолишни бас қилинг, – кескин гапирдим мен. – Курук гапларга вақтни кетказманг. Кетдик. Ўн дақиқадан сўнг биз юқорига чиқамиз.

У бироз тинчланди, шекилли, яна гапирганида овози бироз хотиржам эди.

– Кечиринг, Вик. Мен қоронғиликдан қўрқаман, ер остидан-ку, жудаям. Ўзингни худди тупроқ тагида тириклай кўмилгандек сезар экансан.

– Тушунаман. Ўзингизни қўлга олинг. Агар пушаймон қила бошласангиз, ҳалок бўласиз.

Мен унинг тирсагидан ушлаб, олдинга қараб юрдим. Оёқ остидаги пол бутунлай тик ҳолда пастга эниб, биз қандайдир қоп-қора қудуқни эслатувчи ўра ичига кириб борардик.

Бирдан фонарим ўчиб қолди. Паула қўлимга ёпишиб олди, у сал бўлмаса бақириб юбораёзди.

– Ҳаммаси жойида. Қани, ўзингизнинг фонарингизни ёқинг-чи. Мендаги фонарнинг қуввати тугаб қолди. Анча ёнган эди.

Паула менга фонарини берди ва деди:

– Вик, шошилишимиз керак. Фонар узоқ ёрита олмайди.

– Бизга узоқ ёниши шарт ҳам эмас.

Кимнидир қўллаб-қувватлаш ва уни тетик ҳолга келтириш менга тинчлантирувчи таъсир қилди. Шу билан бирга аҳволимиз ёмонлашганини англадим

ва фонар қуввати тугамасдан юқорига чиқиб олишга уриниб, кадамимни тезлаштирдим.

Биз пастга қараб юрганимиз сари ҳаво тобора дим ва бўғиқ бўла борди. Кулфатимиз ошгани сайин ҳар бир кадамимиз билан қуйи эна бошладик.

Паула бирдан тўхтаб қолди.

– Биз бошқа томонга кетяпмиз, – унинг овози му-  
сиқа торидай жаранглаб кетди. – Биладан, бошқа то-  
монга. Орқага қайтдик.

– Йўқ, тўғри кетяпмиз. Ерости йўли охирида Дед-  
рик чап томонга бурилган эди. Мен унинг ортидан  
кузатгандим. Кетдик, олдинга қараб кетдик. Ўша ерда  
кўрамиз.

– Вик, мен кўрқяпман.

Паула мендан четланди. Унинг узук-юлуқ нафас  
олаётганини эшитиб, юзини фонар билан ёритдим.  
Пауланинг ранги оқариб кетган, кўзлари эса қандай-  
дир ғалати олазарақ боқарди.

– Мен бу ерда ортиқ қола олмайман. Қайтиб кета-  
ман. Нафасим бўғилияпти.

Менинг ўзим ҳам зўрға нафас олардим. Кўкра-  
гимни нимадир оғир босиб тургандек, куч билан бир  
амаллаб нафас олардим.

– Қани, яна юз ярд юрайлик. Агар чиқиб кетиш  
жойи бўлмаса, у ҳолда ортга қайтамиз.

Пауланинг қўлини ушлаб, уни суяб олдим. Биз яна  
эллик қадам чамаси юрдик, навбатдаги чорраҳага дуч  
келдик. Энди ҳаводан нафас олиб бўлмай қолди.

– Мана, мен қаергадир етамиз, демаганмидим? Энди  
ўнг томонга қараб юрамиз. Агар унинг ер юзига чиқ-  
май пастга қараб кетаётган ковак жой эканини сезсак,  
у ҳолда қайтиб, чап томонга боришга уриниб кўрамиз.

Паула истар-истамас менга эргашди.

Ҳар бир ерости йўли, ҳар бир ковакдан ўтар эканмиз, улар айнан бир-бирига ўхшар эди. Эҳтимол, биз омадга ишониб, шунчаки доира ичида бекордан-бекорга айланиб юргандирмиз. Зулмат ичида одимлар эканмиз, қадам ташлашимиз тобора қийинлашар, оёқларимиз тош осиб қўйилгандай оғирлашган, мен олдинга қадам босиш учун ўзимни мажбур қилардим. Паула оғзини очиб, зўрға нафас олар, уни қўллаб-қувватлашга мажбур эдим. Ниҳоят ерости йўли пастга қараб кетди, ҳатто сал-пал юқорилади.

– Биз тўғри кетяпмиз. Бунга ишонаман, – хитоб қилдим мен. – Кўряпсизми, юқорилаяпмиз.

Паула бутун оғирлигини қўлимга ташлади.

– Нақадар расво ҳаво. Энди юролмаيمان.

Унинг белидан ушлаб, олдинга қараб судрадим. Ерости йўлининг тепа қисми тобора пастлаб, ниҳоят бошимизни эгишимизга тўғри келди. Йигирма қадам юргач, анча энгашиб, деярли букчайиб қолдик.

Бироз нафас ростлаш учун тўхтадик.

– Вик, биз қайтишимиз керак, – Паула мени орқага тортди ва келган йўлимиздан қайта бошлади. Мен қоқилиб кетиб, уни қувиб етдим ва орқа томонга бурилдим.

– Эсингизни йиғинг, Паула! Қани, кетдик. Ваҳима қилишнинг ҳожати йўқ.

– Билмайман, – у пинжимга тикилди. – Мен кўрқувдан қутула олмаяпман. Бу жой ҳаддан зиёд қоронғи.

Пауланинг қанчалик қалтираётганини сездим.

– Келинг, бироз ўтириб дам оламиз, – таклиф киритдим мен. – Бу ердан чиқиб кетишимиз шарт, чиқиб кетамиз ҳам. Фақат асабийлашмаслик керак.

Биз ўтирдик ва шунда мен пол яқинида, пастда ҳавонинг тоза ва мусаффо эканлигини сездим. Бир неча

дақиқадан сўнг кўкракни босиб турган оғирлик йўқолди ва оёқлар енгиллашиб қолди.

– Хўш, қалай, яхши бўлдимми?

– Ҳа.

Паула ўрнидан турди ва пешанасига тушган сочларини тўғирлаб қўйди.

– Мен ўзимни ёмон тутдим. Кечиринг. Бошқа такрорламасликка ҳаракат қиламан.

– Ҳечқиси йўқ, – деб ғўлдирадими мен ва унинг қўлидан тутдим. – Бу клаустрофобия. Ўтиб кетади. Хўш, юра оласизми? Энди ўрмалаб юришимизга тўғри келади. Бошингизни кўпроқ энгаштиринг. Мен биринчи бўлиб юраман.

Биз тош қопланган йўл узра оёғимиз, қўлимиз қонаган аҳволда эмаклаб кетдик. Бироз вақт ўтгач, ётиб дам олишга тўғри келди. Томоғим қуриб, қақраб қолди. Мен хириллаб нафас олар, роса терлагандим. Паула ёнимда чўзилиб ётиб олди.

– Сиз ҳақиқатан бу ердан чиқиб кетамиз, деб ўйлайсизми? – деб сўради у мендан заиф овозда.

– Албатта чиқиб кетамиз, – жавоб бердим мен, аммо товушимда олдинги ишонч йўқ эди. – Бироз дам олиб, яна юрамиз.

Мен аллақачон Дедрик бу йўлдан юра олмаганини билгандим. Афтидан, биз қаердадир нотўғри бурилганмиз.

Бирдан Паула қўлимдан ушлаб олди.

– Нима бу?

Мен қулоқ тутдим.

Қаердадир олисда, сал бўлмаса нақ ернинг марказидан ёмғир шовқини ва қуруқ барглар шитирлашини эслатувчи ноаниқ товушлар эшитиларди.

– Вик, нима бу?

– Билмадим.

– Ёмғир ёғаётганга ўхшайди-я?

– Бўлиши мумкин эмас. Қани, жим!

Биз қимирламасдан ўтирар ва бўғиқ шовқинга қулоқ солардик.

Шовқин аста-секин янада яқинроқдан аниқ эшитила бошлади. Бу тош тўшалган йўл узра чопаётган минглаб майда оёқчаларнинг товуши эди. Мен улар нимани англатишини тушундим. Бу товушларни эшитган эдим, фақат энди улар битта эмас, балки ўнлаб, юзлаб ададда эди.

Каламушлар юриш бошлаган эди!

## 5

Мен сапчиб оёққа турдим.

– Туринг! Тезроқ! Қочамиз!

– Бу нимаси яна? – деб сўради Паула ҳангу манг бўлиб, минг машаққат билан ўрнидан турар экан.

Унинг қўлидан маҳкам ушладим.

– Каламушлар! Тезроқ! Қўрқманг! Биз улардан қочишга улгурамиз!

Ерости йўли бўйлаб букилиб қочишга тушдик. Каламушлар тапир-тупири тобора яқиндан эшитила бошлади. Биз деворга урилсак ҳам, ердаги тошларга тўқнашиб кетсак ҳам, бошимиз билан тепа қисмига тегиб кетсак-да, олдинга интилишда давом этардик. Ерости йўлидан чапга, бурчақдан бурилганимда, тепа қисми баландлашганини кўрдим. Бир неча ярддан сўнг қаддимизни бутунлай ростлаш мумкин бўлиб қолди.

– Юришни янада тезлатинг, – дедим мен Паулани ортимдан эргаштириб ва қадамимни жадаллаштирдим.

Энди чопиш осон кечди. Биз ортга қарамай, фақат олдинга интилардик. Ерости йўлининг адоғи кўринмасди. Бирдан Паула чайқалиб кетди, йиқилишига сал қолди, яхшиям, вақтида қўлидан ушлаб қолдим. У ўзини устимга ташлади. Оғир нафас оларди.

– Бошқа юра олмайман, – деб зўрға шивирлади у.

Мен қўлим билан Пауланинг белидан ушлаб, олдинга судрадим, аммо бир-икки ярд юрмасдан, у гўё тиззасидан урилган каби полга ағдарилиб тушди.

– Бироз нафас ростлашимга имкон беринг. Ҳозир ҳаммаси жойида бўлади. Бир дақиқа тўхтанг.

Мен беихтиёр деворга суяниб туриб қолдим, қулоғимни динг қилиб, нафасимни тиклашга уриндим. Майда товушлар анча узоқда қолди. Аммо мен бу бир дақиқалик жимлик эканлигини тушунардим.

– Тезроқ олдинга юриш керак.

Қаердадир яқин масофадан яна ёмғир шовқинини эслатувчи товуш эшитилди. Паула гандираклаганича оёққа тик турди.

– Кетдик, – дедим мен уни суяб ва тез-тез қадам ташладим.

Кўп ўтмай Пауланинг иккинчи нафаси очилди, биз яна олдинга қараб югурдик. Орқадаги шовқин бизни тўхтовсиз таъқиб қиларди.

Биз тобора яқинлашаётган каламушларнинг қадам товушини эшитиб, қандайдир мўъжиза туфайли тезликни оширдик. Навбатдаги чорраҳага етганимизда, мен бирор дақиқа ҳам ўйламай Паулани эргаштирганча ўнг томонга бурилдим. Биз узун ва баланд туннелга тушиб қолдик. У олдинга қараб чўзилиб кетган эди. Девор сатҳини фонар билан ёритиб, қаергача кетганини билиш учун қараганимда, охирида одам

бўйи келадиган кубба шаклидаги ўтиш жойи борлигига кўзим тушди.

– Бу ёққа, – деб нафасим тиқилиб гапирдим. Паулани ўтиш жойига итардим, сўнг ортидан ўзим ҳам гандираклар йўлга тушдим.

Катта баланд ёрға тушиб қолдик. Уни ёритиб, бир уюм ёғоч қутиларга кўзим тушди, улар ёрғ ўртасида катта жойни эгаллаб ётарди.

– Вик, буёғига бошқа чиқиш жойи йўқ! – деб қичқирди Паула.

У ҳақ эди. Биз хато равишда тош ўровга тушиб қолгандик. Ундан фақат ортга чиқиб кетиш мумкин. Аммо орқага қайтиш йўли қирқиб ташланган, каламушлар тўлқини ерости йўли бўйлаб босиб келарди.

– Тезроқ! Кириш жойини бу қутилар билан берки-тамиз. Қутулиб кетишимизнинг ягона йўли шу.

Биз қутилар уюмига ўзимизни урдик, улардан бирини олиб, гандираклаганча кириш жойига қўйдик ва янгисини келтириш учун орқага чопдик. Янги қаторни теришга улгурганимиз заҳоти каламушларнинг қўланса хидини хис этдик. Уларнинг узун ерости йўли бўйлаб югураётган товуши эшитила бошлади.

– Тезроқ!

Мен бирданига иккита қутини қатор устига қўйдим. Паула кейинги қутини олиш учун чопиб борганида, фонар билан ерости йўлини ёритдим. Мудҳиш манзарага кўзим тушди-ю, бутун вужудим музлаб кетди: тор йўлак бутунлай малла тукли махлуқлар тўдасидан жонли гилам тўшалгандай кўринарди. Қулоқни тешиб юборгудек чинқирик, думлар ва минглаб оёқчаларнинг ерга урилишидан ҳосил бўлган товуш даҳшатли ва мудҳиш, шу билан бирга уйғунлашмаган ҳолатни юзага келтирган эди.

Тўшпончани олдим-у, туғёнга келган бу тўдага қарата икки марта ўқ уздим. Ўқлар товуши қулоғимни қар қилгудек бўлиб ерости йўлида тарқалди.

Даҳшатли малла гиламнинг олдинги томони бир сесканиб тўхтади. Орқага тисарилишга ҳаракат қилди, аммо чекинишнинг илож йўқ, каламушлар тўдаси бутун конни эгаллаган, олдингиларнинг ортга қайтишига йўл қўймасди.

Ўқлар учта махлуқни ерга михлади ва қолганлари уларга ташланиб, бир-биридан ошиб, худди устара каби тишларини ботириб, бир зумда ғажиб бурдалаб ташлади. Ҳаво мудҳиш хунук чийиллаш билан тўлиб кетди.

Мен Пауланинг қўлидаги қутини юлиб олиб, зудлик билан ўтиш жойига қўйдим. Яна ғорга қайтиб, иккита қутини судраб келиб, уларнинг устига жойладим.

Паула ўзи олиб келган қутиларни қаторга қўяр экан, каламушлардан бири туйнукдан ўтиб, унинг оёғига ёпишди. Пауланинг қаттиқ қичқириши мени ёрдам бериш учун ташланишга мажбур қилди. Паула тепага қараб ётар, қўли билан каламушни ҳайдашга уринар, бу махлуқ эса тишларини иржайтирганча томоғига ёпишишга ҳаракат қиларди.

Мен тўплонча дастаги билан каламушнинг орқасига қаттиқ урдим ва уни ушлаб, бир лаҳзада қутилар деворининг нариги томонига, ерости йўлига қарата улоқтирдим. Паула жароҳатланганми, йўқми, кўриш учун вақтим йўқ эди. Мен у ташлаб юборган қутини жойига қўйдим ва янгисини олиб келиш учун отилдим.

Паула ўрнидан туриб гандираклаганча менга ёрдам беришга уринди. Биз қутиларнинг иккинчи тахламини тугатдик, деворни тўрт фўтдан зиёд қилиб қў-



тардик, аммо бу етарли эмасди. Ғорга кириш жойини бутунлай беркитиб ташлаш керак. Ана шунда нисбатан хавфсиз бўламиз. Аммо бу ҳолатда ҳам каламушларнинг ёввойи тўдаси бизнинг «ижод қилган» деворимиздан ошиб ўтиши мумкин.

– Келинг, яна бир қатор терамиз, – дедим мен ҳансираб.

Биз тер тўкишда давом этдик, қутиларни судраб келиб, устма-уст қўяр ва қолганларини келтиришга уринардик.

Даҳшатли шовқин ва чийиллаш етиб келиб, ясаган деворимиз очофат каламушларнинг зарбалари остида тебрана бошлади.

– Каламуш! – деб қичқириб юборди Паула.

У қутини тушириб юборди ва ўзини орқага ташлаб, қўли билан томоғини ёпди. Мен фонарча ёғдусида ғорни ёритдим ва яшин тезлигида яқинлашаётган мавжудотни кўрдим-у, қўлимни силтадим.

Жирканч махлуқ сал бўлмаса букиб юбориш даражасида қўлларимга ёпишди. Кейин эса енгимга осилиб, елкамга тирмашди. Унинг тирноқлари ўтқир эди.

Мен фонарни ташлаб, каламушни ушламоқчи бўлдим, у бўйнимга ёпишган эди. Аммо хато қилиб, ушлай олмадим. Сидириб ташламоқчи бўлганимда, қўлимга маҳкам ёпишиб, тишларини ботирганини сездим. У иккинчи марта тишламоқчи бўлгани-да, шундай сиқдимки, орқа суяклари синиб кетди. Махлуқни девор туйнугидан нариги томонга ирғитиб юбордим, сўнг охирги қутини тешикка жойлаштириб, ўтиш жойини бутунлай беркитиб ташладим.

Паула фонарни олди-да, менга яқин келди. Биз қутилардан тикланган деворни кўздан кечирдик. Каламушлар деворнинг нариги томонида қутиларга

ёпишар, уларни ғажишга уринар, аммо қутилар қи-  
мирламасдан маҳкам турарди.

– Давом эттираммиз. Яна битта девор ясайммиз, ана шунда биз қутуламмиз, – дедим мен.

– Қўлингиз қонабди-ку.

– Ҳечқиси йўқ. Бўлинг, тезроқ яна бир қатор терай-  
лик.

Биз яна ўнта қутини судраб келиб, керакли жойга ўрнатдик. Чарчаганиммиз боис оёқда зўрға қалқиб бўл-  
са-да, ўтиш жойини учинчи қатор билан беркитмагун-  
ча ишлашни давом эттирдик. Ана шундан кейин бу-  
тунлай куч-қувватдан қолиб, ерга чўзилдик. Бир неча  
дақиқадан сўнг Паула қаддини ростлаб оёққа турди.

– Қани, дастрўмолингизни беринг-чи, мен қўлин-  
гизни боғлайман.

Қўлимни боғлаб бўлгач, у яна ёнимда чўзилиб ётди.

– Ҳозир бир шиша виски бўлганида, қанча бўлсаям  
берардим, – тўнғилладим мен ва Паулани енгил қу-  
чоқладим. – Энди сиз ҳаётимда саргузашт бўлмаган,  
деб айта олмайсиз.

– Мен уларни четлаб ўтмоқчи эдим, – деб жавоб  
берди Паула титроқ овозда. – Ҳаётимда биринчи мар-  
та шундай қўрқувга дуч келдим. Сизнингча, улар ке-  
тиб қоладими?

Деворнинг нариги томонидаги шовқинга қараган-  
да каламушлар бу қамални энг камида бир ҳафта да-  
вом эттирса керак, деб ўйлаш мумкин эди.

– Билмадим. Ҳар ҳолда тез кетмаса керак, аммо биз  
кўрқмасак ҳам бўлади: улар бу ёққа ўта олмайди.

– Вик, унақада биз бу ердан чиқиб кета олмайммиз  
ахир. Борди-ю, каламушлар кетиб қолган тақдирда  
ҳам барибир шахтадан қандай чиқиб кетишни бил-  
майммиз, фонар эса тўхтовсиз ёниб турмайди.

Мен фонар нуруни ғор деворига қаратдим. Ниҳоят, нур ғор ўртасидаги қутилар уюмига тушди.

– Келинг, уларда нима борлигини кўрайлик, – деб таклиф киритдим мен ва зўрға ўрнимдан туриб, оқсай-оқсай уюм томон бордим. Қутилардан бирини судраб, икки марта полга олиб урдим, қопқоғини қўпардим. Унинг ичидан яхшилаб жойланган сигарета тахламларни топдим.

– О-ҳо, қаранг, марихуана солинган сигареталар! – хитоб қилдим мен. – Бу ерда Барретнинг махфий омбори жойлашган, шекилли. Нақадар омад. Улар миллиондан ҳам кўп.

Паула зўрға ўрнидан туриб, менга яқин келди.

– Ахир у буларнинг барчасини биз келган туннелдан ташиб келтирмаган бўлса керак, – дедим мен тўлқинланиб. – Атрофни қараб кўрайлик-чи, иккинчи кириш жойи йўқмикан?

Ғорнинг деворлари ниҳоятда мустаҳкам тошдан иборат бўлгани учун мен бутун эътиборимни полга қаратдим. Паула усталик билан ниқобланган қопқоқли туйнукни биринчи бўлиб топди. Туйнукнинг бир томонидаги қопқоқни босган эдик, кўтарилди. Уни чеккасидан ушлаб, қопқоқни очишга муваффақ бўлдик. Ғорга мусаффо ҳаво оқими ҳуриллаб кирди.

– Мана, чиқиш жойи, – дедим мен қоронғи бўшлиқни кўрсатиб. У оёғимиз остида эди. Пастга қараб қўпол тош зиналар кетган, улар девордаги тошдан йўнилган эди. Биринчи бўлиб пастга мен туша бошладим. Охирги зинага оёқ қўйиб, тор йўлак охирида қуёш нури тушиб турганини кўрдим.

Бу йўлакдан ўтаётиб шахтадан чиқиб кетиш йўлини топдик. Қуёшнинг ёрқин нури сал бўлмаса кўзимизни кўр қилаёзди. Пастда, тагимизда буталар билан

қопланган қумлик ястаниб ётарди. Маълум бўлишича, биз чуқур ташландиқ очиқ, саёз коннинг чеккасидан чиққан эканмиз, унинг чуқурлигидан тор йўлакка қинғир-қийшиқ сўқмоқ ўтган экан.

Мен офтоб тиғи остида турар, Паула эса сал орқароқда эди. Ана шунда тўсатдан қандайдир алоҳида говур-ғувир қулоғимга етиб келди. Бирдан буталар ортида яшириниб турган иккита юк машинасига кўзим тушди. Улар анча узоқда эди. Бир нечта эркак қўллари билан мени кўрсатиб турарди. Тезда ўзимни қоронғилик ичига тортганимда, улар сўқмоқ бўйлаб юқорига, бизга томон интилишди.

## ЕТТИНЧИ БЎЛИМ

### 1

– Орқага, у ерда Барретнинг одамлари турибди! – деб хитоб қилдим-у, Паулани яна тор йўлак томонга итардим. – Улар ҳали сизни кўришгани йўқ. Мен бу ердан чиқиб, чалғитиб тураман. Улар ортимдан югурган заҳоти сиз дарҳол пастга тушиб, юк машинасига ўтиринг. Иложи бўлса, биринчи дуч келган телефонгача етиб боринг-у, Мифлинни чақиринг. У одамлари билан тезроқ келсин. О’кей?

Қалтис вазиятларда Паула ҳеч қачон тортишиб ўтирмайди. У қўлимни қисди-ю, бош ирғаб тушундим дегандек ишора қилди ва ўзини қоронғилик ичига олди. Шу тариқа мен ғордан яна чиқиб қочдим.

Бир неча киши илон изи сўқмоқдан юқорига чиқа бошлади. Кўтарилиш ҳаддан зиёд тик бўлгани боис уларнинг ҳаракати суст эди. Менга нимадир деб қич-

киришди. Мен эса қаерга қочишни белгилаш мақсадида шоша-пиша атрофни кўздан кечира бошладим.

Сўқмоқ йўл тор йўлакка кириш олдидан анча узоққа буралиб кетган, очик кон четидан бир неча ярдни камраб олган эди. Мен энди асло куч-қувватим сўнмаган ҳолда сўқмоқ бўйлаб жадаллаб кетдим.

Очик кондан юқори чиққач, ўсиб ётган буталар ортида қум тепалари ва улар ортидан бошланиб кетган сахрога кўзим тушди. Бу сахро Монте-верде конига туташиб кетарди. Чап томонимда Сан-Диегога ўтувчи автомобиль йўли кўринар, Паула йўл олмаган бўлса, мен ўша ёққа қараб қочишим мумкин эди. Агар шу томонга қараб қочсам, у мени таъқиб қилаётганларнинг орқасида қолиб кетади. Шундай экан, менинг вазирам уларни иложи борича Пауладан узоқроққа олиб кетишдан иборат. Агар унга ёрдам бермоқчи бўлсам, мен бошқа томонга, ўннга, қум тепаларининг нақ ўртасига, бутазорлар марказига қочишим керак. У ерда хилват жойлар кўп бўлиб, бемалол яшириниш мумкин.

Мен абжирлик билан юмшоқ қум устида бир бутадан бошқасига чошиб югурардим, бу дарахтлар мени таъқиб этувчилар кўзидан яширсин, дердим.

Ўн ярд масофада чошиб, бир лаҳзага тўхтадим-у ортимга қарадим. Карьер тепасида ҳали ҳеч ким кўринмасди, бир оний фурсат ичида қаттиқ безовта бўлдим. Улар Паулани топиб олишмаган бўлсин-да, деб хавотирландим. Аммо шунда таъқиб этувчиларнинг қичқириқлари етиб келди, демак, улар кондан сакраб чиқиб кетишади, деб ўйлаш мумкин. Мен қалин бута тагидан чиқиб, серрайиб қотиб қолдим.

Деярли шу лаҳзада карьердан биринчи одамнинг боши кўринди. Унинг ортидан яна тўрт киши пайдо

бўлди. Улар тўхтаб, атрофни кўздан кечира бошладилар. Ана шунда яна уч киши қўшилди.

Булар босқинчи кўринишидаги бақувват йигитлар эди. Улардан тўрттасининг эғнида очиқ қизил чизикли пахтадан тикилган спорт кийими бўлиб, қолганлари анча уринган костюм кийган ва шаҳар харобаларида истиқомат қилувчи кишилар эди.

Улар орасида кенг яғриндор, пакана киши ажралиб турар, афтидан, у бошлиқ ўрнида бўлиб, буйруқ беришни қанда қилмасди. Тўрт йигит чапга, автомобиль йўлига чошиб кетди. Қолганлари эса ярим доира бўлиб олиб, мен томонга кела бошлашди.

Мен буталар ортига беркиниб, кенг жойдан бошқа буталар орасига сакраб ўтдим-да, яна орқамга қараб олиш учун тўхтадим. Таъқиб қилувчилар ҳам тўхтаб, қайси томонга қочганимни билолмай қолишди. Агар мен ҳаддан зиёд эҳтиёткор бўлсам, улар топа олишмайди, сўнг карьерга қайтиб, у ердан Паулани топишади, деб ўйладим-у, буталар тагидан чиқиб, очиқ ялангликка томон югуриб кетдим.

Орқамдан эшитилган қичқирикларга қараганда, улар мени пайқаб қолишди, шунинг учун тўғрига қараб ташландим. Олтин нурларини саҳро устига сочган кўёш тезгина ботди, аммо шунга қарамай, кун ҳали иссиқ, қайноқ қум устида чопиш кўрқинчли равишда оғир эди.

Мен орқага қарай-қарай, биринчи тўрт киши яна орқасига қайтиб, қувишга қўшилганини кўрдим. Таъқиб қилувчилар ярим доира бўлиб, мени тобора саҳро томонга сиқиб келардилар, шу билан катта автомобиль йўлини қирқиб қўйдилар. Иссиқ, афтидан, мендан кўра, уларга кўпроқ халақит берар, борди-ю, мен оралиқ масофани сақлашнинг уддасидан чиқа олма-

сам, қуёш уфқ ортига беркинмагунча, улардан қутулиб кетиш имкониятига эга бўламан.

Афтидан, бу фикр уларнинг ҳам хаёлига келди, шекилли, орқадан ўқ овози эшитилди, ўқ бошим тепасидан хуштак чалиб ўтди.

Мен чопаётганимда ўқ узишганидан унчалик хавотирланганим йўқ, албатта. Югураётган кишини тўппончадан нишонга олиш учун ниҳоятда уста мерган бўлиш керак. Шунга қарамай, хавфсизлигимни таъминлаш учун мен ўзимни у ёқдан-бу ёққа ташлаб чопардим.

Яна бир бор орқамга қараб, қуваётганларнинг бироз орқада қолаётганларини кўрдим.

Мени Пауланинг тақдири кўпроқ ташвишга соларди. Агар кимдир юк машиналарини қўриқлаш учун қолган бўлса, у Паулани дарров ушлаб олиши мумкин. Аммо мен бошлаган режамни давом эттиришдан бошқа ҳеч нимани қабул қила олмасдим. Орқага қайтиб, унга қандайдир ёрдам беришдан асло умид йўқ. Таъқиб қилувчилар шундай кенг давра олиб, сиқиб кела бошлашдики, менинг катта автомобиль йўлига чиқшим ҳамма томондан кесиб қўйилди. Агар қуршовга олишган бўлса, эртами кечми, барибир менгача етиб келишларини яхши билишади. Бу қуршовни ёриб чиқиш мумкин эмасмикан, деб ўйладим, аммо бу ишни қоронғи тушмасдан уддалаб бўлмасди. Мен олдинга кетавердим, аммо энди чопмас, балки эринчоқлик билан, бир-бир босиб борардим. Қувиб келаётганлар ҳам қувишни секинлаштирдилар, орамиздаги масофа ўша-ўшалигича қолди.

Ўнг томонимда, узоқда тоғ этаги кўринди. Бу мени ташвишга солди. Ҳадемай тоғлар йўлимдаги енгиб бўлмас тўсикқа айланади, сўнг таъқиб этувчиларга

чап томондан тутиб олишларига имконият яратиб беради. Агар дарҳол чора кўрмасам, қопқонга тушиб қолишим ҳеч гап эмас.

Мен занжирни узиб ўтишга қарор қилдим, буни тоғ жойига етмасдан қилиш керак. Шунинг учун олдинга отилиб, сўнг кескин равишда чап тарафга бурилиб югура бошладим.

Шу заҳоти ортимдан қичқириқлар эшитилди.

Бурилиб қараб, уч киши қум кечиб, кўндаланг келлаётганини кўрдим. Югуришни янада кучайтирдим, уларга нисбатан кўпроқ масофани босиб ўтишим керак. Мен ҳансираб қолдим, юмшоқ қумлик бутун режамни чиппакка чиқарди.

Биринчи бўлиб баланд бўйли йигит югурди. Унинг узун оёқлари қум устида бамисоли қанот каби учди ва менга тезда яқинлашди.

Энди у билан тоғ этаги ҳамда автомобиль йўли ўртасидаги оралиқда чопиб борардик. Агар мен новчадан ошиб кетсам, қуршовдан чиқа оламан. Борди-ю у менга етиб олса, саҳронинг торгина йўлагига ҳали замон қўлига тушишим аниқ.

Масофани чамалаб кўрсам, у мени қувиб етяпти. Тишларимни ғижирлатиб, тезроқ чопдим ва анча илгарилаб кетдим.

Қолган таъқибчилар – энди уларнинг барчаси югурарди – умидсиз ҳолда орқада қолиб кетишди, аммо бу йигит мени қадам-бақадам қувиб келарди. Биз аста-секин чиқиш жойига яқинлашдик. Энди мен йигитни кўрдим: юзи қип-қизил. Кепка остида тер қуюларди, лабларида заҳарханда кулги қотиб қолган.

У менга худди қутурган букадек ташланди. Мен бурилиб кетишга уриндим. Аммо у режамни пайқаб



қолди. Менга яқинлашиб, костюмидан ушлади-да, ўзига қараб силтаб тортди.

Унинг калласига боплаб тушириш учун қўлимни кўтардим, аммо рақибим мени ушлаб олди-ю, айқдай қучоғига қисди. Бир-биримиз билан қум устида ёқалашиб кетдик.

Мен унинг қулоғига бир марта зарб билан урдим, аммо зарб ярим букилган қўлим билан берилгани учун унчалик кучли чиқмади. Рақибим мендан ўзини ажратди-ю, юзимга мушт йўллади. Мен куч билан бир амаллаб бу зарбадан ўзимни четга олдим ва кўкрагига қараб урдим. Бу тўғридан берилган кучли зарба бўлиб, уни орқага тисарилишига мажбур қилди. Ҳужумга зўр бердим ва рақибимнинг иягига қарата зарба бердим. Унинг боши орқага силтанди, мен иккала қўлим билан яна бир нечта зарбалар тўлқинини ёғдирдим.

Жағига ҳам худди шундай зарба бердим. У тиззалаб қолди, ўнг томондан айланиб тушган зарба бечорани ҳолдан тойдирди ва қум устига чўзилиб қолди.

Энди ўтиш жойи очиқ, аммо мен бутунлай кучсиз бўлиб қолган, оёғимни зўрға судрардим.

– Тўхта!

Бу таҳдид тўла қичқириқ мени ортга бурилиб қарашга мажбур этди. Гирдиғумдан келган, елкалари кенг эркак менга яқин келди. Ўнг қўлида тўппонча бор эди. Қирқ бешинчи калибрли бу қурол тўғридан-тўғри пешанамга қаратилган эди.

Мен тўхтаб қолдим.

– Қўлингни кўтар!

Қўлларимни кўтардим. Ох, шунчаки тик туриш ва нафас олиш қанчалик яхши эди! Агар омадимиз келган бўлса, бу вақтда Паула телефонгача етиб борган бўлиши керак.

Мен оёғига уриб йиқитган йигит ўрнидан турди. У ёнимга келиб, кинояли кулимсиради.

– Қани, Мак, уни тинтиб кўр-чи! – деб буюрди гирдиғумдан келган яғриндор киши. Йигитча мени тинтиб кўриб, тўппончани топди-да, ўртоғига ирғитди.

– Бошқа ҳеч нарса йўқ, Жо, – деди у ва бир чеккага чекинди.

Жо менга яқин келди, кичкина кўзлари бироз талмовсираб қарарди.

– Сен кимсан ўзи? Сени илгари кўрмаганга ўхшайман, – деди у бироз ташвишланиб.

– Мени Мэллой дейишади.

– Э, бу ўша сенга айтган одам экан-да, – гапга аралашди Мак қизиқиши ошиб.

– Ҳа, тўғри. Демак, бу ўша, яъни Барретнинг ишига ҳадеб бурнини тикаверадиганми? – деб сўради Жо мени тўппонча билан туртиб.

– Майли, сиз айтгандек бўлаверсин, агар ёқса, – жавоб бердим мен. – Бу гапни мен тўғримда у айтган эмасми?

Жо жилмайди.

– Сен, йигитча, бутунлай адашиб кетдинг. Биз Барретнинг одамлари эмасмиз. Бу ерда ўзимизнинг ишимиз бор.

Зўрға нафас олиб қолганлар ҳам етиб келишди. Улар менга ғазаб билан хезланишди, аммо елкаси кенг йигит қўли билан орқага четланишни ишора қилди.

– Мак, йигитларни олгин-у, ишга кириш, мен эса бу дўстим билан уйчага кириб чиқаман. Ишни битиргандан кейин орқага қайтаверинглар.

Мак рози бўлиб, боши билан ишора қилди ва йигитларни ундаб, кон томон кетди. Мен эса Жо билан ёлғиз қолдим.

– Кулоқ сол, дўстим, – деди яғриндор тўппончасини силкитиб, гўё бу билан мени тешиб ташлагандай бўлди. – Сенга нимани буюришса, ҳаммасини бажар, ана шунда омон қоласан, сенга зарар етмайди. Ўзимнинг ҳам пешанангдан дарча очишга унчалик ҳушим йўқ. Аммо жаҳлимни чиқарсанг, бу ишни қиламан.

Мен Жони яхшилаб кўздан кечирганимдан сўнг, етарлича хотиржам бўлдим. Унинг ёши қирқларда эди. Навқирон қип-қизил юзи, кичик кўзлари ва юпқа лаблари қалин бақбақаси билан ниҳоясига етган эдики, мен буни шу вақтгача бирор кишида кўрмаган эдим. Гарчи бўйи унчалик баланд бўлмаса-да, кенг елкаси, калта бўйни ҳамда йўғон қўлларига қараб, ҳеч бир истисносиз уни горилла каби кучли дейиш мумкин эди.

– Қани, кетдик, – деди Жо менинг ўй-мулоҳазаларимни бузиб юбориб. – Олдинга қараб юравер, атрофга ҳадеб бурилаверма. Қачон тўхташни айтаман. – У қўли билан тоғ томонни кўрсатиб, қўшиб қўйди: – Қани, қадамингни бироз тезлаштир-чи. Агар орқага қарасанг, ҳатто елка оша қарасанг ҳам бошлаб дарча очаман. Тушундингми?

Мен «ҳа» деб жавоб бердим.

– Ундай бўлса, қани юр.

Мен қаерга ва нима учунлигини билмай кетавердим. Ортимдан оғир ташланган қадамларни эшитардим. Мени олиб келаётган қўриқчига бирдан ҳамла қилишим учун оралиқ узоқлик қилар, унинг ўқ узиши учун эса масофа жуда яқин эди.

Қадам ташлар эканман, ўз-ўзимга: «Бу қандай тўда, улар қаердан пайдо бўлган?» – деб савол бердим. Улар қандай ишни адо этади-ю, қачон ортига қайтади? Мифлин ҳамда унинг йигитлари қўлига барибир тушиши учун имкониятлар етарли деб ўйладим.

«Бу ўша йигитча, сенга у ҳақида аёл гапирганди», – деган, Макка айтилган сўзларни хотиримга келтирдим.

«Ким экан ўша аёл?»

Биз тоғ этагига етиб келдик, юриш оғирлашди. Йўл тоққа қараб кетарди. Жо кўпинча бақириб қолар: «Ўнгга юр!» ёки «Чапга бурил!» – дер, ораликдаги ма-софани қисқартирмай олға қадам ташлашдан бошқа иложим йўқ эди.

Бу вақтга келиб қуёш ботган, қош қорайиб бошлаганди. Ҳадемай қоронғи тушади, ана шунда қочиб қолишим учун имконият туғилади. Жудаям эҳтиёт бўлишим кераклигини билардим, албатта. Мени қўриқлаб келаётган киши қўлида тўппонча билан туғилганга ўхшайди. Шундай экан, бутунлай қоронғи тушгунча сабр қилиш керак, бир қарорга келиш учун кутишга тўғри келади.

– О’кей, дўстгинам! – деди тўсатдан Жо. – Тўхта! Кел, бироз дам олайлик. Менга бурилгин ва ўтир!

Ортимга ўгирилдим. У мендан тўрт ярд нарида турар, худди чўққадай терлаб кетган эди. Шундай ис-сиқда тоққа кўтарилиш Жо учун ниҳоятда оғир эди.

У менга қўли билан бир тошни кўрсатди, ўзи эса бошқасини танлади. Мен ерга оғир чўкдим, дам олиш имконияти берилганидан хурсанд бўлдим.

– Чекишни истайсанми? – Жо шундай деб менга «Лайк страйк» сигаретасини таклиф қилди.

У ўзига битта сигарета олиб, қутисини менга ир-ғитди.

– Хўш, у ерда, конда, аҳвол яхши бўлдимми? – деб сўради чекиб, кичкина қирғий бурнидан тутун чиқарар экан.

– Тўғриси айтсам, бу курорт эмас, – жавоб бердим мен чекиб, сигаретани қайтариб берар эканман. – У ерда одамхўр каламушлар тўлиб-тошиб ётибди...

Жонинг кўзлари олайиб кетди:

– Каламуш дейсанми? Эшитгандай бўлгандим, аммо ишонмагандим. – У сигаретага қараб қўйди. – У ерда тасодифан марихуанали сигаретани кўрганинг йўқми?

– Ҳа, икки миллионталар бор, кам эмас. Санаб кўрганим йўқ, албатта, аммо шунча бўлса керак, деб ўйлайман.

Жо майда етилиб кетган икки қатор тишларини кўрсатиб, ёйилиб кулди.

– Жин урсин! Шунчалик кўпми? Мен бу аёлга Баррет ўзининг захираларини шу ерда яширган десам, ишонмаган эди. Улар қандай жойлаб қўйилган?

– Қутиларга солинган. «Бу аёл» деганингиз ким бўлди?

У менга аччиқланиб қаради:

– Бу ерда, ошнагинам, саволни мен бераман. Туншундингми? Сенинг ишинг эса жавоб бериш.

Мен шунда ҳаммасини англадим.

– М-м... мана, сизлар нима билан шуғулланар экансиз, – деб хитоб қилдим сўнг. – Барретни талайсизлар, шундайми?

– Сен, йигитча, топдинг. Биз унинг марихуанали омборини ўмарамиз, кейин ўзимиз гиёҳванд моддаларни тайёрлаб сотиш билан шуғулланамиз. – Жо ўрнидан турди. – Қани, кетдик. Қоя бўйлаб тикка кетамиз, ҳеч қаёққа бурилмай тўғри кетавер. Қани, бос!

Биз яна тоғ томон қадам ташлаб кетдик.

Энди атроф бутунлай қорайиб қолди. Мен қаерга қадам ташлаётганимни илғамасдим. Аммо ортимдан кузатиб келаётган кишининг кўзи, афтидан, мушук-

никидан қолишмайди. У бурилишлар келганда бақириб, йўлда учраган тош ва буталардан огоҳлантирар, гўё ҳаммасини худди кундуз кундагидай кўрарди.

– Тўхта! – деб юборди бирдан у.

Мен тўхтаб, кутиб турдим. Жо қулоқни тешиб юборгудай қаттиқ хуштак чалди. Бир дақиқалар ўтгач, биздан беш одим чамаси нарида чироқ ёнди. Мен бута ва дарахтлар ортида усталик билан ниқобланган, тўсинлардан қурилган уйчани кўрдим. У тоғ қояси тепасида жойлашган эди.

– Хўш, қалай, зўрми? – деб сўради Жо мағрур ҳолда. – Ўзимиз қурдик. Уни пайқашдан олдин назар солишинг керак, аммо бу вақтда каллангга қўрғошин қадалган бўлади. Қани, кетдик. Ўша томонга тўғри қараб юравер.

Мен яна одимладим.

Эшик бутунлай очик эди. Мен кенг, оддий мебеллар қўйилган хонага кирдим. Камин олдида қўллари ни орқасига қўйиб, бўялган лабида сигарета тутатганича Мэри Жером турарди!

## 2

Хона ўртасидаги кема фонуси атрофида оқ парвона ўзининг титроқ соясини ташлаганча тинмай айланарди. Қанотларини қоқиб, у фонардан нарига учиб борди-ю, қандайдир химоясиз ҳолда хона бўйлаб учиб, Жонинг рўпарасида туриб қолди. Жо қўли билан ҳашаротни уриб полга туширди-да, оёғи билан топтаб ташлади.

Мен Мэри Жеромга кўзларимни тикиб, серрайиб қолган эдим. Бошқа одамни бўлса майли, аммо бу ерда уни учратаман, деб сира хаёлимга келтирмагандим.

Мэри Жером сариқ-қизил аралаш ковбойлар либосини кийган, тарғил рангдаги шимда, бошида қизил шойи дуррача танғиган эди. Қоп-қора сочлари дурра остига яширинган бўлиб, чиройини янада оширган. Мен биринчи бор кўрганимдан буён у анча озган, ранги оқарган, шунга қарамай ҳамон мафтункор эди.

– Салом, – дедим мен. – Гапимга ишонмаслигингиз мумкин, аммо анча вақтдан буён сиз билан учрашмоқчи бўлиб юргандим.

– Секинроқ, биродар, ўзингни тутиб тур, – ғўлдиради Жо. – Ҳеч ким сенга гапир дегани йўқ. Анови жойга ўтир, жим бўл!

У мени стул турган томонга қараб туртди. Стул печ ёнида турарди.

Мен ўтирдим.

– Уни қаердан топдиларинг? – деб сўради Мэри Жером.

Жо мағрур ҳолда истехзоли кулимсиради.

– Конда экан. Баланддаги тор йўлакдан чиқаётганида кўриб қолдик. Сахрога томон жуфтакни ростламоқчи эди, биз ушлаб олдик.

– У ёлғиз эдими?

– Албатта!

– Ундай бўлса, нега сахро томонга қочади?

Жо Мэрига саволомуз қараб қолди ва қўли билан жингалак калта сочларини силаб қўйди.

– Сиз нимани назарда тутяпсиз?

– Агар у қочмоқчи бўлса, автомобиль йўлига қочиши керак эди. Шундай эмасми? – дея сабр-тоқат билан изоҳ берди у.

Жонинг юзидаги хуррам ифода ғойиб бўлди, ғазабга тўлиб, мен томонга бурилди:

– Бу қанақаси, йигитча? Сен ёлғиз эмасмидинг?

– Бўлмасам-чи! Мен билан бирга бир қиз бор эди,  
– жавоб бердим мен. – У полицияни чақиришга кетди.

Мэри иложсиз қолган каби елкаларини қисиб қўйди.

– Мен сизлар билан ишлашдан бош тортаман, Жо,  
– деди у ўкинч билан. – Сиз нимагаки қўл урсангиз,  
ҳаммаси омадсиз бўлади.

– Жин урсин, – деб сўкинди Жо ғазабдан бўғриқиб.  
– Унинг ёлғиз эмаслигини мен қаердан биламан?

– Бўпти, энди бунинг аҳамияти йўқ, аммо шундай  
бўлган экан, сиз қандайдир чора кўришингиз керак.

– Ҳа, тўғри. – Жо менга қаради. – Уф, лаънати! Яна  
ўша конга боришимга тўғри келади. – Сиз унга қараб  
тура оласизми?

Мэри бош ирғади.

– Ташвишланманг, мен ўзим унга эҳтиёт бўламан.  
Сиз, Жо, тезроқ боринг.

– Мэри, мана сизга тўппонча. Маҳкам ушланг.

У қирқ бешинчи калибрли оғир кольт тўппончани  
қўлига олиб, силкитиб қўйди.

– Бораверинг.

Жо менга тикилиб қаради:

– Кўзингга қара, йигитча, ҳазиллашма тагин. У бу  
ўйинчоқни қандай ишлатишни яхши билади.

Жо кулбадан чиқди. Унинг тоғдан қандай тушиб  
кетаётганини эшитиб турдим. Конга етиш учун ками-  
да ярим соат вақт кетади: бу муддат давомида Миф-  
лин балки ўша ерда бўлишга улгурар.

Мэри Жером печ ёнидан узоқлашиб, менга юзма-  
юз ҳолда оромкурсига ўтирди. Тўппончани ёнига қў-  
йиб, оромкурсининг юмшоқ суянчиғига тирсагини  
суяди.



Хонадан қочиб чиқишим учун имконият туғилди, деб ўйладим мен, аммо бундан нима чиқарди, бошимдан ўқ ейишим аниқ.

– Сиз билан кўришгандан буён анча вақт ўтди, – гап бошладим мен. – Менинг шахтада бўлганимни Паулага сиз хабар бердингизми?

– Ха. Нима учунлигини сўраманг. Эҳтимол, мен ҳиссиётли бўлиб бораётгандирман.

Унинг овозида ҳорғинлик сезилди.

– Бу Жо дегани ким ўзи? Дўстингизми?

– Дўстим эмас.

Мэри бошини кўтариб, менга қаради.

– Сиз саволлар беришга шошиляпсиз, нима учун? Дарвоқе, гапингизни давом эттираверинг. Мен устмонлик қилишдан чарчадим. Энди ўйиндан чиқаман. Мен ана шу Жони ўзимга оғдириб олишни уддалайман деб ўйлагандим, аммо натижа чиқмаяпти.

– Келинг, бу ердан бирга чиқиб кетамиз.

– Йўқ, тўғри келмайди. Жо чидай олмайди, мен ўзим ҳам унга қарши боролмайман. Биз бироз кутиб турамыз. Борди-ю, у қайтиб келмаса, сиз бутунлай озодсиз, қаёққа хоҳласангиз, кетаверасиз.

– Фараз қилайлик, Жо қайтиб келди, кейин нима бўлади? – деб сўрадим мен ва билингирмай стул чеккасига сурилдим. – Менга нима бўлади?

Мэри елкаларини қисди:

– У сизга ҳеч қандай ёмонлик қилмайди. Жо бундайлардан эмас. Ўзи бу ердан бутунлай кетгунча сизни шу ерда тутиб туради. Сиз ҳеч нарсадан кўрқманг. Қани, яхшилаб ўтириб олинг ва хотиржам бўлинг. Жо қайтгунича шу ерда турасиз, тушунарлими?

– Сиз бу даврага қандай тушиб қолдингиз?

Аёл аччиқ кулди:

– Мен Лининг хотиниман. Наҳотки шуни англама-дингиз?

Мен ҳайрон қолганимдан сал бўлмаса сакраб кетай дедим ва унга тикилиб қолдим.

– Сиз Ли Дедрикнинг хотинимисиз?

– Худди шундай.

– Ахир у Серена Маршлендга уйланган-ку!

– Аввал менга уйланган эди.

Мэри сигарета чиқариб чекди ва сигаретанинг тутаб турган учига қараб ўйланиб қолди.

– Ли учун ҳаётда икки хотинлик беҳуда иш.

– Сиз Серена билан никоҳи сохта демоқчимисиз?

– Ҳа, худди шундай. Серена ўшанда унинг уйланганини билгани йўқ. Энди эса билади.

Мэри Жером яна аччиқ кулимсиради.

– Сиз унга бу ҳақда айтдингизми?

– Мен отасига айтганман.

– У шунинг учун хузурингизга, «Бич-отел»га келганмиди?

Мэри менга қошларини чимириб қаради.

– Сиз бундан хабардормисиз? Ҳа, мен ўшанда унга ҳаммасини батафсил гапириб берганман. У менга минг доллар берди ва кўздан йўқолишим кераклигини айтди.

– Энди шошмасдан бир бошдан менга ҳаммасини айтиб беринг-чи. Сиз Дедрикка қачон турмушга чиққансиз?

– Тўрт йил муқаддам, аммо аниқ санаси ёдимда йўқ, чунки эса сақлайдиган бахтли воқеа ҳам рўй бермаган. Мен Дедрик билан Парижда учрашдим-у, севиб қолдим. Шу қадар разилки, кўпгина аёллар унинг қармоғига илинганини билмай қолишади. Билмайман, Дедрик негадир менга уйланди. Унда доимо

бир уюм пул бўларди. Менга эса ҳеч қаерда ишла-  
маётгандай кўринарди. Афтидан, пул мени ҳам ўзига  
жалб этди. Мана, нимаики хоҳлаган бўлсам, барчаси-  
га эришдим, – Мэри сигарета кулини печкага ташлади  
ва бошқа сигаретага қўл узатди. – Мен унинг Парижга  
гиёҳванд моддалар етказиб берувчи контрабандачи  
эканлигини билиб қолдим. Жо у билан бирга ишлар-  
ди. Ли мени ҳам бу ишга тортди, – Мэри кулиб қўй-  
ди ва давом этди. – Дедрикнинг нақадар ўжар бўлиб  
қолишини ҳатто тасаввур ҳам қила олмайсиз. Шундан  
кейин, у Серена Маршлендни учратиб қолди. Қандай  
ишга қўл урганидан, мен ҳатто шубҳаланмадим. У ил-  
гари ҳам ҳеч огоҳлантирмасдан ғойиб бўларди, бу са-  
фар ҳам барча ишларни бизнинг жавобгарлигимизга  
ташлаб, яна бутунлай йўқолди. Жо давом эттиришга  
ҳаракат қилди, аммо ишга қайси томонлама кири-  
шиш кераклигини билмади. Полиция бизни қўлга ту-  
ширишига сал қолди. Франциядан қочишга муваффақ  
бўлдик ва бу ерга келиб қолдик. Ана шунда мен унинг  
Серена Маршлендга уйланганини билиб қолдим. Бар-  
ретнинг олдига бордим. Сиз уни танийсизми?

Мен танийман деб жавоб бердим.

– У кутиш кераклигини айтди, – давом эттирди га-  
пини Мэри юзида ғамгин ифодани намоён қилиб, –  
мени чув туширишга муваффақ бўлди. У Ли пулини  
олиш учун Серена Маршлендга уйлангани, агар бун-  
га эришса, дарҳол ҳузуримга қайтиб келишини айт-  
ди. Баррет мendan уларга халақит бермаслик, Лидан  
узоқроқ юриш, унинг қўл-оёғини боғлаб қўймасликни  
сўради. Мен аҳмоқ бу гапларнинг ҳаммасига ишониб  
ўтирибман. «Чендос-отель» меҳмонхонасидан жой  
олиб, Барретнинг олдидан қайтаётганимда, отишма-  
га дуч келдим. Бу Барретнинг қўли билан бажарилга-

нини дарров фаҳмладим. У мендан қутулишга қарор қилган. Шунда дарҳол «Бич-отель» меҳмонхонасига кўчиб ўтдим. – Мэри менга қараб қўйди ва сўради: – Хўш, ҳикоям сизга ёқдими?

– Оз ёки кўп даражада, – жавоб бердим мен. – Тўғри, бу мен сиздан эшитмоқчи бўлган гапга унчалик ўхшамайди, аммо аҳамияти йўқ, давом этинг.

– Сиз нимани кутган эдингиз?

– Аввал сиз гапингизни тугатинг. Шундан кейин айтаман.

У елкаларини қисди.

– Озгина қолди. Агар Ли билан учрашувим амалга ошса, уни ҳузуримга қайтишга кўндирмоқчи эдим. Аммо Ли «Оушен-энд» данғиллама ҳовлига кетганини билиб қолдим. Ўша ерда учратаман, деб бордим, аммо сизга дуч келдим ва унинг ўғирланганини билдим. Аммо Лини аслида ўғирламаган эдилар, шундай эмасми?

– Ҳа, шундай! Бироқ улар Баррет билан ўғирланиш вариантини ўйлаб топиб, Серенадан беш юз минг долларни ўмаришди. Бу кам пул эмас. Мен яқинда Дедрикни Баррет билан бирга кўрдим.

– Мен бу гаров тўғрисида газеталардан ўқиб қолганман. энди у қаерга боришни ўйлаган бўлса, кетавериши мумкин. Майли, бу ҳақда нима ҳам дердингиз! Мен Баррет марихуанали сигаретлар захирасини ана шу конда сақлашини билиб қолдим. Биз Жо билан бирлашдик. Мен Барретдан қасос олиш учун унинг омборини ёқиб юбормоқчи эдим. У ерда уч юз минг доллардан зиёд турадиган марихуана бор. Аммо Жо бошқа йўлни: бу гиёҳванд моддаларнинг барчасини ўмариб, сотиб юбориш кераклигини таклиф этди. Гиёҳванд моддалар контрабандаси билан шуғулла-

ниш эса мен учун ниҳоятда ифлос иш. Жо ҳам бундай ишга мутлақо ярамайди. Унинг калласи бу ишлар билан шуғулланишга мослашмаган. Мен четга чиқаман. Шунда Жо мен учун қандайдир режа туза бошлади, – Мэри жилмайди. – Аёл билан эркак бир том остида узоқ қолмаслиги керак, эртами кечми, у ўзининг меҳр-муҳаббатини изҳор қилиб, шилқимлик қилиши турган гап.

– Йўғ-е, айрим пайтда мумкин, – деб эътироз билдирдим мен айёрона кулиб.

Бирдан отишма товуши иккимизни ҳам сакраб ўрнимиздан туриб кетишга мажбур этди.

– Нима гап? – сўради Мэри дераза олдида чопиб бориб.

– Эҳтимол, полиция Жонинг ортидан қуваётгандир, – дедим мен умидвор бўлиб. – Эҳтиёткорлик юзасидан чироқни ўчираман.

Мен фонус пилигини пасайтирар эканман, яна отишма товуши эшитилди, буниси энди яқин эди. Фонусни илгақдан олиб, милтиллаб турган оловни ўчирдим.

– Бу Жо ва Мак, – деди Мэри ва зарб билан эшикни очди.

Отишмалар шуъласи тунги зулматни ёритиб юборди. Пастда бунга жавобан учқунлар сачрар, ўқлар кулбанинг ёғоч тўсинига тегиб, пайрахаларни қўпарарди.

Оғир нафас олиб ҳансираган Жо билан Мак хонага ёпирилиб киришди ва эшикни маҳкам беркитиб олишди.

Шу дақиқадан эътиборан бир оғиз ҳам гапиришмади. Улар деворга суюниб зўрға нафас олишар, ўқлар кулбанинг қалин деворларига келиб урилар, пастда водий бўйлаб эса отишма овозлари янграр эди.

– Милтиқларни чиқаринглар, – деб буюрди Жо. – Бу Баррет!

Мэри хона бўйлаб ўтиб, кичкина қазноқни очди ва иккита милтиқ билан қайтиб келиб, уларни одамларига тутқазди.

– Сизга ҳам берайликми? – деди у хотиржам, гап худди бир пиёла чой устида бораётгандек.

– Албатта! Агар бу Баррет бўлса, мен сизлар билан биргаман, – деб жавоб бердим.

У қазноқдан яна бир жуфт милтиқ, халтада ўқлар олиб чиқди.

– Нима гап, Жо? – деб сўради Мэри биз милтиқларни ўқлаётганимизда.

– Жин урсин, йигитларимиз бирдан уларнинг устидан чиқиб қолишган. Улар Баррет бошчилигида ўн киши бўлишган. У юкнинг бир қисмини олиб кетиш учун келган бўлса керак, деб ўйлайман. Афтидан, улар юк машиналаримизни кўриб қолиб, бизга ҳужум қилишган.

– Нималар деб вайсаяпсан? – портлаб кетди Мак. – Ахир сен у ерда йўқ эдинг-ку! – У девор ёнида тиззалаб турар ва Мэрига қараш учун ўгирилган эди.

– Улар коннинг тепасида, биз эса пастда эдик. Бу худди қуёнларни ўққа тутишга ўхшарди. Биринчи отишмадаёқ Гарри, Лу, Жоржни отиб ўлдиришди. Қолганлар эса юк машинасининг орқасига беркинишди. Баъзилар коннинг четига чекиниб бориб, мен ёлғиз

қолгунимча отишди. Ниҳоят бизни тамом бўлган деб ўйлашди-ю, нима бўлганини кўриш учун пастга тушишди. Гарри ва Жорж оғир ярадор бўлса-да, аммо хали нафас олишарди. Баррет иккаласини ҳам тинчитди. Мен уларнинг бошқалар билан банд бўлиб турганидан фойдаланиб астагина бир четга қараб ўрмаладим. Кондан деярли чиқиб кетгандим, аммо бирдан Жо пайдо бўлди. Бу ярамас чекиб келарди, шунинг учун уни бир миля наридан бемалол пайқаш мумкин эди. Табиийки, улар бизнинг ортимиздан қувиб кетишди. Мен Жодан отмасликни илтимос қилдим, аммо у худди оёғи куйган товукдай зир югуриб, ўзининг замбарагидан ўқ ёғдира бошлади, шунда улар бизнинг қаерга қочаётганимизни пайқаб-қолишди ва қувишни давом эттиришди. Мен қоронғилиқда ўрмалаб қутулишдан умид қилгандим, аммо Жо отишмалари билан бир миля наридаги чор-атрофни ёритиб юборганидан сўнг бу ишни қилиб бўлармиди? Мана биз шу ердамиз, улар изимиздан келишмоқда, энди томоша бўлади.

Жо жавоб бериш ўрнига ўшқирди:

– Мен ҳар ҳолда улардан иккитасини отдим. Мени отишлари қонуний эмаслигини бу хунасалар билармикан? Сен шу ҳақда ўйлаб кўрдингми?

Улар бир-бирлари билан сўкишар экан, мен уй олдидаги водийни кўздан кечирдим. У ерда яширинадиган жой йўқ. Ҳамла қилаётган кишилар биз томонга кириб келиши керак эди. Агар душман қоямизни қўлга киритса, бу тарафга мутлақо сездирмай ўтиб олиши мумкин.

Мен милтиқни дераза тоқчасига қўйдим ва қоронғилиқни нишонга олиб, тепкини босдим. Худди шу лаҳзада водийнинг қарама-қарши томонидан чакнаш рўй берди-да, ўқ кулба деворига урилиб, овоз чиқарди.

– Улар ўша ерда, нариги томонда, – дедим мен. – Агар водийдан югуриб ўтиб кетишса, биз ҳалок бўламиз.

– Ҳечқиси йўқ, бир неча дақиқадан кейин ой чиқади, – деди Мак. – Биз бу ерга қочиб келаётганимизда, у нақ тоғнинг тепасида турганди. Ҳадемай бизга ҳамма жой аниқ кўриниб қолади.

Менга водий тубида нимадир қимирлаётган, ҳаракат қилаётганга ўхшади. Мўлжални алмаштириб, нишонга олдим, ўқ уздим. Қандайдир ноаниқ кўланка ўзини пана жойга олди, аммо Жо ва Мак сергак тортиб, улар ҳам отишди, бизгача ожиз қичқириқ етиб келди. Бу иккиси, гарчи катта ақл-фаросат билан ажралиб туришмаса-да, аммо отишни эпларди.

– Мана, яна биттаси тайёр, – деди Жо, унинг овозида қониқиш оҳанглари сезиларди.

Мен Мэрининг елкасига қўлимни қўйиб, уни ўзимга тортдим.

– Уйда бошқа чиқиш жойи борми? – деб сўрадим шивирлаб эшикни кўрсатар эканман.

У рад этгандай бош чайқади.

– Томга-чи?

– У томонга туйнук орқали зина бор, аммо тушиш учун томда ҳеч нима йўқ.

– Аниқми?

– Фақат арқон билан тушиш мумкин, аммо бу жуда қийин.

– Қараб кўриш керак, – дедим мен. – Арқон қаерда?

– Анови ерда, ошхонада.

Жо яна отишни бошлаб юборди.

– Эҳтиёт бўл! – қичқирди у. – Улар келишяпти.

Мен ҳаракатдаги олти ёки етти шарпани кўрдим, улар пастда водий оралаб чопишарди. Биз яна ўқ



узишга киришдик. Яна икки одам йиқилди. Қолганлари эса қарама-қарши томондаги тепа ортига чекинишди.

– Арқонни келтириб, туйнукни очинг, – дедим Мэрига. – Балки қочиб қолишимизга тўғри келар.

– Нима деб шивирлашяпсизлар? – сўради шубҳаланиб Жо.

– Чекинишга тайёргарлик кўряпмиз, – дедим мен. – Том орқали.

– Бефойда, – тўнғиллади у. – Ой чиққанида, улар бизни худди какликдай отиб ташлашади.

– Барибир уриниб кўриш керак, – эътироз билдирдим мен, ёрқин ойнинг дастлабки нурлари тепаликларнинг устки қисмини ёрита бошлаганини кўриб. – Мана, ой аллақачон кўтариляпти.

– Ҳа, ҳар ҳолда, уларга ҳам осон эмас, – деди Мак дераза олдида чўккалаб ўтирганча. – Энди биз нишонга тегиза олмаймиз.

– Улар нималарнидир амалга оширмоқчи, шекилли. Сенга шундай туюлмаяптими? – ташвишланиб сўради Жо. – Беш дақиқадан буён битта ҳам ўқ узишмади.

– Нега ўқ узишар экан? – дедим мен. – Улар яхшироқ кўриниши учун ой чиқишини кутишяпти. Шундан кейин бошлашади. Ой ёруғида бизни деворнинг орасидан ҳам кўра олишади.

– Мана арқон, – Мэри қўшни хонадан туриб қичқирди.

– Хўп, мен том устига чиқаман, – дедим мен. – Қарай-чи, у ерда нима бор.

– Сен яхшиси, ўзингга қарасанг яхши бўларди, – деди захархандалик билан Жо. – Дафн маросимингда гуллар бўлмайди, шуни ҳисобга олиб қўй.

Мен орқа томондаги хонага ўтдим.

Мэрининг қўлида чўнтак фонари бўлиб, у туйнукка элтувчи қисқагина зинапояни ёритиб турарди.

– Сиз бу ёққа чиқмасангиз яхши бўларди, – деди Мэри. – Улар, эҳтимол, пайқаб қолишади.

– Эй, сизлар, ўт очиб, мени пана қилиб туринглар, – деб қичқирдим Мак ва Жога. – Мен том устига чиқаман!

– Умид қиламанки, том ағдарилиб кетмайди, – деди Мак кулиб.

Улар водийга қараб ўт очишди. Мен кутиб қулоқ солдим, аммо ҳеч қандай жавоб отишмаси бўлмади.

– Улар нимани ўйлаётганини билсам эди, – тўнгилладим мен. – Майли, юқорига чиқайлик-чи, у ерда нима гап бор экан.

Зинапоядан кўтарилиб, туйнук қопқоғини аста очдим. Ясси том худди кундуз куни каби ёп-ёруғ эди. Ой нури тўппа-тўғри уйга тушиб турарди.

Бошим узра тоғ қояси буралиб юқорига кўтарилган, ундан бирор жойга яшириниш ҳам, пана бўлиш ҳам асло мумкин эмас. Ойнинг бундай ёғдусида томдан тоққа кўтарилиш ўзини ўлимга маҳкум этиш билан баробар. Фақат битта имконият қолган – ой тоғ ортига ўтиб яширинса, биз турган қоя яна қўланкада қолади. Аммо кутиш учун вақтимиз бўладими, йўқми, шуни билмасдим.

Мен яна зинадан пастга сирғалиб тушдим.

– Хуш ёқадиган гап кам, – деб хабар қилдим қолганларга. – Арқон ҳам ёрдам бермайди. У ер ҳаддан зиёд ёруғ. Бирор соатдан кейин нимадир қилиш мумкиндир, аммо ҳозир эмас.

– Бир соатдан кейин бизни тобут ташийдиган машинада олиб кетишади, – деб шодон гап отди Жо бошқа хонадан.

– Қаҳва тўғрисида нима дейсиз? – сўрадим мен Мэридан. – Бизга бу ерда ҳали узоқ серрайиб туришимизга тўғри келади. Мен нариги хонага бориб, душманни кузатиб тураман, сиз эса бизга қаҳва қайнатинг.

Мак ва Жонинг ёнига қайтдим. Биринчиси ёндирилмаган сигаретани чайнар, пастга қараб водийни кузатар, иккинчиси эса оромкурси чеккасига ўтирган кўйи очик қолган деразадан ташқарига назар ташлар эди.

– Сизга мабодо шахтада бир қиз дуч келмаганмиди? – деб сўрадим Макдан.

– Йўқ, нима эди?

– Сизлар мени кўриб қолганларингда, бир қиз ёнимда эди. Уни полицияга жўнатгандим.

– Барибир бизга ёрдам бера олмайди. Бу водийдан ҳеч қандай ўқ товуши эшитилмайди. Нега бундайлигини билмайман, аммо аниқ. Агар полиция бизни ахтариш учун бу ерга тумшуғини тикса, ўртамиздаги тўқнашувдан беҳабар қолади, – деди Жо. – Боз устига агар полиция мени қутқарадиган бўлса, бу ғуруримни поймол қилади.

– Йўғ-е, мен эса ўзимнинг ғуруримни қандай бўлмасин эсдан чиқаришнинг урдасидан чиқаман, – деди Мак ва истехзоли илжайди. – Яхшиси, мени полиция тутиб олсин, Барретнинг қўлига тушгандан кўра шуниси афзал.

– Хўш, йигитлар, сизнингча, чекиш мумкинми? – деб сўради Жо.

– Агар шунчалик чеккингиз келган бўлса, бориб полга ўтириб олинг. Мен эса ўрнингизни эгаллаб тураман, – дедим унга.

– Ёмон йигит эмассан. Сени отиб қўймаганимга хурсандман.

– Мен ҳам.

У полга жойлашиб олиб, сигарета чекди.

– Бу чўчқалар негадир жонбозлик кўрсатишмаяпти, – ўсмоқчилади Мак. – Балки кетиб қолишгандир?

– Чиқиб қарагин бўлмаса, – деди Жо. – Гаров ўйнаб айтаманки, улар ниманидир мўлжаллашяпти.

Менга ҳам шундай туюлди. Водий туби ой ёруғи билан ойдинлашган бўлса, душман бизга ҳамла қила олмаслиги, қоронғи тушиши билан шубҳасиз, хужум бошлаб юборишини англадим.

Мэри хонага қайноқ қаҳвали финжонларни олиб кирди. Жо ўзининг сайёҳлик сувдонини олди-ю, финжонига бироз ром қўшди.

– Яна ким спиртли ичимлик истайди? – деди у сувдонини силкитиб.

Мак ҳам ўзига қуйиб, сувдонни менга узатганди, рад этдим.

– Мен фақат қаҳва ичаман.

– Хўш, бу ердан қутулиб чиқишимизнинг имкониятлари борми? – деб сўради Жо қаҳвани хўплар экан.

– Нега бўлмас экан?

– Тилингни тий, Жо, – деди қисқа қилиб Мак. – Сафсаталаринг билан фақат асабга тегасан, холос. Агар сени ўлдириб қўйишса, бирор киши ҳам йиғламайди.

– Нега бирор киши ҳам? – қизишди Жо. – Онамчи? – У иккинчи финжон қаҳвани олиш учун ўрnidан турди. – Қизлар-чи, улар бир тўда – барчаси мен учун йиғлаб дод солади.

Худди шу онда бирдан пулемёт овози тариллади. Узоқдан буталар ортидан йирик калибрли пулемёт ёлқини чақнаб, изидан ўлим овозлари янгради: та-та-та-та!

– Ёт! – деб қичқирдим мен ва ўзимни полга ташладим.

Жо эшикка томон иккита заиф қадам ташлади-ю, оҳиста ўгирилиб, товушсиз ағанаб тушди.

Биз қимирламасдан ётдик. Пулемёт тўхтовсиз тариллаб отиларди. Ўқлар чийиллаб, деразага учар, эшик кесақисини қўпарар, қарама-қарши томондаги хона деворига тақиллаб тегарди. Кейин эса пулемёт қандай ўқ ота бошлаган бўлса, худди шундай жимиб қолди.

– Водийни кузатиб тур, – дедим Макка ва ўзим Жо томонга ўрмаладим.

Пулемёт ўқлари унинг кўкрагини илма-тешик қилиб юборган эди. Пичоқ консерва банкасини қандай кесса, ўқлар Жони худди шундай аҳволга солганди.

– Ўлдиришибдими? – сўради овози титраб Мэри. Унинг бўлиб ўтган воқеалардан қанчалик таъсирланганини фаҳмладим.

– Ҳа.

– Нима ҳам дердик, умид қиламанки, агар бу ердан қутулиб чиқиш насиб этса, унинг онасига албатта гапириб бераман, – деди Мак. – Гаров ўйнаб айтаманки, хурсанд бўлганидан ҳамма байроқларни илиб чиқарди. У бу чўчқани сира яхши кўрмаган.

– Деразадан бошингизни чиқарманг, – огоҳлантирдим мен Мэрини ва олдига эмаклаб бордим.

У дераза ёнида тиззалаб турарди.

– Ана, – деди Мак, – бу итваччалар ниманидир ўйлаяпти, дегандим-а!

Шу дақиқада пулемёт яна бир сайради-ю, ўқлар бутун хона бўйлаб чақнаб кетди.

– Диққат, улар келишяпти! – қичқириб юборди Мак.

Ой ёруғида қора шарпалар биз томонга югуриб, ўзларини гоҳ у, гоҳ бу ёққа ураётгани, бу билан нишонимиз дуч келмасликка ҳаракат қилишаётганини кўрдим. Мак бировини йиқитди, қолган бештаси биз томондаги буталар ортига водийни кесиб ўтиб, яшириниб олишди.

– Иш чаток, – дедим мен, дайди ўқ дераза рахига тегиб кўпариб юборганида, энгашиб қолар эканман. – Энди улар эшигимиз олдига бемалол келганини сезмай қоламиз ҳам.

– Аммо бу ёққа жангсиз кира олишмайди-ку, – деди Мак. – Қани ром? Менинг ичгим келяпти.

У Жонинг ёнига эмаклаб бориб, чалқанчасига ағдарди ва чўнтагидан сувдонни олди.

Ўқ овози ўчганида, мен милтиқдан уч марта пулемёт ўти кўринган бутага қарата отдим.

У ерда нимадир ғимирлади – қандайдир одам пулемёт олдидан сакраб турди-да, юзи билан ерга келиб урилди.

– Яхши ўқ уздинг, – деди Мак, у аллақачон дераза олдига қайтишга улгурган эди. – Энди бу шоқоллар пулемётни қўлга олиш учун яширинган жойларидан чиқишади.

– Улар шу ерда, уй ёнида, – шивирладим Мэрига. – Орқадаги хонага боринг.

– Нега? – деди у менга синчков қараб.

– Боринг ва саволлар берманг! – дедим иложи борича қатъий гапиришга уриниб.

У итоаткорлик билан бўйсунди.

– Сизга автомат бериш керакми? – деб сўрадим Макдан.

Мак имо қилди.

– У Жода.

Мен эмаклаб бориб, ўлдирилган Жонинг ўттиз саккизинчи калибрли автомат тўппончасини олдим-у, ортимга қайтдим.

– Ушланг. Энди гапимни диққат билан эшитинг. Мен том устига чиқаман. Ўқ отишни бошлаганим ҳамон эшикни дарҳол очинг. Агар омадингиз чопса, сизни тезда пайқашмайди, кейин эса кеч бўлади. Дарров отишни бошланг-у, уларни гумдон қилинг. Эсингизда бўлсин, у ерда беш киши.

– Улар сизни томда кўрганлари заҳоти отиб ўлдиришади.

– Начора, таваккал қилишга тўғри келади.

Шу пайт қоронғилик ичидан товуш эшитилди:

– Эй, сизлар, таслим бўлинглар, акс ҳолда ҳаммангизни отиб ташлаймиз.

Орқа хонада кутиб турган Мэрининг ёнига ўрмалаб бордим.

– Мен юқорига чиқаман, – дедим унга. – Улар шундоққина эшик ортида туришибди, аммо биз кутилмаган совға тақдим этамиз. Сиз шу ерда қолинг ва эътибор бериб турунг. Акс ҳолда кулфатда қоламиз.

Мен туйнукни эҳтиёткорона очдим ва сабр-тоқат билан қулоқ солиб турдим. Кейин оҳиста кўтарилдим. Бошим ва елкамни чиқардим. Ён-атроф жимжит. Водийнинг нариги тарафидан Барретнинг бирорта одами бизни кузатиб турибдими, йўқми, билмоқчи эдим. Мен кузатишмаётганидан умид қилардим.

Худди сувилондек ястаниб, овоз чиқармасликка ҳаракат қилиб, том устига ўрмаладим. Ҳар дақиқада водийнинг қарама-қарши томонидан ўқ узишларини кутардим.

Бу йўл менга қанчалик узоқ туюлганини билсангиз эди! Том четига яқинлашган заҳоти янада секинроқ ҳаракат қила бошладим.

Ўқ узишлар мени сергакликка мажбур қилди. Аммо улар эшикка отишарди. Шовкин-сурондан фойдаланиб, дарҳол олдинга қараб сапчидим ва том четига бориб қолдим.

Тепадан туриб, қояга ёпишиб ўсган бута ва дарахтларни кўздан кечирдим. Дастлабки дақиқаларда ҳеч кимни пайқамадим, аммо уйдан йигирма ярд нарида тош ортида беркиниб олган бир йигитни аниқ сезиб қолдим. Худди ўликдек чўзилиб ётиб, қолганларини ҳам аниқладим. Улар ярим доира шаклида ёйилган, уйни нишонга олишганди. Дарахтлар танаси ёки тошлар ортига беркиниб олишган, бирортаси бошини чиқариб қарамас ва беҳуда таваккал ҳаракат қилмасди. Улардан иккитасини гумдон қилишим мумкин, аммо қолганлари Мак ўқ узгунича мени отиб ўлдиришлари тайин. Макка бу пойлоқчиларнинг қаердалигини айтиб берсам, ишончли ва ақли иш бўларди, ана шунда уларга ҳамла қилиш мумкин.

Орқага тисарилиб эмаклаётганимда, қамалга олганлардан бири тасодифан мени кўриб қолиб қичқирди-ю, ўқ узди. Ўқ визиллаб ёнимдан ўтиб кетди. Мен бир ўқ билан уни гумдон қилдим-у, ортга бурилдим, бошқасига ўқ узар эканман, газанда илон каби ўрнидан сакраб туриб, сўнг йиқилганига кўзим тушди.

Ўрмалаб орқага қайтаётганимда пастдан ўқ овозлари янграб, сув тарновидаги пайрахаларни учириб юборди.

Мен ярим энгашганча ўқдай учиб туйнукка кирдим, шу заҳоти водийнинг қарама-қарши томонидан ўқ товушлари эшитилди. Бу овоз ҳамма томонни тўтиб кетди, мен эса бамисоли соққадай пилдираб зинапоядан пастга тушдим.

– Сиз жароҳатланмадингизми? – деб сўради Мэри.



– Йўқ!

Бир сония ҳам тўхтамай, олдинги хонага қараб югурдим. Эшик ёнида турган Мак қоронғиликка қарата тўхтовсиз ўқ узарди.

Мен яқинлашганимда, ўқ узишни тўхтатиб, эшик ортига чекинди.

– Ура, уларни боладик! – завқ-шавқ билан хитоб қилди у. – Бешаласини ҳам гумдон қилдим. Бошқалари ёрдамга келмай туриб, бу ердан чиқиб кета ола-мизми?

Мэри келиб, бизга қўшилди.

– Кетдик, – дедим мен. – Тезроқ. Бу тирик қолишимизнинг биринчи шарти. Мак, сиз биринчи бўлиб борасиз, Мэри иккинчи, мен эса охирида бораман. Чаққонроқ. Тўғри буталар устига сакраймиз. Ҳамма тайёрми?

Мэри бош ирғади.

– Олға!

Остонадан сакраган Мак пастдаги қалин бутазор устига тушди.

#### 4

Биз кулбадан анчагина узоқда бўлган бутазорда қоронғиликка кўмилиб ётар ва водийни кўздан кечирар эдик. Қарама-қарши томондан бирор ҳаракат, бирор ўқ узиш, бирор товуш эшитилмасди.

Мак терлаган юзини қўли билан артди ва жунжикди: тоғ томондан совуқ шамол эсаётганди.

– Улар негадир жимжит бўлиб қолишди-я? – деди у ярим паст овозда.

– Ҳа.

Мен ундан ярми бўшаб қолган сувдонни олиб, Мэрига узатдим.

У рад қилди:

– Йўқ, мен совқотганим йўқ.

Оғзимга сувдонни қўйиб, ўткир ромдан бир неча хўплам сипқордим. Мен ичкиликка мойил эмасман, ромни ҳам фақат шамолламаслик мақсадида истеъ-мол қилдим.

– Энди кетсак бўлар, деб ўйлайман, – дедим кейин.  
– Агар улар келмайдиган бўлса, бу ерда тенти раб ўтиришдан нима наф?

– Сизнингча, улар орқага, конга қайтишмадими? – сўради Мэри.

– Эҳтимол. Бориб қарайлик. Баррет, афтидан, одамлар билан таваккал қилишдан кўра, ортга қайтиб, марихуанани ортиш керак, деган қарорга келганга ўхшайди. Мабодо ортиб кетадиган бўлса, полиция уларнинг устига ташланади.

– Агар у сизнинг қизингизни ушлаб олмаган бўлса, – деди Мак ўрнидан туриб.

– Кетдик!

Мен олдинга биринчи бўлиб тез-тез қадам ташлаб кетдим. Ўзимни пана жойларга олдим, бекордан-бекорга таваккал иш қилмоқчи эмасдим. Йўлимиз қоядан пастга қараб кетарди. Кўп ўтмай, буталар сийраклашди ва тоғ қояларидан водийга тушар эканмиз, йўл қиялай борди. Яна олтмиш ярд чамаси йўл босишимиз керак.

Очиқ майдон бошланадиган нуқтага етиб келдик.

Тўхтаб, атрофни кўздан кечирдик. Ой нури қумликни ёритиб турар, ярим миля радиусдаги ер сатҳида ҳеч қандай ҳаракат сезилмасди.

– Агар улар ҳали ҳам тепалик устида дайдиб юришган бўлса, у ҳолда елкамиздан ўқ ейишимиз аниқ, – деб тўнғиллади Мак. – Хўш, таваккал иш тутамизми?

– Шундай қилишга тўғри келади. Сиз ҳозирча шу ерда тулинг, мен эса олдинга қараб кетаман. Агар менга бирор зарар етказишмаса, ортимдан келаверинг. Эътирозлар борми?

– Сиз қандайдир дангал йигит экансиз, – деб ғўлдиради Мак елкамга мулойим уриб қўяр экан.

Мэри бир текис товушда деди:

– Менимча, улар ўша ерда қолишмаган. Конга қайтган бўлишса керак.

Мен уни ҳақ деб ҳисоблаб, пастга қум тепалик сари ўрмалаб кетдим. Сўнг бошимни елкамга тортиб очик майдонга қараб югурдим. Юз ярдча масофани босиб ўтиб, тўхтаб ортимга қарадим. Мак ва Мэри изимдан чопиб келишарди. Менга тенглашгунларича сабр қилиб турдим, сўнг шундай дедим:

– Улар конда. Ҳар томонга тарқаламиз ва узоқроққа югурамиз. Бирор гап бўлса, дарҳол ётинглар.

Биз кон томондаги юмшоқ қумлик томон зўр бериб чопиб кетдик. Баъзан нафасни ростлаб олиш учун тўхтар эдик. Аммо сабрсизлик билан олға интилавердик, чунки мен Пауланнинг тақдиридан ниҳоятда ташвишланардим. У полициягача етиб бордимикан, деб ўйлар, кондаги жимжитлик қўрқитмоқда эди. Борди-ю, Мифлин ўша ерга отряди билан борган бўлса, конда икки томонлама отишма бошланиши керак эди.

Бироз вақт ўтгач, пастда конга кириш жойи кўринди ва мен шерикларимга тўхташ ва олдимга келишни ишора қилдим.

– Бундан буён эмаклаб юришимизга тўғри келади, – дедим мен. – Баррет соқчи қўйган бўлиши мумкин.

Қандай бўлмасин, биз унга тўқнаш келмаслигимиз керак. Сиз, Мэри, бироз орқада юринг, – деб буюрдим. – Бу ишни эркакларга қўйиб беринг.

Биз яна тарқалдик, энди шовкин кўтармай, аста-секин эҳтиёткорлик билан ҳар бир чуқурча, ҳар бир бутани пана жой ҳисоблаб, улардан фойдаланган ҳолда олдинга қараб ҳаракатлана бошладик.

Мак бирдан қотиб қолди ва қўли билан олдинни кўрсатди. Ўша томонга қараб, уфқ чизиғи бўйлаб турган одамнинг бошини кўриб қолдим. У худди менга ўхшаб, тиззалаб бутадан биз томонга қараб турарди.

Мак сас чиқармай мен томонга ўрмалаб келди-ю, қулоғимга шивирлади:

– Мен уни қўлга оламан. Бир пайтлар десантлар армиясида хизмат қилганман, бу менинг ишимга тегишли.

Бош ирғадим ва Мак қорни билан соқчи томон эмаклаб кетганини кузатиб турдим.

Мэри ҳам олдимгача эмаклаб келди-да, ёнимга чўзилди, у ҳам уфқнинг ёруғида одам турганини пайқаб қолган эди.

Биз худди қуршовда қолгандек кутиб ётардик. Бироқ айтарли ҳеч нима рўй бермади, Мак бизни алдади, деб ўйлай бошладим.

Бирдан соқчи ўрнидан туриб, биз томонга қаради, ой нурунинг қум узра тушган нурида ажойиб нишонга айланди. Сўнгра қандайдир бўғиқ овоз чиқарди-ю, юзи билан қум устига гуп этиб тушди.

Мак бизга қўлини силкитди ва ўша заҳоти қум ортида яширинди. Мен унга томон ўрмалаб, Мэрига орқамдан келишни ишора қилдим.

– У ҳеч нарсани фаҳмлашга ҳам улгура олмади, – деб шивирлади Мак мен яқинлашганимда. – Бу менга жуда ёқяпти.

Биз кон чеккасига ўрмалаб бориб, ичкарига қарадик.

Иккита юк машинасининг чироғи тўла куч билан ишлаб, очиқ ёруғда бизга шиддат билан фаолият кўрсатаётганларнинг аниқ манзарасини намоён этиб турарди. Бир тўда одамлар кузовга чўп қутиларни ортишар, бошқалари эса машаққат билан туннелга элтувчи қинғир-қийшиқ сўқмоқдан пастга қараб, тушар ва янги яшикларни ўзи билан бирга олиб чиқишарди.

Ерости йўлига кираверишда Барретнинг ўзи турарди. У қўлларини силкитиб зўр бериб сўкинар ва одамларини шоширгани-шоширган эди.

Мак беихтиёр Барретни нишонга олди, аммо мен уни тутиб қолдим.

– Тўхтанг! У ерда шеригим бўлиши керак. Шеригим бу ердан чиқишга улгурмаган, телефонга етиб бора олмаган. Пастга тушиб, уни излаб кўраман. Агар улар мени пайқаб қолишса, ана шунда отинглар, биринчи бўлиб Барретни нишонга олинг.

Мак бош ирғади ва мен аста-секин конга туша бошладим.

Кутилмаганда оёғим остидаги тош сирғалиб кетди. Ўзимни шартта буталар панасига олдим, ўша ерда дамим ичимга тушиб ўтирдим. Аммо пастда ишлаётган одамлар шунчалик банд эдиларки, бирор нарсага эътибор беришмасди.

Мен паналаб юриб, коннинг охиригача бордим, машина олдигача эмакладим. Барретнинг овози яққол эшитилар, у терлаб кетган одамларни шошириб, уларга қичқирарди. Мен шовқинсиз одимлар, юк ортилган машинагача ўрмалашда давом этардим. Ишлаётган одамларга пана бўлган томонга бир амаллаб ўтиб, астагина кўтарилдим ва кабина ичига қарадим.

Бахтимга Паула ўша ерда экан. Қўл-оёқлари арқон билан боғлаб ташланган, бақирмаслиги учун оғзига латта тиқиб қўйилган. У товушимга бурилиб қаради ва нигоҳларимиз учрашди. Мен эшикни очиб, кабина ичига кирдим.

Қўрқиб кетган Паула оғзидаги латтани олганимда кулимсиради.

– Ох, сизни кўрганимдан қанчалик бахтиёрман, – деди у.

– Мен ҳам, – жавоб бердим Пауланинг қўллари боғланган арқонни кесиб. – Нима бўлди? Сиз қўққисдан уларга дуч келиб қолдингизми?

Паула бош ирғади. Мен оёғини арқондан бўшатар эканман, у увишиб қолган қўлларини уқалай бошладди.

– Баррет сизни ҳамон коннинг ичида бўлиши керак, деб ўйлаяпти. Менинг у ерда бўлганимни ҳатто билмайди ҳам. У мени сиз томонга борадиган йўлни излаган, деган хаёлда. Юклаб бўлгандан кейин мени шахтага ташлашини айтиб таҳдид қилди.

– Майли, ўзича ўйлайверсин. Кетдик. Тезроқ юқорига чиқиш керак. У ерда бизни дўстларимиз кутмоқда.

Биз юк машинасининг қоронғи томонини кўзлаб, секин ва овоз чиқармасдан орқа томонга ўтдик. Йўлнинг ярмини босиб ўтганимизда, кон тепалигидан ошганимиз заҳоти тўсатдан ортимиздан қичқириқ эшитилди. Менинг жоним товонимга тушиб кетай, деди. Баррет бизни пайқаб қолди, деб ўйладим.

Ортимга ўгирилиб қарадим.

Баррет коннинг ичкарасига қараб турарди. Пастда ишлаётган уч киши ҳам тор йўлакнинг кириш жойига термилиб қолишганди. Яна даҳшатли, аъзойи бадан-

ни музлатадиган қичқирик эшитилди. Бирдан Баррет тор йўлакнинг ичкари томонига ўқ узди ва даҳшат билан қичқирганча худди телбалардек сўқмоқ бўйлаб пастга, машиналар турган томонга ташланди.

– Каламушлар! – деб нафасим тиқилиб қолди ва Пауланинг қўлидан маҳкам ушладим. – Тезроқ юқорига. Олға!

Паула билан иланг-биланг сўқмоқ орқали юқорига чиққунимизча Мак билан Мэри конга қарата палапартиш ўқ уза бошлашди. Биз қичқирик ва ўқ узишларни эшитдик, аммо ортга қайрилиб қарамасдан коннинг четига чиққунча эмаклашда давом этар, азбаройи чарчаганимиздан зўрға нафас олардик.

Мак менинг юқорига чиқишимга ёрдамлашди.

– Қарагин, каламушлар! – у қўли билан пастни кўрсатди, юзи эса даҳшатдан бужмайиб кетди. – Эҳ, бу йигитларнинг куни битди!

Мен кон ичкарисига қарадим. У газандалар билан ғиж-ғиж қайнаб ётарди. Каламушлар отишма билан машғул олти киши атрофида ирғишларди. Баррет бирданига қўлини силкитиб, худди чавақланаётган чўчкадек чинқириб юборди. Учта каттакон махлуқ ёпишиб ташлангани, унинг малла терилар қайнаб ётган қозон ичида ғойиб бўлганини кўриб қолдим.

Қолган беш киши ерга қапишганча каламушларнинг қутурган тўлқини ичида қолганида яна бир гала кемирувчи чийиллаш ҳамда шовқин-сурон билан шахта ичидан чиқиб, сўқмоқ бўйлаб пастга, одамларни гумдон қилиш учун отилди.

Мен Пауланинг қўлидан ушлаб олдим.

– Бу ердан тезроқ кетайлик!

Тўрт кишилиқ гуруҳимиз қумлик бўйлаб катта йўл томон югуриб кетди.

## САККИЗИНЧИ БЎЛИМ

### 1

Мен, Мэри Жером, Франкони ва Паула Брендоннинг кабинетига ёпирилиб кирганимизда, вақт ярим тундан ошган эди. Қовоғи солиқ ва бироз қизарган Мифлин сафимизнинг охирини ташкил этарди.

Округ полициясининг бошлиғи стол ортида ўтирар ва ҳар биримизни имкон қадар синчковлик билан кузатарди. Ҳозир у шинам кийинмаган: Мифлин уни биз бошдан кечирган воқеани эшитиши учун тўғридан-тўғри тўшақдан турғизган эди.

– Қани, ўтиринглар, – деб тўнғиллади Брендон қўли билан стол атрофида турган қатор стулларни кўрсатиб.

У даст бурилиб, лейтенантга тик қаради:

– Хўш, у ердан нималар топдинглар?

– Икки юк машинада марихуана ва ўн олтита жасад, – деб жавоб берди Мифлин. – Барретни каламушлар еб битирган. Тўдадан бор-йўғи бир кишигина тирик қолган, ўша бизга ҳамма гапни гапириб берди. Аммо у тўғрисида сизга Мэллой маълумот беради. Эшитишни хоҳлайсизми?

Округ полиция бошлиғи менга қовоқларини уйиб назар ташлади ва стол ғаладонини тортиб, қимматбаҳо сигара қутисини олди. Улардан бирини ўзига олди-ю, бошқаларга таклиф қилмасдан қутини яна жойига қайтариб ғаладонни ёпиб қўйди.

– У фақат шунинг учун бу ерга келган кўринади, – деди Брендон захархандалик билан ва йўғон бармоқлари Мэри Жеромни кўрсатиб сўради: – Бу ким ўзи?



– Ли Дедрикнинг хотини, – дедим мен.

– Ким-ким, дединг?

– Ли Дедрикнинг хотини.

У Мэри Жеромга ўгирилиб қаради:

– Шунақами?

– Ҳа, – жавоб берди у совуққонлик билан пинагини бузмасдан.

– Унга қачон турмушга чиққан эдингиз?

– Тўрт йил муқаддам.

Брендон сигарани стол устига қўйди ва оро берилган қўллари билан бошидаги оқишга мойил, дағал сочларини силаб қўйди.

– Демак, унинг Серена Маршленд билан никоҳи ҳақиқий эмас? – деди у руҳан бўшашиб.

– Очиғи, шундай, – дедим мен Брендоннинг гангиб қолганидан роҳатланиб. – Менинг бошидан гапиришимни хоҳлайсизми ёки саволлар беришни афзал кўрасизми?

Брендон яна сигарани қўлига олди, қаҳр-ғазабга тўлиб, унга гугуртнинг чўпини тиқиб қўйди.

– Дедрик хоним-чи?.. Серена Маршленд бу ҳақда биладими?

– Энди билади.

Ҳар ишга қодир полиция бошлиғи оғзининг чеккалари осилиб, боши семиз елкаси ичига чўкди. У бутун кўриниши билан тақдир ҳукмига мураса қилган ва тобеликка кўнган каби қўлини силтади:

– Майли, гапиринг, фақат ҳамма айтганларимга ишонади, деб уйламанг.

– Мен ўзимнинг барча изланишларимда кўпгина тахмин ва фаразларга таянганман, – дея гап бошладим курсидан бор гавдамни олдинга ташлаб. – Сўзлаб берганларимдан нималарнидир далиллар билан

исботлаш мумкиндир, аммо кўп қисмини тасдиқлаб бўлмайди. Шундай қилиб, бизга Барретнинг катта контрабандачилар тўдаси бошлиғи эканлиги аниқ, у гиёҳванд моддаларни етказиб бериш билан шуғулланган. Ли Дедрик ва Льют Феррис эса Барретнинг ёрдамчилари бўлишган. Биринчиси Парижда шу иш билан машғул бўлган, иккинчиси марихуанани Мексикадан олиб келиш билан шуғулланган. Бунга етарли далилларимиз бор. Шу билан бирга Дедрик бу аёлга уйлангани ҳам бизга маълум, – мен қўлим билан Мэри Жеромни кўрсатдим. – У эри нима иш билан шуғулланганидан беҳабар бўлган. Сўнг Ли Мэрини ташлаб кетиб, Серена Маршлендга уйланган ва Нью-Йоркка келиб қолган. Шундан сўнг фараз ва тахминлар бошланиб кетади. Афтидан, Маршлендларнинг ҳайдовчиси Суюки қандайдир йўллар билан Дедрикнинг аслида қандай одам эканлигини билиб қолган. Балки у Дедрикни қўрқитмоқчи бўлгандир, буни билмайман. Балки фош этаман, деб таҳдид қилгандир-у, аммо Дедрик Серена Маршленднинг пулларини эгаллаш йўлидаги режаларини барбод қилиши мумкин, деб англагандир. Шу боис Суюкининг оғзини ёпиш учун уни ўлдиргандир. Қотилликни яшириш ҳамда Серенадан кўпроқ пул умариш учун Дедрик ўзининг ўғирланишини ташкил этгандир. Бу ғоя аъло даражада иш берган. Ҳеч ким Суюкини Дедрик ўлдирганидан гумонсирамайди. Шу билан бирга ўғирланиш рўй бермаганига ҳеч ким шубҳаланмайди. Буларнинг барчасига Баррет тўла-тўқис ёрдам берган. Дедрик Барретнинг уйида яширинча яшайверади, сўнг беш юз минг гаров пулини ундириб олади ва Пиреллига қарши худди ўғирлагандек сохта далиллар тайёрлайди. Дарвоқе, буни амалга ошириш осон, чунки Пирелли

у яшайдиган хонанинг қаршисидаги уйда истиқомат қилади. Барретнинг Пиреллини кўргани кўзи йўқ эди, шу сабабли унинг хонасига қармоқ, гаровдаги пулнинг бир қисмини ва тўппончани ташлайди. Сўнг полицияга ўз номини яшириб хабар беради. Полиция бу жойга келиб, Пиреллини қамоққа олади...

Шу сўзларни айтганимда Брендон Мифлинга қиё назар ташлаб тўнғиллади:

– Биласанми, булар ҳаммаси нимага ўхшаб кетяпти? Турган-битгани Мэллойнинг ғирт сафсата-си. Мэллой, сенинг мақсадинг аниқ – Пиреллини қамоқдан чиқариб олиш. Аммо сен Дедрикни Пирелли ўғирламаганига мени ишонтирадиган ҳеч нима айта олмадинг. Хўш, яна нима гапинг бор, тўкиб сол!

– Баррет яшайдиган уйда Грация Леман номли қоровул аёл яшаган. У Барретни кўлида қармоқ тутган ҳолда кўриб қолган. Аёл Барретни кўрқитмоқчи бўлган. Дедрик Грациянинг олдига кўришиш учун келган-у, уни ўлдирган...

Брендон заҳархандалик билан кулди.

– Уни ким ўлдирган дединг?

– Дедрик, енгил матодан тикилган костюм ва оқ наматсимон шляпа кийган ҳолда. Қотиллик рўй берган тунда унинг Грация билан бирга турганини Жон Дридон кўрган.

– Буларнинг ҳаммаси кампирларнинг чўпчагидай гап. Ўша Леман деганинг ўзини ўзи ўлдирган, тушунарлими? Сенинг эса якка-ю ягона шоҳидинг, бу – кўчадаги фоҳиша, холос. Мени унинг кўрсатмаларига ишонади, деб ўйлаяпсанми? Гувоҳларнинг бирортаси ҳам тешик тангага арзимади.

Унинг сўзларига елка қисиб қўйишдан бошқа иложим қолмаган эди.

– Енгил матодан тикилган костюм кийган киши Дедрик эканлигини сен қаердан биласан? Илгари уни кўрганмидинг?

– Йўқ, кўрмаганман. Аммо овозидан таниб қолганман. У ўзини ўғирлаш саҳнасини ўйлаб топганида, мен билан телефон орқали гаплашган эди. Шундай товуши борки, танимаслик мумкин эмас.

– Бу ҳақда судда маслаҳатчиларга гапириб бергин, ана шунда нималар бўлишини кўрасан, – деб тиржайди Брендон. – Сенинг бугун ўзлаштирганинг шуки, Баррет контрабандачилар тўдасига бошчилик қилиб, гиёҳванд моддаларни юклаш билан машғул бўлган. Бунинг учун миннатдорман, шу, холос. Қолган ҳаммаси ҳеч қандай исботи бўлмаган уйдирмадан иборат.

Мен Франконга қарадим. У ҳам бош ирғаб, гўё полиция бошлиғининг айтганлари адолатдан эканлигини тасдиқлаётгандек эди.

– Майли, шундай бўла қолсин! Энди уйга тарқалиб, ухласак бўлади, – дедим Брендонга кучли зарда билан. – Мен бу ерга ўзимча келиб қолганим йўқ, агар ишонишни истамасангиз, кераги ҳам йўқ.

– Шошмагин. Айтганларингни баёнлаштириш учун такрорлашингга тўғри келади, – деди Брендон руҳи кўтарилиб,

У Мифлинга ишора қилди. Мифлин эшикни очиб, сержант Макгроуни чақирди. Бир дақиқадан сўнг бу кабинетга эси паст, думбул киши сержант погонларини таққанича кириб келди. Унинг оқ хом семиз юзи ғам-ташвишдан холи, беташвиш эди. Бир тахлам қоз келтириб, курсига ўтирди-ю, кутиб қотиб турди.

Мен айтганларимни вақти, соати, қачон, қандай рўй берганини қайд этиб такрорладим. Бу анча вақтимни олди. Сўнгра полиция бошлиғи мени, Мэри

Жером, ҳатто Паулани саволларга кўмиб ташлагани, аммо бундан ҳеч нима чиқмади.

– Буларнинг ҳеч қайсида бир грамм ҳам далил-исбот йўқ, – деди у ниҳоят. – Айтган гапларингиз билан судда иштирок этсангиз, округ прокурори уни қандай айлантириб ташлашини кўрасиз, – Брендон ўша заҳоти Франконга ўгирилиб, қўшиб қўйди. – Менга келганда эса Дедрикни Пирелли ўғирлаган, деганман ва ҳозир ҳам шундай деб ҳисоблайман. Бу жайдари криминалист эса, – Брендон мени кўрсатди, – фикримни ўзгартиришга мажбур этадиган ҳеч нима топа олман. У таянган барча гувоҳлари ёки ўлик, ёки ишониш қийин бўлганлардир. Агар сиз, Франкон Дельмонико баридаги Лола тасдиқлаган Пиреллининг айбсизлигини исботловчи далил судни ишонтиради, деб ҳисобласангиз, у ҳолда аниқ жиннисиз! Энди кетинглар. Сен, Мэллой, менинг кўп вақтимни олдинг. Бу ерга Дедрикни бошлаб кел, ана шунда балки ҳамма гапингга ишонарман. Бу охириги сўзим! Омад тилайман!

Биз йўлакка чиққач, бир-биримизга тикилиб қолдик.

– Ҳеч нима қила олмайсан, у ҳақ, Вик, – деди Франкон. – Сенинг айтганларинг ажойиб, аммо улар судда бизга ёрдам бермайди. Дедрикни топиш керак.

Чиқаверишда бизга Мифлин қўшилди.

– Қани, уй-уйимизга кетдик, одамлар дам олиши керак, – деб тўнғиллади у.

– Сенинг йигитларинг Дедрикни излаб кўришдими? – сўрадим ундан.

– Биз Дедрикни эмас, балки енгил матодан тикилган костюм кийган кишини ахтаряпмиз, – деди у эҳтиёткорлик билан. – Грация Леман ўлдирилган кундан бошлаб ахтаряпмиз. Сен, Вик, Брендонга эътибор

бериб ўтирма. У Грациянинг ўлдирилганига шубҳаланмайди, фақат шунчаки бақирришни яхши кўради.

– Агар уни ахтарган бўлсаларинг, нега шу пайтгача топмадиларинг?

Чарчоқдан лейтенантнинг сўппайиб қолган юзи қизариб кетди.

– Керак бўлса топамиз. Тортишиб ўтирмаймиз. Агар у шаҳарда бўлса, эртами, кечми, қамоққа оламиз.

– Борди-ю, чуқур жойга яширинган бўлса-чи? Сизлар, ахир шаҳардаги ҳар бир уйни тинтиб чиқа олмайсизлар-ку, – дедим мен қизиққонлик билан. – ахир фақат шу тарзда уни топиш мумкин.

Франкон гапга аралашди, у бизнинг арзимас мунозарамиздан чарчаб шундай деди:

– Хўп, мен ухлашим керак. Эртага оғир куним. Сизнинг эса, Вик, Пирелли устидан бўладиган судга бир ҳафта, мен белгилаган кунимга икки кун қолди. Мен судда қуруқ қўл билан сўзга чиқмоқчи эмасман. Бу ҳақда сизни огоҳлантирган эдим.

Мен эътироз билдирмасдан туриб, Франкон чиқиб кетди.

Биз, яъни мен, Мэри ва Паула ишимиз унмаганидан толиқиб, чарчаб кўчага чиқдик.

– Балки мен Мэрини уйга олиб кетарман? – деди Паула.

– Ихтиёрингиз. Эртага идорада учрашамиз. Балки ўша вақтгача менда бирор ғоя пайдо бўлиб қолар.

Мен уларни таксига ўтқаздим, сўнг кетгунларича қараб турдим. Ўзимнинг «Бьюик»им томон бурилиб кетаётганимда, мени Мифлин қувиб етди.

– Ачинарли, Вик, – деди у, – аммо мен ҳеч нима қила олмасдим.

– Тушунаман.

Мен машинага суяниб, сигарета олиш учун чўнтагимга кўл суқдим.

– Сенингча, Дедрик шаҳардан чиқиб кета оладими? Мифлин елкаларини қисди.

– Ким билади. Биз барча йўлларга: аэропорт, автобус бекатлари, темир йўл вокзалларида кузатув жойларини қўйиб ташлаганмиз. Агар булардан қутулиб чиқиб кетса, унинг омади. Аммо шундай жой топиб, ўтирган бўлиши мумкинки, ҳеч ким ўша ердан қидиришни хаёлига ҳам келтирмаслиги мумкин. Шунақага ўхшайди.

Мен бош ирғадим.

– Биз шубҳа остига олинган уйларнинг ҳаммасини текшириб чиқдик, – гапини давом эттирди Мифлин. – Агар яширинган бўлса, у ниҳоятда ишончли жой бўлиши керак.

Тўсатдан калламга бир фикр келиб қолди.

– Ҳа, афтидан, шунақага ўхшайди, – дедим мен. – Гаров ўйнаб айтаманки, у ҳали шаҳарда. Шошма, Тим, кетма. Мен ниманидир ўйлаганга ўхшайман. Сен уйда бўласанми? У ҳолда ётишга шошмай турасан, балки мен сенга қўнғирок қиларман.

– Хаёлингга нима келди? – сўради Мифлин. – Сенингча, у қаерда яширинган?

Мен машинамга чиқиб, двигателни ўт олдирдим.

– Сизлар ахтаришга ҳақдингиз сиғмайдиган жойда, – деб жавоб бердим мен. – «Оушен-энд» ҳашаматли саройида у, оғайни!

Машинамнинг тезлигини ошириб, газни босдим. Мифлин орқамдан нимадир деб кичқирди, аммо мен энди уни эшитмасдим.

«Оушен-энд»га элтувчи хусусий йўлдан бурилиб, автомобиль чироқларини ўчирдим. Бу ҳашаматли ҳовли ақлга сиғмас даражада, Дедрик яшириниши мумкин бўлган энг қулай маскан ҳам. Агар тўнғич Маршленд кетган бўлса, қизи ёлғиз қолган. Дедрик Серенага турли ёлғонларни дўндириб, яшириниш ҳақида ҳеч бир қийинчиликсиз келишиб олиши мумкин.

Албатта, бу бор-йўғи тахмин, холос. Гарчанд ўлғудай уйқум келаётган бўлса-да, мен текшириб кўрмасдан ухлай олмаслигимни яхши билардим.

Ҳовлига бир миля қолганида тўхтаб машинадан тушдим. Йўлнинг қолган қисмини пиёда босиб ўтсам ишончли бўлади.

Асосий дарвоза бутунлай берк экан. Мен ўғрилардан бундай данғиллама ҳовлида ўрнатиладиган турли хилдаги сигнал қурилмалари хусусида эшитгандим. Шу боис ўзимни дарвозадан узоқ тутдим. Баланд девор ёнидан ўтаётиб, осилиб турган, чирмашиб ўсувчи лианага кўзим тушди. У мени кўтара оладиган даражада мустаҳкам эканлигига ишонч ҳосил қилдим. Девор устига чиқишимга озгина ҳаракат кифоя қилди. Кўз олдимда ой ёғдусида яшнаб, барқ уриб ётган боғ намоён бўлди. Мен шовқин солмасликка ҳаракат қилиб, эҳтиёткорлик билан тўппа-тўғри гулзор устига сакрадим.

Сал узоқда уй кўринди ва мен яшириниб, ҳар бир соя тушган жой ва бута ортига писиниб беркинган кўйи ўша томонга яқинлаша бошладим. Улар айвонга боравериш йўлимидаги ҳар қадамда учрар эди.

Пастки қават бутунлай қоронғиликка чулғанган. Шунга қарамай, тепадаги икки деразадан ёруғлик та-



ралиб турибди. Вақт ярим кечадан ошган бўлса-да, кимдир ҳануз уйғоқ эди.

Мен айвон томон зинадан кўтарилар эканман, резина таглик қўйилган пойабзалим бирор марта ҳам гижирамлади. Деразалардан биридан менга тушган нур айвоннинг оқ тош плиталарини ёритиб, очик, тўртбурчак шакл пайдо қилди. Юқорига чиқиб бориш жуда осон. Дераза болохонали айвонда ўрнатилган. Мен панжарага оёғимни қўйиб, юқориги харигача етдим, сўнг икки қўлим билан маҳкам ушлаб кўтарилдим-у, парда осилмаган деразага назар ташладим.

Кўзларимга ишонмай қолдим: каравотда енгил матодан тикилган костюм кийган киши бемалол ялпайиб ётарди. Бир қўлида вискили бордоқ, иккинчисида эса журнал. Оғзида қистирилган сигарета тутаб турар ва у диққатини жамлаб, ниманидир ўқир эди.

Шундай қилиб, менинг тахминим тасдиқланди. Дарвоқе, иш муваффақиятли якунланди, деб ўйлаш мумкин: у шу қадар яхши ҳисобини олганки, бу жойдан бошқа қаерда ҳам шундай хавф-хатарсиз яшаш мумкин?

Йўқ, бу одамни ёлғиз ҳолда қўлга олмоқчи эмасман. Менга гувоҳлар керак. Афсусланиб, нақшинкор панжарадан айвонга сакраб тушдим-у, яқин атрофдаги телефон-автоматни эслай бошладим. Аммо, ўйлашимча, бу атрофда бўлиши мумкин эмас. Боз устига менга ҳаддан зиёд керакли одамни бу ерда ёлғиз, қаровсиз қолдириб бўлмайди. Агар ухлаб ётганида телефон будкасини ахтариш баҳонасида ҳовлида қолдириб кетишим мумкин эди. Лекин айти дамда у ҳар бир дақиқада ўрнидан туриб, кетиб қолиши мумкин.

Шунда бирдан залда телефон туриши эсимга тушди.

Мен айвон орқали ойнаванд эшикка яқинлашдим, у залга олиб борарди. Ойнинг ёрқин нурида эшикдаги автоматик сигнализацияни кўздан кечирдим. Шубҳали ҳеч нимани пайқамадим. Эшикнинг қулфини очиш ўрнига уйни айланиб ўтиб, очик деразани ахтаришга тушдим.

Бу оқшом мен учун омадли келди. Уй биносини айланиб кўриб, уйнинг орқа қисмида битта деразага кўзим тушди, у осонгина очилди. Бошимни ичкарига тикиб, қулоқ солдим. Ҳамма жой жимжит. Ён чўнтагимни кавлаб, Пауланнинг фонарини олдим. Унинг қуввати гарчи ўтириб қолган бўлса-да, рўпарамда залга олиб чиқувчи йўлак турганини кўрсатди.

Қўлларимга таяниб, деразага чиқиб олдим. Сўнг уни ёпиб, оёқ учида залга томон ҳаракат қилдим.

Уйда осудалик ҳукм сурарди. Залга ўтишдан олдин бироз вақт қулоқ солиб турдим. Сўнг кириб, ортимдан эшикни маҳкам ёпдим.

Телефон аппарати диван ёнида турарди. Мен гўшакни кўтариб, Мифлиннинг рақамини тердим.

Чақирилаётган узундан-узоқ гудок товушини кўнглимдан ўткази туриб, баланд қаватдаги ҳар бир овозни илғаб олишга уринардим. Ниҳоят шиқирлаш эшитилиб, Мифлин «Хэллоу!» деди.

– Мен уни топдим, – дея шивирладим гўшакни оғзимга маҳкам босиб. – У «Оушен-энд»да. Бир неча дақиқадан сўнг бу ерга кела оласанми?

– Аниқми, ўзинг ишонасанми? – Мифлиннинг овози ҳаяжондан титраб кетди.

– Албатта, ишонаман. Уни ўзим кўрдим. Энди яхшилаб эшит, Тим. Ўзинг билан бирга Мэри ва Паулани ҳам олиб кел. Гувоҳ сифатида. Машинани уйдан узоқроққа қўйгин. Дарвозага яқин келманглар, яхшиси,

девордан ошиб ўтинлар. Айвонга кўтарилгач, мен чақирмагунимча эшик орқасида туринглар. О'кей?

– Сен ўзинг ҳақиқатан ўша эканлигига ишонасанми? – қайта сўради Мифлин. – Хусусий уйга ордерсиз бостириб кирадиган бўлсам, иш жойим ва лейтенантлик юлдузчаларимдан ажралиб қолишим мумкин.

– Шу сафар амалингни ўйламай турсанг яхши бўларди! Тезроқ бўл! Мен қизларга айтаман, улар кийиниб, сени кутиб туришади. Хуллас, сизларни йигирма дақиқадан сўнг кутаман, – дедим мен ва эътироз билдиришга улгура олмасидан гўшакни қўйдим.

Сўнг дарҳол Пауланинг рақамини тердим.

– Тезроқ кийининглар, – дедим у гўшакни кўтарганида. – Ўзингиз билан бирга Мэрини ҳам олинг. Йигирма дақиқадан сўнг Мифлин сизларнинг ҳузурингизга боради. «Оушен-энд»га жўнайсизлар. Мен Дедрикни топдим.

Паула сўраб ўтирмади, бунга вақт сарфламай, ҳозир тайёр бўламиз, деди.

Мен гўшакни қўйиб чекдим, ҳаяжондан терлаб кетганимни ана шунда ҳис қилдим.

Қаердадир зулмат ичида залда турган соат вақтни жиддий равишда ҳисоб-китоб қиларди. Мен диванда ўтирганча оёғимни ликиллатар ва хотиржам бўлишга уринардим. Агар омадимиз келса, иш шу билан охирига етади, ҳаммаси меъёрдагидек кетса, Пирелли эрталаб озодликка чиқади.

Кўзларимни юмдим. Охирги марта ухлаганимдан бери узоқ вақт ўтгандек туюлди, назаримда. Ҳа, Макс менга Барретнинг хонаси калитини берганидан буён кўп вақт ўтди. Ҳатто бир-икки соатдан сўнг ҳаммаси тугаши, бари ниҳоясига етишига ишонмай ҳам қолдим.

Бирдан юқорида ўқ узилгани эшитилди.

Мен дивандан учиб кетгудай бўлиб турдим. Зални оралаб ўтиб, ўқ товушининг акс-садосидан олдинроқ эшикни очдим.

Коронғилик қўйнида тик туриб, қулоқ тутдим. Қаердадир эшик очилди. Чироқ ёнди. Кимдир зина-поя ёнидаги тор йўлакдан югуриб ўтиб кетди. Мен яшил атлас ёпқич кийган аёлнинг ғира-шира шарпасини зўрға илғаб қолдим. Бошқа эшик ёпилди, сўнг даҳшатли, қўрқинч аралаш фарёд янгради.

Учта зинани биттада ҳатлаб босиб, юқори қаватга учиб чиқдим. Шунда ёруғлик тушиб турган эшик ортидан, унинг охиридан иккинчи бор аянчли нола эшитилди.

Мен тор йўлакдан сакраб ўтиб, эшиклар ёнида тўхтаб қолдим ва хоналар ҳамда Дедрикнинг хонасига назар ташладим.

У қимирламай ётар, Серена эса тепасида энгашганча зўр бериб елкаларидан ушлаб, силкитарди.

– Ли! Ли! – деб қичқирарди у. – Ли! Нималар қилиб қўйдинг? Азизим! Жавоб бер!

Мен хонага тезгина кириб бордим. Каравотда ётган кишига бир қараб, ўлганлигини билиш мумкин эди. Ўқ унинг чеккасига теккан, қон юзидан оқиб, оқ кўйлагига сачраган эди.

Серенанинг қўлидан ушлаб олдим.

– Ўзингизни босинг, – дедим мен. – Энди ҳеч қандай ёрдам бера олмайсиз.

У менга кескин ўгирилиб қаради. Кўзлари даҳшат билан боқарди. Сўнг йиғлашга тушди. Қўллари билан мени итаргандек бўлди, кейин кўзлари чарақлади ва ҳушдан кетиб, қўлларимга йиқилиб тушди.

Мен Серенани пол устига ётқизиб, мурда устига энгашдим.

Каравотда, унинг ўнг қўли ёнида ўттиз саккизинчи калибрли автоматик «кольт» тўппончаси ётар, учидан тутун чиқиб турарди. Мурданинг юзида даҳшат қотиб қолган, бир нечта порох унинг оқ терисини куйдирган эди.

– Нима бўлди?

Мен бурилиб қарадим.

Остонада халат кийган Уэдлок турар, сочлари ҳурпайиб кетган эди.

– У ўзини отиб қўйди, – қисқагина жавоб бердим мен. – Дедрик хонимни бу ердан олиб кетишга ёрдам берсангиз.

Серенанинг устига энгашиб, қўлларимда кўтардим, хонадан олиб чиқдим. Эшик оғаси четланиб, менга йўл берди, унинг ёноқлари бўзариб, пир-пир уча бошлади.

Мен Серенани зинапоядан пастга олиб тушиб, залдаги диванга ётқизиб қўйдим.

– Кўча томондаги эшикни очинг, тоза ҳаво кўпроқ кирсин, – дедим Уэдлок чироқни ёққан пайтида.

У айвонга чиқувчи эшикни очгунча, мен бордоққа виски қуйиб, Серенанинг ёнига келдим. Диван ёнида тиз чўкканимда, у кўзини очди.

– Кўнглингизни чўктирманг, ўзингизни эҳтиёт қилинг, – дедим унга. – Мана, бироз ичиб олинг.

У аччиқланиб, қўлимни итариб юборди ва ўрнидан турди.

– Ли!

– Кулоқ солинг, энди унга ҳеч қандай ёрдам бера олмайсиз. Илтимос, кайфиятингизни бузманг.

У ўзини орқага, ёстиқ устига ташлаб, қўллари билан юзини яшириб олди.

– Ли, нега бу ишни қилдинг? – деб фарёд чекди эшитарли қилиб. – Нега? Нега, азизим?

Уэдлок яқин келиб, унга чор-ночор тикилди.

– Полицияни чақиринг, – деб буюрдим унга. – Бу ерда нима рўй берганини айтинг ва бошқа ишга халақит берманг.

– Мен тушунмаяпман, – талмовсиради Уэдлок гангиб қолганча. – Сиз бу ерда нима қиляпсиз? Қандай келиб қолдингиз?

– Бунинг аҳамияти йўқ. Полицияни чақиринг.

Чол нимадир демоқчи бўлди, ўйлаб кўрди шекилли, қўлини силтаб, аста-секин юриб хонадан чиқиб кетди. У зиналарни босиб, юқорига кўтарилаётганини эшитдим.

– Мана, ичиб олинг, – яна Серенага мурожаат қилдим мен. – Сиз бардам бўлишингиз керак. Ҳозир бу ерга полициядан изқуварлар ёпирилиб келишади. Уни яширганингизни билиб қолишса, сизга ёмон бўлади.

Серена бордоқни олиб, озгина хўплади, титраб кетди-ю, бордоқни стол устига қўйиб деди:

– Нима учун? Мен ҳеч кимга айтмайман, полицияга хабар қилмайман, деб сўз бергандим. У кеча кечқурун қайтиб келиб, ўзини ўғирлаб кетганлар қўлидан қочганини айтди. Агар бу ерда эканлигини билиб қолишса, ўлдириб юборишар экан. У ҳатто Уэдлокдан ҳам ҳеч кимга айтмасликни илтимос қилди.

– Кимлар ўғирлаганини ҳам айтдимиз?

– Бўлмасам-чи! Баррет ва Пирелли-да, – жавоб берди Серена оғир нафас олиб. – Баррет Пиреллини олдинги ҳаётига нуқта қўймоқчи бўлгани учун ёллаб, уни ўлдирмоқчи бўлганини айтди.

Мен кўрққан гап ана шу эди. Серена полицияга ҳам худди шундай деб айтиши мумкин.

– У Пиреллини тилга олганига ишончингиз комилми?

Мен айвонда қандайдир ҳаракатни пайқаб, Мифлин келганини тахмин қилдим.

Серена юзини ўгирди:

– Бу гапни ўйлаб топишимнинг менга нима кераги бор? – деди у.

Эшикка яқин бордим. Айвонда Паула, Мэри Жером ва Мифлин туришарди. Мен лейтенантни имлаб, қизларга шу ерда қолиб, ҳозирча кўринмай туришни ишора қилдим.

Мифлин уйга кўрқа-писа, худди мушук иссиқ плита устида юргандай бир-бир босиб кирди.

Серена менга бурилиб қаради ва унга тикилиб қолди.

– Дедрик юқорида! – деб изоҳ бердим мен лейтенантга. – У ўзини отди.

Мифлин сўкинди ва залдан тезгина чиқиб, зина-поялардан юқорига кўтарилди.

– У бу ерга қандай келиб қолди? – деб сўради Серена ва гўё бўғилиб қолгандай қўлини кўйлагининг ёқасига чирмаштирди.

– Жуда оддий. Мен Дедрик шу ерда яширинган, деб тахмин қилгандим. Шунинг учун полиция лейтенантига сим қоққандим.

– Сиз... сиз анови телефондан кўнғироқ қилдингизми?

Мен бош ирғаб қўйдим.

– А-а-а, энди тушунарли! Ли, эҳтимол, сизнинг гапингизни эшитиб қолган-у, шундан кейин ўзини отган.

Мен унга савол назари билан қарадим.

– Унга ўзини отиши нима учун керак эди?

Серена бошини эгди ва юзини ўгирди.

– Ахир уни полиция... қотилликда айблаб, ахтарётганди-ку, шундай эмасми?

– Тўғри, аммо барчаси сиз айтгандек эмас. Мен Ленинг хонасида бўлдим, аммо унда бир хил ўтказкичли телефон йўқ эди.

Серена бу гапга жавоб бермади.

Шунда менда яна бир фараз «йилт» этиб ўтгандай бўлди. Бу кеча мен тахминлар тўрига тушган эдим.

– У сизгача уйланганини билармидингиз? – деб сўрадим иложи борича хотиржам бўлишга уриниб.

Серена ғазабга тўлиб, бир тўлғаниб қўйди. Юзи жонсиз ниқоб қиёфасига кирди.

– Мен бу мавзуда гапиришни истамайман.

– Менга эса сиз Дедрикнинг биринчи хотинини кўришни истаганга ўхшаб кетдингиз. У айвонда кутмоқда.

Серена шиддат билан оёққа сакраб турди.

– Мен уни кўришни истамайман! Уйим остонасини босиб ўтишга ҳадди сиғмайди.

– Аммо у Дедрикни таний олади-ку! Барибир бу ерга киришига тўғри келади.

– Йўқ, унинг уйимга киришини ман этаман!

Серенанинг юзи бўзариб кетди, чарақлаган катта кўзлари эса бутунлай ич-ичига кириб кетгандай бўлди.

– Мен Дедрикни севаман! – давом этди ғазабга тўлиб қалтираган кўйи Серена. – Бу хотин унга суйкалишини асло истамайман.

Мен ойнаванд эшикка яқин бордим.

– Кириг, – деб Мэри Жеромни таклиф этдим. – Юқорига чиқинг ва эрингизни кўздан кечиринг. Бу аёлга эътибор берманг. Биламан, у нима учун хохламаётга...



Сўзларим бўғзимда қолди.

Серена холлнинг нариги томонидаги ёзув столи ға-  
ладонидан ниманидир тимирскилаб топди. Сўнг уни  
бизга ўқталди. Серенанинг қўлида кичкина автома-  
тик тўппонча ялтирар эди.

– Жойингдан қимирлама!

Мэри эшик ёнида хотиржам турар, Серенага совук  
ва қаҳр билан қарар эди.

– Сиз нега бунча қўрқиб кетдингиз? – деб сўрадим  
мен сездирмай, у томонга сурилар эканман.

– Тўхтанг! Жойингиздан жилманг, бўлмаса отиб  
ташлайман!

У тепкини аста-секин босаётганини кўриб, тўхтаб  
қолдим.

– Ўточар қурол билан эҳтиёт бўлиб муомала қи-  
линг, – деб огоҳлантирдим мен.

– Бу аёлни кўзимдан йўқотинг! Менинг Лиимга  
яқинлашишни хаёлига ҳам келтирмасин!

– Бу ерда нима бўляпти ўзи?

Хонага Мифлин қайтиб кирди.

Кўчада машина тормозларининг шовқини эшитил-  
ди, айвон бўйлаб оғир қадам товушлари гурсиллади  
– хонага сержант Макгроу икки полициячи ҳамроҳли-  
гида кириб келди.

Серена дарҳол ўзини орқага ташлади. Аммо мен  
унинг ҳар бир қадамини кузатиб турардим. Серена  
тўппончани қандай кўтаргани, ўзининг кўкраги-  
га тираганини пайқаб қолдим. Тўппончанинг учини  
кўксига тираганида нигоҳлари захаролуд эди. Мен бу  
вазиятни кутгандим, шунинг учун тўппонча отилиб  
кетишидан олдин, унга ташланиб, оёғидан чалиб йи-  
қитдим.

Мифлин яшин каби олдинга интилиб, тиззалаб олди ва унинг қўлидан тўппончани тортишга улгурди.

Мен ўзимни чеккага олдим.

Серена ёнбош бўлиб ётар, бошини кафти билан маҳкам ушлаб, фарёд чекиб, нола қиларди.

– Жароҳатланмадими ишқилиб? – сўради Мифлин оғир нафас оларкан.

Мен бош чайқаб, Серенадан анча нарида, полдаги ўқдан ўйилган жойни кўрсатдим.

– Лаънатилар, нима бўляпти ўзи бу ерда? – деб бобиллади Макгроу. – Нима гап?

– Уни юқорига олиб чиқинг, Дедрикни ўз кўзи билан кўрсин, – дедим мен Мифлинга Мэри Жеромни кўрсатиб. – Гарчи ўзи билмаса-да, бу ерда нималар рўй берган бўлса, ҳаммасининг очқич калити ўшанинг қўлида.

– Аммо қандай... – деди Мифлин.

– Уни юқорига олиб чиқинг, – гапини бўлдим. – Майли, мен эмас, бу ерда нима бўлганини ўзи айтсин.

Мифлин елкаларини қисди ва Мэрига ортидан юришни ишора қилди.

У Мифлинга эргашиб кетди. Мен эса Серенани кўтариб, диванга ётқиздим. У қўллари билан юзини беркитган, танаси эса овоз чиқармай чекаётган нола-фигонидан титрар эди.

Макгроу тишларини ғижирлатди.

– Шундай қилиб, сен барибир бу жумбоқни ечдинг, – истехзо билан кулди у. – Қани, ҳаммасини тўкиб сол-чи, қандай уддаладинг?

– Сенга бошқалар тўкиб солаверсин. – тўнгилладим мен ва Пауланинг ёнига йўл олдим.

– Вик, бу ерда нималар бўляпти? – деб сўради у.

– Қўлларингизни дуога тайёрланг. Эҳтимол, энди Пиреллини турмадан олиб чиқармиз.

Биз тик турганча кутардик. Бир неча дақиқадан сўнг Мэри Мифлин ҳамроҳлигида пастга тушиб келди.

– Биласанми, – деди Мифлин хансираб, – у ерда Дедрик ётгани йўқ. Мэри, бу Льют Феррис деяпти.

Лейтенант Макгроуга қараб қолди.

– Сержант, сен Ферриснинг афту башарасини танийсан. Қани, юқорига чиқиб қара-чи, у ерда ким ётган экан?

Макгроу зинага йўл олди.

– У эса Дедрик деяпти, – Мифлин боши билан Серена томонни кўрсатиб. Серена ҳамон диванда юзларини беркитганича ётарди.

Мен бош ирғадим.

Бир пайт Макгроу панжара ортидан энгашиб, қичқириб юборди:

– Бу Феррис, аниқ шундай!

– Ундай бўлса, Дедрик қаерда? – сўради Мифлин.

– Сўранг, балки айтиб берар, – дедим мен Серенани кўрсатиб. – Менимча, конда ундан латта ва суяк қолган, бош чаноғида эса ўқ тешиги бор.

Бирдан Серена дивандан сакраб турди, унинг юзи оқариб кетган, кўзлари эса қатъият билан чакнардди.

– Дедрикни мен, мен отдим! – деди у зўрға эшитиладиган овозда. – Феррисни ҳам мен ўлдирдим. Менга нисбатан қандай жазо қўлласангиз қўллайверинг. Менга ҳаммаси барибир.

Кечки оқшом соат бешда идорамиз эшиги зарб билан очилиб, хонага, бизнинг ҳузуримизга Тим Мифлин вазмин юриб келди.

Мен ўзимнинг оромкурсимда мук тушиб ўтирардим. Паула эса Керманнинг тўзиб кетган кушеткаси ёнида турарди. Керман эндигина Париждан қайтиб келган ва Паулага сарф-харажатлар хусусида ҳисоб берарди. Унинг харажатлари рўйхати тўнгич Жон Рокфеллернинг даромадидан ҳам катта эди.

– Бир зиёфат учун шампан виносига йигирма доллар! – деб хитоб қилди Паула рўйхатни ёрдамчининг юзи олдида силкитар экан. – Тагин ҳаммаси бир чақага қиммат. Ҳеч қандай ахборот йўқ. Ҳисоб-китобга яраша ҳеч вақо йўқ!

Керман ожизона қутулишга уринди.

– Нега менга бунча майда-чуйда билан ёпишиб олдинг ўзи? – деб зорланди у. – Йигит киши бироз кайф-сафо қилмоқчи бўлган, шунга шунчами?

– Ҳа, Тим сенмисан? Кир, киравер! – хурсанд бўлиб кичқирдим мен ва сакраб туриб, ёқимли меҳмонга пешвоз чиқдим. – Ҳузуримизга келасан, деб ўйламагандим. Ўтир. Эй, Жек, минғирлашни бас қил, лейтенантга виски қуйиб бер.

– У фақат шунга ярайди, холос, – кесатди Паула.

– Бу ерда менга озгина ишонишларини эшитиш ҳам ёқимли, – фахр билан деди Керман.

У кушеткадан туриб, шишалар билан машғул бўлди. Шу аснода Мифлин ҳам рўпарамдаги оромкурсига оғир чўкди.

– Иш нималар билан тугаганини билиш ҳамма учун қизиқарли бўлса керак, – деб гап бошлади у. – Қандай

кун бўлди ўзи – Брендонга зарба берилди. – Мифлин кулиб юборди. – Серена билан ҳам иш силиққина битди. У ҳаммасига иқрор бўлди. Қизиқ иш-да: хотинларни салгина бўш қўйдингми, асло тўхтата олмайсан.

– Эркаклар ҳам бундан кам эмас, – деб юмшоққина эътироз билдирди Паула.

Мифлин қадахни қўлига олиб, менга кўз қисиб қўйди.

– Хўп, соғ-омон бўлайлик! – деди у. – Ажойиб! – У мамнун бўлганидан тилини тақиллатиб қўйди. – Менга шуниси етмай турганди ўзи. Гап бундай, Франкон Серенани ҳимоя қилишни ўз зиммасига олган эди. У бой-бадавлат мижозлардан совға-салом ундириш қобилиятига эга. Мен Серенани полицияга олиб борганимда, у Пиреллининг ҳузурида экан. Менга Франконнинг дарров Серенага боғлангани ҳайрон қолдирди. Пиреллини бир соат олдин озод этишди. Брендон-ку, бу ишни қилмоқчи эмасди, аммо иложи йўқ. Пирелли севгилиси билан кўришганидан кейин келиб учрар экан, ўзи айтди. Майхўрлик менинг ҳисобимдан бошлансин, деди.

– Ажойиб бўпти! – хитоб қилиб юборди хурсандлигидан Керман. – Демак, бугун ресторанда кайф-сафо қилар эканмиз-да.

– Ҳисоб-китобни, албатта, сен тўлайсан, – деб гап қистирди Паула.

– Серена сўроқда нималарни гапирганини эшитишни истайсанми? – деб менга мурожаат қилди Мифлин.

– Албатта.

– Сен Суюкининг ўлдирилиши билан қизиқиб қолганимда, ҳақиқатдан узоқда эмасдинг. Ҳаммаси ўшандан бошланди. Суюки бошиданок Дедрикни

кўргани кўзи йўқ эди. Дедрик Маршлендларникида, Нью-Йоркда бўлганида, Суюки сездирмасдан унинг машинаси юкхонасини кўздан кечиради ва контрабандачилик фаолиятига доир далиллар топади. Шу билан бирга Мэри Жеромга уйланганини билиб олади. Ўзининг кашфиёти тўғрисида Серенага гапириб бермоқчи бўлади, аммо улгурмайди, чунки у Дедрик билан шошилиш равишида шахримизга келиши керак эди. Шунда далилларни Серенанинг столи устида қолдиради. Уларни ўқиб кўрган Серена дарҳол самолётга ўтириб, Дедрикнинг ортидан учиб кетади. Улар «Оушен-энд»да учрашадилар. Суюки эса оқшом соат ўнда Дедрикнинг ёнига қайтиш учун «Орхид-отел»га йўл олади. Серена Дедрикни қўш хотинлик ва қаллобликда айблайди. Аммо Дедрик унинг устидан кулади ва сенга пулинг туфайли уйланганман, деб қўшиб қўяди. Афтидан, Маршлендлар билан бу тарзда гапириб бўлмайди. Ниҳоят Серена уни отиб ўлдиради.

Дедрик билан «Оушен-энд»да Баррет ва Ферриснинг учрашуви белгиланган эди. Улар қотиллик юз берганидан сўнг деярли бир неча сония кечикиб келишади ва Серенани жиноят содир этган ҳолатда учратиш қолишади. Баррет буларнинг барчасидан бойиш имкониятини англайди-ю, дарҳол фойдаланмоқчи бўлади. Полиция мазкур қотиллик тўғрисида билмагани учун у Серенани ўз қўлида тутиб турди. Баррет ўликни шахтада яширишни таклиф қилди, бунинг учун Серена пул тўлаши керак эди. Аёлнинг бошқа иложи қолмаган эди.

Феррис Дедрикнинг мурдасини ўзининг машинасига ортиб, уни конга яшириб қўяди. Бу кон Монте-вердида жойлашган. Баррет эса Серенани орқага,

аэропортга олиб боради. Сўнгра Баррет Феррис билан бирга ортга қайтиб, Суюкини кута бошлашади. Уни ўлдириб, Феррис сенга Дедрик деб ўзини танитиб, ўғрилиқ сахнасини ўйлаб топадилар.

Бу воқеа соат ўнда рўй берган, дейишади, ваҳоланки, Дедрик соат саккизда ўлдирилган эди. Шу билан у Серенанинг айбсизлигини таъминлаган эди.

Қолганлари сенга маълум.

Феррис Баррет ҳалок бўлганини билгандан сўнг «Оушен-энд»га отланади ва Серенадан ўзини яширишни сўраб, уни қистайди. Серена ёндош уланган телефондан сенинг тунги суҳбатингни эшитиб қолади. Бу гап-сўздан кейин борди-ю, Феррис қамалса, мени сотиб қўяди, деб уни бир умр индамасликка мажбур этади, гўё биз уни Дедрик деб ишонишимизга умид боғлайди. Шу тариқа қалтис ўйин бошланади, бу режадагидек яқун топиши мумкин эди. У хонага кириб яширинган бечора Феррисни орқа томонидан отди, ўз жонига қасд қилди, деб найранг ишлатди. Борди-ю, Мэри Жером бўлмаганида, хаммаси муваффақиятли тарзда тугаши мумкин эди...

– Бундай деб ўйламайман... Уэдлок Серенанинг масъулиятдан халос бўлишига асло йўл қўярмиди? У Дедрикни юзидан танир эди. Шу билан бирга Серена хатога йўл қўйди. Аслида Феррис бўлган Дедрик дегани ўз хонасидаги телефони орқали мени эшитган бўлиб чиқди, ваҳоланки, унинг хонасида ҳеч қандай телефон йўқлигини билардим. Ана шу ҳолат мени сергаклантирди ва Серена учун муҳим вазиятда нега уни отиш зарур бўлиб қолди, деб сўрашга мажбур этди мени. Энди унга нима бўлади, Тим?

Мифлин елкаларини қисди.

– Ҳа, Франконининг қанотлари остида унга ҳеч гап бўлмайди. Ҳар ҳолда пулнинг кучи қандай бўлишига қойил қолмай илож йўқ!

– Ҳатто Франкон ҳам уни қутқариб қололмайди, деб ўйлайман. Мэри Жером нима бўлади?

– Ҳеч нарса. Уни ҳеч нимада айблай олишмайди. У эмин-эркин аёл ва бизнинг асосий гувоҳимиз. – Мифлин оромкурсидан турди. – Хўп, энди мен кетишим керак. Пирелли полициячилар билан учрашишни ёқтирмаса керак, шунинг учун бу ердалигим билан унинг кайфиятини бузмайман.

Мифлин кетгач, Керман бепарволик билан сўради:

– Пиреллининг маъшуқаси чиройлими?

– У қандай бўлмасин, сенга ҳеч қандай алоқаси йўқ, – деб гапга аралашди Паула яна ҳисоботга рўйхатни илова қилар экан. – Сен, яхшиси, мана бу харажатни тушунтириб бер – атир учун эллик доллар деганинг нимаси?

Мен Керманнинг жўшқин, аммо кам даражада ишонтира оладиган изоҳларини эшитганча ҳузурланиб яна юмшоқ оромкурсига ўтирдим.



## МУНДАРИЖА

Биринчи бўлим.....	3
Иккинчи бўлим.....	43
Учинчи бўлим.....	78
Тўртинчи бўлим.....	123
Бешинчи бўлим.....	161
Олтинчи бўлим.....	201
Еттинчи бўлим.....	242
Саккизинчи бўлим.....	278

*Адабий-бадиий нашр*

**Жеймс Хедли Чейз**

# **ДАНҒИЛЛАМА ҲОВЛИДАГИ ЎЛИМ**

*Детектив роман*

**Муҳаррир:** Анвар Намозов  
**Бадиий муҳаррир:** Ўткир Тожибоев  
**Техник муҳаррир:** Иномжон Ўсаров  
**Мусахҳих:** Нодира Шомуродова

Нашриёт лицензияси: № А1 255, 31.12.2014.

Теришга берилди: 05.01.2020.

Босишга берилди: 30.01.2020.

Офсет қоғози. Қоғоз бичими: 84x108<sup>1/32</sup>.

Cambria гарнитураси. Офсет босма.

Шартли б.т.: 12,3. Ҳисоб-нашриёт т.: 15,9.

Адади: 5000 нусха.

Буюртма № 60.

«Yangi kitob» нашриётида нашрга тайёрланди.

100138, Тошкент шаҳри Учтепа тумани

Чилонзор даҳаси 13-мавзе 45-уй.

Тел.: (+99891) 132-36-64, (+99890) 992-35-01


e-mail: yangikitob@mail.ru

Ўзбекистон Республикаси Президенти Администрацияси  
хузуридаги Ахборот ва оммавий коммуникациялар  
агентлигининг Ғафур Ғулом номидаги нашриёт-матбаа  
иждодий уйида чоп этилди.

100128, Тошкент шаҳри, Лабзак кўчаси, 86 уй.

35.000c.

-----



## Жеймс Хэдли Чейз

(1906 – 1985) — инглиз ёзувчиси, 90 га яқин детектив романлар муаллифи. Жеймс Л.Догерти, Реймонд Маршалл, Эмброс Грант тахаллуслари билан ҳам ижод қилган. Чейз романлари ханузгача қўлма-қўл бўлиб ўқилади. Кўплаб асарлари экранлаштирилган.

Муаллиф романилари шунинг учун жозибалики, у ўқувчини нихоятда кизиктириб қўяди. Қахрамонлар бир қадар чигал, боши берк кўчага кириб қоладилар. Воқеа-ҳодисалар шиддатли тус олиб, турли-туман муҳитда кечади. Детектив романларга хос саргузаштлар оқимида қахрамонлар ҳаёти талотўпларга гирифтор бўлади.

Чейз жинойт дунёсининг чиркинлигини кўрсатиш орқали қахрамонларнинг ички дунёсини очиб беради. Воқеалар, албатта, саргузаштлар гирдобида кечади. Қўлингиздаги «Данғиллама ҳовлидаги ўлим» романини ўқиб, бунга ўзингиз ҳам амин бўласиз.

16+



YANGI KITOB

ISBN 978-9943-6327-4-5



9 789943 632745